

МИХАИЛ ШОЛОХОВ

АСАРЛАР
ТҮПЛАМИ
САККИЗ ТОМЛИК



ОЧИЛГАН ҚҰРИҚ

ИККИ КИТОБЛИ
РОМАН



«ТОШКЕНТ» БАДИИ ҚАЗАХСТАНЫҢ АДАБИЕТ НАШРИЕТИ – 1965

МИХАИЛ ШОЛОХОВ

АСАРЛАР
ТҮПЛАМИ



ТОМ

ОЧИЛГАН ҚҮРИҚ

РОМАН
ИККИНЧИ КИТОВ



«ТОШКЕНТ» БАДИЙ АДАБИЕТ НАШРИЕТИ — 1965

ВАХОБ РЎЗИМАТОВ
таржимаси

Машҳур совет ёзувчиси Михаил Александрович Шолохов «Очилган қўриқ» романининг иккинчи китобида колхоз тузуми барпо қилинган йилларидағи қишлоқ ҳаётини тасвир қиласди. Давидов, Размётнов ва Нагулынов каби ижобий қаҳрамонлар бутун ҳаётини совет ҳокимиётини мустаҳкамлаш ишига багишлаганлар. Улар ўз ҳузур-ҳаловатларини кўзламайдилар. Янгилик душманларига қарши аёвсиз курашадилар. Романда ажойиб-ғаройиб воқеалар уста санъаткор қўли билан ғоятда ишонарли ва жозибали баён этилади. Шолоховга «Очилган қўриқ» романи учун 1960 йилда Ленин мукофоти берилди.

Шолохов Михаил.

Асарлар тўплами. 8 томлик. Т. 7. Т.,
«Тошкент» бадиий адабиёт нашриёти. 1965.

Т. 7. Очилган қўриқ. Роман. Иккинчи китоб.
452 бет. Тиражи 15000.

Шолохов Михаил. Собрание сочинений. Т. 7.

I БОБ

Ер ёмғир намидан кўпчир, шамол булутларни тўзитганда эса чарақлаган офтобдан баҳра олар, ундан кўкиш буғ ўрлар эди. Эрталаблари анҳордан, сизотли, ботқоқ пастликлардан туман кўтарилади. Туман паға-паға бўлиб Гремячий Логдан ошиб ўтарди-да, даштдаги тепаликлар томон еларди, у ерда майин фируза ҳовур ичида йўқолиб, сингиб кетарди, дараҳтларнинг баргларида, уйлар ва омборларнинг қамиш томларида, ҳамма ерда ўтли питрадек сочилиб ётган, қўрғошиндек вазмин қалин шудринг ўт-ўланларни ерга эгганча тушга қадар ётарди.

Даштда ажриқ тиззага уриб қолди. Ялангликнинг нарёғида жумрушқа гуллади. Унинг бол тотли ҳиди кечга яқин хутор бўйлаб таралиб, қизларнинг зиқ кўнгилларини орзиқтиради. Уфқа туташиб кетган кузги буғдой кўм-кўк кўрпадек бўлиб турар, бехато униб чиқсан лалми кўзни қувонтиради. Қумлоқ ерларда найча бўлиб униб чиқсан маккажўхорилар диккайиб турарди.

Июннинг биринчи ярми охиригача об-ҳаво айнимади, осмонда булутдан асар кўринмади, ёмғир ювган дашт қуёшда қулф уриб яшнади! У ҳозир худди эмизики ёш онага ўхшар, кўркам, сокин, бир оз ҳоргин, борлиги билан оналикнинг гўзал, баҳтиёр ва соф табассумидан яйраб-яшнаган эди.

Ҳар куни эрталаб ҳали қуёш чиқмасидан Яков Лукич Островнов эскирган брезент плашини кифтига ташлаб, экинларни томоша қилгани хотор ташқарисига чиқарди. У шудринг қатралари жимиirlаётган кўмкўк кузги буғдой эгатида узоқ туриб қоларди. Ҳорғин қари отдек бошини қўйи солиб, тек турганча ўйларди: «Тўлишадиган вақтида «қалмоқ»* эсиб қолмаса, буғдой гармселга дучор бўлмаса, худонинг қаҳрига йўлиққур колхоз ғаллага ёлчиб қолади! Лаънати совет ҳокимиятининг хўп омади келган-да! Шунча йил якка хўжалик бўлганимизда керагида ёғмаган ёмғир, бу йил шаррос қўйиб берди! Ҳосил бўлиб бериб, колхозчиларга дунё-дунё даромад тегиб қолса борми, унда уларни совет ҳокимиятига қарши қайрай олармидинг? Ҳеч-да! Оч одам — бамисоли ўрмондаги бўри, хоҳлаган кўйингга соласан; тўқ одам — охури тўла чўчқа, ўрнидан қимирлатолмайсан. Бу жаноб Половцев нимани ўйлайпти эканлар, нимани кутялти эканлар, гарангман! Ҳозир айни совет ҳокимиятининг илдизига болта урадиган пайт, у киши бўлсалар бекор ётибдилар...»

Половцев ваъда қилган тўйнаришни кута-кута тинкаси қуриган Яков Лукич, албаттa, алам устидагина шундай деб ўйларди. У Половцевнинг мутлақо бекор ётмаганини, ниманидир умид билан кутаётганини жуда яхши биларди. Тепаликдан Островновнинг боғига келиб тақалган жарликдан ўтиб деярли ҳар куни кечаси узоқ хоторлардан ва ёт станицалардан чопарлар келишарди. Афтидан, улар отларини жар ёқасидаги дарахтзорда қолдириб, ўзлари яёв келишса керак. Уларнинг шартли тақиллатишини эшишиб, эшикни Яков Лукич очар, чироқ ёқмасдан Половцевнинг ҳужрасига кузатиб қўяр эди. Ҳужранинг икки деразали дарчаси куни туни берк турар, ичкарисидан эса кул ранг жундан босилган қалин намат тутиб қўйилган эди. У ер ҳатто қуёш чарақлаб турган кунда ҳам ертўладагидек қоп-қоронғи, ундан худди ертўладагидек мөгор, нам ҳиди, аҳён-аҳёнда шамоллатиладиган бинога хос сассиқ, бадбўй ҳаво ҳиди келар эди. Кундузи

* Қалмоқ — шарқи-жанубий шамол.

на Половцев, на Ляньевский ташқарига чиқар, ихтиёрий бандиларга туваклик вазифасини тахтаси кўчирилган пол остидаги рух челяк бажарар эди.

Кечалари ўғринча келадиганларнинг ҳар бирини Яков Лукич даҳлизда гугурт чақиб наридан-бери кўздан кечирав, аммо бирон марта ҳам таниш башара учратмаган, уларнинг ҳаммаси бегона, афтидан, узоқдан келган одамлар эди. Бир куни Яков Лукич алоқачиларнинг биридан журъат қилиб оҳиста сўради:

— Қаёқдан бўласан, ҳамқишлоқ?

Липиллаб ёнаётган гугурт шуъласи бошлиқ кийган ўрта ёшлардаги казакнинг очиққина туюлган серсоқол юзини ёритди, Яков Лукич унинг сал қисилган кўзларини, илжайишдан ярқираган тишининг оқини кўрди.

— Нариги дунёдан, ҳамқишлоқ!— оҳиста шивирлаб жавоб берди келган одам. Кейин амр билан қўшимча қилди:— Кўп суриштирмай, ўзларининг олдиларига олиб кир!

Икки кундан кейин тағин ўша серсоқол казак билан яна бир ёшроғи келди. Улар даҳлизга оғир бир нарсани олиб киришди, аммо овоз чиқармай оҳиста қадам босишарди. Яков Лукич гугурт чақиб, серсоқолнинг қўлида иккита офицерча эгар, елкасида кумуш нақши юғанлар кўрди: иккинчиси кифтида қора жулдур буркага ўралган узун ва бесўнақай бир нарсани кўтариб турарди.

Серсоқол казак Яков Лукичга эски танишлардек имо қилиб, сўради:

— Бормилар? Икковлари ҳамми?— кейин жавобни ҳам кутмасдан ҳужрага қараб кетди.

Гугурт Яков Лукичнинг бармоқларини куйдириб, ёниб бўлмоқда эди. Серсоқол қоронгида нимагадир қоқилиб кетди, паст овоз билан сўкинди.

— Шошма, мен ҳозир,— деди Яков Лукич қовушмаётган бармоқлари билан қутичадан гугурт олаётib.

Половцевнинг ўзи эшик очиб, оҳиста гапирди:

— Киринглар. Қирсанглар-чи, мунча имиллайсизлар? Сен ҳам кир, Яков Лукич, ишим бор. Секинроқ, ҳозир чироқ ёқаман.

У «кўршапалак» фонарни ёқди, лекин энсизгина тирқиши қолдириб уни куртка билан пана қилди, тирқишидан охра билан бўялган пол тахтасига қия шуъла тушиб турарди.

Келганлар эҳтиром билан саломлашиб, олиб келган нарсаларини эшик олдига қўйиши. Серсоқол олдинга икки қадам ташлаб, пошналарини уриштириди-да, қўйнидан пакет олиб узатди. Половцев конвертни очиб, уни фонарга яқинроқ олиб бориб наридан-бери ўқиди-да, деди:

— Седойга раҳмат айтинг. Жавоб ёзмайман. Ундан ўн иккинчигача хабар кутаман. Кетаверишлари нгиз мумкин. Етгунларингча тонг отиб қолмасмикан?

— Йўқ, жадаллаб етиб оламиз. Отларимиз яхши,— деб жавоб берди серсоқол.

— Хўп, боринглар. Хизматларинг учун ташаккур.— Қуллуқ!

Икковлари ҳам баравар бурилиб, пошналарини уриштириши-да, чиқиб кетиши. Яков Лукич қойил қолиб ўйлади: «Ана машқини олганлар! Ҳарбий хизматда эскича таълим олишган, ҳаракатларидан кўриниб турибди!.. Лекин улар буни нега ҳеч нима деб аташмаяпти экан?..»

Половцев унинг олдига келиб, вазмин қўлини кифтига қўйди. Яков Лукич бехосдан ўзини йиғишириб, қоматини ростлади-да, қўлларини икки ёнига чўзди.

— Кўрдингми лочинларни?— Половцев оҳиста кулиб қўйди.— Булар панд беришмайди. Булар ўтга бошласам ҳам, сувга бошласам ҳам кетаверишади, булар Войсковой хуторидаги баъзи абраҳлар билан мижғовларга ўхшаган эмас. Қани, кўрайлик-чи, бизга нима олиб келишибди экан...

Половцев бир тиззаси билан чўккалаб, бурка устидан чандиб танғилган оқ хом қайишни чаққон ечди-да, уни очиб бўлак-бўлак қилинган қўл пулемёти қисмларини, ёғли жулга ўралган, хира йилтираб турган тўртта дискни олди. Кейин эҳтиёт билан иккита қилич олди. Улардан бири қирилиб, тўзиган қинга солинган казакча оддий қилич, иккинчиси эса — вазмин кумуш бандига қорайиб қолган георгийча тасма тақилган,

қинига қора нақшли кумуш қопланган, кавказча қора португияли офицерча қилич эди.

Энди иккала тиззаси билан чўккалаган Половцев қўлларини чўзиб қилични кафтларида ушлаб тураг, кумушларнинг хира жилосини томоша қилаётгандек бошини орқасига ташлаган эди, сўнг уни бағрига бошиб, қалтираган овоз билан гапирди:

— Жоним, жонгинам! Қадрдон вафодорим! Сен ҳали менга имон-ишонч билан хизмат қиласан!

Унинг пастки япалоқ жағига титроқ кирди, кўзларида қаҳр ва завқ ёшлари қайнади, аммо у ўзини бир амаллаб босиб олиб, оқариб, буришиб кетган юзини Яков Лукичга ўғирди-да, жарангдор овоз билан сўради:

— Буни танияпсанми, Лукич?..

Яков Лукич энтикиб ютинаркан, индамай бош силкиди: у қилични таниди, уни дастлаб минг тўққиз юз ўн бешинчи йили Австрия фронтида ёш ва азamat хорунжий Половцевда кўрган эди...

Каравотда индамай беларво ётган Лятьевский ўрнидан турди, яланг оёқларини осилтириб, бўғинларини қирсиллатиб керишди, якка кўзи тундлик билан чақнади.

— Таъсири учрашув!— деди у хирқираб.— Исёнворий фарофат. Расво дид билан суфорилган бунаقا чучмал манзараларни ёмон кўраман!

— Қўйсангиз-чи!— деди кескин Половцев.

Лятьевский елкасини қисди.

— Нима учун қўйишим керак экан? Нимани қўйишим керак экан?

— Қўйсангиз-чи, илтимос қиламан!— деди Половцев оҳистагина, оёққа туриб, каравот томонга худди биқиниб бораётган кишидек аста-секин қадам ташларкан.

Унинг қалтираётган чап қўлида қилич, ўнг қўли билан эса кул ранг толстовкасининг ёқасини юлқимоқда эди. Яков Лукич Половцевнинг кўзи ғазабдан қаншарига қараб шиграйиб қолганини, салқи юзининг толстовкаси тусига кирганини кўриб ваҳми келди.

Лятьевский бамайлихотир ва ошиқмай каравотга ҷўзилди-да, қўлларини боши остига олди,

— Театрона ҳаракат! — деди у илжайиб, ёлғиз кўзи билан шифтга тикиларкан.— Мен буларни бир эмас, бир неча марта расво провинциал театрларда кўрганман. Жуда жонимга гегди!

Половцев ундан икки қадам берида тўхтади, ҳорғин ҳаракат билан қўлини кўтариб, пешонасидағи майдада терни артди; сўнгра бўшашган қўли шилқ этиб пастга тушди.

— Асабим... — деди минғиллаб ва шол бўлгандек дудуқланиб, илжайишга уриниб узун титроқ башарасини бир томонга тортиб тириштириди.

— Бу гапни ҳам жуда кўп эшитганман. Занчалишлик қиласкермасангиз-чи, Половцев! Узингизни қўлга олинг.

— Асабим... — минғиллади Половцев.— Асабим қақшаяпти... Менинг ҳам жонимга тегди, бу зулмат, бу қабр...

— Зулмат — донишмандларнинг ҳамдами. У ҳаёт ҳақида фалсафий мулоҳазалар юритишга ёрдам беради, асаб қақшаш деган нарса аслида эрсираган бўжамали қизлару ичидагап ётмаслик билан бош оғриқ дардига гирифтор хонимларда бўлади. Асаб қақшаш — офицер учун исноду шармандалик! Сиз риёкорлик қиляпсиз, холос. Половцев, ҳеч асабингиз қақшаштагани йўқ, балонинг ўқидексиз! Сизга ишонмайман! Чин офицерлик сўзим, ишонмайман!

— Сиз офицер эмас, ҳайвонсиз!

— Сиздан буни ҳам жуда кўп эшитганман, лекин сизни бари бир дуэлга чақирмайман, жин урсин сизни! Оёқдан қолган, бемаврид гап, бундан кўра заруроқ ишлар бор. Бундан ташқари, ўзингизга маълумки, муҳтарам зот, сиз намунасини меҳру иштиёқ билан кўқсингизга босган полиция темиртаклари билан эмас, шамшир билан олишадилар. Эски тўпчи сифатида қуруқ савлатнинг бу туридан нафраланаман. Сизни дуэлга чақиришимга қарши бўлган яна бир далил бор: сиз зоти пастсиз, мен бўлсан — энг қадими фамилиялардан бирига мансуб бўлган поляк дворяниман, яъни...

— Менга қара... шляхтич! — дағаллик билан унинг сўзини бўлди Половцев, овозида бирдан яна одатдаги

қатъият ва жарангдор оҳанг пайдо бўлди.— Георгий-ча қуролни таҳқирламоқчимисан? Яна бир нима десанг, итдек чопиб ташлайман!

Лятьевский каравотда туриб ўтирди. Унинг лабларида яқингинадаги кинояли илжайишдан асар ҳам қолмаган эди. У жиддийлик билан соддагина деди:

— Аммо бунга ишонаман! Овозингиз самимий ва холис ниятингиздан дарак бериб турибди, шунинг учун ҳам унимни ўчираман.

У яна ётиб, эскигина пахмоқ одеялни энгагигача тортди.

— Мен сени бари бир ўлдираман,— ўжарлик билан таъкидлади Половцев, каравот олдида бошини буқадек энгаштириб тураркан.— Бир нафар акобир зот ҳайвонни худди мана шу қилич билан бирданига иккита қилиб қўяман — биласамни қачон? Донда совет ҳокимиятини ағдариб ташлаган заҳотимиз!

— Бе, унда бемалол ёшимни яшаб оларканман, умрим боқий бўлса ҳам ажаб эмас,— деди заҳарханда билан Лятьевский ва қўпол сўкиниб, деворга ўгирилиб олди.

Эшик олдидаги Яков Лукич гўё чўғ устида турган-дек оғирлигини оёғидан оёғига соларди. У бир неча марта ҳужрадан чиқиб кетмоқчи бўлди-ю, аммо Половцев қўлининг имоси билан уни тўхтатди. Ниҳоят у сабри чидамай, илтижо қилди:

— Мен чиқиб кетсан, менга рухсат берсангиз, жаноби олийлари! Ҳадемай тонг отади, мен барваҳт далаға чиқишим керак...

Половцев стулга ўтирди, қиличини тиззасига қўйиб, унга қўлларини тиради-да, энгашганча узоқ жим қолди. Унинг пишқирганча оғир нафас олаётгани билан столдаги каттакон чўнтақ соатининг чиқиллаётганигина эшитиларди. Яков Лукич Половцевни, мудраяпти, деб ўйлаган эди, аммо вазмин, қурч гавдали Половцев шахт билан ўрнидан турди-да, деди:

— Эгарларни ол, Лукич, қолганларини мен оламан. Юр, буларнинг ҳаммасини ишончлироқ, қуруқроқ жойга яшириб қўяйлик. Чунончи... ҳалиги, нима эди... э, жин ургур... тезак тахланганга яширсакмикан, а?

— Муносиб жой, юринг,— жон-дили билан рози бўлди, ҳужрадан чиқиб кетишнинг эвини қилолмай турган Яков Лукич.

У эгарлардан бирини олган ҳам эдики, шу орада каравотдан жон ҳолатда сапчиб тушган Лятьевский, кўзини ғазаб билан чақнатиб, ўшқирди:

— Нима қиляпсиз ўзи? Мен сиздан сўраяпман: нималар қиляпсиз?

Бурка устида энгалиб турган Половцев, қаддини ростлаб, совуққина сўради:

— Хўш, нима эди? Сизни бунчалик ҳовлиқтирган нима?

— Шуни ҳам тушунмайсизми? Ҳушингизга ёқса эгарлар билан мана бу темир-терсакларни яширингү, лекин пулемёт билан дискларни қолдиринг! Сиз биродарингизнинг чорвоғида яшаётганингиз йўқ, пулемёт бизга ҳар дақиқада асқатиши мумкин. Умид қиласманки, буни тушунсангиз керак?

Қисқагина ўй сургандаш сўнг Половцев унинг фикрига қўшилди:

— Гапингизда жон борга ўхшайди. Радзивилл ҳаромиси. Унда ҳаммаси қола қолсин. Бор, Лукич, ётавер, сенга рухсат.

Эски ҳарбий интизом нақадар суюк-суюғига сингиб кетган экан! Яков Лукич ўйлаб ҳам улгурмасдан, яланг оёқлари бехосдан «чапдан, орқага» айланиб, қадоқ товоnlари бир-бирига эшитилар-эшитилмас урилиб кетди. Буни пайқаган Половцев илжайиб қўйди. Яков Лукич эса орқасидан эшикни ёпгачгина, ножӯя иш қилиб қўйганини фаҳмлаб, хижолатдан қизарип кетди-да: «Жин урган серсоқол ўзининг ҳарбий интизоми билан ҳушимни оғдирибди!» деб ўйлади.

У тонг отгунча мижжа қоқмади. Исённинг муваффақият қозониши ҳақидаги умидлари ўрнини унинг барбод бўлиши мумкинлиги ҳақидаги хавотирлар, Половцев билан Лятьевскийга ўхшаган пиҳини ёрган одамлар билан тақдирини боғлаб, ниҳоятда пала-партиш иш тутганидан қилган пушаймонлари, вақти ўтган пушаймонлари эгаллади. «Эҳ, шошқалоқлик қилдим, балога гирифтор бўлдим!— ўқинч билан хаёл сурарди Яков Лукич.— Мен қариган аҳмоқ бир чек-

када пайт пойлаб тура қолсам, Александр Анисимовичга кўнглимдагини айтмай турсам бўларкан. Улар коммунистлардан устун чиқишганда — ўшанда уларга дарров қўшилиб, тайёрга айёр бўла қолсам бўларкан, бўлмаса — улар мени расвойи жаҳон қилиб, адойи тамом қилишлари турган гап... Лекин бир ҳисобда: борди-ю, мен ҳам, яна бошқа бирор ҳам, ҳаммамиз ўзимизни четга олаверсак унда нима бўлади? Ўла-ўлгунча совет ҳокимиютини ортмоқлаб ўтиб кетамизми? Буниси ҳам ярамайди! У ўзи яхшиликча елкамиздан тушмайди, сира ҳам тушмайди! Тезроқ бир ёқлик бўла қолса эди. Александр Анисимович, чет элдан десант келади, кубанликлар мадад беришади, деб ваъда қиляпти-ю, ваъдага қўйнимизни тўлдирипти-ю, охири бурнимиздан чиқмасмикан? Яна худонинг ўзи билади-да! Борди-ю, иттифоқчилар бизнинг еримизга десант туширишга кўнмай, оёқ тираб туриб олса-чи, унда нима бўлади? Худди ўн тўққизинчи йилдагидек инглиз шинелларини юбориб, ўзлари уйларида хотинлари билан айш-ишратда қаҳваҳурлик қилиб ётишса,— унда уларнинг шинеллари билан нима иш битирамиз? Шинелларнинг этаги билан бурнимиздан тирқираган қонни артишдан бошқа иложимиз қолмайди. Большевиклар бизнинг абжағимизни чиқаришади, худо ҳақи, абжағимизни чиқаришади! Улар бу ишга чечан бўлиб кетишган. Унда уларга қарши бош кўтарган ҳаммамиз барбод бўламиз. Дон тупроғи ўртаниб кетади!»

Бу фикрлардан Яков Лукични қайғу босиб, ўпкаси тўлгудек бўлиб ўзига ачиниб кетди. У узоқ инқиллаб-синқиллаб, шивирлаганча дуо ўқиб чўқинди, кейин эса илашқоқ хаёллари яна кундалик гапларга келиб тақалди: «Александр Анисимович нега бу кўр поляк билан ҳеч чиқишимас эканлар? Улар нега нуқул юлқи-лашавераркан? Олдимизда шундай катта иш турибди-ю, улар бўлса бир катакдаги иккита қопогон теватга ўхшаб чиқишишмайди. Аксари мана бу бир кўзлиги ёпишиб қолади, чакаги тинмай гоҳ ундей дейди, гоҳ бундай. Ярамас одам, менинг унга ҳеч ишонгим йўқ. «Сўқирга, букурга, хотинингга ишона кўрма» деган мақол бежиз эмас экан. Александр Анисимо-

вич уни ўлдириб қўяди, ҳудо ҳақи ўлдариб қўяди!
Ўлса ўлар, файри дин-ку.

Ниҳоят Яков Лукич шу таскин берувчи хаёллар билан озгина мизғиди-ю, лекин уйқусида ҳаловат бўлмади.

II БОБ

Яков Лукич қуёш чиққанда уйғонди. У бир соатнинг ичида бир-биридан тутуриқсиз ва бемаза бир қанча туш кўрган эди.

Бир туш кўрса, ёш йигитмишу, ясанган-тусанган, уст-боши куёвлардек башанг ҳолда черковдаги лавҳ олдида турганмиш, ёнида эса — ҳудди булут чулғагандек ҳарирга ўранган, узун келин кўйлагидаги Лятьевский оёгини ўйнатиб, кулиб турган беқарор кўзини ундан олмасмиш, нуқул беҳаёлик билан ғашига тегиб кўз қисармиш. Яков Лукич унга: «Вацлав Августович, сен билан икковимиз никоҳланишимиз ярамайди: сен нимжон бўлсанг ҳам ҳар қалай эркаксан. Шу ҳам иш бўлдими? Қолаверса, мен уйланган бўлсам. Кел, шу гапларнинг ҳаммасини попга айтайлик, тағин икковимизнинг бошимизни қовуштириб қўйиб, эл-юрга шарманда қилмасин!» дермиш. Лятьевский эса совуқ қўли билан Яков Лукичнинг қўлини олармиш-да, унга энгашиб хуфия пи chirлармиш: «Уйланганлигингни ҳеч кимга айтма! Мен сенга шундай хотин бўлайки, жонгинам Яша, оғзинг очилиб қолсин!»—«Жин урсин сени, аҳмоқ кўр!»—дея қичқирмоқчи бўлиб Яков Лукич қўлини Лятьевскийнинг қўлидан тортиб олмоқчи бўлармиш, аммо бунга муваффақ бўлолмасмиш, Лятьевскийнинг бармоқлари совуқ, пўлатдек мустаҳкам эмиш, Яков Лукичнинг овози ғалати унсиз, лаблари эса ҳудди пахтадан ясаб қўйғандек эмиш. Яков Лукич қаҳри келиб туфурди-да, уйғониб кетади. Соқоли билан ёстиқда ёпиш-коқ сўлак...

Чўқиниб, «алҳазар, алҳазар» дея шивирлашга улгурмасдан яна туш кўрса, у ўғли Семён, Агафон Дубцов ва бошқа ҳамқишлоқлари билан аллақандай кат-

такон плантацияда айланиб юрганмиш, оқ либос кийган нозира жувонларнинг қўл остида помидор узишаётган эмиш. Яков Лукичнинг ўзи ҳам, атрофидаги ҳамма казаклар ҳам нима учундир яланғоч эмиш, аммо ундан бошқа ҳеч ким яланғочлигидан ор қилмасмиш. Дубцов унга орқасини ўғирганча помидор тупига энгашармиш, кулгиси қистаб ғазабдан бўғилган Яков Лукич: «Бунчалик паст энгашмасангчи, чўтирип ахта! Ақалли хотин-халаждан уялсанг-чи!» дермиш.

Яков Лукичнинг ўзи эса помидорларни хижолат билан чўнқайиб ўтирганча ўнг қўлидагина терармиш, чап қўлинини эса чўмилувчилар сувга тушаётганларида қандай пана қилсалар, шундай пана қилиб турармиш...

Яков Лукич уйғонгач, ваҳима босган бежо кўзларини бақрайтирганча каравотда узоқ ўтириди. «Бунака расво тушлар яхшиликка кўринмайди. Бир бало бўлади!»— деган фикрга келди у, дилини оғир қайғу босди, яқиндагина кўрган тушларини эслашнинг ўзиёқ жиркантиради.

У таъби тириқ бўлганча кийинди, эркаланиб келиб суйкалган мушукка озор берди, ионушта вақтида эса хотинини бекордан-бекорга «аҳмоқ» деб юборди, дастурхон устида хўжалик тўғрисидаги гапга ноўрин аралашган келинидек кап-кatta хотинга қизалоқقا ўқталгандек қошиқ ўқталди. Отасининг бачканалиги Семённинг кулгисини қистатди: у қўрққан бўлиб башарасини аҳмоқона буриштириб, хотинига имо қилди, хотини бўлса овозини чиқармай қотиб-қотиб кулди. Бундан Яков Лукичнинг тоқати тоқ бўлиб кетди: қошиқни столга улоқтириб, ғазабдан титраётган овоз билан қичқирди:

— Ҳиринглајапсанлар, ҳадемай қон йиғласанглар керак!

У чала ионушта қилганча, намойишкорона ра-вишда столдан туриб кетаётган эди, худди аксига олгандек кафти билан товоқнинг четини босиб олди, сарқит карам шўрва шимига тўкилиб кетди. Келини юзини қўллари билан бекитганча, йўлакка қараб отилди. Столда бошини қўлларига қўйганча Семён

қолди, кулгидан гўштдор елкаси титрар ва қурч кураклари лопиллар эди. Ҳатто Яков Лукичнинг ҳамиша сипо хотини ҳам ўзини кулгидан тийиб туролмади.

— Бугун сенга нима бўлди, отаси?— кула-кула сўради у.— Чап ёнбошинг билан турдингми ёки ёмон туш кўриб чиқдингми?

— Сен қаёқдан биласан, қари алвости?!— тоқати тоқ бўлиб қичқирди Яков Лукич ва шошилганча ўрнидан туриб кетди.

Ошхона остонасида эшик кесакисидан чиқиб турган михга илиниб қолиб, янги сатин кўйлагининг енгини тирсагигача йиртиб юборди. Ўз хонасига қайтиб кириб, сандиқдан бошқа кўйлак қидира бошлади, шу вақт деворга омонат суюб қўйилган сандиқ қопқоғи тарақлаганча яғринига тушиб кетди.

— Минг лаънат сенга! Бугун менга бир бало бўлди ўзи!— алам билан хитоб қилди Яков Лукич, маҗолсизланиб табуреткага ўтириб, яғринида пайдо бўлган каттакон ғуррани эҳтиёт билан пайпасларкан.

У наридан-бери кийинди, карам шўрва тўкилган шими билан йиртилган кўйлагини алмаштириди, аммо шошиб, ҳовлиқиб турганидан шимишинг тугмасини қадашни унудди. Шу туриш-турмушида Яков Лукич колхоз правлениесигача борди, тўқнаш келган хотинларнинг саломлашишлари билан аллақандай маъноли кулиб шоша-пиша юзларини четга буриб олишларидан ўзича таажжубланарди... Унинг таажжубига қаршисидан пилдираб келаётган Шчукарь бобо очиқ-часига хотима бериб қўя қолди.

— Қарияпсан-а, ўргилай, Яков Лукич?— ачинган намо сўради у тўхтаб.

— Нима, сен яшаряпсанми? Ҳеч яшараётганга ўҳшамайсан! Кўзинг худди товушқоннинг кўзидек қип-қизарип, шапоқ босибди.

— Кўзимнинг шапоқ босгани кечалари китобхонлик қилганимдан. Қариган чофимда китобхонлик қилиб, ҳар хил олий маълумотлар оляпман, аммо у ёқ-бу ёғимга қараб юраман, сен бўлсанг чолларга ўҳшаб паришонхотир бўлиб қолибсан...

— Нима қилиб паришонхотир бўлиб қолибман?

— Кўча эшигингни бекита чиқмабсан, молинг чуваб кетади...

— Семён бекитиб қўяр,— деди фаромушлик билан Яков Лукич.

— Сенинг эшигингни Семён бекитмайди...

Фаҳмлаб қолиб алланечук бўлиб кетган Яков Лукич пастга қараб ҳуши учди-да, бармоқларини чаққонлик билан ишга солди. Бу наҳс тонгда устига ёғилган ҳамма офат ва бахтсизликларнинг устига-устак Яков Лукич правление ҳовлисида кимдир тушириб қолдирган картошкани босиб олиб, эзиз юборди-да, сирғаниб кетиб, бор бўйи билан йиқилиб тушди.

Йўқ, буниси жуда ҳам ошиб тушди, буларнинг ҳаммаси бежиз содир бўлаётгани йўқ! Иримчи Яков Лукич уни қандайдир каттакон бахтсизлик кутаётганига қаттиқ ишонар эди. У ранги ўчган, лаблари қалтираганча Давидовнинг хонасига кириб борди-да, деди:

— Тобим қочиб қолди, ўртоқ Давидов, бугун ишдан жавоб берсангиз. Үрнимга омборчи ишлаб турар.

— Мазанг йўқроқ кўринасан, Лукич,— ачиниб жавоб берди Давидов.— Бориб дамингни ол. Фельдшерга ўзинг кирасанми ёки уйингга юборайликми?

Яков Лукич умидсизлик билан қўл силтади:

— Фельдшер жонимга ора киролмайди, бир оз ётсам ўзимга келиб қоларман.

У уйда дарчаларни ёптириб ечинди-да каравотга чўзилганча қаердадир йўртиб келаётган офатни сабр билан кута бошлади... «Ҳаммаси шу лаънати ҳокимиятдан!— фикран нолирди у.— Ундан на кундузи-ю, на кечаси ҳаловат бор! Кечалари билан эски замонда умрим бино бўлиб кўрмаган аҳмоқона тушларни кўриб чиқаман, кундузи бўлса, фалокат кетидан фалокат ясов тортиб келгани-келган. Бу ҳокимият замонида умрим эрта кунда ҳазон бўладиганга ўхшайди! Ажалимдан беш кун бурун ўладиганга ўхшайман!»

Бироқ Яков Лукичнинг ташвишли хавотирлари шу куни беҳуда бўлиб чиқди: офат қаердадир тутилиб қолиб, унинг бошига икки кундан кейингина, мутлақо кутмаган томонидан келди...

Яков Лукич ётар олдида юрагига далда бериш учун бир стакан ароқ ичиб олди, туни билан туш кўрмай, миқ этмай ухлади, эрталаб тетик бўлиб уйғонди, қувонч билан: «Хайрият!» деб қўйди. Кунни иш билан овора бўлиб ўтказди, эртасига якшанба куни кечки овқат олдидан хотинининг нимадандир ташвишланаётганини пайқаб сўради:

— Назаримда паришонроқ кўринасан, снаси? Ё сигиринг оғриб қолдими? Кеча менга ҳам подадан хомушроқ қайтгандай туюлган эди.

Хотини ўғлига қаради:

— Сёма, бирпас чиқиб тур, отанг билан гаплашадиган гапим бор.

Ойна олдида сочини тараётган Семён норозилик билан тўнфиллади:

— Нима бало, ҳаммаларинг сирлашадиган бўлиб кетдинглар? Меҳмонхонада — отамнинг бошимизга дардисар бўлган дўстлари эрта-ю кеч шивирлашишади, бу ерда бўлса — сизлар... Ҳадемай сизларнинг сир-асрорларингиздан уйда кўз ҳам очолмай қоламиш шекилли. Уй эмас, бамисоли аёллар монастири: ҳамма ёқда шивир-шивир, пичир-пичир...

— Ҳой, бунинг сенга ташвиши тушмай қўя қолсин, гўсала! — қизишиб кетди Яков Лукич. — Сенга бирор — чиқ дедими, чиқиб тур! Жуда ҳам гапдон бўлиб кетибсан... Менга қара, тилингни тий, бўлмаса тийиб қўйишим ҳеч гап эмас!

Семён қизариб кетиб, отасига ўгирилди-да, бўғиқ овоз билан деди:

— Сиз ҳам пўписани камроқ қилинг, дадажон! Оиламизда қўрқоқлар билан гўдаклар йўқ. Бир-бirimizga пўписа қилишга тушсақ, ҳаммамиз ҳам расво бўлиб ўгирмайлик...

У эшикни қаттиқ ёниб чиқиб кетди.

— Мана, ўғилгинангни томоша қилиб қўй! Итваччанинг ботирлигини қара-я! — аччиқланиб хитоб қилди Яков Лукич.

Ҳеч вақт гап талашмайдиган хотини босифи билан шундай деди:

— Бир ҳисобда ўйлаб кўрсак, Лукич, сенинг бу текинтомоқ меҳмонларинг бизни ҳам хуноб қилиб

юборди. Буларни деб хавотирда яшаймиз, тинкалариймизга тегиб кетди! Ҳали замон хутор катталари уйимизни тинтиб қолса борми, адойи тамом бўламиз! Турмушимиз турмуш эмас, қора безгак, шитир этган, тиқ этган шарпадан титраймиз. Худовандо бу кунни ҳеч кимнинг бошига сола кўрмасин ҳам, кўрсатмасин ҳам! Сени ҳам, Сёмушкани ҳам ўйлай-ўйлай юракларим эзилиб кетди. Бу истиқоматчиларимизни билиб қолишича борми, уларни ҳам қамашади, сизларни ҳам қўшиб олиб кетишади. Унда биз хотинларнинг ҳолимиз нима кечади? Тўрва осиб гадойчилик қиласмиزمис?

— Бас!— унинг гапини бўлди Яков Лукич.— Сёмка икковларинг айтмасаларинг ҳам нима иш қилаётганлигимни ўзим биламан. Сен нима демоқчи эдинг? Айт!

У иккала эшикни ҳам зичлаб ёпиб, хотинига яқин келиб ўтирди. Аввалига унинг гапларига қулоқ солиб, кўнглидаги ташвишини зоҳирان сездирмади, ниҳоят ўзини босолмай скамейкадан сапчиб турди-да, ошхона бўйлаб зир юргурганча беихтиёр шивирлай бошлиди:

— Тамом бўлдик! Туққан онам хароб қилди! Жонимга жабр қилди!

Бир оз тинчлангач, каттакон кружкада устма-уст икки марта сув ичди-да, оғир ўйга толиб, скамейкага ўтирди.

— Энди нима қиласан, отаси?

Яков Лукич хотинининг саволига жавоб бермади. У саволни эшитмаган эди...

Хотинининг гапига қараганда, яқинда тўртта кампир келиб, бизни жаноби офицерларнинг олдига олиб кирасан, деб туриб олишибди. Кампирлар сабрсизлик билан, офицерларнинг ўзларига бошпана берган Яков Лукич ва Гремячийдаги бошқа казакларнинг ёрдамида қачон қўзғолон бошлаб, бетавфиқ совет ҳокимиятини ағдариб ташляжакларини билмоқчи бўлишибди. Яков Лукичнинг хотини, уйимизда ҳеч қандай офицерлар йўқ, бўлган ҳам эмас, деб ишонтиришга уриниб, ҳеч ишонтиролмабди. Бунга жавобан букур ва заҳар кампир Лошчилина унга ғазаб билан:

«Мени лақиллатишга ёшлик қиласан, ўргилай! Бизга ўз қайнананг, офицерлар қишидан бери меҳмонхонамизда ётишибди, деди-ку. Уларнинг одамлардан хуфия туришини биламиз, ахир биз уларни ҳеч кимга айтмаймиз-ку. Бизни Александр Анисимич деган катасининг олдига олиб кир!» дебди.

...Половцевнинг олдига кирап экан, Яков Лукични яна ўша ғулғула чулғади. У, Половцев содир бўлган воқеани эшитиши билан қутуриб дўппослайди, деб ўйлаган, шунинг учун муте итлардек титраб-қақшаб жазо берилишини кутар эди. У ҳаяжондан тутила-тутила, лекин ҳеч нарсани яшириб қолмай хотинидан эшитган ғапларнинг ҳаммасини пойма-пой айтиб бергач, Половцев кулиб қўя қолди:

— Конспираторлигимиз чакки эмас... Ҳа, шундай бўлиши мумкин эди. Ойинг бизни доғда қолдирибдида, Лукич? Нима дейсан, энди нима қилсак экан?

— Меникидан кетишларингиз керак, Александр Анисимович!— деди кескин, унинг муомаласидан дадиллашган Яков Лукич.

— Қачон?

— Қанча тез бўлса шунча яхши. Хаёл суриб ўтиргани вақт зиқ.

— Сен айтмасанг ҳам биламан. Аммо қаёққа?

— Билмадим. Қаёқдалар ўртоқ... Кечирасиз-да, энди гапимдан адашганим учун! Жаноби Вацлав Августович қаёқдалар?

— У йўқ. Кечаси келади, сен уни эртага боғнинг олдидаги кутиб оласан. Атаманчуков ҳам хоторнинг чеккасида турадими? Бир неча кун ўша ерда тура турман. Мени олиб бор!

Улар пуса-пуса етиб олишди, ажралишларидан олдин Половцев Яков Лукичга шундай деди:

— Хўп, яхши бор, Лукич! Сен онанг важини ўйлаб кўр, Лукич... У бутун ишимизни барбод қилиб қўйиши мумкин... Сен шу тўғрида ўйлаб кўр... Лятьевскийни кутиб олиб, менинг қаердалигимни айт.

У Яков Лукични қучоқлаб, унинг соқол олинмаган дағал юзига қуруқ лабларини тегизди-да, сўнг узоқлашиб уйнинг анчадан бери сувалмаган деворига сингиб кетгандек ғойиб бўлди...

Яков Лукич уйига қайтиб келиб ўрнига ётди ва хотинини одатдан ташқари шиддат билан девор томонга сурис, деди:

— Менга қара... Сен энди онамга овқат берма... сув ҳам берма. Бари бир эрта-индин ўлади...

Яков Лукич билан узоқ ва мاشаққатли умр кечирган хотини ҳайрон бўлиб қолди:

— Яша! Лукич! Үғлисан-а!

Шундан кейин Яков Лукич шунча йил бирга кечирган тутув умрлари мобайнинда ёши ўтиб қолган хотинини биринчи марта қулочкашлаб уриб юборди, бўғиқ овоз билан хирқиради:

— Жим! У бизни адойи-тамом қиласай деяпти-ку!
Жим! Сургун бўлгинг келяптими?

Яков Лукич вазминлик билан ўрнидан туриб, сандиқ оғзидағи кичкинароқ қулфни олиб, эҳтиёт билан иссиқ йўлакка чиқдида, онаси ётган ҳужранинг эшигини қулфлаб қўйди.

Қампир унинг қадамларини эшилди. Уни қадамларидан таниб олишга одатланган эди... Үғлининг одимини ҳатто узоқдан ҳам қулоги билан пайқашга ўрганмаслиги мумкинми, ахир? Бундан эллик йил муқаддам — ҳали барно жувон экан,— рўзгор ишларидан, куйдириш-пиширишдан бош кўтариб, эндигина тетапоя юраётган якка-ю ёлғиз ардоқли тўнгичи Яшеньканинг яланг оёқлари ботинмай онда-сонда шапиллатиб полда қадам ташлаётганига завқ билан жилмайиб қулоқ солар эди. Кейин у мактабдан қайтаётган кичкина Яшуткасининг тақ-туқ сакраб-сакраб, зинапояни тапиллатиб келаётганини эшигадиган бўлди. Ўшанда ўғли қувноқ, улоқдек шўх эди. Ўша ёшида унинг бирон марта бўлсин қадамлаб юрганини билмайди. У яккаш югуарар, югуранда ҳам худди улоққа ўхшаб шаталоқ отиб югуар эди... Ҳаммага ўхшаб сўнгсиз қайгуларга бой, дафъали қувончларга қашшоқ узоқ ҳаёт кечирди; мана у — энди ўрта ёшлардаги она — кечалари бўйдор, шўх йигит Яшанинг сирғанаётгандек енгил қадамларига норозилик билан қулоқ солади, ҳолбуки ўғли билан зимдан фахрланарди. У сайилгоҳлардан кеч қайтиб келаркан, чориқлари полга тегмай ўтаётгандек туюлар — унинг

ўспиринлик одими шу қадар енгил ва чаққон эди. Ўғли улғайиб, оиласлик бўлди, она буни сезмай ҳам қолди. Унинг юришлари вазмин ишонч касб этди. Ўй бўйлаб аллақачонлардан бери хонадон бошлигининг, кексаяёзган салобатли кишининг қадамлари янграса-да, она учун эса у ҳамон ўша Яшенъка, уни ўқтин-ўқтин тушида малла сочли кичкина шўх болалигicha кўради...

Мана ҳозир ҳам қадамларини эшитаркан, кампирларга хос бўғиқ овоз билан сўради:

— Яша, сенмисан?

Ўғли жавоб бермади. У эшик олдида бир оз турди-да, кейин негадир қадамини тезлатганча ҳовлига чиқиб кетди. Кампирни мудроқ босаркан ўйларди: «Худога шукурки, бинойидек мудаббир казак туғиб, вояга етказдим! Ҳамма ухлаб ётиби-ю, у бўлса қўрага чиқиб кетди, рўзғорнинг ташвишида юриди». Унинг рангсиз, қуруқшаган лабларида мағрур оналик табассуми кўриниб ўтди...

Шу кечадан бошлаб уйнинг тинчи кетди...

Мадорсиз ва мажолсиз кампир ҳамон яшар, ақалли бир бурда нон, ақалли бир қултум сув беришларини сўпар, Яков Лукич ўйлакдан пусиб ўтаркан, унинг ҳолсизланган сассиз шивирини эшитар эди:

— Яшенъкагинам! Ўргилай, ўғлим! Гуноҳим нима?! Ақалли сув берсанглар-чи!

...Оиладагиларнинг ҳаммаси ҳам бутун бошли катта уйга киришга безилларди. Семён билан хотини туну кунни ҳовлида ўтказишар, Яков Лукичнинг хотини рўзғор иши билан уйга кириб қолгудек бўлса, титраганча ўқраб қайтиб чиқар эди. Иккинчи сутканинг охирида кечки овқатга ўтирганларида, Яков Лукич: «Ҳозирча шу ёзлик ошхонада тура турайлик» деган эди, Семённинг аъзойи бадани титраб-қақшаб, столдан турди-да, ларзадан каловланаётгандек чиқиб кетди...

...Тўртинчи куни уй жимжит бўлиб қолди. Яков Лукич бармоқлари титраганча қулфни очиб, бир вақтлар онаси яшаган ҳужрага хотини билан бирга кирди. Кампир оstonага яқин ерда ётар, у қиш куни тасодифан сўрида унубиб қолдирилган эски тери қўл-

қопни тиhsиз милклари билан ямлаган эди... Сувни, афтидан, дераза рафидан топиб амаллаган бўлса керак. У ерга дарча тирқишидан кўз ва қулоқ илғамайлиган енгил ёмғир томчилари тушган эди, эҳтимолки, бу туманли ёзда шудринг тушган бўлса ҳам ажаб эмас...

Марҳуманинг эгачилари унинг буришган чувакки, на жасадини ювиб, ясатиши, йиғлаб-сиқташди, аммо кўмиш маросимида Яков Лукичдан кўра аччиқроқ, эзилиброқ йиғлаган одам бўлмади. Ҳам алам, ҳам пушаймон, ҳам жудоликнинг кулфати — ҳаммаси ўша куни унинг қалбини даҳшатли юк бўлиб босди...

III БОБ

Давидов жисмоний меҳнатни қўмсаб, диққат бўларди. Унинг кучли, саломат вужуди ишга, кечга бошиб ҳамма мушакларини тотли ҳорғинлик сирқиратадиган ишга муштоқ эди. Ана шунда кечаси ҳузур бағишлиовчи ҳордиқ билан бирга тушсиз, енгил уйқу ҳам келади-қолади.

Бир куни Давидов умумлаштирилган лобогрей-каларнинг ремонти қандай кетаётганини текшириш учун темирчилик устахонасига кирди. Қизиган темир билан ёнаётган кўмирнинг ачимсиқ нордон ҳиди, сандоннинг жарангдор саси билан кўхна дамнинг хирқироқ чоллардек нолувчи нафаси уни ҳаяжонга солди. У болалигидан бери жуда ҳам таниш ҳидларни маза қилиб ҳидлаганча, ним қоронғи устахонада бир неча минут индамай туриб қолди, сўнг иштиёқини босолмай қўлига босқонни олди... У икки кунгача темирчиликдан чиқмай ишлади. Унга овқатни уй бекаси олиб келарди. Аммо, одамни ҳар ярим соатда машғулотидан искарт чалғитиб туришса, омбурдаги тановор кўкарганча совуб қолиб, қари темирчи Сидорович жовраганча тўнфилласа, дамкаш бола Давидовнинг диққатдан толган қўли қаламни ерга тушириб юбора-юбора навбатдаги ҳужжатга ҳарфлар ўрнига аллақандай бемаъни, қинғир-қийшиқ бўлиб кетган ажи-бужи нарсаларни ёзаётганини кўриб ошкора тиржайиб турса — бу лаънати иш иш бўлиб қаёққа борарди!

Давидов бундай иш шароитларига туфуриб, Сидоровичга халал бермаслик учун қари боцманлардек димофида сўкиниб, устахонадан чиқиб кетди; заҳрини сочиб тундлашганча колхоз правлениесида ўтириб олди.

Ахир у уззукун вақтини кундалик, аммо зарур ҳўжалик масалаларини ҳал қилишга: ҳисобчилар тузадиган ҳисботлар ва сон-саноқсиз маълумотларни текширишга, бригадирларнинг маърузаларини эшишишга, колхозчилардан тушган турли-туман аризаларни бартараф қилишга,— хуллас, шуларсиз каттакон коллектив ҳўжалик ҳаётини тасаввур қилиб бўлмайдиган ҳамма нарсаларга сарфлар, лекин булар Давидовни унча қаноатлантирmas эди.

У кечалари ёмон ухлайдиган бўлиб қолди, эрталблари, албатта боши оғриб уйғонар, тўғри келган жойда наридан-бери овқатланар, ўзида илгари таниш бўлмаган аллақандай сирқовлик ҳис қилас, бу нарса уни кечгача тарк этмас эди. Давидов ўзи сезмаган ҳолда аллақандайдир чўкиброқ қолди, табиатида илгари унга сира ҳам хос бўлмаган серзардалик пайдо бўлди, сиртдан эса Гремячий Логга келган дастлабки кунларидагидек қурч ва бардам кўринмас эди. Бунинг устига анави Лушка Нагульнова билан унинг ҳақидаги узлуксиз ўйлар, ҳар бало ўйлар келиб қўшилди... Лаънати жувон унга жуда bemavrid тўқнаш келди!

Бир куни Размётнов Давидовнинг сўлиб қолган юзига кўзларини қисиб жилмайганча тикиларкан, шундай деди:

— Борган сари ориқлаб кетяпсан-а, Сёма? Ҳозир кўринишинг худди қишлоvdан ёмон чиққан қари ҳўкизнинг дидини беради: ҳадемай юрган йўлингда чўзилиб қоладигандайсан, худди туллагандек кўримсиз бўлиб қолибсан... Тулляпсанми дейман? Сен қизларга, айниқса тул хотинларга камроқ анқай. Бу нарса соғлиғингга қаттиқ зарар қиласди...

— Аҳмоқона маслаҳатларингни пишириб е!

— Сен унақа фижинма. Яхши кўрганимдан маслаҳат беряпман-а.

— Доим ҳар хил бемаъниликларни ўйлаб чиқарасан, факт!

Давидов аста-секин, аммо туташ қизариб борарди. Хижолатини енгишнинг эвини қилолмай, ёпишмаса-да, бошқа нарсалар тўғрисида гапира бошлади. Бироқ Размётнов бўш келмади:

— Бундай қизаришни сенга флотда ўргатишганми ё заводдами, юзинг эмас, бўйнинггача қизариб кетди-я? Тағин бутун вужудинг билан қизариб кетаётган бўлмагин? Қани кўйлагингни еч, кўрай-чи!

Давидовнинг тундлашган кўзларида ғазаб учқунларини кўргачгина Размётнов суҳбат йўналишини ўзгартиб, ҳафсаласизлик билан эснаганча пичан ўроғи ҳақида гап бошлади, юминқираган мижжалари орасидан уйқуси келганинамо бўлиб тикиларди, муғомбираона табассумини эса яширолмас, ёки атайлаб яширгиси келмас эди.

Размётнов Давидов билан Лушканинг алоқалари ни сезганмикан ёки билармикан? Ҳар қалай, биладигангага ўхшайди. Ҳа, ўз-ўзидан маълум, билади. Беҳаё Лушка бу алоқаларни яширгиси келмагани у ёқда турсин, ҳатто жўрттага намойишкорона кўз-кўз қилаётган бўлса, уларни қандай қилиб сир тутиш мумкин? Партячейка секретарининг хотини бўлиб, рад этилгач, оддий колхозчи билан эмас, кимсан, колхоз раисининг ўзи билан топишганлиги, унинг кўкрагидан итартмаганликлари афтидан Лушканинг тўпори иззат нафсига хуш келарди, шекилли.

У колхоз правлениесидан бир неча марта Давидов билан бошлашиб чиқди, хуторда ҳукм сурган қатъий одатларга зид ўлароқ уни қўлтиқлаб, ҳатто унга кифти билан суюниброқ олар эди. Давидов Макарни кўриб қолишдан қўрқиб олазарак бўлар, лекин қўлинни тортиб олмас, Лушканинг одимига мослаб худди тушовланган отдек майда қадам ташлар, нима учундир ўқтин-ўқтин теп-текис ерда қоқилиб кетар эди... Ошиқ-маъшуқларнинг бошига битган офат — хуторнинг шилқим болалари ҳар хил қиёфага кириб ингичка овоз билан:

Келин билан күёви —
Ачиган хамир икови!

деб чинқирганча орқаларидан югуришарди.

Улар ўз бемаъни байтларини узундан-узоқ минг куйга солиб, пайдар-пай ҳунар кўрсатишар, терлаб шалаббо бўлган Давидов ичидан болаларни, Лушкани, ўзининг кўнгилчанлигини койиб Лушка билан икки квартал босиб ўтгунча «ачиган хамир» бирма-бир ошхамирга, чучук, ёғли, ширин ва ҳоказо хамирларга айланиб борар эди. Ниҳоят Давидовнинг тоқати тоқ бўлиб, Лушканинг маҳкам ёпишган қорамафиз бармоқларидан тирсагини оҳиста бўшатиб оларди-да, «Кечирасан, вақтим йўқ, тезроқ бормасам бўлмайди» деб йирик қадам ташлаганча илгарилаб кетарди. Аммо хира болаларнинг таъқибидан осонликча қутулиб бўлмасди. Улар икки гуруҳга бўлинниб олишар; бир гуруҳ Лушканинг жигига тегиши учун қолар, иккинчиси Давидовнинг изидан кетар эди. Таъқибдан қутулишнинг биргина осон йўли бор эди, Давидов яқин орадаги четанга бориб хивич синдириб олаёт-гандай бўлар, болалар шу ондаёқ тумтарақай бўлиб кетишар эди. Колхоз раиси шундагина кўча билан шу атрофнинг ҳукмрон хўжайини бўлиб қоларди...

Яқингинада тун яримдан оққандан Давидов билан Лушка хутор ташқарисидаги узоқ даштда жойлашган шамол тегирмоннинг қоровулига тўқнаш келиб қолишли. Қекса қоровул Вершинин чакмонини ёпинганча эски суфур тепанинг тагида ётган эди. Тўппатўғри ўзига қараб келаётган икки одамни кўриши билан бирдан озод туриб, ҳарбийчасига қатъий хитоб қилди:

— Тўхта! Ким бу?— у эскигина, бунинг устига ўқланмаган милтиқни ўқталди.

— Ошна. Менман, Вершинин!— деб истар-истамас жавоб берди Давидов.

У шартта орқасига бурилиб, Лушкани эргаштира кетди, аммо Вершинин уларга етиб олиб, ёлворди:

— Бир чекимгина бўлса ҳам тамакингиз йўқми, ўртоқ Давидов? Азбаройи ҳуморликдан гаранг бўлиб кетдим!

Лушка юзини ҳам ўгирмади, четга ҳам чиқмади, юзини рўмол билан ҳам яширмади. Давидовнинг халтадан шоша-пиша гамаки солиб берәётганини бепарво кузатиб турганча, хотиржамлик билан деди:

— Юр, Сёма! Сен ҳам ишқ дардида дашт кезганларни эмас, ўғриларни пойлагин-да, Николай амаки! Кечаси ёвуз одамларгина сайд қилиб юрмайди...

Николай амаки қисқагина қаҳқаҳлаб, тап тортмай Лушканинг кифтига қоқиб қўйди:

— Қайдам, ўргилай Луша... кечасининг иши — қоронғи: бирор — ишқнинг дардида, бирор — бегона ғаниматнинг пайида. Менинг ишим қоровулчилик, ўтган-кетганни сўроқлаш, шамол тегирмонни қўриқлаш, чунки унда таппи-тезак эмас, колхознинг ғалласи сақланяпти. Хўл, тамакингиз учун раҳмат. Яхши боринглар! Омадларингни берсин...

— Нима жин уриб гапга суқиласан? Четга чиқиб турсанг-ку, эҳтимол, танимаган ҳам бўлармиди,— деди ошкора ғижиниб Давидов, ёлғиз қолганларида.

— Мен ўн олтида эмасман, қиз бола ҳам эмасманки, рўпара келган қари аҳмоқдан тортинаверсам,— қуруққина жавоб берди Лушка.

— Аммо ҳар ҳолда...

— Нима ҳар ҳолда?

— Бу нарсаларнинг ҳаммасини намойиш қилишингнинг нима ҳожати бор?

— Нима, у менинг туққан отам ёки қайнатамиди?

— Сенга тушунолмай гарангман...

— Бир зўр бергину тушуниб ол.

Давидов қоронғида Лушканинг юзини кўрмасди, аммо овозидан кулаётганини пайқади. Унинг ўз хотинлик шаънига бепарволигидан, одоб-ахлоққа мутлақо риоясизлигидан ўқиниб, куйиниб хитоб қилди:

— Тушунсанг-чи, тентак, мен сенинг ташвишингни тортияпман!

Лушка яна ҳам қуруқроқ жавоб берди:

— Машаққат чекмай қўя қол. Ташвишимни ўзим тортаман. Сен ўзингнинг ташвишингни тортавер.

— Мен ўзимнинг ҳам ташвишимни тортияпман.

Лушка бирдан тўхтаб, Давидовга тақалиб келди. Унинг овозида дашном оҳангни янгради:

— Бошида шундай деб қўя қолмайсанми, ўргилиб кетай! Сен фақат ўзингнинг ташвишингни тортасан, сени кечаси даштда хотин киши билан кўринб қолган-

ларига ачиняпсан. Николай амакининг сени кечаси кимга илиқиб юрганинг билан иши йўқ.

— «Илиқиб юрганинг» нимаси? — фижинди Давидов.

— Нима экан бўлмаса? Николай амаки ёшини яшаган одам, сенинг мен билан кечаси бу ерга маймунжон тергани келмаганингни билади. Гремячийдаги яхши одамларга, софдил колхозчиларга ёмон отлиқ бўлиб қолсам-а, деб қўрқиб кетдинг. Шундайми? Мен билан бир чақалик ҳам ишинг йўқ! Мен билан бўлмаса, барибир бирон бошқаси билан ўйнагани хутордан бошлашиб чиқардинг. Ширингина гуноҳ қилсангу, сояда, панада қолсанг, қилғиликларингни ҳеч ким билмай қўя қолса. Сен шунаقا пиҳингни ёрган экансан! Бунаقا бўлмайди, ўргилиб кетай, умрбод панада жон сақлаб ўтолмайсан. Сени қара-я, бу киши тағин матрос эмишлар! Бу нима қилганинг ўзи? Мен қўрқмасаму сен қўрқсанг? Бундан чиқдики, мен эркагу сен хотин экансан-да, шундайми?

Лушканинг кайфияти койишдан кўра ҳам ҳазилга мойилроқ эди, лекин ҳамма нарсадан хушторининг муомаласи иззат нафсига теккани кўриниб турарди. Унга нафрат билан қиё қараб, бир оз индамай тургач, бирдан қора сатин юбкасини тез ечди-да, буйруқ оҳангига деди:

— Ечин!

— Эсингни едингми? Нима учун?

— Менинг юбкамни киясан, мен сенинг шимингни кияман. Шунда ҳаққоний бўлади! Бу дунёда ким ўзини қандай тутса, ўшанга муносиб кийиниши керак. Бўл, имиллама!

Давидов Лушканинг сўzlаридан ва қилган таклифидан хафа бўлган бўлса ҳам кулиб юборди. Камоли зардаси қайнаб кетган бўлса ҳам, ўзини куч билан тийиб, оҳиста гапирди:

— Шўхлигингни қўй, Луша! Кийин, кетамиз.

Истар-истамас эран-қаранлик билан Лушка юбкасини кийди, рўмоли остидан тўзиб чиққан сочларини тузатди, дабдурустдан кутилмаган чуқур ҳасратли овоз билан деди:

— Сен билан диққат бўлиб кетдим, латта матрос!

Улар шундан сўнг то хуторгача чурқ этмай келишиди. Тор кўчада ҳам индамай хайрлашишди. Давидов сиполик билан таъзим қилди, Лушка ҳам сезилар-сезилмас бош иргаб, эшикдан кирди-да, кекса заранг дарахтининг соясига сингиб кетгандек ғойиб бўлди...

Улар бир неча кунгача учрашишмади, кейин, Лушка бир куни эрталаб колхоз правлениесига кирди-да, йўлакда энг охирги арзгўйининг кетишигача кутиб ўтириди. Давидов ўз хонасининг эшигини бекитмоқчи бўлган эди, Лушкани кўриб қолди. Лушка тиқмачоқ тиззалари юбкасини таранг тортиб, оёқларини эркакларга ўхшаб ёйиб ўтирганча бемалол жилмайиб, пис-та чақмоқда эди.

— Писта чақасанми, раис? — сўради у кулунч ва сокин овоз билан. Ингичка қошлиари учиб турар, очиқ кўзлари қувлиқ билан боқар эди.

— Нега ўтоққа чиқмадинг?

— Ҳозир бораман, кўряпсанми — иш кийимимдаман. Сенга айтгани кирган эдим... Бугун қоронғи тушиши билан ялангликка чиқ, сени Леоновларнинг хирмони ёнида кутаман. Қаердалигини биласан-а?

— Биламан.

— Борасанми?

Давидов индамай бош силкиб, эшикни зичлаб ёпди.

У қўлларини ёноқларига тираб, кўзларини бир нуқтага тикканча столда узоқ вақт ўй суриб ўтириди. Ўйлатиб қўядиган ишлар бор эди!

Ҳали дастлабки аразлашишларидан олдин Лушка икки марта қош қорайгандা квартирасига келган,— бир оз ўтиргач, овози борича:

— Мени кузатиб қўй, Сёма! Ташқарида қоронғи тушиб қолди, ёлғиз кетгани қўрқиброқ турибман. Ўлгундек қўрқяпман. Мен болалигимдан қўрқоқман, болалигимдаёқ қоронгидан юрак олдириб қўйганман,— деган эди.

Давидов юзини буриштириб-тириштириб, кўзлари билан тахта деворни имо қилган эди. Деворнинг нарёғида уй бекаси — диндор кампир жигибийрон бўлиб, мушукдек типирчилаб заҳрини сочганча, товоқни қошиққа, қошиқни товоққа уриб, эри билан Давидов-

та қандайдир овқат тайёрламоқда эди. Лушканинг ер тагида илон қимиrlаса биладиган зийрак қулоги беканинг аччиқ шивирини аниқ әшитмоқда эди:

— Шу киши қўрқар эканми?! Хотин эмас, шайтонку! Нариги дунёда ҳам қоронғида пайпаслаганча бориб шайтоннинг йигитини топиб олар, шунда ҳам қуҷоғига тортишини пойлаб ўтирумас. Худоё, бу зўр гуноҳимни ўзинг кечир! Шу киши қўрқар эмишларми? Ҳа, қоронғидан жуда ўтаканг ёрилса керак сен иблиснинг!

Лушка ўзига унча порам келмайдиган таърифини әшитаркан жилмайиб туради, холос. У аллақаёқдаги диндор кампирнинг надоматлари кайфиятини буза оладиган хотинлардан эмас эди. Бу ялоқланиб туралдиган риёкор покдомонни назар-писанд қилса ўлсин! Қисқагина рафиқалик умрида шаддод Лушка бундан ҳам зўроқ ишкалларга йўлиқсан, гремячийлик хотинларга бундан ҳам зўроқ олишувларда бас келган. Бека хотин эшик орқасида секин жовраб, уни саёқ, бузук, деб атаётганини аён әшитиб туради. Эҳа, ўзидан озор етган хотинлар билан бўлган тўқнашувларда Лушка шунаقا хийлагина юмшоқ сўзларни айтар эдими? Улар ўтакетган соддадиллик билан, ўз эрларимизни ўзимизгина яхши кўришга ҳақлимиз деб, ўйлаб, унга болохонадор сўкишлар билан ёпишиб, юлқилашишарди! Ҳар қалай, Лушка ҳақини кеткизмай, доимо рақибаларининг роса таъзирини берарди. Йўқ, у ҳеч қачон ва ҳеч қандай ҳолларда гангид қолмас, узиб олиш учун гап тополмай қолмас, хуллас, ҳали хуторда Лушканинг бошидан рўмолини юлиб олиб, шармандайи шармисор қила оладиган рашкчи хотин чиқмаган эди... Аммо бари бир кампирнинг таъзирини бериб қўйишга аҳд қилди — шунчаки, тартиб-қоида учун, бирдан-бир ҳаётӣ таомилга амал қилиб: чунки ҳеч вақт бирорвуда Лушканинг ҳақи қолиши керак эмас.

Иккинчи дафъа келишида Давидовни олдинга ўтказиб юбориб, уй эгаларининг босиб ўтиладиган хонасида бир дақиқача тутилиб қолди-да, Давидов йўлакка чиқиб сўнг ғичирловчи зинапоядан тушиб кетгач, жуда ҳам ёввош бир қиёфа билан бекага ўги-

рилди. Лушканинг мўлжали хато кетмади. Филимониха кампир бусиз ҳам лабини наридан-бери ялаб олиб, бидиллаб гапира бошлади:

— Ўлгудек беномус экансан-да, Лукеръя, сенда-қасини умрим бино бўлиб кўрмаган эдим!

Лушка камтарлик билан кўзини ерга тикиб, тавба-тазарру билан ўйга толгандек хона ўртасида тўхтаб қолди. Унинг киприклари худди пардоз берилгандек, қора, узун эди, киприкларини пастга туши-раркан, улар оқарган ёноқларига соя солди.

Бу ясама тавбадан алданган Филимониха энди ён босиброқ шивирлади:

— Ўзинг ўйлаб кўр, жувонсўхта, ажралишган бўлсанг ҳам эринг бор, хотин бошинг билан бўйдоқ эркакникига, тағин қоронғи тушганда келишинг ақлга тўғри келадими? Элу юртнинг кўзи олдида нечук номус қилмайсан, а? Эсингни йиғ, худо ҳақи уялсанг-чи!

Лушка ҳам бека хотиннинг гап оҳангига осойишта ва мулоим жавоб берди:

— Пушти паноҳимиз, ризқ бергувчимиз худован до...— у пайт пойлагандек бир оз жим қолди, қисқа сукутдан сўнг қоронғига қаҳр билан чақнаган кўзларини ердан олди.

Тақводор хотин худонинг номини эшитиши билан бошини дарров қуий солиб, шоша-пиша чўқина бошлади; Лушка ана шунда гапларини, эркакча дағал ва қатъий овоз билан писандали қилиб ту-гатди:

—...Худойи таоло ҳар кимнинг чекига номус тақсимлаб, одамларга улашганда мен уйда йўқ эдим, сайлгоҳда эдим, йигит-яланг билан кўнгилхушлик қилиб, ўйнашиб-ўпишиб юрган эдим. Шу важдан номус тақсим қилинаётганда менга бир бурда ҳам тегмай қолган. Тушундингми? Хўш, нега оғзингни очганча аграйиб қолдинг? Энди мендан сенга бир топшириқ: квартирантинг мен билан бўлари бўлиб қайтиб келгунча, сен биз гуноҳкорларнинг ҳақимизга дуо қилиб тур, қариган байтал!

Лушка охири ҳангуманг, лол бўлиб, бош кўтаролмай қолган бека хотинни ҳатто нафратли бир наза-

рига ҳам арзитмай кибр билан чиқиб кетди. Уни зинапояда кутиб турган Давидов эҳтиёт билан сўради:

— Нима тўғрисида гаплашдинглар, Луша?

— Хуллас, диний нарсалар тўғрисида,— оҳиста кулиб ва Давидовнинг пинжига кириб жавоб берди, ҳушига ёқмаган гапдан ҳазил билан қутулишини собиқ эридан ўрганган Лушка.

— Йўқ, жиддий сўраяпман: нима деб шивирлаётган эди? Сени хафа қилиб қўймадими?

— Мени хафа қилолмайди, бу қўлидан келмайди ҳам. Раشكига чидаёлмай заҳрини сочди, мендан сени рашк қиляпти, кемшиккинам!— яна ҳазил билан қутулди Лушка.

— Биздан бад олиб қолганга ўхшайди, факт!— Давидов афсусланиб, бош чайқади.— Сен менинг олдимга келмаслигинг керак эди, гап шунда!

— Кампирдан қўрқдингми?

— Нега энди?

— Хўп, сен шунаقا юрак ютган йигит бўлсанг, бу тўғрида гап сотиб ўтиришимнинг ҳам ҳожати йўқ экан.

Кожбаҳс ва ҳовлиқма Лушкага бирон нарсани уқтириш маҳол эди. Қалбига бехосдан ўрнашиб олган каттакон туйғудан худди яшиндан кўзи қамашгандек шошиб қолган Давидов эса Макар билан орани очди қилиб, Лушкага уйланишни бир неча бор астойдил ўйлаб кўрган, чунки, ўзини шундай бир ноқулай аҳволга солиб қўйған эдики, бундан ишҳоят қутулиши, шу билан шаънига тўқилиб кетиши мумкин бўлган фийбатларга барҳам бериши керак эди. «Мен уни тарбиялаб оламан! Мен уни ликонглатиб қўймайман, ҳар бало ҳунарларини ҳам ташлаттираман! Уни ижтимоий ишга жалб қиласман, ўзича ўқиб билимини оширишини илтимос қиласман ёки шунга мажбур этаман. Ундан бир иш чиқади, бу аниқ факт! У эслик хотин, жizzакилиги қолиб кетади, лўттибозлигини ташлаттираман! Мен Макар эмасман, Макар икков ларининг жинлари чиқишмас эди, менинг характерим бўлса бошқача, мен унга йўлини топиб муомала қиласман»,— ўзи билан Лушканинг имкониятларига шун-

дай ошиқча баҳо бериб худписандлик билан ўйларди Давидов.

Улар Леоновларнинг хирмони ёнида учрашишга ваъдалашишган кунлари Давидов тушданоқ соатга қарай бошлади. Шартлашилган учрашувдан бир соат олдин зинапоядан Лушканинг енгилгина одимини эшитиб таниркан, аввал ҳайрати ошиб, кейин ғазаби қўзиб кетди. Сўнгра Лушканинг янгроқ овози эшитилди:

— Ўртоқ Давидов борми?

Бека хотин ҳам, худди шу вақтда уйда ҳозир бўлган унинг чоли ҳам жавоб бермади. Давидов кепкасини қўлига олди-ю, эшикка югурди, жилмайиб турган Лушка билан юзма-юз тўқнаш келди. Лушка четланди. Улар индамай эшик тагига чиқишиди.

— Менга бу бачканаликлар ёқмайди! — деди Давидов дағаллик билан ва ҳатто ғазабдан муштини қисди. — Сен нега бу ерга келдинг? Сен билан қаерда учрашишга ваъдалашган эдик? Жавоб берсанг-чи, жин ургур!..

— Сен менга нега бақирасан? Мен сенинг киминингман — хотининг ёки аравакашингманми? — ўз навбатида сўради, ўзини босиқ тутган Лушка.

— Қўйсангчи! Мен ҳеч бақираётганим йўқ, сўраяпман.

Лушка елкасини қисиб, кесатиқомуз осойишталик билан гапирди:

— Хўп, бақирмасдан сўраётган бўлсанг, унда бошқа гап. Азбаройи соғиниб кетганимдан муддатидан олдинроқ келдим. Сен хурсанд, мамнун бўлсанг керак?

— «Мамнун»ингга бало борми! Энди бекам бутун хоторга гап қилиб юборади! Ўтган сафар сен унга нима балолар деган эдинг, у бетимга ҳам қарамай, нуқул жавраб, карам шўрва ўрнига расво бир нарсани ичиради? Диний нарсалар тўғрисида гаплашдик, девдингми? Дин тўғрисидаги гап ўлсинки, сенинг ҳақингда оғиз очилди дегунча сувга чўкаётган одамдек ҳиқчоқ тутиб, мўматалоқ бўлиб кетади.

Лушка ўшларга хос шундай эшилиб, қаҳ-қаҳ уриб юбордики, Давидовнинг беихтиёр кўнгли юмшаб қолди. Лекин у бу сафар мутлақо хушчақчақлик қилишга

мойил эмас эди, Лушка кулиб турган ва ёш тирқираб кетган кўзини унга тикканча:

— Ҳали, ҳиқчоқ тутиб, мўматалоқ бўлиб кетади, дегин? Бундан баттар бўлсин, тақводор! Бировларнинг ишига тумшуғини тиқмасин. Худди менинг одоб-ахлоқимдан кўз-қулоқ бўлиб туришининг кафилини олгандек!— деркан, Давидов унинг гапини соvuққина бўлди:

— У бизни бутун хуторга гап-сўз қилиб юборса, сенга бари бирми?

— Бу иш соғлиғига зарар қилмаса бўпти-да,— бепарвогина жавоб берди Лушка.

— Сен бунга лоқайд қарасанг, мен мутлақо лоқайд қараёлмайман, факт! Аҳмоқлик қилиб, муносабатларимизни кўз-кўз қилишинг етар! Кел бўлмаса, мен эртагаёт Макар билан гаплашай-да, ё икковимиз турмуш қурайлик ё бўлмаса ўз йўлимизга ажралишиб кета қолайлик... Мени бировлар узоқдан бармоғини нуқиб кўрсатиб: ҳув ана — Лушканинг хуштори раис келяпти, дейишига тоқатим йўқ. Сен ўзингнинг шунаقا ошқора қилмишларинг билан жуда обрўйимни тўқяпсан. Тушундингми?

Лушка қизариб кетиб, Давидовни куч билан итариб юборди-да, тишлари орасидан гапириди:

— Куёвдан ўргилиб кетай! Сен эпашанг қўрқоқни бошимга ураманми? Сенга тегай деб ўлиб турганим йўқ, хомтама бўлма! Мен билан хутордан бошлишиб ўтишга ор қилар эканлар-у, «бирга турмуш қурсак» эмиш! Қўрқмаган нарсалари йўқ, ҳаммадан андиша қиладилар, эси пастларга ўхшаб, болаларни қўрсалар ҳам ўтакалари ёрилади. Бор, обрўйингни қўлтиқлаб ялангликка, Леоновларнинг хирмонига чиқиб, ёлғиз ўзинг ўтга узала тушиб ёт, бадбаҳт! Мен сени ажабтовор одам деб юрсам, Макаркамдан Фарқинг йўқ экан: у яккаш, жаҳон революцияси, дерди, сен бўлсанг — обрўйим, дейсан. Сенлар билан ҳар қандай хотин ҳам бўлиб ўлади.

Лушка бир оз жим турди-да, бирдан кутилмаган мулойим, ҳаяжондан қалтираган овоз билан деди:

— Хайр, Сёмагинам!

У бир неча дақиқа тараддудда қолгандек турди-

да, сўнг шартта бурилиб, тор кўчадан тез-тез юриб кета бошлади.

— Луша! — деб чақирди Давидов овозини пасайтириб.

Муюлишда Лушканинг оқ дурраси учқундек лип этди-да, қоронида ғойиб бўлди. Давидов нима учундир ловиллаб кетган юзини қўли билан артиб, саросимадан илжайиб, серрайиб қолганча ўйлар эди: «Таклиф учун топган вақтимни қара! Заб уйландингми, галварс, факт!»

* * *

Аразлари жиддий тус олиб кетди. Ҳа, хуллас энди бу араз ҳам, ҳатто жанжал ҳам эмас, уларнинг оралари бузилиб қолган эди. Лушка яккаш Давидов билан тўқнаши келиб қолишдан ўзини олиб қочарди. Ҳадемай буниси ҳам бошқа квартирага кўди, Лушканинг қулоғига етмай қолмаган бу нарса ҳам уни ярашишга ундаёлмади.

«Феъли ўзи шунаقا бўлса жин урсин уни!» — деяғижинди, севгилисими бирон ерда ёлғиз учратишдан узил-кесил умидини узган Давидов. Аммо нимадир юрагини тоят ачитиб туар, қалби ҳам худди серёғир октябрь кунларидек қоронғи, ҳасратли эди. Афтидан, Лушка қисқагина муддат ичидан Давидовнинг ишқ-муҳаббат қийноқларини кўрмаган соддадил қалбига яқингина сўқмоқ йўлдан кириб олган эди...

Рост, оралари бузилишининг ижобий томонлари ҳам бор: биринчидан, ундан Макар Нагульновга бориб, орани очди қилишдек мاشаққатли ишнинг ҳожати қолмас, иккинчидан, Давидовнинг бир қадар одобахлоқсиз қилмиши туфайли бир оз тўкилаёзган мустаҳкам обрўига энди ҳеч нарса футур етказолмас эди. Бироқ бу эзгу мулоҳазаларнинг биронтаси ҳам шўрлик Давидовга унча таскин беролмасди. Ёлғиз қолди дегунча, ўзи бехабар ҳолда маъносиз кўзларини дарҳол яқин бир ўтмишга тикар, ҳазин ўйга толиб, жилмаяр. Лушканинг ҳамиша чанқоқ жозибали лаб-

ларининг ардоқли ҳидини, ўтли кўзларининг ҳамиша беқарор ифодасини эслар эди.

Лушаня Нагульйонованинг кўзлари жуда ажойиб эди! Ер тагидан қараса, нигоҳида гўдакларнинг беозор назаридек мафтун этувчи бир нарса сезилиб турар, шу дақиқада ўзи ҳам турмуш билан ишқ-муҳаббат бобида кўпни кўрган хотинга эмас, кўпроқ қиз болага ўхшаб кетар эди. Бир дақиқадан кейин эса ҳамиша бегард, синъкалланган дуррасини бармоқларининг енгил ҳаракати билан тузатиб, бошини кўтараркан, ғашга тегувчи жилмайиш билан тикилар, шунда хира йилтираётган тунд кўзларида беҳаёлик ва муғамбирлик белгилари аён-ошкор кўринар эди.

Лушканинг бундай дафъатан товланиш салоҳияти истиғно мактабида камолга етган эмас, туғма истеъодд эди. Ҳар қалай, Давидовга шундай туюлар эди. Муҳаббат кўзини боғлаб қўйганидан у маъшуқасининг бўлакча, балки, ҳатто ҳаддан ортиқ даражада нописандлигини, бинобарин, ўзига бино қўйғанлигини кўрмас эди. Давидов кўпгина нарсаларни кўрмас ва пайқамас эди.

Бир куни у муҳаббатдан меҳри товланиб кетиб, Лушканинг сал-пал элик суркалган ёноғидан ўпаркан:

— Лушенькагинам, худди гулга ўхшайсан! Сенинг ҳатто сепкилларингдан ҳам хушбўй ҳид келади, факт! Биласанми, улардан ниманинг ҳиди келади?— деди.

— Ниманинг ҳиди келади?— деб сўради қизиқ-қан Лушка, тирсагига таяниб кўтариларкан.

— Аллақандай саринлик, хўш, чунончи шабнам ҳиди десаммикан... Хуллас, худди бойчечакнинг ҳидидек, сезилар-сезилмасу, аммо яхши ҳид келади.

— Мен шундай бўлишим ҳам керак,— деди сиполик ва астойдил жиддийлик билан Лушка.

Бундай беибо манманликдан ғаши келиб, таажужубланган Давидов индамай қолди. Бир оздан сўнг сўради:

— Нега энди сен шундай бўлишинг керак экан?

— Чунки мен чиройлиман.

— Нима, сенингча, ҳамма чиройлилардан ҳам хушбўй ҳид келиб туриши керак эканми?

— Ҳаммани айтольмайман, билмайман. Мен уларни исқаб кўрганмасман. Улар билан ишим ҳам йўқ, мен ўзимни айтяпман, тентак. Сепкил чиройлиларнинг ҳаммасида ҳам бўлавермайди-ку, сепкил бўлса — баҳорнинг белгиси, сепкилимдан бойчечак ҳиди келиши керак.

— Мақтанчоқсан, факт!— деди ўкиниб Давидов.— Агар билгинг келса, ёноқларингдан бойчечакнинг эмас, чучимаган мой қўйилган туруп билан пиёзнинг ҳиди келади.

— Бўлмаса, нега ўпаман деб ёпишасан?

— Туруп билан пиёзни яхши кўраман-да...

— Сен худди ёш болага ўхшаб бўлмағур гапларни айтяпсан, Сёма,— деди норозилик билан Лушка.

— Ақлли одам билан оқилона... Биласан-а?

— Ақлли одам аҳмоқ билан бўлса ҳам оқилоналигича қолади, аҳмоқ одам эса ақлли одам билан ҳам аҳмоқоналигича қолади,— деди ҳозиржавоблик билан Лушка.

Улар ўшандаги ҳам бекордан-бекорга уришиб қолишган, лекин ундаги уришлари дарҳол унут бўлиб, бир неча дақиқадан кейиноқ яраш билан тугаган эди. Ҳозир бўлса бошқача эди. Давидовнинг назарида Лушка билан кўрган-кечиргандарининг ҳаммаси гўзал, аммо қайтиб келмайдиган узоқ ўтмиш бўлиб туюларди. Ўни ёлғиз учратиб, дардини изҳор қиломай, ҳозирги муносабатларини узил-кесил аниқлаб ололмагач, Давидовнинг ҳасрати ошиб кетди. У Размётновга колхоз ишларини ҳам бирга қўшиб олиб бора туришни топшириб, ўзи эса бир қанча муддатга колхоз ерининг узоқ участкаларидан бирида май шудгорини кўтараётган иккинчи бригадага жўнаш тараддудига тушди.

Бу қандайдир амалий мuloҳазалар юзасидан туғилган сафар эмас, муҳаббатининг яқинлашиб келаётган хотимасини истаган, айни бир вақтда эса бундан қўрқкан одамнинг шармандали қочиши эди. Давидов вақти-вақти билан ўзига четдан туриб разм солаётгандек буларнинг ҳаммасини туппа-тузук пайқар, аммо бутунлай безиллаб қолган, шунинг учун ҳам ўзига энг мақбул қарор сифатида хутордан чиқиб кета ту-

ришни маъқул кўрар, негаки, ақалли у ерда Лушкани кўрмайман, бир неча кун хотиржамроқ яшарманку, деб умид қилар эди.

IV БОБ

Июннинг бошларида ўқтин-ўқтин, ёзга хос бўлмаган, куздагидек майда, момақалдириқсиз, шамолсиз, осойишта ёмғир ёғиб турди. Эрталаблари ғарбдаги олис тепаликлар ортидан кул ранг-кўкиш булат ўрмалаб чиқарди. У ёйила-ёйила осмоннинг ярмини эгаллар,— остидаги қора патчалари хунук оқариб турар,— кейин у шу қадар пастлар эдик, унинг ҳарирдек шаффоф қуий увадалари даштдаги тепаликда турган ел тегирмоннинг томига илашарди; аллақаердадир баландликда гулдирак эшитилар-эшитилмас роҳатбахш ёмғир қуийб юборар эди.

Янги соғилган сутдек илиқ ёмғир томчилари туманли сукунатга бурканган ерга солланиб тушиб, қуримаган, кўпик боғлаган халқобларда оқ пуфак бўлиб кўпчирди; ёзнинг бу сийрак ёмғири шу қадар беозор ва осуда эдик, ҳатто гуллар ҳам бошларини эгмас, ҳатто ҳовлиларда юрган товуқлар ҳам ундан панага қочмас эди. Улар омборларнинг, нам, қорайиб кетган четанларнинг олдида қунт ва ҳафсала билан дон қидириб ер титишар, улуғвор салобатлари йўқолаётган, ивиган хўроздар эса ёмғирга эътибор бермай, навбатма-навбат чўзиб-чўзиб қичқиришар, уларнинг тетик овозлари кўлмакларда бемалол чўмилаётган чумчуқларнинг чирқиллашлари, ёмғир ҳамда чанг ҳиди анқитиб, меҳр билан чорлаётган, ерга шахт билан учиб келиб ўзини ураётгандек қалдирғочларнинг вижирлаши билан қўшилиб кетар эди.

Гремячий Логдаги ҳамма хўроздарнинг овози ҳам ҳайратда қоларли даражада хилма-хил эди. Ярим кече бўлганда қичқиришни Любишкинларнинг ҳаммадан олдин ўйғониб оладиган хўроzi бошлаб берарди. У хизматини бажонидил бажарадиган ёш рота командирига ўхшаб қувноқ, янгроқ ингичка овоз билан қичқирилар, унга Агафон Дубцовнинг ҳовлисидағи хўроздарни вижирлаши билан қўшилиб кетар эди.

полковникларга хос салобатли йўғонроқ овоз билан жавоб қайтарарди: сўнгра хутор устида беш минутча пайваст ва пайдар-пай қичқириқлар янграб турар, ҳаммадан кейин эса уйқусираб қаттиқ қақолаб, қўндоқда қанотларини кучли тапиллатганча Майданикевларнинг хуторда энг қари, сариқ, биққи хўрози генералларга хос бўғиқ, амирона ҳирқироқ овоз билан қулоқни битириб қичқирап эди.

Ошиқ-маъшуқлар билан оғир касаллардан ташқари, Нагульновнинг тушунчасида буларнинг бир-бирларидан фарқлари йўқ эди, хуторда ҳаммадан кейин Макар Нагульновнинг ўзи ётар эди. У кечасидаги бўш вақтларидан фойдаланиб, ҳамон ҳафсала билан инглиз тилини ўрганарди. Унинг хонасидаги стул суюнчиғида каноп сочиқ, бурчакда муздек қудуқ суви солинган ҳўқача туради. Макар машаққат билан билим орттироқда эди! Кўйлагининг ёқаларини ечиб, соchlари ҳурпайган, тердан шалаббо бўлганча ланг очиқ дераза олдида столда ўтирас, пешонасидағи, қўлтиғидаги, кўкраги ва яғринидаги терни сочиқ билан артиб, ўқтин-ўқтин дераза рафидан ташқарига энгашганча, ҳўқачадан бошига сув қўйиб, ҳузур билан босиқ пишқириб-пишқириб қўяр эди.

Бешинчи чироқ хира ёниб турар, унинг газетадан қилинган қалпоғига тунги парвоналар келиб урилар, девор орқасида бека кампир оҳиста хуррак тортар, Макар эса ўзига ниҳоятда зарур бўлган, фоятда мاشаққатли тилни сўзма-сўз ўрганиб бормоқда эди... Бир куни ярим кечага яқин дам олиш учун дераза рафига чеккани ўтирди, шунда илк бор хўрозларнинг навосини астойдил эшитди. Диққатини бериб қулоқ солиб танг қолган Макар завқ билан хитоб қилди: «Худди параддагига ўхшайди-я, дивизия кўригидагига ўхшайди-я! Турган-битгани мўъжиза-ку!..»

Ўшандан буён у ҳар кун кечаси хўрозларнинг қичқириқларини кутадиган, тунги куйчиларнинг амирона овозларига ҳузур билан қулоқ соладиган бўлиб, булбулларнинг лирик чақ-чақлари ҳамда наволарини астойдил ёмон кўриб қолди. Ўнга, айниқса Майданикевлар хўрозининг хўрозларнинг умумий хорида хотималовчи аккорд бўлиб хизмат қиласидиган генералча

йўғон овози ёқарди. Аммо кунлардан бир куни у одатланиб қолган ва кўнглида маъқуллаб қўйган қичқириқлар тартиби кутилмаган ҳолда безориларча бузиб юборилди: қудратли хўрзинг йўғон овозидан кейин бирдан яқин орада ён қўшни Аркашка Айирбошчининг қўрасидаги омбор орқасида қандайдир расво, афтидан ёш бир жўжахўрор ўғил болаларга хос олифта чийилдоқ овоз билан қичқириб юбориб, кейин қандайдир бемаъни кекирикдан нафаси тиқилганча макиён-часига узоқ қақолади. Шундан сўнг чўккан жимликда Макар расво жўжахўрзинг қўндоққа ўрнашиб олиш учун қанотларини силкитиб, товуқхонада ти-пирчилаетганини аниқ эшилди, афтидан жўжахўрор қичқираман деб қўндоғидан тушиб кетишдан қўрққан бўлса керак.

Бу қилиқ очиқдан-очиқ интизомни бузиш ва субординация қоидаларига тўла риоясизлик эди. Макарнинг назарида бу нарса, чунончи, чинакам генералдан сўнг унинг гапини тузатмоқчи бўлиб, алла-қандай кўримсиз, бунинг устига дудуқ бўлим командирининг гапириб юборишига ўхшаб кетар эди. Астойдил жаҳли чиққан Макар бундай бемаъниликка чидай олмасди, у қоронғиликка қараб: «Бекор!» деб қичқириди-да, секин сўкинганича деразани ғазаб билан тарақлатиб ёпди.

Эртасига бу воқеа такрорланди, унинг эртасига яна такрорланди. Макар яна икки марта қоронғиликка қараб: «Бекор!» деб қичқириди. Қичқириғидан бека хотин чўчиб уйғониб кетди. Овозлар ва уларнинг янграш вақтлари бамисоли даражама-дараҷа қайд этиб қўйилгандек хўрзларнинг тунги қичқириш тартибларининг бир маромдаги расамади қаттиқ бузилмоқда эди. Макар тун оғиши биланоқ ётиб ухлайдиган бўлиб қолди... У ортиқ шуғулланолмас, аломат сўзларни ёдлай олмас эди. Ўйлари сурбет хўроздан нарига айланиб кетолмас, у ғазаб билан, бу хўроз ҳаётда ҳам, шубҳасиз, худди ўз эгасига ўхшаган бемаъни ва енгилтак бўлса керак, деб ўйлар эди. Макар бегуноҳ паррандани ичиди, аглаҳ, текинхўр, ҳовлиқма, деб сўкарди. Майданиковнинг хўроздидан сўнг қичқиришга журъат қилган қўшни хўрор Макарнинг

калавасиничуватиб қўйди: инглиз тилини ўзлаштириши жуда пастга тушиб кетди, кайфияти ҳам кундан-кунга ёмонлашарди... Бу тартибсизликка барҳам бе-риш пайти етган эди!

Тўртинчи куни эрталаб Макар Аркашка Айирбошчининг қўрасига кириб, совуққина саломлашди-да, сўради:

- Қани, хўрозингни кўрсат-чи.
- У сенга нимага керак бўлиб қолди?
- Турқига қизиқиб қолдим.
- Турқини кўриб нима қиласан?

— Кўрсатсанг-чи! Сен билан ади-бади айтишиб ўтиргани вақтим йўқ!— деди ғижиниб Макар.

У тамаки ўраш билан банд экан, Аркашка қўлида хивич билан омбор тагидан бир гала олачипор чиройли товуқларни аранг ҳайдаб чиқди. Ҳа, ўйлаганича ҳам бор экан! Макарнинг тахминлари тўппа-тўғри чиқди: ўн чоқли олачипор, енгилтак ва беқарор товуқларнинг орасида жуссасизгина, шумшайган, кўкишкул ранг тусли, кўримсизгина хўroz гир-гир айланиб юради. Макар уни намойишкорона нафрат билан кўздан кечириб, Аркашкага шундай маслаҳат берди:

- Бу чала жўжани сўйиб юбор!
- Нимага сўяман энди?
- Угра ошига,— қисқа жавоб берди Макар.
- Нега энди? Рўзғоримда ўзи битта, товуқларга ҳам ўч.

Макар киноюномуз илжайиб, лабларини буриштириди:

— Товуқларга ўчлигидан бошқа иши йўқми? Шу ҳам иш эканми! Аллақаёқдаги бемаъни жўн иш.

— Шундан бошқа ишга кераги ҳам йўқ. Мен у билан полиз ҳайдамоқчимасман. Бир тишли плугни ҳам тортолмайди...

— Бўлди, ҳазилингни қўй! Мавриди келганда ҳазиллашишни мен ҳам биламан...

— Нима, менинг хўрозим сенга кун бермай қўйдими?— энди тоқатсизланиброқ сўради Айирбошчи.— Арпангни хом ўриб қўйдими?

— Хўрозинг аҳмоқ әкан, тартиб деган нарсани билмайди.

— Қанақа тартибни билмайди? Ё кампирингнинг полизига учиб тушаётидими?

— Полизга учиб тушаётгани йўқ, хуллас...

Макар қандай тартиб ҳақида гапираётганини тушунтиришдан ўнғайсизланарди. У оёқларини кериб хўрозга еб юборгудек бўлиб бир дақиқа тикилиб турди, сўнгра миясига шу фикр келиб қолди:

— Менга қара, қўшни,— деди жонланиб у Аркашкага,— хўроларимизни айирбошламаймизми?

— Сенинг от-уловсиз хўжалигингда хўрз нима қиларди?— деб сўради қизиқиб қолган Айирбошли.

— Топилади, бу шумшайгандан тузукроғи ҳам топилади!

— Майли, олиб кел, агар хўрозинг дурустроқ бўлса, айирбошлаверамиз. Мен ўзимникига қийишмайман.

Ярим соатдан сўнг Макар йўл устида кирган бўлиб, Аким Бесхлебновнинг қўрасига бурилди, унинг қўрасида кўпдан-кўп товуғи бор эди. У ёқ-бу ёқдал гаплаша туриб, Макар ҳовлида изғиб юрган товуқларга диққат билан разм солди, хўроларнинг овозларини тинглади. Бесхлебновнинг бешта хўрози ҳам бири-биридан бўйдор, турқлари басавлат, энг муҳими, уларнинг ҳаммаси ҳам дурустгина қичқирадиган, кўринишлари ҳам сипо эди, хайрлашишларидан олдин, Макар таклиф қилди:

— Менга қара, отахон, менга битта хўрозингни сотмайсанми, а?

— Ия, ўртоқ Нагульнов, ахир карам шўрвага товуқ солинса мазалироқ бўлади-ку, хоҳлаганингни танлаб ол, кампирларимнинг товуқлари сон минг.

— Йўқ, менга хўрз керак. Менга қоп ҳам бериб тур, солиб олиб кетай.

Орадан сал ўтмай Макар Аркашка Айирбошлининг ҳовлисида қопнинг оғзини ечмоқда эди. Маълумки, ҳар қандай айирбошга ишқивоз бўлган Аркашка бўлажак мовоза завқидан ҳузур қилиб, қўлларини бир-бирига ишқаганча гапирмоқда эди:

— Кўрайлик-чи, олифтанг қанақа әкан, ҳали ус-

тига пул сўраб қолсак ҳам ажаб эмас. Тезроқ ечсангчи, мунча имиллайсан! Мен ҳозир ўзимнинг хўрзимни тутиб келаман, уриштирамиз, кимнинг хўрзи зўр чиқса, ўша ширинкома олади. Худо ҳақи, бўлган гап шу, бўлмаса мен айирбошламайман! Сенинг хўрзингнинг турқи қанақа? Барвастадан келганми?

— Гвардиячи!— қисқагина минғиллади Макар, қопнинг чандилиб қолган тугунини тиши билан ечаётib.

Аркашка тушиб кетаётган шимини кўтара-кўтара товуқхонага югурди. Бир дақиқадан сўнг у ердан хўрзларнинг жон ҳолатдаги қийқириқлари эшитила бошлади. У ўтакаси ёрилаёзган, ҳаллослаб нафас олаётган хўрзни кўкрагига босганча қайтиб келганда Макар оғзи очилган қоп тепасида гарансиб бошини қашиганича турарди: қанотлари шалпайиб тушган «гвардиячи» жон талвасасида тўқ сариқ думалоқ кўзларини ола-кула қилиб қопда ётарди.

— Унга нима бўлди?— деб сўради ҳайратланган Аркашка.

— Хато кетди!

— Қасал эканми?

— Сенга айтяпман-ку, хўрз важида хато кетди деб.

— Хўрз ҳам хато кетказиши мумкинми? Қизиқ гапларни гапирасан-а!

— Хўрзни айттаётганим йўқ, лақма одам, менинг мўлжалим хато кетди. Олиб келаётсам, қопдан туриб қичқирмоқчи бўлиб қолди, мени эл-юртнинг кўзи олдида шарманда қилаёзди,— правлениенинг олдидан ўтаётган эдим,— хўш, салгина бошини бир томонга буриб қўйган эдим... салгина буриб қўйган эдим-а, буни қара, иш бунақасига айланиб кетиби. Дарров болта олиб чиқ, бўлмаса беҳудага ҳаром қотади.

Боши чопилган хўрзни Макар четан оша улоқтириб, оstonада ивирсиб юрган бекасига қичқирди:

— Ҳой, онажон! Эти совимасдан патини юл, эртага угра пиширасан!

У Аркашкага ҳеч нарса демай, яна Бесхлебнов-никига борди. Чол бошда: «Бунақада ҳамма товуқла-

римни тул қолдирасан!» деб тихирлик қилди, аммо кейин ҳар қалай яна бир хўрозини сотди. Аркашка билан айирбошлаш амалга ошди, бир неча дақиқадан сўнг эса Аркашканинг калласиз хўрози четандан ошиб тушди, унинг орқасидан ниҳоятда мамнун Макар кампирга қичқирди:

— Мана бу ярамасни ол, ол, онажон! Интизомсиз иблисни юлқиб ташла-ю, дарров қозонга тиқ!

У каттакон ва зарур бир ишни амалга оширган кишидек кўчага чиқди. Аркашканинг хотини бошини аламли ўқинч билан чайқаганча уни кўзлари билан кузатиб қолди, у қўраларида Макар хўrozларга берган қонли жазодан ҳайратланган эди. Унинг сассиз саволига жавобан Аркашка шаҳодат бармоғини пешонасига олиб бориб, уни у ёқ-бу ёққа чайқатди-да, пицирлади:

— Ақлдан озибди! Яхши одам эди, ақлдан озибди. Астойдил жинни бўлиб қолганга ўхшайди. Бечора кечалари билан ўтиради-я. Инглиз тили бошига етибди, лаънати!

Елғизлика мардона бардош бераётган Макар ўшандан бўён кечалари билан хўrozларнинг куйлашларини монесиз эшитадиган бўлиб қолди. У кун бўйи далада хотин-халаж ва болалар билан бирга ғалла ўтоғида ишлаб, кечқурунлари эса ёвғон карам шўрва билан сут ичиб овқатлангач, инглиз тили ўргатадиган дарслликка мук тушиб, сабр билан ярим тунни кутарди.

Ҳадемай унга Шчукарь бобо ҳам келиб қўшилди. Бир куни кечқурун эшигини оҳиста тақиллатиб, сўради:

— Қирсам мумкинми?

— Қир. Нимага келдинг? — совуққина савол билан кутиб қолди уни Макар.

— Нима десам экан... — чайналди Шчукарь бобо. — Эҳтимол, мен сени жуда қўмсагандирман, Макарушка. Кел, кириб бир хабар олиб чиқай, дедим.

— Нима, сен хотин кишимидингки, мени қўмсайсан?

— Қари одам гоҳо хотин кишидан баттар одам қўмсаб қолади. Менинг ишим мутлақо диққинафас: айғирларнинг олдидан жилмаганим-жилмаган. Бу

тилсиз махлуклар меъдамга тегиб кетди! Сен, чунончи, ундан ширин сўзингни аямай гапирсанг, бошини кўттармай сулисини туширганча, думини силкитади. Бунинг менга нима нафи бор? Бунинг устига жин урган такани айтмайсанми! Бу дарранда қай вақтда ухлар экан, Макарушка? Қечаси кўзингни юмдинг дегунча — лаънати тумшугингнинг тагида ҳозири нозир. Бир неча марта уйқуда ётганимда туёғи билан босиб олса бўладими! Ўтакамни ёриб юборади, ана шундан кейин кўзимни ўйиб олиб ташласанг ҳам ухлай олсам ўлай агар! Шунақанги лаънати, ярамас дарранда эканки, сира кўз очирмайди! Туни бўйи отхона билан пичанхонани изғиб чиқади. Уни сўйиб қўя қолмаймизми, Макарушка?

— Ҳой, бу гапларингни йиғишитир! Правлениенинг такалари менинг тасарруфимда эмас, улар Давидовнинг ихтиёрида, ана ўшанга бор.

— Худо сақласин, мен така жидан эмас, сени кўриб кетгани келдим, менга биронта қизиқроқ китоб берсанг, ёнингда инида ётган сичқондек жимгина ўтираман. Сенинг кўнглинг ҳам хуш бўлади, менинг кўнглим ҳам. Мен сенга жичча ҳам халал бермайман!

Макар ўйлаб кўриб рози бўлди. Шчукарга рус тилининг шарҳли лўгатини бераётиб деди:

— Майли, ёнимда ўтира қол, ўқигин-у, ичингда ўқигин, лабингни ҳам чапиллатма, йўталма, аксирма — хуллас унингни чиқарма! Менинг командам билан тамаки чекамиз. Вазифа тушунарлими?

— Ҳаммасига розиман, аммо аксириш масаласи нима бўлади? Бирдан жин уриб аксиргим келиб қолса, унда нима бўлади? Вазифам шунаقا бўлганидан бурнимнинг катаги доим пичан тўпон билан тўла бўлади. Гоҳо уйқумда ҳам аксириб юбораман. Унда нима қиласиз?

— Ўқ бўлиб даҳлизга учиб чиқасан!

— Эҳ, Макарушка, ўқ бўлганда ҳам расво, занглаган ўқман! То даҳлизга югуриб чиққунимгача йўлйўлакай ўн марта аксириб, беш марта бурун қоқиб оламан.

— Сал шошилгин-да, чол!

— Бир қиз эрга тегишга шошилибди-ю, куёв то-пилмабди. Бир сахий одам топилиб, ҳожатини осон қилибди. Никоҳланмаган қиз оқибатда нима бўпти дегин? Ажабтовур жувон бўпти! Мен ҳам шу кунга тушишим турган гап: шошиб кетаётгиб йўл устида бир бало қилиб қўйсам нима бўлади, сен унда мени бу ердан ўша заҳоти ҳайдаб чиқарасан, гапнинг сираси-ни айтяпман!

Макар кулиб юбориб, деди:

— Сал эвидароқ югургин-да, обрўйингни эҳтиёт қил. Хуллас, гап шу: овозингни ўчириб, мени ишдан қўйма, мутолаа қилиб, маданий чол бўл.

— Яна бир савол берсам мумкинми? Қовоғингни осилтирма, Макарушка, охирги саволим.

— Хўш? Тезроқ бўл!

Шчукарь бобо сўрида ийманиб ижирғанди-да, чайналиб гапирди:

— Биласанми, яна нима гап бор... Ўзи унчалик унақа эмас-у, аммо бироқ, бу ишимдан кампирим хафа бўлгани-бўлган, «Ўхлатмайсан!» дейди. Қошки бу менинг ихтиёrimда бўлса?

— Муддаони гапириб қўя қолсанг-чи!

— Анави нарсани гапиряпман-да. Чуррам туш-ганиданми, ёинки бирон бошқа дардданми, қорним ёмон қулдирайди, булутли кундаги момақалдироқдек гулдирайди! Сен билан биз унда нима қиламиз? Ахир бу ҳам машғулотдан алақситади-ку?

— Даҳлизга югурасан, ҳеч қандай момақалдиро-ғу чақмоқ бўлмасин! Вазифа тушунарлимис?

Шчукарь индамай бош силкиб, оғир хўрсинди-да, лугатни очди. Ярим тунда у Макарнинг раҳбарлигига ва унинг тушунтиришларидан фойдаланиб, илк марта хўрзларнинг қичқиришларига яхшилаб қулоқ солди. Ўч кундан кейин эса улар биргаликда ёнма-ён дераза рафига чўзилганларича ётардилар, Шчукарь бобо завқ билан шивирлар эди:

— Ё раббий, ё раббий! Умрим бўйи бу хўрзлар-ларнинг думини босиб, кичкина болалигимдан товуқ-ларнинг ёнида катта бўлган бўлсам ҳам, уларнинг бу-нақа чиройли сайрашларини пайқамаган эканман. Ҳа, энди маъносига тушуниб олдим! Макарушка, Май-

данниковнинг иблисининг олишини қара-я? Худди генерал Брусиловнинг ўзи, вассалом!

Макар қошини чимириб, вазминлик билан шивирлаб жавоб берарди:

— Ол-а! Бизнинг генералларимизга қулоқ солсанг-чи, бобо,— мана буларнинг овозларини овоз деса бўлади! Сенинг Брусиловинг нима экан? Биринчидан, собиқ чор генерали — демак, мен учун шубҳали, шахс, иккинчидан, кўзойнак таққан зиёли. Овози ҳам, ажаб эмаски, Аркашканинг биз еб юборган хўрозининг овозига ўхшаган бўлса. Овозларга ҳам сиёсий нуқтаи назардан баҳо бериш керак. Мана, чунончи бизнинг дивизиямизда бир йўғон овозли одам бор эди — йўғон овоз бўлганда ҳам бутун армияга татигудек эди! Оқибатда аплаҳ чиқиб қолди: душманларга ўтиб кетди. Ана ўша мен учун ҳали ҳам йўғон овоз эгаси-лигича қолди деб ўйлайсанми? Бекор айтибсан! У энди менга йўғон овоз эгаси эмас, чийилдоқ бир сотқин, холос!

— Макарушка, аммо хўрозларга сиёсатнинг даҳли йўқ шекилли? — ботинмай сўради Шчукарь бобо.

— Хўрозларга ҳам даҳли бор! Майданниковнинг хўрози ўрнида биронта кулакнинг хўрози бўлса — мен у текинхўрнинг овозига ўла қолсам ҳам қулоқ солмас эдим! Кулакнинг думига тоқатим бор эканми!.. Хўп, ҳангамани тўхтатайлик! Сен ҳам ўз китобинги ол, мен ҳам ўзимнигини олай, бўлар-бўлмас саволлар билан алақситаверма. Акс ҳолда, юз хотир қилмай ҳайдаб чиқараман!

Шчукарь бобо хўрозлар қичқиригининг астойдил ишқивози ва муҳлиси бўлиб қолди. Макарни Майданниковнинг хўрозини бориб кўришга унатган ҳам ўзи эди. Улар иши бор кишилар бўлиб, Майданниковнинг қўрасига киришди. Кондрат далада май шудгорини кўтараётган экан, Макар унинг хотини билан гаплашди, гап орасида нима учун ўтоқча чиқмаганини сўради, ўзи эса ҳовлида савлат тўқиб юрган хўрозни диққат билан кўздан кечиради. Хўроз жуда ҳам сипо ва басавлат, тўқ сариқ патлари ҳашаматли эди. Макар кўрикдан мамнун бўлди. Ён эшикдан чиқаётib

уни ичига тушган Шчукарни тирсаги билан туртиб, сўради:

— Қалай?

— Таровати ҳам овозига муносиб. Хўроз эмас, архирей!

Ухшатиш Макарга сира ҳам ёқмади, аммо у индамади. Улар правлениега яқинлашиб қолганларида Шчукаръ кўзлари қинидан чиқаёзиб, Макарнинг гимнастёркаси енгига ёпишиди:

— Макарушка, сўйиб қўйишлари мумкин!

— Кимни?

— Кимни бўларди, хўрозни-да, худо ҳақи! Бехосдан сўйиб юборишлари ҳеч гапмас! Сўйиб қўйишмаса эди!

— Нега сўйишади энди? Нима сабабдан? Гапингга тушунолмаяпман, нима деб валақляяпсан?

— Нимасига тушунмайсан? Хўроз чириб кетган эски гўнгдан ҳам қари, ёши мен билан тенг келиб қолади, ажаб эмаски, мендан ҳам катта бўлса. Мен бу хўрозни болалигимдан бери биламан!

— Ёлғон гапирмасанг-чи, бобо! Хўроздар етмиш йиллаб умр кўрмайди, табиат қонуиларида бу тўғрида ҳеч нарса дейилган эмас, тушундингми?

— У бари бир қари, энгагидаги ҳамма пати оқариб кетган. Ё сенинг кўзинг тушмадими?— қизишиб эътиroz билдириди Шчукаръ бобо.

Макар пошнасида шартта тез бурилди. У шу қадар катта қадам ташлаб тез елиб кетмоқда эдики, Шчукаръ унга етиб оламан деб ўқтин-ўқтин зинғиллаганича югуради. Бир неча минутдан сўнг улар яна Майданниковнинг ҳовлисига кириб келишди. Макар Лушкадан хотира бўлиб қолган, хотинлар тутадиган уқали дастрўмолча билан пешонасидаги терни артар, Шчукаръ эса ярим кун тулкининг изидан қувган този итдек оғзини катта очиб, ҳаллослар эди. Унинг сапсар ранг тилидан соқолига томчи-томчи бўлиб тиниқ сўлак оқиб тушарди.

Кондратнинг хотини очиқ юз билан жилмайганча буларнинг олдига келди.

— Бирон нарсани унтутиб қолдирибсизларми?

— Сенга шуни айтиш ёдимдан кўтарилибди, Прокхоровна: сен хўрозингни сўйиб юрмагин.

Шчукарь бобо савол алматидек букилиб, қўлини олдинга чўзди-да, кир бармоғини силкиганча, нафаси чиқмай ҳансира башаққат билан гапирди:

— Худо кўрсатмасин!..

Макар унга норозилик билан қия қараб қўйиб, гапида давом этди:

— Биз колхозда унинг наслини кўпайтириш учун сендан сотиб олмоқчимиз, ёки айирбошлармиз, чунки турқига қараганда насли зотдорга ўхшайди, ажаб эмаски, бизда янги зот товуқлар урчитиш учун аждодлари биронта Англия ёинки шунга ўхшаган Голландиядан олиб келинган бўлса, қаншарида ғурраси бор голланд ғозлари бўладими? Бўлади. Эҳтимол, бу хўрозд ҳам голланд миллатидандир,— сен буни билмайсан-ку? Хўш, мен ҳам билмайман, бинобарин, уни зинҳор-базинҳор сўйиш мумкин эмас.

— У насл урчитишга ярамайди, жуда қариб қолган, биз уни Троицага сўйиб, ёш хўрозд сотиб олмоқчи эдик.

Бу гал, нима девдим, дегандек, Макарни Шчукарь бобо тирсаги билан туртди,— аммо Макар унга эътибор қилмай, хотинга уқтиришда давом этди:

— Қарилиги — айб эмас, бизга насл урчтиб беради, ароқда ивитилган буғдој билан боплаб боқсак, товуқларга хушомад қиласвериб, титиқларини ўйнатиб юборади! Хуллас, бу қиммат баҳо хўрозни зинҳор-базинҳор йўқ қилиш мумкин эмас. Вазифа сенга равшан бўлдими? Хўп, дуруст! Ёш хўрозни бўлса, Шчукарь бобо сенга шу буғуноқ олиб келиб беради.

Макар ўша куниёқ Демка Ушаковнинг хотинидан рўзгоридаги ошиқча хўрозни нархини келиштириб олиб, уни Шчукарь бободан Майданниковага бериб юборди.

Шу билан охирги тўсиқ ҳам бартараф қилингандек эди. Аммо шу орада хутор бўйлаб, Макар Нагульнов нима ният биландир ҳамма ердаги хўроларни каттакатта пул бериб, чакана-улгуржисига сотиб олаётганимиш, деган ҳазиломуз овоза тарқалди. Ҳазил-

мазахни яхши кўрадиган Размётновнинг шундай во-
кеага аралашмай четда қолиши мумкинмиди? Дўсти-
нинг аломат ишини эшитгач, буни ўзи шахсан текши-
риб, суриштириб кўрмоқчи бўлиб, кечқурун аллама-
ҳалда Нагульновнинг квартирасига кириб келди.

Макар билан Шчукарь бобо қалин-қалин китоб-
ларга энгашганларича, столда ўтиришарди. Пилиги
ниҳоятда баланд қилиб қўйилган чироқ буриқсимиқда
эди. Хонада қоракуялар учиб юрар, лампа шишага
кийдириб қўйилган қофоз қалпоқдан куюнди ҳиди ке-
лар, бошлангич мактабнинг биринчи синифидагина ҳус-
ниҳат дарси вақтида ҳукм сурадиган жимжитлик ҳукм
сурмоқда эди. Размётнов эшикни тақиллатмасдан ки-
риб, оstonада турганча йўталди, ҳафсалা билан му-
толаа қилаётганларнинг биронтаси ҳам унга эътибор
қилмади. Шундан сўнг Размётнов кулгисини аранг
тийиб, баланд овоз билан сўради:

— Ўртоқ Нагульнов шу ерда турадими?

Макар бошини кўтариб Размётновнинг юзига диқ-
қат билан тикилди. Йўқ, тунги меҳмон маст эмасди,
аммо лаблари қаҳ-қаҳлаб юборгудек бўлиб учиб ту-
риди. Макарнинг кўзлари хира чақнаб, чимирилди.
У бамайлихотир шундай деди:

— Сен Андрей, гап сотиб ўтиргани қизларнинг
олдига бор, кўриб турибсанки, менинг сен билан бе-
ҳуда вақт ўтказишга иложим йўқ.

Макар унинг хушчақчақ кайфиятига шерик бўли-
шига мойил эмаслигини кўргач, Размётнов сўрига
ўтириб чекаркан, жиддий тусда сўради:

— Йўқ, очигини айт: уларни нима учун сотиб ол-
динг?

— Угра билан карам шўрва пишириш учун. Сен,
уларни Макар хутордаги ойимқизларга мороженое
қилиб беради, деб ўйлаганимидинг?

— Мороженое қилиб беради, деб ўйлаганим йўғу,
албатта, аммо акабландим: шунча хўрозни нима қи-
лар экан, яна келиб-келиб хўрозларни танлабди, деб
ўйладим.

Макар жилмайди:

— Уграга солинган хўрозларнинг тожисини ёқги-
раман вассалом. Сен-ку менинг харидларимдан ажаб-

ланибсан, мен бўлсам, Андрей, шунга ажабланяпманки — сен нега ўтоқقا чиқмаяпсан?

— Мени у ерга чиқариб нима қилмоқчисан? Хотин-халажни кузатиб туришим керак бўлса — бу ишга бригадирлар қўйиб қўйилган.

— Кузатиш эмас, ўзинг ҳам ўтоқ қилишинг керак.

Размётнов қўлларини силтаб, хушчақчақлик билан кулиб юборди.

— Нима, мен уларга қўшилициб индов юлишим керакми? Э, бекорларни айтибсан, оғайни! Бу эркакларнинг иши эмас, қолаверса, кимсан қишлоқ советининг раиси бўлсам.

— Катта кетмай қўя қол. Катта кетгудек катталардан эмассан! Нима учун мен улар билан бирга индовми, бошқа бегона ўтларни юлишар эканман-у, сен юлолмас экансан?

Размётнов елкасини қисди.

— Гап унда эмас, казакларнинг олдида иснодга қолмоқчи эмасман.

— Давидов ҳеч қандай ишдан ҳазар қилмайди, мен ҳам. Нима учун сен фурожкачангни қийшиқ қўнқайтириб олганингча, кун узун-кун идорангда ўтирасан, ёинки ийиги чиққан латта портфелингни қўлтифингга тиқиб хутор бўйлаб ҳовлиқканча изғийсан? Нима, оиласвий аҳвол ҳақида справка керак бўлиб қолса секретаринг бериб юборолмайдими? Сен, Андрей, бу қилиқларингни ташла! Эртагаёқ биринчи бригадага чиқиб, гражданлар урушининг қаҳрамонлари қандай ишлай олишларини хотин-халажга кўрсатиб қўй!

— Нима, эсингни едингми ёки ҳазиллашяпсанми? Уриб ўлдирсанг ҳам чиқмайман! — Размётнов тамаки қолдигини жаҳл билан улоқтириб, скамъядан сапчиб турди. — Қалака бўлишни истамайман! Ўтоқ — эркакларнинг иши эмас! Қараб турсам, ҳали бориб картошка чоп ҳам дерсан?

Макар столни қалам билан бамайлихотир чертганча гапирди:

— Партия қандай ишга юборса, ўша эркакларнинг иши. Чуночи менга: бор, Нагульнов, контраларнинг калласини чоп, дейишса,— жон-жон деб бораман! Бориб картошка чоп, дейишса жон-жон деб бўлмаса ҳам-

ки, бераман. Сут соғувчи бўлиб, бориб сигир соғ, дёйишса, тишимни-тишимга қўяману, бари бир бораман! Ўша лаънати сигирнинг эмчагини у ёққа тортқилаб, бу ёққа тортқилаб қўлимдан келганича соғавераман!

Ҳовридан тушган Размётновнинг чеҳраси очилди:

— Ўзи ҳам, сенинг панжанг билан сигир соғадигандада. Сен уни бир зумда ер парчин қилиб қўясан-ку!

— Ер парчин қилиб қўйсам — яна турғизиб қўяман, аммо охирги томчи сутини сирқитиб олмагунимча, узил-кесил ғалабагача соғавераман. Тушундингми? — Унинг жавоб беришини ҳам кутмасдан ўйчанлик билан давом эттириди: — Сен бу ишни ўйлаб кўр, Андрюха, эркаклигину казаклигинг билан унча мағрурланма. Бизнинг партиявий номусимиз бундан иборат эмас, мен шундай деб тушунаман. Тунов куни янги секретарь билан учрашгани кетаётсан, йўлда Тубянской ячейкасининг секретари Филоновга дуч келиб қолдим, у мендан «Йўл бўлсин, райкомга эмасми?» деб сўради. Райкомга, дедим. «Янги секретаргами?» Ўшанинг олдига, дедим. «Хўп, бўлмаса бизнинг пичанзорга бурил, ўша ерда». Қамчини билан йўлнинг чап томонини кўрсатди. Қарасам: шифиллатиб пичан ўришяпти, олтита лобогрейка ўряпти. Эсларингни едиларингми, бунча барвақт ўроққа тушиб, дедим. У: «Бу пичан эмас, яккаш бурган билан бало-баттар қушқўнмас, шуларни ўриб силос қилишга қарор бердик» деди. Ўзларинг қарор қилдиларингми, деб сўрадим мен. У менга: «Йўқ, кечак секретарь келиб, ҳамма далаларимизни айланиб чиқди-да, шу бурганга дуч келиб қолганда, бурганни нима қилишимизни сўраб қолди. Биз, шудгор қилиб бостириб юборамиз, деган эдик, кулиб бостириб юбориш ақлдан эмас, ўриб силос бостиранглар жўялик бўлади, деди» деб жавоб берди.

Макар Размётновга синовчан назар билан тикилганча индамай қолди.

— Сен уни кўрдингми? — сабрсизлик билан сўради Размётнов.

— Бўлмаса-чи! Йўлдан бурилиб, икки километрча нарига борсам — иккита бричка турибди; бир чол ўт

ёқиб, бўтқа пиширятти: ҳўқиздек баҳайбат бадбашара бир йигит бричканинг тагида товонини қашиб новда билан пашша қўриб ётибди. Секретарга ўхшамайди: оёқ яланг, башараси ҳам — ғалвирдек. Секретарни сўрасам — йигит тиржайди. «У эрталаб лобогрейкада ўрнимга ўтирганча, далани гир айланиб пичан ўряпти» деди. Отдан тушиб, уни бричкага боғладим-да, ўроқчиларнинг олдига бордим. Биринчи лобогрейка ўтиб кетди, унда похол қалпоқ, тердан тўзиб йиртилган кўйлак билан арава мойидан яғир каноп шим кийган чол ўтирибди. Ўз-ўзидан равшанки — секретарь эмас. Иккинчисида сочи олинган, кўйлаксиз йигит ўтирибди, терлаб кетганидан устидан мой қуйганга ўхшайди, офтобда қиличдек ялтирайди. Албатта, секретарь бўлмаса керак, деб ўйладим. Секретарь яланғоч бўлиб ўроқ машина ҳайдамайди. Пайкалга қарасам, қолгандари ҳам яланғоч! Ана холос, булардан қайси бири секретарь эканлигини билиб ол-чи! Зиёли қиёфасидан таниб оламан деб, ҳаммаларини олдимдан ўтказиб юбордим,— жин урсин, қани энди таниб ололсам! Ҳаммалари ярим белларигача яланғоч, ҳаммалари бир мирилик чақадек бир хил, биронтасининг пешонасига, секретарь шу, деб ёзиб қўйилмаган. Ана сенга зиёлича қиёфа! Ҳаммасининг қиёфаси ҳам зиёлига ўхшайди. Энг паҳмоқ попнинг соч-соқолини тақир олиб, солдатлар чўмилаётган ҳаммомга киргазиб юборгин — топа олармикансан? Унда ҳам шундай бўлди.

— Сен, Макарушка, аҳли динга тил тегизма: гуноҳ бўлади!— ботинмай илтимос қилди, шу вақтгача фиқ этмай ўтирган Шчукаръ бобо.

Макар унга қаҳр билан қараб қўйиб, гапида давом этди:

— Мен бричкаларнинг олдига қайтиб келиб, ҳалиги йигитдан: ўроқчилардан қайси бири секретарь, деб сўрадим. У бадбашара лаҳма, кўйлаксизи секретарда, деди. Мен унга: кўзингга пашшалар ўтириб хира қилиб қўйибди, артиб ол, ўроқ машинасидагиларнинг чолдан бошқа ҳаммаси яланғоч, дедим. У бричканинг тагидан чиқиб, кўзларини ишқалаб, қаҳқаҳлаб кулиб юборса бўладими! Мен ҳам қараб кулиб юбордим: мен бричкаларнинг олдига етиб келгунимча

бобо ҳам кўйлаги билан қалпогини ечиб ташлабди, битта шимда ҳаммадан олдинда кетяпти, ярғоқ боши ялтирайди, шабада оппоқ соколини елкасидан ошириб юборяпти, бурганнинг устидан худди оққушдек сузиб кетяпти. Ҳа, ана холос, дедим. Райком секретари уларга шаҳардан қизиқ расм олиб келибди — далада яланғоч изғиб юришибди, бу ориятсиз янги расмга шарти кетиб, парти қолган чонни ҳам эргаштиришибди. Бадбашара йигит мени уларнинг олдига олиб бориб, секретарни кўрсатди. Мен унга яқинлашиб, ўроқ машинанинг ёнига борганча, ўзимни танитдим. Сиз билан танишиш учун райкомга кетаётган эдим, дедим, у бўлса кулиб юборди-да, отларни тўхтатиб: «Ўтири, отларни ҳайдай, пичан ўриб, шу баҳона билан сен билан танишиб ҳам оламиз, ўртоқ Нагульнов» деди. Отларни ҳайдайтган йигитчани ўриндиқдан тушириб юбориб, ўрнига ўтиридим-да, отларни чуҳладим. Хўш, тўрт марта айлангунимизча танишиб олдик... Оламшумул йигит экан! Бизда ҳали бунаقا секретарлар бўлган эмас. «Мен сизларга Ставрополдагилар қандай ишлашларини кўрсатиб қўяман! Сизларда чоловорга лампас тақиб юришади, бизда ўроқни яхши ўришади» деб кулади. Мен унга, ишни ким дўндиришини ҳали кўрамиз: керилган гар-гар кекиради, куюнчакни фам куйдиради, дейман. Ҳамма гапни бир-бир сўраб олди, кейин: «Ўйингга қайтавер, ўртоқ Нагульнов, ҳадемай сиз томонга бораман» деди.

— Яна нималар деди? — қизиқиб сўради Размётнов.

— Бошқа унча арзийдиган гапларни гапиргани йўқ. Ҳа, Хопровни ҳам сўради: активист эдими, ёки йўқми деди. Активист қаёқда, активист эмас, бир дардисар эди, дедим.

— У нима деди?

— Уни нима учун, яна хотини билан бирга ўлдиришди экан, деб сўради. Кулакларга ўлдириш учун баҳона камми, дедим. Уларга ёқмай қолган бўлса ўлдиришгандир-да, дедим.

— У нима деди?

Ғўра олма егандек лабларини буриштириб қимир-

латди-да, бир нарса дедими ёки йўталдими: «ҳм, ҳм»-лаб очиқ бир гап айтмади.

— Хопровлар тўғрисидаги гапни қаёқдан эшилди экан?

— Ким билади дейсан. Район ГПУсидагилар айтишганга ўхшайди.

Размётнов индамай яна бир папирос чекди. У нима ҳақдадир диққат билан ўйлардики, ҳатто Нагульновнинг олдига нима мақсадда келганини ҳам унтиб қўйди. Макар билан хайрлашаётуб, унинг кўзига жилмайганча тик қараб гапирди:

— Эс-хушимни йиғиб олдим! Эртага тонг отаротмас биринчи бригадага чиқаман. Хотиринг жам бўлсин, Макар, ўтоқда астойдил ишлайман. Якшанба куни сен менга яримта ароқ олиб берасан, шуни билиб қўй!

— Агар яхши ўтоқ қиласанг, олиб бераман, бирга ичамиз. Фақат эртага барвақтроқ чиқиб кет, ишга чиқиш важида хотин-халажга ибрат кўрсат. Хўп, оқ ўйл!— тилали Макар ва яна мутолаага киришди.

Ярим кечага яқин хоторни чулғаган осойишта жимжитликда Шчукарь бобо икковлари хўрозларнинг илк қичқириқларини тантана билан тингладилар, уларнинг бир маромдаги қичқириқларидан ҳар қайсилари ўзларича завқландилар.

— Худди архирей черковидагига ўхшайди!— аъзо́йи бадани эриб кетганидан ҳузур билан шивирлади Шчукарь.

— Худди суворийларнинг сафидагига ўхшайди!— деди Макар, чироқнинг дуд босган шишасиға ширин хаёл билан боқаркан.

Бу аломат ва гаройиб ишқивозлик шундай бунёдга келди, тез орада Макар шу ишқивозлиги туфайли жонидан ажрашига сал қолди.

V БОБ

Бригадага Давидовни Размётновнинг ўзи кузатмоқда эди. Ўша ёқа арава кетаётган эди: қўшчиларга колхоз омборидан озиқ-овқат, хонадондагилар брига-

дада ишлаётганларга алиштириб олишлари учун ич кийим, унча-мунча уст кийим жўнатишаётган эди.

Давидов саргайиб олапес бўлиб қолган этикдаги оёқларини осилтириб, чоллардек буқчайганча атрофга лоқайд назар ташлаб бричкада ўтиради. Елвагай ташлаб олган пиджагини курак суюклари туртиб чиққан, у анчадан бери сочини текислатмаган, патила-патила қора соchlари гарданига бостириб кийган кепкаси остидан қорамағиз йўғон бўйнига, пиджагининг яғир ёқасига тушиб турар эди. Унинг бутун қиёфасида қандайдир ёқимсиз ва аянчли бир нарса бор эди...

Размётнов унга разм соларкан, қаттиқ оғриқдан ижирғангандек юзини буриштириб, ўйлади: «Лушка унинг роса ийифини ўйнатибди-ку! Вой лаънати жувон-эй! Шундай йигитнинг тобини олиб қўйибди-я, кўриб раҳминг келади! Ишқ-муҳаббат деган нарса биздақаларни шу кўйга соларкан: ажабтовор одам эди, карамнинг ўзагидек сўлиб, шумшайиб қолибди».

Ишқ-муҳаббатнинг нима кўйга солиши ҳар кимга аён бўлмаса ҳам Размётновга жуда яхши аён эди. У Марина Поярковани, бошидан ўтган яна баъзи нарсаларни эслаб, ҳасрат билан хўрсинди-да, хушчақчақ жилмайиб, қишлоқ советидан хабар олгани кетди. Ярим ўйлда унга Макар Нагульнов дуч келиб қолди. Ҳар вақтдагидек совуқ, саранжом, бенуқсон ҳарбийча хатти-ҳаракатини бир оз кўз-кўз қиласидан Нагульнов индамасдан Размётновга қўлинини чўзди, кўчадан узоқлашиб бораётган аравани боши билан ишора қилди.

— Уртоқ Давидовнинг қандай аҳволга тушиб қолганини кўрдингми?

— Ориқлаброқ қолибди,— чап бериб жавоб қилди Размётнов.

— Мен ҳам унга ўхшаб юрган вақтларимда кундан-кунга ориқлардим. Уни гапириб ўтираса ҳам бўлади — ирвоқ! Фотиҳасини ўқиб, тобутга чўзилтирверсанг бўладигандек! Менинг квартирамда исhtiқомат қилиб турганида, хотинимнинг қандай расвоматах эканини кўрган эди, ўзининг кўз ўнгида бу оиласиий контра билан уруш олиб борардим, мана

энди келиб-келиб ўзи дучор бўлиб ўтирибди! Дучор бўлганда ҳам унча-мунча дучор бўлмабди! Бугун кўриб, ишонасанми, юрагим эзилиб кетди: ориқлаб кетибди, ҳаммадан гуноҳкордай, кўзлари олазарак, чоловорини, худо ҳақи нима тутиб турганига ҳам ҳайронман! Йигит бечора рўйи рост нобуд бўлиб кетяпти! Менинг бу собиқ рафиқамни қишининг кунидаёқ кулакка чиқариб, Тимошка Тиртифи билан совуқ ўлкаларга жўнатиб юбориш керак эди. Эҳтимолки, ўша ёқларда ҳовридан тушармида.

— Мен бўлсам, сен билмасанг керак деб юрарканман...

— Ҳе! «Билмасанг керак» эмиш! Ҳамма билади-ю, мен билмайманми? Кўзимни чирт юмиб олган эканманми? Менга қолса, жин урган ким кўрган билан илиқишиб юрмайдими, аммо у аглаҳ менинг Давидовимга тақилмасин, менинг қадрдан ўртоғимни хароб қилмасин! Ҳозирги пайтда кўндаланг турган масала шундан иборат.

— Уни огоҳлантириб қўйсанг бўларди. Нега индамадинг?

— Огоҳлантиришдан ўнғайсизландим-да! Ажаб эмаски, мени рашки келганидан айнитяпти, деб ўйлаши ёинки кўнглига яна бошқа гаплар келиши мумкин эди. Мана сен бу ишдан холис одамсан, нега ўзинг индамадинг? Нега уни қатъий огоҳлантирмадинг?

— Ҳайфсан эълон қилибми? — жилмайди Размётнов.

— Агар шалвираб юрадиган бўлса ҳайфсанни бошқа жойда ҳам олаверади. Аммо сен билан биз, Андрей, уни ўртоқларча огоҳлантириб қўйишимиз керак, бу ёғига тоқат қилиб бўлмайди. Лушка — шундай бало-қазоки, Давидов у билан бўлса жаҳон революциясини кўриш у ёқда турсин, мутлақо тил тортмай ўлади-қолади. Ёинки сил юқтириб ажалга ошна бўлади, ға деч тча шунга ўхшаган бирон заҳмга гирифтор бўладис бўлиб! Мен хотинимдан қутулганимдан кейин худди қлиқдан янги туғилгандек бўлдим: ҳеч қандай таносил каълларидан қўрқмайман, инглиз тилини bemalol ўрганилман, ҳеч қандай муаллимлар-

нинг ёрдамларисиз, ўз ақл-фаросатим билан кўп нарсаларни билиб олдим, партиявий ишларни ҳам тартиб билан олиб кетяпман, бошқа ишлардан ҳам ўзимни олиб қочаётганим йўқ. Хуллас, бўйдоқ бўлиб олганимдан бери қўл-оёғим ўзимнинг ихтиёримда, миям ҳам жойида. Хотиним билан биргалигимда ароқ ичган одамдек ҳар куни эрталаб бошим оғриб турардим. Хотин зоти биз революционерлар учун, мен сенга айтсам, оғайни, халқ учун афюн! Мен бу иборани уставга йирик-йирик ҳарфлар билан ёзиб қўярдим, токи ҳар бир партия аъзоси, ҳар бир чинакам коммунист ва ҳайриҳоҳ бу улуғ иборани ҳар кун ётар олдидан ҳам, эрталаб оч наҳорга ҳам уч мартадан ўқисин. Ана ўшанда ҳеч қандай жин урган ҳам ҳозир қимматли ўртоғимиз Давидов тушиб турган кунга тушмас эди. Ақалли ўзинг эслаб кўр, Андрей, турмушда бу лаънати хотин зотидан қанчадан-қанча яхши одамлар панд еди! Сон-саноғи йўқ! Уларнинг дастидан қанчадан-қанча пуллар исроф қилинган, уларнинг касофатига қанчадан-қанча ароқхўрлар пайдо бўлди, улар нинг дастидан туппа-тузук йигитларга партиявий йўл билан қанчадан-қанча ҳайфсанлар берилди, уларнинг касофатига қанчадан-қанча одам турмаларда ўтирибди — ўтаканг ёрилади.

Размётнов ўйланиб қолди. Улар узоқ ва яқиндаги хотираларини, ҳаёт йўлларида учраган хотинларни эслаб хийлагина индамай боришиди. Макар Нагульнов бурун катакларини кериб, юпқа лабларини қимтигансча, кифтларини ростлаб, худди сафда кетаётгандек шаҳдам қадам ташлаб бормоқда эди. У туриш-турмуши билан пинагини бузмайдиган сипо одамнинг тимсоли эди. Размётнов эса йўл-йўлактй гоҳ жилмаяр, гоҳ шахт билан қўлини силтар, гоҳ жингалак сарғиш мўйловини бураб қўяр, гўқ мушукдек қўзларини сузар, баъзан афтидан гоҳ у, гоҳ бу хотин эсига тушиб кетганиданми, гўё каттакон қадаҳдан ароқ ичаётгандек томоғини қириб қўяр, шунда узоқ-узоқ давом эта-диган сукутлар орасида мужмалгича хитоб қиласди:

— Ҳа-ҳа! Вой, лаънати хотин-эй! Ана холос! Қуриб кетгурни қара-я!

* * *

Гремячий Лог аллақаёқдадир орқада қолди, қияликтининг орқасида гойиб бўлди, кўз илғамайдиган бепоён дашт Давидовни ўз бағрига олди. Ут-ўланлар билан нами кўтарилимаган қора тупроқнинг масти қилувчи бўйини кўкрагини тўлатиб шимиаркан Давидов йироқдаги мозор қўрғон ўркачларига узоқ тикилиб қолди. Йироқдан қўкиш бўлиб турган бу қўрғонлар нималари биландир унга Болтиқнинг пўртана сапчитган тўлқинларини эслатди, у бехосдан қалбини келиб босган totли қайғуга бас келолмай, оғир хўрсинди-да, нам бўлган кўзларини бирдан четга бурди... Кейин унинг фаромуш кезувчи назари осмондаги сезилар-сезилмас нуқтага тушиб қолди. Мозор қўрғонларида истиқомат қилувчи, танҳолиги билан шоҳона улуғвор қора дашт бургути салқин осмонда парвоз этиб чарх уаркан, сезилар-сезилмас аста-секин пастларди. Ёзилганича қилт этмай бораётган учлари тўмтоқ кенг қанотлари уни осмони фалакда енгилгина олиб кетмоқда, қаршисидан эсган шамол эса хира йилтираётган қора патларини суяқдор баҳайбат жуссасига қапиштириб ютоққанча яламоқда эди. У муюлишларда сал қийшайганча бурилиб, шарққа қараб интиларкан, қуёш нурлари уни олд томондан ва қуйидан ёритар, шунда Давидовга бургут қанотларининг остидаги майда патлардан оқ учқунлар отилиб, гоҳ бир лаҳза чақнаб, гоҳ сўнаётгандек туюлар эди.

...Даштнинг поёни ва чеки йўқ. Қадимий қўрғонларни мовий ҳовур чулғаган. Осмонда қора бургут. Шабадада ястанаётган ўт-ўлан майин шитирлайди.. Бу бепоён ялангликларда Давидов ўзини кичкина ва ожиз ҳис қилиб, чекқизлиги диққат қиладиган даштни ғамгинлик билан кўздан кечирарди. Шу дақиқада Лушкага бўлган муҳаббати ҳам, айрилиқ алами ҳам, уни учратаман деб амалга ошмаган истаги ҳам баҷкана ва арзимас бўлиб кўринди... Ёлғизлик, мавжудот дунёсидан йироқлик ҳисси оғир юқ бўлиб босди. Шунга ўҳшаган нарсани аллақачонлардир, кемада кечалари «олдинга қаровчи» бўлиб турганида бошидан

кечирган эди. Бунга анча бўлди! Худди аллақачонлардаги унутилаётган тушга ўхшайди...

Қўёш хийла қиздирмоқда. Жанубнинг майин шабадаси кучлироқ эсиб бормоқда. Давидов ўзи бехабар ҳолда бехосдан бошини эгиб мудраб кетди, у камқатнов дашт йўлининг ўнқир-чўнқир ва нотекис жойларидан аста-секин чайқала-чайқала бормоқда эди.

Унга дирдов отлар тўғри келиб қолган эди, аравакаш — хутордагилардан кўпчилигининг фикрига қараганда довдирроқ, ўрта яшар колхозчи Иван Аржанов индамас одам эди. У ўзига яқинда топширилган отларни шу қадар сирган эди, отлар бригада қўшхонасига етиб боргунча шу қадар имиллаб юриб диққат қилиб юбордики, Давидов ярим йўлда мудроқдан кўзини очиб сабри чидамай, жиддий сўради:

— Нима, сен ярмаркага хурмача олиб кетяпсанми, Иван амаки? Синдириб қўйман деб қўрқяпсанми? Нега мунча имиллайсан?

Аржанов орқасини ўгириб анчагача индамади. Сўнgra fўнғиллаган овоз билан жавоб берди:

— Қандай «хурмача» олиб кетаётганимни ўзим ҳам биламан, колхоз раиси бўлсанг ҳамки, мени отларни беҳуда чоптиришга мажбур қиломайсан, овора бўласан, оғайн!

— Ким «беҳуда чоптиргин» деяпти? Ақалли пастга тушаётганимизда елдирсанг-чи! Юк олиб кетаётганинг йўқ-ку, араванг бўш, факт!

Узоқ сукутдан сўнг, Аржанов истар-истамас деди:

— Қачон секин юриб, қачон елиши керагини жониворларнинг ўзи ҳам билади.

Давидовнинг астойдил аччиғи чиқа бошлади. Энди разабини яширмай, хитоб қилди:

— Ана холос! Сенинг нима ҳожатинг бор? Сен нима иш қиласан бўлмаса? Сенинг қўлингга нима учун тизгин бериб қўйилган? Аравани нима учун банд қилиб ўтирибсан? Қани, тизгинни бу ёқقا бер-чи!

Энди Аржанов аён-ошкор бажонидил жавоб берди:

— Тизгин қўлимга шунинг учун бериб қўйилганки, отларни бошқаришим керак, улар мўлжал қилинмаган томонга эмас, мўлжал қилинган томонга бориши керак. Борди-ю, сенинг ёнингда жой банд қилиб ўтири-

ғаним ёқмаёғган бўлса, пастга тушиб бричканинг ёнида яёв кетишим мумкин, аммо тизгинни қўлингга бермайман, овора бўласан, оғайни!

— Нима учун бермайсан энди?— сўради Давидов, ундан кўзини олиб қочаётган аравакашнинг юзига қарашга беҳуда уриниб.

— Сен ўз тизгинингни менинг қўлимга бериб қўяссанми?

— Қандай тизгинни?— дарров тушунолмади Давидов.

— Қандай тизгин бўларди! Бутун колхознинг тизгинни сенинг қўлингда-ку, халойиқ сенга колхозимизнинг ҳамма хўжалигини бошқаришни ишониб топшириб қўйибди. Сен шу тизгинни менга берасанми? Бер майсан, «Овора бўласан, амаки!» десанг ҳам ажаб эмас. Мен ҳам шундайман: мен сенинг тизгинингни сўраётганим йўқ-ку? Сен ҳам меникини сўрама!

Давидов пиқиллаб кулиб юборди. Яқинги нарадаги жаҳлидан асар ҳам қолмади.

— Хўш, чунончи, борди-ю, хуторда ёнғин содир бўлиб қолса, сен бочкиали сувни ҳам шунаقا шармандаларча имиллаб ташийсанми?— деб сўради у, мароқ билан жавоб кутиб.

— Ёнғинга менга ўхшаганларни бочка билан жўнатишмайди...

Аржановнинг ёнидан қааркан, Давидов шундагига илк марта унинг шамол ялаб, пўст ташлаётган ёноғининг пастрофида вазмин табассумдан ҳосил бўлган майда ажинларни кўриб қолди.

— Сенинг фикрингча, қандай одамларни юборишади?

— Сен билан Макар Нагульнога ўхшаганларни.

— Нега энди?

— Хуторда икковларинггина от чоптириб юрасизлар, ўзларинг ҳам шаталоқ отгандек қўним билмайсизлар...

Давидов тиззаларини шапатилай-шапатилай бошини орқасига ташлаганича роса қаҳ-қаҳлаб кулди. Кулгидан нафасини ростлаёлмай туриб сўради:

— Демак, ёнғин бўладиган бўлса, Макар икковимизгина ўчиарканмиз-да?

— Йўқ, нега энди? Макар икковларинг отларни олатасир чоптириб, улардан ҳар томонга оқ кўпик сачратганча сув ташийсизлар, ёнгинни бўлса биримиз чеълак билан, биримиз чангак билан, биримиз болта билан биз колхозчилар ўчирамиз... Ёнгиннинг тепасида Размётнов фармойиш бериб турари, бу ишга ундан бошқа лойиқ одам йўқ...

«Ана сенга довдир амаки!»— астойдил ҳайрат билан ўйлади Давидов. Бир дақиқалик сукутдан сўнг сўради:

— Сен нима учун келиб-келиб худди Размётновни ўт ўчирувчиларнинг каттаси бўлади, деяпсан?

— Ақллигина йигитсану, фаросатинг етмаганини қара-я,—энди ошкора кулиб, жавоб берди Аржанов.— Ким қандай кун кечирса, шунга яраша вазифани бажариши, хуллас, феълига яраша иш қилиши керак. Мана Макар икковларинг шаталоқ отгандек қўним билмайсизлар, на кундузи-ю на кечаси тинимларинг бор, бошқаларга ҳам тиним бермайсизлар, бинобарин, сизлар энг чаққон, жонсарак бўлганларингиз учун тўхтовсиз сув ташиб бериб турасизлар, сув бўлмаса ёнгинни ўчиrolмайсан, гапим тўғрими? Андрюшка Размётнов — лўкиллаб йўртиб юради, то қамчи кўрсатмагунингча, ошиқча югурмайди ҳам, елмайди ҳам. Демак, атаманлик лавозимига яраша нима иш қилиши керак? Икки қўлинни биқинига тираб, амр-фармойиш беради, бақириб-чақиради, беҳуда ҳовлиқиб, одамларнинг оёқлари тагида ўралашади. Биз бўлсак, яъни ҳалойиқ осоийшта юрибмизми, секин юрибмизми, демак ур-йиқитсиз, ҳовлиқмасдан ишнинг пайидан бўлишимиз керак, ёнгинни ўчиришимиз керак...

Давидов Аржановнинг кифтига кафти билан уриб, уши ўзи томон ўғирди-да, унинг қувлик билан кулиб турган кўзларини ва соқол босиб кетган очиқ юзини яқиндан кўрди. Давидов сипо жилмайиб деди:

— Сен бало экансан-ку, Иван амаки!

— Сен ҳам кичкина балолардан эмассан, Давидов!— хушчақчақлик билан жавоб берди униси.

Улар ҳамон илгаригидек аста юриб кетишмоқда, ҳамма уринишлари беҳуда кетишига амин бўлган Давидов энди Аржановни қистамас эди.

У гоҳ аравадан сакраб тушиб ёнма-ён борар, гоҳ яна чиқиб олар эди. Колхоз ишлари ҳақида ва у ёқ-бу ёқдан гаплашаркан, Давидов аравакаши ақли расо одам эканлигига тобора қаноат ҳосил қиласади; бу одам ҳамма нарса тӯғрисида жўяли ва ақлли мулоҳаза юритар, аммо ҳар қандай ҳодисага аллақандайдир ўзига хос аломат, андоза билан қараб баҳо берар эди.

Узоқда дала қўшхонаси, унинг ёнида бригада ошхонасидан буралиб кўтарилаётган ингичка тутун кўринганда Давидов сўради:

— Йўқ, ҳазили йўқ, Иван амаки, умринг бино бўлибдики, отларни секин юргизиб келяпсанми?

— Шундай ҳайдаб келяпман.

— Бу ғалати феълингни менга нега олдинроқ айтмадинг? Мен сен билан келмаган бўлардим, факт!

— Нега энди мен ўзимни элдан бурун мақтаб қўярканман? Юришимни мана ўз кўзинг билан кўрдинг. Мен билан бир марта юрсанг, иккинчи марта юргинг келмай қолади.

— Сен нима сабабдан бундай бўлиб қолгансан?—
кулиб қўйди Давидов.

Аржанов тўғри жавоб беришдан қочди:

— Эски вақтда ичкиликка ружу қилган бир дурадгор қўшним бўларди. Ўзи омилкору, аммо ичкиликка гирифтор бўлиб қолган эди. Нафсини тийиб юриб-юриб, кейин оғзига тегиб қолса, бир ойгача ичаверарди! Бечора бор будини сотиб ичарди!

— Хўш?

— Үғли бўлса оғзига ҳам олмасди.

— Сен даромад қилмай, очиқроқ айтавер!

— Бундан ортиқ бўладими, ўргилай. Марҳум отам абжир овчи эди, чавандозликда ундан ҳам абжирроқ эди. Ҳақиқий ҳарбий хизматдалигида пойга, қиличбозлик, чавандозлик бўйича кўрикда ҳамиша биринчи мукофотни оларди. Ҳақиқий хизматдан қайтиб келгандан кейин станицадаги пойгаларда ҳар йили мукофотлар олиб турди. Туққан отам бўлса ҳам, худо раҳмат қилгур, расво одам эди! Қибр-ҳаволи, олифта казак эди... Ҳар куни эрталаб печкадаги оловда мих қиздириб, мўйловини ўша михга ўраб жингалак қил-

гувчи эди. Халойиқнинг, айниқса хотин-халажнинг кўзи ўнгида савлат тўкишни яхши кўрарди... Отни шундай минардики, кўрсанг ҳушиңг учади! Чунончи, станицага иш билан бориши керак бўлиб қолса, ҳарбий отини отхонадан олиб чиқиб, эгарларди-да, туйқусдан чоптириб кетарди! Уни ҳовлидан чоптириб, четандан ошириб кетарди, орқасидан чанг кўтарилганча қоларди. Отни сира йўртириб ёки жой юргизмас эди. Станица йигирма тўрт чақирим бўлса — чоптириб бориб, чоптириб қайтиб келарди. Азбаройи абжирлигидан от устида қуён овларди. Эшитиб қўй, бўри эмас, қуён овларди! Биронта бурганинг тагидан қуён қочириб, жар ёқалатганча қувлай-қувлай, етиб оларди-да, ё қамчин билан уриб чўзилтиради, ё отига бостиради. Бир неча марта бочиб кетаётганида учиб кетиб маъйиб бўлса ҳамки, ишқивозлигини қўймасди. Хўжалигимиздаги қанча отларнинг бошини еди. Мен ўзим билганимдан олтита отни нобуд қилди: бирини ҳоритиб ўлдиради, бирини оёғидан қолдиради. Онам билан икковимизни хонавайрон қилди! Бир қишининг ичидаги икки отни миниб ўлдиради. Чопиб кетаётган от қоқилиб кетади-да, яхлаган ерга узала тушиб тамом бўлади! Қарасам, отам эгарни елкасида кўтарганча пиёда келяпти. Онам ўлган отга ачиниб дод солса, отам пинагини ҳам бузмасди. Уч кунча инқилаб-синқиллаб ётиб, баданидаги мўматалоқлар ўчмасдан, яна овнинг тадорикини кўришга тушарди...

— Отлар йиқилиб ўлса, у қандай қилиб омон қоларди?

— От — залварли ҳайвон. У чопиб кетаётганида йиқилса, то ерга чўзилгунича уч марта ўмбалоқ ошиб кетади. Отамга нима? Ўузангидан оёғини чиқариб, отнинг устидан қалдирғочдек учади тушади. Хўш, йиқилиб тушиб ҳушига келгунча қанча вақт керак бўлса, шунча беҳуш ётади-да, кейин ўрнидан туриб уйга қараб пиёда равона бўлади. Лашнати довюрак эди! Устихонлари ҳам бамисоли темирдан ясалгандек эди.

— Зўр йигит экан! — деди завқ билан Давидов.

— Зўрликка зўр эди-ю, лекин ундан ҳам зўрроқлар чиқиб қолди.

— Нима бўлди?
— Уни хуторимиздаги казаклар ўлдириб қўйиши.
— Нима учун? — чекаётиб сўради, қизиқиб қолган
Давидов.

— Менга ҳам папиросингдан бер, ўргилай.

— Ахир сен чекмайсан-ку, Иван амаки?

— Астойдил чекмайману, гоҳо-гоҳо эрмак қилиб
қоламан. Ҳозир бу эски воқеа эсимга тушиб қолиб
томогим қақраб, оғзим тахир бўлиб кетди. Нега ўлди-
риши, дейсанми? Қилмишига яраша-да...

— Хулосасини айтганда-чи?

— Хотин киши учун, ўйнаши учун ўлдиришган. У
хотиннинг эри бор эди. Ҳўш, бу ишни эри билиб қолиб-
ди. Отам билан яккама-якка олишишга унинг юраги
дов бермабди: отамнинг бўйи баланд бўлмаса ҳам ни-
ҳоятда зўр эди. Шундан кейин отамнинг ўйнашининг
эри иккита укасини ёнига олибди. Масленицага яқин
экан. Учовлари отамни анҳорда пойлаб ётишибди...
Бафармони худо уни шунақангি калтаклашибди, ки
таёқ билан, аллақандай темир билан уришибди. Отам-
ни эрталаб уйга олиб келганиларида ҳали ҳам беҳуш,
кўм-кўк кўкариб кетган эди. Қечаси билан муз устида
беҳуш ётибди. Ёмон қийналган бўлса керак дейман, а?
Музда ётибди-я? Бир ҳафтадан кейин тилга кириб,
одамларнинг гапларини тушуна бошлади. Хуллас; ўзи-
га келди. Каравотдан икки ойгача туролмади, қон ту-
фуриб ётди, жуда секин гапиради. Жигар-бағри эзи-
либ кетган эди. Дўстлари кўргани келиб, «Сени ким
урди, Федор? Айт, биз ҳам...» деб суриштиришарди. У
бўлса, индамасди, ювош илжайғанча кўзини олиб
қочарди, онам чиқиб кетиши билан: «Эсимда йўқ,
оғайнilar. Мен кўп эрларнинг олдида гуноҳкорман»
деб шивирларди.

Онам бир неча марталаб унинг олдига тиз чўкиб:
«Жоним Федюшка, акалли менга айтсанг-чи, сени ким
ўлдирмоқчи бўлган эди? Худо ҳақи, айтсанг-чи, кимга
ўлим тиласим кераклигини билай-да!» деб илтимос
қилган эди. Аммо отам қўлини унинг бошига қўйиб,
сочини болаларнинг бошини силагандек силаб: «Ким-
лигини билмайман. Қоронғи эди, пайқаёлмадим. Ор-
қамдан бошимга уришди, ерга қулатишди, мени муз-

да кимлар дўппослаганини пайқаёлмай қолдим...» дерди. Ёинки ювошгина илжайиб: «Эсқини эслаб нима қиласан, ўргилиб кетай? Гуноҳни мен қилган эканман — жавобини ҳам ўзим беришим керак...» дерди. Уни тавба-тазарру қилдиргани поп чақирдик, у попга ҳам ҳеч нарса айтмади. Ўлгудек қаттиқ одам эди!

— Попга айтмаганини сен қаёқдан биласан?

— Мен каравотнинг тагида қулоқ солиб ётган эдим. Онам мажбур қилган эди. «Қаравотнинг тагига кириб қулоқ сол, Ванятка, қотилларини эҳтимол тақ-сиримга айтар» деди. Аммо отам уларни ҳеч айтмади. Попнинг саволига беш мартача: «Гуноҳкорман, тақ-сир» деб жавоб берди, кейин эса: «Айтинг-чи, отахон Митрий, нариги дунёда ҳам отлар бўладими?» деб сўради. Поп, афтидан кайфи учиб кетди шекилли, «У нима деганинг, у нима деганинг, худонинг бандаси Федор! У ёқда от нима қилади! Сен имонингни ўйла-сангчи!» деб бидиллади. У отамга узоқ панд-насиҳат қилди, отам чурқ этмай турди, кейин эса: «У ерда от йўқ дейсанми? Афсус! Бўлмаса мен у ерда йилқибон бўлиб олардим... Агар нариги дунёда от бўлмаса, менинг қиладиган ишим ҳам йўқ экан, мен бормасам ҳам бўларкан. Жон бермайман, сенга айтадиган гапим шу!» деди. Поп наридан-бери унинг имонини ўғириб жуда норози ҳолда, жуда аччиқланган ҳолда чиқиб кетди. Мен эшитган гапларимнинг ҳаммасини онамга айтиб бердим; у йиглаб юбориб: «Валинеъма-тимиз гуноҳга ботиб яшаган эди, гуноҳкорлигича ўлиб кетаркан!» деди.

Баҳорда — қор эриб бўлганида — отам ўрнидан туриб, икки кунча уй ичида айланиб юрди, учинчи куни қарасам паҳталик сюртуги билан попогини кийяпти, менга: «Бор, Ванятка, менга бияни эгарлаб бер» деб қолди. Ўша вақтга келиб хўжалигимизда уч яшар бир бия қолган эди. Онам унинг гапини эшитиб қолиб, обидийда қилди: «Сен ҳозир от мина олармидинг, Федя? Ўзинг аранг юрибсан-ку! Ўз жонингга ачинмасанг, ақалли мен билан болаларга раҳминг келса-чи!» Отам кулиб юбориб: «Ахир мен умрим бино бўлиб отни се-кин юргизган эмасман-ку, онаси. Ақалли ўлар олдим-

да бир марта эгарда ўтириб, секин юриб бўлса ҳам ҳовлини айланиб чиқай. Ҳовлини икки марта айланаману уйга қайтиб кираман» деди.

Мен чиқиб бияни эгарладим-да, зинапояга олиб келдим. Онам отамни суюб олиб чиқди. У икки ойчадан бери соқолини олмаган, уйимиз қоронғи бўлгани учун унинг туси нечоғлик ўзгариб кетганини кўрмаган эканмиз... Мен унга офтоб ёруғида тикилишим билан аламдан ўпкам тўлиб кетди! Икки ой бурун отамнинг сочи билан мўйлови тўсдек қоп-қора эди, энди бўлса, ўсиб кетган соқолининг ярми оқарган, мўйловлари ҳам шундай, чакка соchlари бўлса, қордек оппоқ... Агар у маъюс бир қиёфада илжаймаганда — эҳтимол мен йиғлаб юбормасмидим, ўзимни ҳеч тутиб ололмадим... Қўлимдан тизгинни олди, отнинг ёлига ёпишди, унинг чап қўли синган, яқингинада битган эди. Мен уни миндириб юбормоқчи эдим, аммо изн бермади. Ўлгудек мағрур одам эди! Заифлигидан ҳам ор қилярди. Эгарга худди илгариги вақтдагидек қуш бўлиб қўнмоқчи бўлди-ю, эплай олмади... У узангига чиқди, чап қўли панд бериб, бармоқлари ёзилиб кетди-да, қоқ ерга чалқанчасига йиқилиб тушди... Онам билан бирга уни уйга олиб кирдик. Илгари йўталганида қон туфурган бўлса, энди қон томоғидан тизиллаб отила бошлади. Онам кечгача жомашовдан нарига жилмади, қизариб кетган сочиқларни чайиб улгурмасди. Попни чақириб келдик. Оқшомда унинг фотиҳасини ўқиб қўйди, аммо ниҳоят даражада бақувват одам эди. Фотиҳаси ўқилгандан уч кундан кейин кечга яқин диққат бўлиб, каравотида типирчилади, кейин ўрнидан сапчиб туриб, онамга хира, аммо қувноқ кўзларини тикканча: «Фотиҳаси ўқилгандан кейин оёқ яланг ер босиб бўлмайди, дейишади, мен бир оз турайчи... Мен ер юзида кўп юрдим, уни ташлаб кетгани кўзим қиймаяпти. Менга қўлгинангни бер-чи, онаси, бу дунёда у кўп меҳнат қилди...» деди.

Онам унинг олдига бориб, қўлини ушлади. Отам чалқанча ётиб, жим қолди, кейин: «Менинг айбим билан озмунча кўз ёш тўқмади...» деб пичирлаб деворга ўгирилди-да, жон берди, нариги дунёда авлиё Власийнинг йилқиларини боққани равона бўлди...

Хотиралар ҳасратидан бўлса керак, Аржанов анчагача индамай қолди. Давидов йўталиб, сўради:

— Менга қара, Иван амаки, отангни ҳалиги... хўш, хуллас, анави хотиннинг эри билан унинг укалари урганини қаёқдан биласан? Шундай деб тахмин қиласанми? Чамангда шундайми?

— Чама қаёқда! Отам ўлмасидан бир кун бурун айтган.

Давидов ҳатто ўрнидан туриб кетай деди:

— Қандай қилиб айтди?

— Айтди-да. Эрталаб онам сигир соққани чиқиб кетди, мен мактабга кетишдан олдин столда дарсими-нинг чаласини тайёрлаб ўтирган эдим, отамнинг: «Ванятка, олдимга кел» деб шивиrlаётганини эшишиб қолдим. Олдига бордим. У: «Менга пастроқ энгаш», деб шивирлади. Мен энгашдим. У менга секингина шундай деди: «Гап шу, ўғлим, сен ўн учга кирдинг, мендан кейин оила бошлиғи бўлиб қоласан, эсингда бўлсин: мени Аверъян Архипов билан унинг иккита укаси, Афанасий билан Сергей-ғилай калтаклашди. Улар мени ўлдириб қўя қолишганларида — уларга кек сақламасдим. Анҳорда ҳушим ўзимдалигига улардан шуни илтимос қилдим. Аммо Аверъян менга: «Осонгина ўлиб кетмайсан, газанда! Майиб бўлиб яша, роса ўз қонингни ютиб, хумордан чиқ, кейин ҳаром қотавер!» деди. Ана шунинг учун Аверъянга кек сақлаб юрибман. Ажал тепамга келиб турибди-ю, аммо кўнглимда кек сақлаб турибман! Ҳозир сен кичкинасан, катта бўлганингда — менинг чеккан азобларимни эслаб, Аверъянни ўлдир! Айтган гапларимни ҳеч кимга айтма — на онангга-ю на бирон бошқа одамга. Айтмаслигингга қасам ич, айтмайман, деб чўқин». Мен чўқиндим, кўзларим қуруқ эди, отамнинг бўйнидаги крестни ўпдим...

— Вой, лаънати, эски вақтда Қавказдаги черкасларнинг одатига ўхшайди-я! — хитоб қилди, Аржановнинг ҳикоясидан ҳаяжонланиб кетган Давидов.

— Черкасларнинг юраги юрагу, русларнинг юраги тошми? Одамлар ҳаммаси ҳам бир хил, ўргилай.

— Ундан кейин нима бўлди? — сабрсизлик билан сўради Давидов.

— Отамни кўмдик. Мен мозордан қайтгач, меҳмонхонага кириб эшикнинг рахига сундим-да, қалам билан бўйимни чизиб қўйдим. Ҳар ойда бўйимни ўлчаб, чизиб қўярдим: тезроқ катта бўлиб, Аверъянни ўлдирмоқчи эдим... Шундай қилиб мен хонадон бошлиғи бўлиб қолдим, ўша вақтда ўн икки ёшда эдим, онамнинг қўлида мендан ташқари бири-биридан кичик яна еттига бола бор эди. Онам отамнинг ўлимидан кейин ўқтин-ўқтин касалга чалиниб турди, шўrimиз қурсин, қанчадан-қанча муҳтоҷлигу мashaқатлар чекмадик! Отам қанчалик такасалтанг бўлмасин, ўйнаб-кулишни билгани билан, ишлашни ҳам биларди. У баъзи бировлар учун ярамас одам бўлса ҳам, биз болалар билан онам учун ўз меҳрибонимиз эди: у бизни боқарди, кийинтиради, бизни деб баҳордан то кузгача далада қаддини букиб меҳнат қиласади... Ўша вақтда менинг жуссамчувак, суягим қотмаган эди, аммо рўзгорнинг бутун оғирлигини зиммамга олиб, катта кишилардек ишлашимга тўғри келди. Отам ҳаётлигига тўртта бола мактабга қатнардик, у ўлганидан кейин ҳаммамиз мактабни ташлашимизга тўғри келди. Ўн яшар синглим Нюркани овқат қилиш билан сигир соғишга қўйиб қўйдим, укаларим хўжалик ишларида менга кўмаклашишарди. Лекин мен ҳар ойда эшик рахига суялиб бўйимни ўлчашни унутмасдим. Ўша йили ўсишимнинг мазаси бўлмади — мashaқат билан муҳтоҷлик ўсишимга йўл қўймади. Аверъянни бўлса қамиш орасидан паррандани пойлаган бўри боласидек кузатиб юардим. Менга унинг ҳар бир қадами маълум эди; қаёққа кетди, қаёққа жўнади — ҳаммасини билардим...

Тенгдошларим якшанба кунлари ҳар хил ўйинлар ўйнашарди, менинг эса вақтим бўлмасди, чунки хонадон бошлиғи эдим. Бегим кунлари улар мактабга қатнашарди, мен бўлсан қўрада молларнинг тагини тозалардим. Турмушимизнинг бундай уқубатлилиги алам қилиб, аччиқ-аччиқ йиғлатим келарди! Шу йўсинда тенгқур ошналаримдан ўзимни четга тортиб, одамови бўлиб қолдим, гиқ этмайман, элдан қочаман... Шунда хутор бўйлаб менинг тўғримда, Ванька Аржанов довдирроқ, унинг эси йўқроқ, деган гаплар

тарқала бошлади. «Лаънатилар!— деб ўйлардим мен.— Менинг ўрнимда бўлсанглар-чи! Менинг турмушимга ўхшаган турмуш кечирсанглар, эсларинг кириб қолармиди?» Шундан кейин мен ҳамқишлоқларимни мутлақо ёмон кўриб қолдим; ҳеч кимни кўрага кўзим йўқ!.. Папиросингдан яна битта бер, ўргилай.

Аржанов қовушмай папирос олди. Унинг бармоқлари сезиларли даражада титратди. У кўзларини юмиб, лабларини кулгили тарзда чўччайтириб қаттиқ чапиллатганча папиросини Давидовнинг папиросидан узоқ вақт туташтириди.

— Аверъян нима бўлди?

— Аверъянга нима бўларди? Кўнглининг кўчасига келгандек яшади. Хотинини отамнинг ишқи-муҳаббати учун кечиролмади, уни ўласи қилиб дўппосларди, шу йўсинда бир йилдан кейин уни гўрга тиқди. Кузга бориб ўзимизнинг хутордаги ёшгина бир қизга уйланди. «Ха, сен ёш хотининг билан узоқ умр сурмайсан, Аверъян...» деб ўйладим мен ўшанда...

Онамдан яшириқча пул жамғара бошладим, кузда бўлса, яқин орадаги каппонга бориш ўрнига ёлғиз ўзим Қалачга жўнаб, у ерда бир арава буғдойни сотдим-да, бозорда қўлдан бир тиғли милтиқ билан ўнта патрон сотиб олдим. Йўлда қайтиб келаётib милтиқни отиб кўрдим, учта патронни исроф қилдим. Милтиқ расво отарди: тепкиси пистончани дарров чақолмасди, уттадан иккитаси чақилмади, учинчи патронгина отилди. Уйда милтиқни омборнинг бўғотига яшириб қўйдим, харидимни ҳеч кимга айтмадим. Шундан кейин Аверъяннинг пайдан бўлиб юрдим... Узоқ вақт ишим ўнгидан келмай юрди. Гоҳ одамлар халал бериб қолишиади, гоҳ яна бирон сабаб уни ўлдиришимга йўл қўймайди. Лекин бари бир муродимга етдим! Энг муҳими, мен уни хуторда ўлдирмоқчи эмасдим, ишкал жойи шу эди! Покровнинг биринчи куни у станицадаги ярмаркага жўнади, хотинисиз ёлғиз ўзи жўнади. Ёлғиз ўзи кетганини билиб чўқиниб олдим, бўлмаса икковини ўлдиришга тўғри келарди. Бир ярим сутка емай, ичмай, мижжа қоқмай, уни йўл ёқасидаги жарда пойлаб ётдим. Мен бу жарда астойдил ибодат қилиб, худодан ишқилиб Аверъян станицадан ҳамқишлоқ ка-

заклар билан эмас, ёлғиз ўзи қайтсин, деб илтижо қилдим. Мен норасидани илтижом марҳаматли худонинг даргоҳида ижсбат бўлди! Эртасига кечқурун қарасам — Аверъян ёлғиз келяпти. Бунгача қанча араваларни ўтказиб юборган эдим, узоқдан йўлда Аверъяннинг отлари чопиб келаётгандек бўлиб туюлганда юрагим неча марталаб ўйнаган эди... У рўпарамга келганда мен жардан югуриб чиқиб: «Туш, Аверъян амаки, худога ибодат қил!» дедим. У девордек оппоқ оқариб кетди, отларни тўхтатди. У бўйдор, бақувват казак эди, аммо менга бас кела олармиди? Менинг қўлимда милтиқ бор эди-ку. У менга: «Бу нима қилганинг, илонвачча?» деб бақирди. Мен унга: «Пастга тушиб тиз чўк! Нима қилмоқчи бўлганимни ҳозир биласан» дедим. Довюрак эди аblaҳ! Бричкадан таппа ташлаб менга билак яланғочлаганча югуриб кела бошлади... Мен уни шу бурганчалик жойгача яқин келтириб тарс отдим...

— Отолмай қолсанг нима бўларди?

Аржанов жилмайди:

— Унда у мени нариги дунёда йилқи боқиб отамга ёрдамчилик қилгани жўнатарди.

— Шундан кейин нима бўлди?

— Отлар ўқ овозини эшишиб, олиб қочишди, мен бўлсам ҳеч жойимдан қўзғалолмайман. Сёқларим йўқ бўлиб қолди, шамолда қолган япроқдек дир-дир титрайман. Аверъян олдимда ётиби, унга қараб бир қадам жилишга чогим келмайди, оёғимни кўтараману, яна ерга қўяман, иккилиб кетишдан қўрқаман. Шу қадар даф-даф титрардим! Хўш, аранг ўзимга келиб, унинг олдига бордим, башарасига туфуриб, чоловори билан пиджагининг чўнтакларини титкилай бошладим. Ҳамёнини олдим. Унда йигирма саккиз сўм қофоз пул, беш сўмлик тилла пул, икки-уч сўмча танга-чақа бор экан. Мен буларни уйга келгандан кейин санаб кўрдим. Қўлида бор қолган пулини афтидаң, ёш хотинига совға-салом олишшга сарф қилганга ўхшайди... Бўш ҳамённи шу ерга, йўлга улоқтириб жарга сакрадим-да, ура қочдим! Бу воқеа аллақачонлар бўлгану, бошимдан худди куни кеча ўтгандек ипидан-игнаси-гача эсимда. Милтиқ билан патронларни жарга кўмиб

қўйдим. Биринчи қор тушгандан кейин уларни кечаси жойидан қазиб олиб, хоторга олиб келдим-да, милитиқни бировнинг дараҳтзоридаги қари толнинг кавагига яшириб қўйдим.

— Пулни нима учун олдинг? — жаҳл билан кескин сўради Давидов.

— Нима эди?

— Нима учун олдинг, дейман?

— Менга жуда даркор эди,—соддагина жавоб берди Аржанов.— Ўша пайтда муҳтоҷлик бизни битдан баттар мутаб ташлаган эди.

Давидов бричкадан сакраб тушиб анчагача индамай борди. Аржанов ҳам индамас эди. Сўнгра Давидов сўради:

— Бор гап шуми?

— Йўқ, ундан эмас, ўргилай. Терговчи маъмурлар ёпирилиб келиб текширишди, суриштиришди... Аммо шўппайганча қайтиб кетишиди. Мендан кўриш бировнинг эсига келармиди? Бу орада Аверьяннинг укаси Сергей-филай ёғоч кесаётганда шамоллаб қолиб, бетобликдан ўлди: ўпкаси яллиғлаб, зотилжам бўлган экан. Шундан кейин мен қаттиқ ташвишланиб қолдим: Афанасий ҳам ўз ажали билан ўлиб, отам душманларига жазо беришда омад тилаган қўлим ўч ололмай қолса-я,— деб ўйладим. Типирчилаб қолдим.

— Шошма,— унинг гапини бўлди Давидов.— Ахир отанг сенга Аверьяннинг ўзинигина айтган экан-ку, сен бўлсанг учаловига қарши гиш қайраяпсан?

— Отамнинг айтгани ўз йўлига. Отамнинг ҳам ўз хоҳиши бор эди, менинг ҳам — ўз хоҳишим. Шундай қилиб мен типирчилаб қолдим... Афанасийни кечки овқат еб ўтирганда деразадан отдим. Ўша куни кечаси эшик раҳида охирги марта бўйимни ўлчаб, кейин ҳамма чизиқларни латта билан ўчириб ташладим. Милитиқ билан патронларни бўлса, анҳорга улоқтиридим; буларнинг энди менга ортиқ ҳожати йўқ эди. Мен отамнинг хоҳишини амалга оширдим. Ҳадемай онам ўлиш тараддудига тушиб қолди. Кечаси у мени олдига чақириб: «Уларни сен ўлдирдингми, Ванятка?» деб сўради. «Мен, ойижон» деб иқор бўлдим. У менга ҳеч

нарса демай, ўнг қўлимни олди-да, юрагига олиб борди...

Аржанов тизгинни тортиб қўйди, отлар илдамроқ юра бошлади, у Давидовга болаларнинг кўзларидек очиқ қуралай кўзлари билан тикилиб, сўради:

— Энди, отларни нега қаттиқ ҳайдамайсан, деб суриштирмайсанми?

— Ҳаммасига тушундим,— жавоб берди Давидов.

— Сен, Иван амаки, ҳўкиз қўшиб сув ташишинг керак экан, факт.

— Мен буни Яков Лукичдан бир неча мартабалаб илтимос қилдим, аммо у кўнмади. У мени охирги кунимгача калака қилмоқчи...

— Нима учун?

— Мен болалик вақтимда унинг қўлида бир яrim йил хизматкор бўлганман.

— Шунақами?

— Шунақа, ўргилай. Сен ҳали Островновнинг хўжалигида умр бўйи хизматкорлар бўлганини билмайсанми?— Аржанов айёrona кўз қисди:—Бўлган, бўлган, ўргилай... Бундан тўрт йил бурун солиқлар билан сиқа бошлашгач, полуги пасайиброқ қолди, ҳамлага тайёрланган заҳарли илондек кулча бўлиб олди, ҳозир колхозлар бўлмай, солиқлар ҳам камроқ бўлса борми — Яков Лукич ўзининг кимлигини кўрсатиб қўярди, хотиринг жам бўлсин! У ашаддий кулак, сизлар илонга қўйниларингдан жой бериб юрибсизлар...

Давидов узоқ сукутдан сўнг деди:

— Биз буни тузатамиз, Островнов важини яхшилаб бартараф қиласмиз, аммо сен, Иван амаки, бари бир дарди бор одамсан.

Аржанов ўйчанлик билан аллақаёқдаги йироқларга қараб жилмайди:

— Ахир дард деган нарса — сенга нима десам экан... Мана чунончи, олча дарахти ўсиб турибди, унинг ҳар хил шоҳ-бутоқлари кўп. Мен қамчига соп қилиш учун келиб унинг бир шохини кесиб олдим,— олча шохидан қилинган соп пишиқ бўлади,— бечора бутоқ япроқлар билан ўралиб, кўрк ташлаб, бу ҳам дард билан ўсиб турган эди, мен бўлсан шу шохни йўниб ташладим, мана у... Аржанов ўриндиқнинг таги-

дан қамчи олиб, Давидовга пўстлоғи қуриб, чақа бў-
либ кетган қўнғир тусли олча сопни кўрсатди.— Мана
у! Кўримсиз! Одам ҳам бамисоли шундай: одам ҳам
дарди бўлмаса худди шу сопга ўхшаб яйдоқ, аянчли
бўлиб қолади. Мана, Нагульнов аллақандай бегона
бир тилни ўрганяпти — дард; Крамсков бобо йигирма
йилдан бери ҳар хил гугурт қутичаларини йигади —
дард; сен Лушка Нагульнова билан ўйнашиб юриб-
сан — дард; кўчадан келаётган аллақандай бир масти
қоқилиб кетиб, яғринини четанга ишқайди — бу ҳам
дард. Ўргилай, раис, агар одамни ҳар қандай дарди-
дан маҳрум қилиб қўйсанг, у мана шу сопга ўхшаб
тап-тақири шумшук бўлиб қолади.

Аржанов Давидовга қамчини узатиб, боягидек ўй-
чанлик билан жилмайганча гапирди:

— Уни қўлингга ушлаб ўйлаб кўр, балки эсинг
жойига келиб қолар...

Давидов жаҳл билан Аржановнинг қўлини итарди:

— Жин урсин сени! Мен бусиз ҳам ўйлаб кўриб
ҳамма ишни бартараф қилишим мумкин!

...Шундан кейин улар қўшхонага етиб боргунлари-
ча йўл бўйи чурқ әтишмади...

VI БОБ

Бригадада тушлик қилишмоқда эди. Узунасига ту-
таш қилиб ўрнатилган омонат столга ҳамма плугчи-
лар билан етовчилар сиққан эди. Улар аҳён-аҳёнда
эркакларга хос беодоб ҳазил-мазаҳ сўзларни отиб,
ошпаз тайёrlаган бўтқанинг сифати ҳақидаги лўнда
фиркларини айтиб, овқатланишмоқда эди.

— Доим тузни кам солади! Ошпаз эмас, дардисар!

— Тузи паст бўлса, туллаб кетмассан, тузини расо
қилиб ола қол.

— Васька икковимиз бир товоқда еймиз, у тузи
паст бўлса ёқтиради, мен шўр бўлса ёқтираман. Ик-
ковимиз бир товоқни қандай қилиб бўлиб оламиз³
Ақлинг жуда кўпайиб кетган бўлса, маслаҳат бер!

— Эртага четан тўқиб, товоқларингни ўртасидан
ажратиб берамиз, вассалом. Эҳ, эси паст! Шундайгина
жўн нарсага ҳам фаросатинг етмаса!

— Бе, оғайни, ўзингнинг ақлинг ҳам ҳўқизингнинг ақлидан кўп эмас.

Столдагилар яна анчагача айтишиб ҳазиллашишлари мумкин эди-ю, бу орада узоқдаги аравани кўриб қолишиди, ҳаммадан кўзи ўтири плугчи Прянишников кафтини пешанасига тираб, секин ҳуштак чалиб кўйди:

— Бу келаётган довдир Ванька Аржанов, ёнидағи — Давидов.

Столга пойма-пой тарақлаб қошиқлар тушди, ҳамманинг кўзи бир дақиқагина арава гойиб бўлган сой томонга сабрсизлик билан тикилди.

— Нима қунларга қолдик! Яна бизни шатакка олгани келяпти,—деди босиқ койиниб Агафон Дубцов.— Шарманда бўлдик! Йўқ, менинг жонимга тегди! Ўзларинг кўзларингни лўқ қилаверинглар, кўзимни лўқ қилавериб тинкамга тегди, номусдан юзига қарашга орқиламан!

Давидов қарши олиш учун ҳамма ёппасига столдан турганини кўраркан, юраги хушнудлик билан орзиқиб кетди. У катта-катта қадам ташлаб борар, унга қараб қўллар чўзилар, эркакларнинг қуёшда қоп-қорайиб кетган юzlари, қизлар ҳамда хотинларнинг қуёш тафти теккан оқиши қора мағиз юzlарида табассум порлар эди. Бу хотинлар ҳеч қачон чинакамига қораймас, ишда оқ рўмолларини шундай чирмаб ўраб олишардики, кўзлари учунгира тирқиш қолдиришарди. Давидов йўл-йўлакай таниш юzlарга разм соларкан, жилмаярди. У билан қадрдон бўлиб кетишган, келганига астойдил хурсанд эдилар, уни ўз қадрдонлариdek кутуб олишмоқда эди. Бир лаҳза ичида буларнинг ҳаммаси Давидовнинг онигига етиб бориб, қалбини қувонч билан қитиқлаб ўтди, унинг кўтаринки овози хирқираб чиқди:

— Хўп, салом, сургалаётган заҳматкашлар! Меҳмонни боқасизларми?

— Кимки узоқ турадиган бўлиб келса, боқамиз, кимки бир соатгагина меҳмон бўлиб келса — уни боқмаймиз, таъзим-тавозе билан кузатиб қўямиз. Шундайми, бригадир?— деди ҳаммани кулдириб Прянишников.

— Мен сизларда узоқ турсам керак,— жилмайди Давидов.

Дубцов қулоқни кар қилувчи йўғон овоз билан бўкирди:

— Ҳисобчи! Уни шу бугундан эътиборан тўла таъминот рўйхатига ёзиб қўй, сен бўлса, ошпаз, қорнига сиққунча етадиган бўтқа сузив кел!

Давидов ҳамма билан қўл бериб кўришиб, стол атрофини айланиб чиқди. Эркаклар у билан одатдаги-дек қўл сиқиб кўришишди, хотин-қизлар эса кўзига тикилиб ийманганча қўлларини узатишарди: ўз маҳаллий казаклари уларни бундай диққатларига арзитишимас, тўқнаш келиб қолганда хотин-қизларга ўз тенгларига қўл узатгандек қўл узатиб кўришишмас эди.

Дубцов Давидовни ёнига ўтқазиб, унинг тиззасига вазмин ва иссиқ кафтини ташлади.

— Келганингга жуда хурсандмиз, сени жонимиздай кўрамиз, Давидов!

— Кўриб турибман, раҳмат!

— Аммо сен дарров сўкишга тушма...

— Мен мутлақо сўкмоқчи эмасман.

— Йўқ, сабринг чидамайди, албатта, бундай қилмай қўймайсан, аччиқ-тизиқ гапнинг бизга ҳам нафи тегади. Аммо ҳозирча индамай тур. Одамлар кавшаниб турганда, уларнинг иштаҳаларини бўғишнинг ҳожати йўқ.

— Сабр қилиш ҳам мумкин,— кулиб қўйди Давидов.— Яхшилаб гаплашиб олишимиз турган гап, аммо овқат устида бошламаймиз, бир амаллаб сабр қила-миз, а?

— Албатта сабр қилиш керак!— деди ҳаммани қаҳ-қаҳлатиб кулдириб кескинлик билан Дубцов ва ҳаммадан олдин қошиқни олди.

Давидов товоқдан бошини кўтармай, ҳафсала билан индамай овқат ерди. У тушлик қилаётган қўшчи-ларнинг босиқ овозларига деярли қулоқ солмас, аммо яккаш кимнингдир юзидан кўз узмай тикилиб турганини сезар эди. Бўтқани тугатгач, Давидов енгил тортиб хўрсиниб қўйди: қачонлардан бери илк марта қорни чинакам тўйган эди. Ёғоч қошиқни болаларга ўхшаб ялаб, бошини кўтарди. Столнинг нариги

томонида унга кўзлари қуралай қиз тик боқиб туар, бу кўзларда шу қадар оташин, изҳор этилмаган муҳаббат, муштоқлик, умид ва итоаткорлик барқ уаридики, Давидов бир лаҳзагина саросимада қолди. У мажлисдами ёки қўча юзасидами — қўллари катта, бўйдор, кўркам ўн етти яшар бу қиз билан хоторда илгари ҳам кўп учрашиб туар, тўқнаш келганларида қиз унга ийманиб меҳр билан жилмаяр, унинг бирдан қизарib кетадиган юзида саросима акс этар эди,— аммо ҳозир унинг нигоҳи қандайдир улуғлашган ва жиддийлашиб қолган эди...

«Сени менга қайси шамол учирив келяпти, мен сени нима қиласман қизалоққина? Мени бошингга урасанми? Ҳамиша атрофингда қанча ёш йигитлар юришади-ю, сен бўлсанг менга қарайсан, эҳ гумроҳ! Ахир мен сендан икки баробар каттаман-ку, тилка пора, хунук, кемшикман-ку, сен бўлсанг буларни кўрмаяпсан... Йўқ, сен менга керакмассан, Варюха-куюнчак! Менсиз кунингни кўравер, жоним»,— деб ўйларди, Давидов қизнинг лов-лов ёнаётган юзига фаромушлик билан тикиларкан.

Қиз кўзи Давидовнинг кўзлари билан тўқнашаркан, четга бурилиб ерга тикилди. Унинг киприклари учар, эскигина кир кофтачасининг бурмасини ўйнаётган дағаллашган йирик бармоқлари хийла титрамоқда эди. Унинг ҳислари шу қадар содда ва очиқ, болаларча соддалик қилиб бу ҳиссини яшира олмас эдики, буларнинг ҳаммасини кўзи кўр одамгина пайқамаслиги мумкин эди.

Кондрат Майданников Давидовга мурожаат қилиб кулиб юборди.

— Сен Варькага унақа тикилма, бўлмаса ҳамма қони юзига тепиб кетади! Бор ювиниб кел, Варька, балки бир оз ҳовуингдан тушарсан. Лекин қандай қилиб боради? Ҳозир оёғи ҳам йўқ бўлиб қолган... У менда етовчилик қиласди. Сенинг қачон келишингни суриштиравериб қулогимни битирди, Давидов. «Мен қаёқдан биламан унинг қачон келишини, қўйсанг-чи» дейман унга. У бўлса, эртадан-кечгача шу саволини ҳижжалаб, қуриган ёғочни чўқилаган қизилиштонга ўхшаб менга тинчлик бермайди.

Гўё, оёқлари йўқ бўлиб қолди, деган тахминни рад этмоқчи бўлгандек Варя Харламова ёнига бурилдида, тиззасини енгилгина букиб ўтирган скамейкасидан сакраб тушди, оқарган лаблари билан нимадир деб шивирлай-шивирлай, Майданниковга нафрат билан қараб-қараб қўйғанча будка томонга кета бошлади. Будканинг олдига етгач, тўхтади-да, стол томонга бурилиб титроқ овоз билан қичқирди:

— Сен, Кондрат амаки... сен, амаки... ёлғон гапиряпсан!

Унга умумий қаҳқаҳа билан жавоб беришди.

— Узоқдан туриб ўзини оқлаяпти,— деди кулиб Дубцов.— Узоқдан ўнғай бўлади.

— Нега қиз болани уялтирасан? Яхши эмас!— деди норозилик билан Давидов.

— Сен уни ҳали билмайсан,— ён босиб жавоб берди Майданников.— У сенинг олдингда шундай ювош бўлиб туриби, сен бўлмасанг у андиша қилиб ўтирамасдан бизлардан ҳар биримизни юмдалаб ташларди. Шаддод қиз! Қиз эмас жангари. Ўрнидан сапчиб туриб кетганини кўрдингми? Бамисоли ёввойи така!..

Йўқ, бутун бригада аллақачонлар билган, Давидов эса илк бор ҳозиргина эшишиб билган қиз боланинг соддагина муҳаббати унинг эркаклик иззат-нафсига пором келмасди. Борди-ю, унга бошқа кўзлар ақалли бир мартағина шундай садоқату муҳаббат билан қараб қўйса унда бошқа гап эди...

Ноқулай ҳангомани бартараф қилишга уриниб, Давидов ҳазил билан деди:

— Хўп, ошпаз билан ёғоч қошиққа раҳмат! Қорнимни тўйдиришди.

— Ошпаз билан қошиққа эмас, ғайрат қилганлари учун ўнг қўлинг билан каттакон оғзингга миннатдорчилик билдири, раис. Яна озгина сузиб келайми?— деб сўради столдан тураркан улуғвор, одатдан ташқари йўғон ошпаз хотин.

Давидов унинг қудратли қоматини, яғриндор елкаларини ва қучоқ етмас жуссасини ошкора ҳайрат билан кўздан кечирди.

— Сизлар бу одамни қаёқдан топиб олдинглар?— паст овоз билан сўради Дубцовдан.

— Таганрог металлургия заводида бизнинг заказимиз бўйича ясаб беришди,— жавоб қилди ҳисобчи, беибо ёш йигит.

— Сени нега илгари кўрмаган эканман?— ҳамон таажжубланарди Давидов.— Габарит жиҳатидан ҳажмдор экансану, сени кўрмаган эканман, она жон.

— Ўғиллик ҳам бўлиб қолдим!— пиқиллаб кулиб юборди ошпаз хотин.— Мен сенга қандай қилиб она бўлай, ёшим атиги қирқ еттида бўлса? Мени шунинг учун кўрмагансанки, қиши куни уйдан чиқмайман. Гавдам йўғон, оғим калта бўлгани учун қорда юролмайман, текис жойда ҳам қорга ботиб қоламан. Қиши кунлари ҳеч қаёққа жилмасдан уйда ўтираман, жундан ип йигираман, рўмол тўқийман, хуллас, бир амаллаб тириклигимни ўтказаман. Лойда ҳам юролмайман: шалтоқда худди туяга ўхшаб тойиб кетиб узала тушишдан қўрқаман, мана қуроқчиликда ошпаз бўлиб келдим. Мен сенга ҳеч она эмасман, ўртоқ раис! Мен билан тутув яшамоқчи бўлсанг — мени Даъра Куприяновна деб чақир, унда бригадада сира ҳам оч қолмайсан!

— Сен билан тутув яшашга мутлақо розиман, Даъра Куприяновна,— деди жилмайиб Давидов ва ўрнидан туриб жиддий тусда таъзим қилди.

— Шунда сенга ҳам, менга ҳам яхши бўлади. Энди менга товоғингни бер, тафт бостисига қатиқ қўйиб берай,— деб қўйди Давидовнинг хушмуомаласидан ниҳоятда мамнун бўлган ошпаз.

У товоққа саҳиийлик билан бир килограмм келадиган жигардеккина қатиқ қўйиб, уни таъзим билан узатди.

— Сен нега ишлаб чиқаришда ишламай, ошпазлик қиласан?— сўради Давидов.— Шу залваринг бўладиган бўлса, плугнинг қулоғини бир марта босиб қўйсанг борми — тиши бир йўла ерга ярим метр ботиб кетади, факт!

— Ахир менинг юрагим касал-да! Докторлар, юрагингни ёғ босган, дейишади. Менга ҳатто ошпазлик ҳам оғир, идиш-товоққа уриндим дегунча — юрагим уриб, ҳалқумимнинг тагига келиб қолади. Йўқ,

ўртоқ Давидов, мен плугчиликка ярамайман. Бу ўйин менинг нағмамга тўғри келмайди.

— Яккаш юрагидан нолийди-ю, учта эрни кўмди. Учта казакнинг бошига етиб, ҳозир тўртингчисини қидириб юрибди, аммо нима учундир ишқивозлар чиқмай турибди, унга уйланишдан қўрқишияпти, бунақангги хотин ийифингни ўйнатиб юборади!— деди Дубцов.

— Ёлғончи чўтирир ўлгур!— бақирди астойдил жаҳли чиқиб кетган ошпаз.— Менда нима айб экан, учта казакдан биронтаси ҳам чайир чиқмаса, ҳаммаси бир бало симён, ирвоқ бўлса, худо уларнинг умрини қисқа қилган бўлса мен айбдорманми?

— Узинг уларнинг ўлишига ёрдам бергансан,— бўш келмасди Дубцов.

— Нима билан ёрдам берибман?

— Нима биланлиги маълум-ку.

— Аниқроқ қилиб айт!

— Менга бусиз ҳам ҳаммаси равшан.

— Йўқ, сен анигини айт, бекорга валақлаб нима қиласан!

— Нима билан ёрдам берганинг маълум: ишқмуҳаббатинг билан,— деди Дубцов эҳтиёткорона, кулиб.

— Лаънати аҳмоқ!— дея ғазаб билан қичқирди ошпаз умумий қаҳқаҷани босиб тушиб ва столдаги идиш-товоқнинг ярмини бир қучоқ қилиб сидириб кетди.

Аммо пинагини бузмайдиган Дубцовни осонликча енгизи маҳол эди. У қатиқни ошиқмай ичиб бўлди-да, мўйловини кафти билан артиб, деди:

— Эҳтимол аҳмоқ ҳамдирман, эҳтимол. лаънатиси ҳамдирман, аммо қизалоқ, бироқ бу гап важида, ишнинг миридан-сиригача биламаи.

Шундан кейин ошпаз Дубцовнинг шаънига шундай бир сўз айтиб юбордики, стол атрофида гумбирлаган зўр қаҳқаҷа кўтарилиди, кулги ва хижолатдан қизариб кетган Давидов эса аранг гапирди:

— Бу қандай бўлди, оғайнилар?! Бунақасини мен флотда ҳам эшитмаган эдим-ку!..

Аммо Дубцов сиполикни қўлдан бермай, намойишкорона қизиқонлик билан қичқирди:

— Бориб қасам ичаман! Қрест ўпишга тайёрман! Аммо гапимдан тоймайман, Дашка: учала эринг ҳам сенинг муҳаббатинг туфайли нариги дунёга сафар қилди! Оз эмас, авлоқ эмас учта эр-а... Ўтган йили Володька Грачев нимадан ўлди? У ҳам сеникига қатнарди-ку...

Дубцов гапини тамом қилолмай, шахт билан энгашди: унинг боши устидан худди снаряд парчасига ўхшаб залвардор ёғоч чўмич ғизиллаганича учеб ўтди. Дубцов йигитлардек чаққонлик билан скамейкадан ҳатлади. У столдан ўн метрча узоқлашган ҳам эдики, бирдан четга сакраб чап берди, унинг ёнидан ҳар томонга чапиллатиб қатиқ саҷратганча қалайи товоқ учеб ўтди-да, қиялаб бориб даштга тушди. Оёқларини кериб туриб олганча Дубцов мушти билан пўписа қилиб қичқиради:

— Ҳой, Дарья, бас! Нимани отсанг ҳам отаверу, аммо сопол товоқларни ота кўрма! Синган идиш учун, худо ҳақи, меҳнат кунингдан босиб қоламан! Варька-га ўхшаб будканинг орқасига ўтиб ол, ўша ердан туриб ўзингни оқлашинг осон бўлади!.. Мен бўлсам бари бир сўзимдан тоймайман. Эрларингни нобуд қилиб, энди мендан аламингни оляпсан...

Давидов аранг тартиб ўрнатди. Будка яқинига чеккани ўтиришди, Кондрат Майданников кулгидан нафаси тиқила-тиқила деди:

— Ҳар куни тушки овқат вақтидами, кечки овқат вақтидами шу томоша. Агафоннинг кўзи бир ҳафта-гача кўкариб юрди. Дарья муштуми билан тушириб қолди, шунда ҳам уни калака қилишини қўймайди. Агар шудгордан яхшиликча кетмасанг, Агафон, ўйндан ўқ чиқиб, ё кўзингни ситиб чиқаради, ё бутингни ириб ташлайди...

— Хотин эмас, «фордзон» трактори!— деди завқ билан Дубцов, ёнларидан ўтиб кетаётган ошпазга ўғринча назар ташларкан.

Уни кўрмаган киши бўлиб баландроқ овоз билан гапирди:

— Йўқ, биродарлар, яшириб нима қилдим, агар

хотиним бўлмаса Даشكага албатта уйланардим. Уйланганда ҳам бир ҳафтага уйланардим, кейин урақочардим. Шунча зўр бўлишимга қарамай, бир ҳафтадан ортиғига дош беролмасдим. Ҳозирча ўлимга хушим йўқ. Нима учун ўзимни бекордан-бекорга ўлимга рўпара қилиб берарканман? Бутун гражданлар урушида ўлмай, келиб-келиб энди хотин кицидан ўлиб кетаманми... Йўқ, мен аҳмоқ бўлсам ҳам, бориб турган қувман! Дашка билан бир ҳафтани амаллаб ўтказардиму, кейин кечаси каравотдан астагина сирғилиб тушиб, эшиккача эмаклаб борардим-да, у ёғига қўрага чиқиб олиб, уйга етгунча шаталоқ отиб қочардим... Ишонасанми, Давидов, худо ҳақи, рост айтаман, ростини айтмасам мана Прянишников ҳам турибди: бир куни мазалик овқат қилгани учун Даشكани қучоқлаб қўймоқчи бўлдик, у олдидан келди, мен орқасидан бордим, икковимиз қўл ушлашдик. Аммо Дастьяга бари бир қулочимиз етмади, ниҳоятда йўғон-да! Ҳисобчини чақирдик,— у ёш йигит, устига қўрқоқроқ ҳам, Даشكага яқинроқ келгани юраги дов бермади. Шундай қилиб Дашка умрбод чала қучоқланганча қолиб кетди.

— У лаънатининг гапига ишонма, ўртоқ Давидов!— деди кексизгина кулиб ошпаз.— Агар у бугун ёлғон гапириб олмаса, эртага диққат бўлиб ўлади. Қадамида ёлғон гапиролмаса, юролмайди, феълиатвори шунақа!

Чекиб бўлганларидан сўнг Давидов сўради:

— Яна қанча ҳайдашларинг керак?

— Бир талай.— истар-истамас жавоб берди Дубцов.— Бир юз эллик гектардан ошиқроқ. Кеча бир юз эллик саккиз гектар қолган эди.

— Чакки ишламабсизлар, факт!— деди совуққина Давидов.— Нима иш билан машғул бўлдинглар ўзи? Ошпаз Куприяновна билан томоша қўйдингларми?

— Ҳе, бу гапинг чакки.

— Нима учун биринчи бригада билан учинчи бригада аллақачон ҳайдаб бўлди-ю, сизлар сургаяпсизлар?

— Қел, Давидов, кечқурун ҳаммамиз йиғилишиб, астойдил гаплашиб олайлик, ҳозир бўлса бориб ер ҳайдайлик,— таклиф қилди Дубцов.

Бу жўяли таклиф эди, Давидов бир оз мулоҳаза қилиб кўриб, кўнди.

— Менга қайси ҳўқизларни берасизлар?

— Менинг ҳўқизларим билан ҳайдай қол,— маслаҳат берди Кондрат Майданников.— Менинг ҳўқизларим ишнинг ҳадисини олган, ўзлари ҳам ажабтовор, икки жуфт ёш новвосимиз ҳозир курортда ётибди.

— Курортда деганинг нимаси?— таажжубланди Давидов.

Дубцов жилмайиб тушунтириди:

— Қувватсизликларидан эгатга мункиб қолишяпти, хўш, биз уларни қўшдан чиқариб ҳовуз олдидаги ўтлоққа бошвоқсиз қўйиб юбордик. У ерда ўт қалин, тўйимли, еб семиришсин, бари бир уларнинг нафи тегмайди. Улар қишлоғдан дирдов бўлиб чиқиши, ҳар куни иш, шалпайиб плугни тортолмай қолиши — вассалом! Қари ҳўқизлар билан қўшалоқлаб қўшмоқчи эдик — жин урсин, бари бир иш чиқмади. Кондратнинг ҳўқизлари билан ҳайдайвер, у тўғри маслаҳат беряпти.

— Унинг ўзи нима иш қиласди?

— Мен унга уйига бориб келиши учун икки кунга рухсат беряпман. Хотинимнинг тоби қочиб ётиб қолибди, ҳатто Ванъка Аржановдан ич кийим ҳам бериб юбормабди, уйга келиб кетсин, дебди.

— Унда бошқа гап. Бўлмаса мен, уни ҳам бирон курортга жўнатаётган экансан, деб ўйлабман. Қараб турсам, сизларда курортдагига ўхшаган кайфиятлар ҳукм сураётганга ўхшайди...

Дубцов Давидовга сездирмай, қолганларга имо қилди, ҳамма ўрнидан туриб ҳўқизларни қўшгани кетди.

VII БОБ

Кун ботарда Давидов пайкал этагида ҳўқизларни қўшдан чиқариб, бошвоқларини олди. У эгат ёнидаги ўтга ўтириб, пиджагининг енги билан пешанасидаги терни артди, титраётган қўллари билан тамаки ўрай бошлади — нечоғлик чарчаганини шундагина сезди. Унинг яғрини сирқирап, тақимлари остида қандайдир

безлар ўйнар, қўллари чол кишининг қўллариdek қалтирар эди.

— Тонгда ҳўкизларни топа олармиканмиз? — сўради у Варядан.

Варя унинг қаршисида шудгорда туарди. Унинг каттакон эски чориқ кийган кичкина оёқлари ҳозиргина плуг ағдариб ташлаган юмшоқ тупроққа тўлиғигача ботиб туарди. Чангдан кул ранг бўлиб кетган рўмолини юзидан четга суриб, у шундай деди:

— Топамиз, улар кечаси узоққа кетишмайди.

Давидов қўзларини юмиб, ютоқиб чекарди. У қизга қарагиси келмасди. Қиз эса баҳтиёр ва ҳорғин табассумдан яйраб, оҳиста деди:

— Мени ҳам, ҳўкизларни ҳам чарчатдинг. Жуда кам дам оларкансан.

— Ўзим ҳам ўлгудай чарчадим,— деб қўйди тундлик билан Давидов.

— Ўқтин-ўқтин дам олиш керак. Кондрат амаки ўқтин-ўқтин дам олиб, ҳўкизларга ҳам дам бериб тургандек кўринади-ю, ҳамиша ҳаммадан кўп ҳайдайди. Сен кўникумаганинг учун чарчаб қолдинг...

У «жоним» деган сўзни ҳам қўшмоқчи эди-ю, қўрқиб кетиб, лабларини қимтиди.

— Бу гапинг тўғри, ҳали кўникунимча йўқ,— унинг фикрига қўшилди Давидов.

У ўрнидан аранг туриб, толиққан оёқлари билан базур одимлаганича эгат ёнидан қўшхонага қараб йўл олди. Варя унинг орқасидан бораиди, кейин етиб олиб, ёнма-ён кета бошлади, Давидов ўнг қўлида йиртилиб ўнгиб кетган матросча тельняшкасини кўтариб кетмоқда эди. Кундуз куни плугни мослайман деб энгашиб, ёқаси плугнинг қулоғига илиниб қолди, қаддимни ростлайман, деб бирдан тельняшкасини иккига айириб юборди. Кун ҳам хийлагина иссиқ. У тельняшкасиз ҳам юраверса бўлар эди-ю, аммо қиз боланинг кўз олдида ярим белигача яланғоч бўлиб плугнинг орқасидан бориши мутлақо мумкин эмас эди. Хижолат билан матросча кийимининг барларини туташтирас экан, сенда биронта тўғноғич топилмайдими, деб сўради. Қиз, афсуски йўқ, деб жавоб берди. Давидов ҳасрат билан қўшхона томонга тикилди.

Унинг ораси икки километрча келарди. «Бари бир бориб келишга тўғри келади»,— деб ўйлади Давидов ва ўқинчдан томоғини қириб паст овоз билан тўнғиллади-да, шундай деди:

- Менга қара, Варюха-куюнчак, мени шу ерда кутуб туратур, мен қўшхонага бориб келаман.
- Нима учун?
- Мана бу увадани ечиб, пиджагимни кийиб келаман.
- Пиджакда исиб кетасан.
- Йўқ, бориб келмасам бўлмайди,— деди ўжарлик билан Давидов.

Жин урсин, у чиндан ҳам кўйлаксиз яланғоч бўлиб савлат тўколмайди-ку! Бир ками энди унинг кўкраги билан қорнидаги суратларни бу ёқимтой, иффатли қизалоқнинг кўриши эди. Рост, Давидовнинг кенг кўкрагининг икки томонидаги татуировка сипо, ҳатто бир оз нафосатли ҳам эди: флот рассомининг қўли маҳорат билан иккита каптарни тасвирлаган. Давидов қимирлади дегунча, кўкрагидаги мовий каптарлар ҳаракатга келар, елкаларини қимирлатгудек бўлса, каптарлар худди ўпишаётгандек тумшуқларини уриширишар эди. Вассалом. Аммо қорнидагиси... Давидов бу сурат дастидан аллақачонлардан бери номус билан азоб чекиб юрарди. Граждан уруши йиллари йигирма яшар ёш матрос Давидов бир куни қаттиқ маст бўлиб қолди. Миноносец кубригида унга яна бир стакан спирт тутишибди. У бир калта иштонда пастки койкада учиб қолди, унинг қўшни тральщикдаги иккита ошнаси — татуировка усталари — мастиларга хос бебошвоқ ахлоқсиз муболағаларини ниҳоясига етказиб, Давидовнинг устида тер тўкишибди. Шундан сўнг Давидов ҳаммомга бормай қўйди, тиббий кўрикларда эса, мени фақат эркак врачларгина кўрсин, деб талаб қила-диган бўлди.

Ҳарбий хизматдан бўшаб, заводда ишлай бошлиганининг биринчи ўили Давидов ҳар қалай журъат қилиб ҳаммомга борди. Қорнини иккала қўли билан тўсиб, бўш жомашов топди-да, бошини яхшилаб совунлади — шу пайт яқингинасида пастдан ҳиринглаган овоз эшишиб қолди. Давидов юзини чайиб қарэса: яр-

ғоқ бош бир ўрта яшар гражданин супачага қўлини тираганча энгасиб, Давидовнинг қорнидаги суратни беҳаёларча томоша қилиб, завқидан ҳиринг-ҳиринг куляпти. Давидов ошиқмасдан сувни қўйиб, ҳаддан ташқари мароқли гражданиннинг ярғоқ бошига эмандан қилинган оғир жомашов билан туширди. У киши суратни дурустгина кўролмай кўзини юмди-да, ерга узала тушди. Давидов боягидай ошиқмасдан ювиндида, унинг бошига бир жомашов совуқ сув қўйиб юборди, унинг кўзини бақрайтириб очганини кўргач, совуқхонага қараб чиқиб кетди. Ӯшандан бўён Давидов ҳаммомда русчасига чинакамига буғланиб ҳузур билан чўмилиш ҳаловати билан узил-кесил хайрлашиб, уйда чўмиладиган бўлди.

Безаб ташланган қорнига Варянинг кўзи тушиб қолишини ўйлаши биланоқ Давидовнинг олови чиқиб кетди, у тельняшкасининг очилиб кетаётган барларини пухтароқ туташтириди.

— Сен ҳўқизларни чиқариб ўтлагани қўйиб юбор, мен кетдим,— деди у хўрсиниб. У ҳайдалган ерни айланиб бориши ёинки шудгордан уч километрча қоқила-қоқила йўл босиши керак, бу кўргилик ҳаммаси аллақандай бир бемаъни тасодиф туфайли эди.

Аммо Варя Давидовнинг режасини ўзича йўйди. «Севиклим менинг олдимда кўйлаксиз яланғоч ишлагани уяляпти»,— деб ўйлади ва қизларга хос камтарлигига риоя қилгани учун унга кўнглида миннатдорчилик билдириб, дарҳол оёқларидаги чориқларини улоқтириди.

— Мен ғизиллаб бориб келаман!

Давидов оғиз очишга ҳам улгурмаган эдики, у қўшхона томонга қуш бўлиб учди. Қоп-қора шудгорда учқур оёқларининг қора мағиз болдиirlари лишиллаб кўринар, бошидаги оқ дуррасининг учлари қаршидан эсаётган шамолда елкасида ўйнар эди. У мушт бўлиб қисилган қўлларини таранг кўкракларига босганча сал олдинга энгасиб югуаркан, бир нарсанигина ўйлар эди: «Югуриб бориб, пиджагини олиб келиб бераман... Тез югуриб бориб келиб, кўнглини хуш қиламан, у шунча вақтдан бери ақалли бир марта бўлса ҳам менга очиқ юз билан қараб, эҳтимолки: раҳмат, Варя, деса».

Давидов уни кўзлари билан узоқ кузатиб, ҳўкизларни чиқарди-да, шудгордан узоқлашди. Яқин орада ўтган йилги бурганин чирмаб ётган печакни топди-да, баргларини тозалаб, майин новдаси билан тельняшкасининг олдини туташ йўрмаб қўйди. Чалқанчасига ётиб, ер ҳиди келиб турган қандайдир юмшоқ қора нарса ичига тушиб кетгандек ухлаб қолди...

Пешанасида нимадир ўрмалаётганидан уйғониб кетди — афтидан, ўргимчак, ё биронта қурт бўлса керак. Ижирғаниб, қўли билан юзини силади, яна мудрай бошлади, яна ёноғида нимадир ўрмалаб, юқори лабидан юра бошлади, бурнини қитиқлади. Давидов аксириб, кўзини очди. Унинг қаршисида Варя чўнқайиб ўтирас, кулгидан ўзини аранг тийиб, бутун бадани учмоқда эди. У ухлаб ётган Давидовнинг юзидан қуруқ ўтни юргизмоқда эди. Давидов кўзини очганда қўлини тортиб олишга улгуролмади. Давидов унинг нозик панжасини ушлаб олди, у эса қўлини тортиб олмади. Бир тиззаси билан чўккалади, кулиб турган юзи бирлаҳзада чўчиган, муштоқ ва итоаткор қиёфага кирди.

— Мен пиджагингни олиб келдим, тур,— эшитилар-эшитилмас шивирлади у, қўлини бўшатиб олмоқчи бўлгандек бўлиб.

Давидов бармоқларини бўшатди. Варяниг офтобда қорайган каттакон қўли тиззасига тушди. У кўзларини юмиб, юрагининг ўқтин-ўқтин гурс-гурс урганини эшиди. У ҳамон ниманидир кутар, нимадандир умидвор эди. Аммо Давидов индамасди. У хотиржам ва равон нафас олар, юзидаги биронта ҳам томир қилт этмас эди. Сўнгра у ўрнидан туриб, ўнг оёғини босганча ўтириб олди, хушёқмаслик билан қўлини чўнтагига солиб, тамаки халтасини пайпаслай бошлади. Энди уларнинг бошлари бир-бирларига тегай-тегай деб қолган эди. Давидов бурун катакларини қимирлатиб, қиз соchlарининг нафис ва хушбўйроқ ҳидларини искади. Қизнинг бутун вужудидан жануб қуёшининг, жазирама қиздирган гиёҳларнинг ҳиди, ёшликнинг мафтун этувчи сарин, бекиёс хушбўй ҳиди анқиб турардики, буни ҳали ҳеч ким сўз билан ифодалаб бера олган эмас...

«Қандай ёқимтой қизалоқ!»— деб ўйлади Давидов

ва хўрсинди. Улар бараварига ўринларидан туришди, бир неча лаҳза бир-бирларининг кўзларига сўзсиз боқишиди, сўнгра Давидов унинг қўлларидан пиджагини олиб, кўзлари билан самимий жилмайди:

— Раҳмат, Варя!

Худди шундай деди: «Варюха-куюнчак» эмас, «Варя» деди. Пиджакни олиб келгани югуриб кетаётганида ўйлаганлари ниҳоят амалга ошди. Бўлмаса нима учун қуралай кўзларида филт-филт ёш кўриниб, уларни ушлаб қоламан деб қуюқ қора киприкларига титроқ кирди? Нима учун йиғлаяпсан, ёқимтой қиз? У гўдакларга хос осойишта соддалик билан бошини қуин солганча овозини чиқармай сассиз йиғларди. Аммо Давидов ҳеч нарсадан бехабар эди: у тамакининг биронта ҳам ушофини тўкиб юбормасликка тиришиб, ҳафсалা билан тамаки ўрамоқда эди. Унинг папирослари тугаган, тамакиси товсилиб қолган, шунинг учун ҳам тўрт-беш марта тортишга етгулик қилиб кичкина-кичкина папирослар ўраб, тамакисини тежамоқда эди.

Варя ўзини босиб олишга беҳуда уриниб, бир озгина турди. Аммо ўзини қўлга ололмади, шундан сўнг шартта бурилиб, ҳўқизлар томон қараб кетаркан, йўл-йўлакай деди:

— Ҳўқизларни ҳайдаб келаман.

Аммо Давидов унинг қалтираётган овозидаги қаттиқ ҳаяжонни яна пайқамади. У индамай бош силкиб тамаки чекди-да, диққат билан бригада барча кучини ишга солса, май шудгорига мўлжалланган ҳамма пайкални неча кунда ҳайдаб бўларкан, энг қувватли учинчи бригададан бу ерга бир неча плуг олиб келиб ташласам, дуруст бўлмасмикан, деб ўйлар эди.

Варяга кўз ёшларини Давидов кўра олмайдиган жойда йиғлаш қулай эди. У маза қилиб йиғлар, кўз ёшлари қорамағиз ёноқларидан думалаб тушар, у ёшларини йўл-йўлакай рўмолининг учи билан артар эди...

Унинг илк, соф қизлик муҳаббати Давидовнинг лоқайдлигига дуч келиб қолди. Аммо, бундан ташқари, ишқ-муҳаббат масалаларида Давидов умуман бефаҳмроқ эди, кўп нарсаларнинг фаҳмига етиб бормас, етиб борган тақдирда ҳам ҳамиша хийлагина кечикиб,

баъзан эса таассуфли даражада кечикиб етиб борар эди...

Хўқизларни қўшаётуб у Варянинг ёноқларида кир излар — яқинда тўкилган, ўзи пайқамаган ёшларнинг изини кўриб қолди. Унинг овозида таъна оҳанги янгради:

— Э-э-э, Варюха-куюнчак! Бугун юзингни ювмаганга ўхшайсан-ку?

— Буни нимадан билдинг?

— Юзингда аллақандай кир излар. Ҳар куни юваниш керак,— деди у ўғит билан.

...Қуёш ботган, улар эса ҳамон қўшхона томон ҳорғин юриб келишмоқда. Даштга қоронги тушиб келмоқда. Терновая балкани туман чулғамоқда. Фарбдаги қорага мойил тўқ кўк булувлар тусини ўзгартироқда: дастлаб унинг пастки патлари хира қизғиши рангга кирди, сўнгра уни қонли-қирмизи шафақ тешиб ўтиб, юқорига жадал ёйилди-да, кенг ярим доира ҳосил қилиб, осмонни эгаллади. «У менга кўнгил бермайди...»—ҳасрат билан ўйларди Варя, қалин лабларини қайгули қимтиб. «Эртага кучли шамол туриб, кун бўйи ер қурғаб қолса, ҳўқизларга қийин бўлади»,— норозилик билан ўйларди Давидов, яллигланаётган уфққа қараб.

Варя яккаш бир нима демоқчи бўлиб оғиз жуфтларди-ю, аммо қандайдир куч унга эрк бермасди. Қўшхонага яқинлашиб қолганларида журъат қилди:

— Менга кўйлагингни бер,— оҳиста илтимос қилди у. Унинг рад этишидан қўрқиб ёлворганча илова қилди:— Бер, бера қол!

— Нима учун?— таажжубланди Давидов.

— Мен уни ямайман, шундай яхшилаб ямайманки, чокини ҳам сезмай қоласан. Юваман ҳам.

Давидов кулиб юборди:

— Устимда тердан чириб тушган. Ямайман десанг, одамлар айтгандек, тутарга келмайди. Йўқ, жоним Варюха-куюнчак, бу тельняшканинг хизмат муддати тугаган, уни Куприяновна олиб, будканинг полини ювсин.

— Менга бергин, ямаб кўрай, ўшанда кўрарсан,— қатъият билан сўради қиз.

— Майли-ю, меҳнатларинг зое кетади-да,— деб қўнди Давидов.

Унинг Давидовнинг йўл-йўл қўйлагини қўлида кўтарганча қўшхонага кириб бориши ноқулай, бу кўп гап-сўзларга сабаб бўлиши, ўз шаънига ҳар қандай беодоб ҳазиллар туғдириши мумкин эди... У Давидовга ўғринча қия қараб қўйди-да, елқасини пана қилиб бир тутам иссиқ нарсани кўкрагига солиб қўйди.

Давидовнинг чанг босган тельняшкаси ялангоч кўксига тегаркан, уни шу пайт нотаниш, аломат ҳаяжонлантирувчи бир ҳис чулғади: гўё бақувват эр киши танасининг бор оташин тафти бутун вужудига ёйишиб, уни тўла эгаллаб олгандек бўлди. Бехосдан лаблари қақради, энсизгина оппоқ пешанасига шабнамдек реза тер тепди, ҳатто юриши ҳам бирдан аллақандай эҳтиёткор ва омонат бўлиб қолди.

Давидов эса ҳеч нарсани пайқамас, кўрмас эди. Бир дақиқадан сўнг у Варянинг қўлига кир тельняшкасини тутқизганини ҳам унугиб унга мурожаат этганча қувонч билан хитоб қилди:

— Уни қара, Варюха, ғолибларни қутлашларини! Ҳисобчи бизга фуражкасини силкитяпти-ку. Демак, сен билан биз ҳалол ишлабмиз, факт!

* * *

Кечки овқатдан сўнг эркаклар будкадан нарироқ-қа гулхан ёқиб, унинг атрофида чеккани ўтиришди.

— Хўш, энди самимий гаплашиб олайлик: нега ёмон ишладинглар? Ҳайдашни нега бунча чўзиб юбординглар?— сўради Давидов.

— У бригадаларда ҳўқизлар кўп,— деб қўйди кичик Бесхлебнов.

— Қанча ортиқ экан?

— Ўзинг билмайсанми? Учинчida — саккиз жуфт ошиқ, бу ҳар қалай тўртта плуг деган гап! Биринчida — иккى плуг ортиқ, демак, улар ҳам бизлардан кучлироқ.

— Бизнинг планимиз ҳам ортиқроқ,— гап қистирди Прянишников.

Давидов кулиб қўйди:

— Қанча ортиқ экан?

— Ўттиз гектар бўлса ҳамки, ортиқ-да. Бунча ерни тумшуғинг билан титкиламайсан.

— Планни мартда сизлар тасдиқлаганмидинглар? Нега энди ҳозир оби дийда қиласизлар? Бригадаларда мавжуд бўлган ерларни ҳисобга олган эдик-ку, шундаймиди?

Дубцов босиқлик билан деди:

— Ҳеч ким оби дийда қилаётгани йўқ, Давидов, гап бунда эмас. Бизнинг бригададаги ҳўқизлар қишлоғдан ёмон чиқди. Моллар билан емларни умумлаштираётганда бизда хашак билан похол камроқ экан. Сен бу нарсани жуда яхши биласан-ку, ахир, бизга ғишава қилишингнинг ҳам ҳожати йўқ. Ҳа, чўзиб юбордик, ҳўқизларимизнинг кўпчилиги камқувватлик қилиб қолди, ем-хашакни ҳам Островнов билан ўйлаганларингдек эмас, расамади билан тақсимлаш керак эди: молларни хусусий хўжаликлардан топширилган емлар билан боқяпсизлар. Оқибатда шундай бўлдики, бирорлар ерни ҳайдаб бўлиб молларни ўроқча тайёрляяпти, биз бўлсак ҳамон шудгор билан оворамиз.

— Бўлмаса, сизларга ёрдам берайлик. Любишкин ёрдам берсин,— тақлиф қилди Давидов.

— Биз йўқ демаймиз,— деди қолганларнинг сукутли розилиги билан далдаланган Дубцов.— Биз магрутур эмасмиз.

— Ҳаммаси равшан,— деди ўйланиб Давидов.— Шу нарса ҳам равшанки, правление ҳам, ҳаммамиз ҳам хомлик қилибмиз: қишида ем-хашакни, чунончи территориал жиҳатларга амал қилиб тақсимлабмиз, бу хато! Иш кучи билан уловни ҳам нотўғри жойлабмиз,— буниси иккинчи хато! Биз қайси жин урганиннайблаймиз энди? Ўзимиз янгишган эканмиз — ўзимиз тузатамиз. Иш унуми бўйича, мен бир суткалик иш унумини айтяпман, кўрсаткич рақамларингиз чакки эмас, умуман олганда эса расво. Қани ўйлаб кўрайлик, бу боши берк кўчадан чиқиб олиш учун сизларга қанча плуг ташлашимиз керак экан, келинглар, ҳамма нарсани ҳисоблаб чиқиб, ёзиб кўрайлик, ўроқ вақтида хатоларимизни ҳисобга оламиз, кучларни бошқача жойлаштирамиз. Қачонгача янгишиш мумкин ахир?

Гулхан атрофида икки соатча ўтириб баҳлашиши, ҳисоблашиши, ғижиллашиши. Ҳаммадан кўра Атаманчуков кўпроқ активлик кўрсатди. У астойдил гапирав, жўяли таклифлар ташлар эди, аммо Бесхлебнов Дубцовнинг шаънига аччиқ гап айтаётганида Давидов Атаманчуковга тасодифан қаараркан, унинг кўзларида шу қадар совуқ нафрат кўриб қолдики, ҳайрат билан қошларини керди. Атаманчуков дарҳол ерга қаради, қўнғир тук босган ҳиқилдоғини бармоқлари билан ишқади, яна бир дақиқадан сўнг Давидовга қараб у билан кўзи учрашганда — кўзларида сохта мулойимлик барқ ураг, юзидағи ҳар бир ажинда самимий лоқайдлик сезилиб тураг эди. «Артист!— деб ўйлади Давидов.— Аммо у менга нега бундай иблисона қаради экан? Чамаси, баҳорда колхоздан ҳайдаганимдан хафамикан?»

Аммо Давидов бир нарсадан хабарсиз, хабардор бўлиши ҳам мумкин эмас эди, ўшанда баҳорда Атаманчуковнинг колхоздан ҳайдалганини эшигтан Половцев уни кечаси ҳузурига чақиририб келиб, қурч жағини қисганча, тишларини ғижирлатиб шундай деган эди: «Бу нима қилганинг, шалоқ? Сен мен учун намунали колхозчи бўлишинг керак, ўзидан ўзи арзимаган нарсаларда қўлга тушиб қоладиган, ГПУдаги сўроқларда бўлса ҳамма қолганларни ҳам, бутун ишни ҳам барбод қоладиган ўтакетган аҳмоқ бўлишинг керак эмас. Сен колхознинг умумий мажлисида тиз чўк, итвачча, аммо шунга эришки, мажлис бригаданинг қарорини тасдиқламасин. Биз бош кўтармасимииздан бурун — одамларимиз заррача бўлсин шубҳага қолмасликлари керак».

Атаманчуковнинг тиз чўкишига ҳам тўғри келмади: Половцевнинг қистовли амри билан мажлисда Атаманчуковни Яков Лукич ҳам, унинг ҳамма маслак дошлари ҳам ёппасига ёқлаб чиқишиди, мажлис бригада қарорини тасдиқламади. Атаманчуков ижтимоий ҳайфсан билан қутулди. Ўшандан бери унинг попуги пасайиб, дуруст ишларди, ҳатто ялқовланиб ишлайдиган кишиларга меҳнатга онгли муносабати билан ўрнак ҳам бўлиб қолди. Аммо Давидов билан колхоз тузумига бўлган нафратини чуқур ва пухта яширол-

мас, нафрати аҳён-аҳёнда ихтиёридан ташқари, тоҳ эҳтиётсиз айтилган сўзи орқали, тоҳ совуқ кулгиси орқали сиртга чиқиб кетар, тоҳ сув берилган пўлатдек кўм-кўк кўзларида аламли учқун каби чақнаб, дарҳол ўчар эди.

Талаб қилинадиган ёрдамнинг кўлами билан ҳайдашни тугатиш муддатларини ярим кечага боргандагина аниқ белгилашди. Давидов шу ернинг ўзида, гулханинг олдидаёқ Размётновга хат ёзиб берди. Дубцов эса учинчи бригададан тушгача ҳўқизлар билан плугчиларни танлаб олиш учун тонг отишини кутиб ўтирасдан, ҳозирнинг ўзидаёқ хоторга жўнайдиган бўлди. Ўчиб қолган гулхан атрофида индамасдан яна бир марта чекишиди-да, ётгани тарқалишиди.

Худди шу вақтда будка яқинида бошқа бир суҳбат давом этмоқда эди. Жўнгина тунука тоғорада Варя эҳтиёт билан Давидовнинг тельняшкасини ювмоқда, ёнида турган ошпаз хотин эркакларнинг овозига мойил паст овоз билан гапирмоқда эди:

- Нега йиглајпсан, жинни?
- Кўйлагидан шўр ҳид келяпти.
- Нима қипти? Ишлаганларнинг ҳаммасининг ички кўйлагидан атир билан ироқи совун ҳиди эмас, шўр билан тер ҳиди келади. Бунча ўкрамасанг? Сени хафа қилиб қўйгани йўқми?
- Йўқ, нима деяпсан, хола!
- Бўлмаса нега дур-дур йиглайсан, лақма?
- Ахир бегонанинг кўйлагини эмас, ўз ёримнинг кўйлагини ювяпман-ку...— деди қиз тогорага бошини эгиб ва ўпкасини аранг босиб.

Узоқ сукутдан сўнг ошпаз қўлларини биқинига тираб, жаҳл билан хитоб қилди:

- Йўқ, тинкамга тегиб кетди! Варъка, ҳозир бoshingни кўтар!

Ўн еттигагина кирган кичкинагина шўрлик етовчи! У бошини кўтарди, ошпазга иффатли ёшлиқининг хун бўлган, аммо баҳтиёр кўзлари тикилди.

- Менга унинг кўйлагидаги шўр ҳам ардоқли...

Даръя Куприяновнанинг баҳайбат кўкраги кулгидан долғаланиб силкинди:

— Мана энди мен ҳам кўриб турибманки, Варька расмона қиз бўлиб қолибсан.

— Илгари қандай эдим! Расмона қиз эмасмидим?

— Илгари эмиш! Илгари сен ўйинқароқ қизалоқ эдинг, мана энди қиз бўлиб қолдинг. Токи бир йигит бошқа бир йигитни яхши кўриб қолган қизи туфайли тутиб олиб урмас экан — у йигит эмас, гўдак. Токи қиз тишини иржайтириб кўзини олайтиаркан — у қиз эмас, ўйинқароқ қизалоқ. Қачонки, унинг кўзи ишқмуҳаббатдан хун бўлиб ёстиғи кечаси билан кўз ёшидан шалаббо бўлиб чиқса — ана унда чинакам қиз бўлиб қолади! Тушундингми, тентак?

Давидов қўлини боши остига қўйғанча будкада ётар, уйқуси келмас эди. «Мен колхоздаги одамларни билмайман, уларнинг кўнгилларидагини билмайман,— ўқинч билан ўйларди у.— Дастрраб кулакларни тугатдик, кейин колхоз ташкил қилдик, кейин хўжалик ишлари бошланиб кетди, одамларни билмасам, билиб олмаган бўлсам, жин урсин, раҳбар бўлиб қаёққа бордим? Уларнинг ҳаммасини билиб олишим керак, улар унча кўп ҳам эмас. Аммо буларнинг ҳаммаси унча осон иш эмас экан... Мана Аржанов мутлақо бошқача экан. Ҳамма уни содда деб юради, аммо у содда эмас, э-ҳа, ҳеч содда эмас! Бу пахмоқ соқол алвастининг кўнглидагини иблис билиб олмаса, ҳеч ким билолмайди: болалигиданоқ чиғаноғига кириб олиб туйнугини ёпиб қўйған, кўнглига йўл топиб кир-чи,— кириб бўпсан, хомтама бўласан! Яков Лукич ҳам тилсимли қулф. Уни кўз остига олиб, яхшилаб разм солиш керак. Ўтмишда кулак бўлгани равшан, аммо ҳозир ҳалол ишлайпти, ўтмишидан қўрқса керак... Бироқ, уни хўжалик мудирлигидан ҳайдашга тўғри келади, оддий колхозчи бўлиб ишласин. Атаманчуковга ҳам тушуниб бўлмайди, менга худди ўлимга маҳкум этилганга тикилган жаллоддек тикилади. Нима гап ўзи? Расмона ўрта ҳол, хўш, оқларда бўлган, ахир улардан қайси бири оқларда бўлмаган? Бу жавоб эмас. Мен ҳамма нарсани пухта ўйлашим керак, кимга чинакам суюниш мумкинлигини, кимга чинакам ишониш мумкинлигини билмай туриб кўр-кўронга раҳбарлик қилишим етар. Эҳ, матрос, матрос! Агар цеҳдаги йигитлар

колхозга қандай раҳбарлик қилаётганингни билиб қолишица борми—то суяинг кўрингунча қатронлашарди!»

Будка ёнида, очиқ ҳавода етовчи хотин-қизлар жой солиб ётишди. Мудроқ босган Давидов Варянинг ингичка овози билан Куприяновнанинг баҳмал овозини эшитарди:

— Мунча пинжимга тиқилмасанг, бузоқ сигирга ёпишгандек?— дерди кулиб нафаси қисилганча ошпаз.— Ҳадеб қучоқлайверасанми? Эшиятсанми, Варька? Худо ҳақи, нарироқ ёт. Ўчоқдаги ўтдек лов-лов ёняпсан! Гапимни эшиятсанми? Сен билан бирга ётиб чакки қилибман... Оташ бўлиб қизиб кетяпсан, тобинг қочиб қолгани йўқми?

Варянинг осуда кулгиси мусичанинг кукулашига ўхшарди.

Давидов мудроқ ичида жилмайиб, уларнинг ёнмаён ётганларини тасаввур этди, уйқуга кетаётиб ўйлади: «Қандай ёқимтой қизалоқ, катта бўлиб бўйи етиб қолибди-ю, ақли ҳали ҳам ёш болаларнинг ақлидек. Бахтиёр бўл, жоним Варюха-куюнчак!»

У ўйғонгандада кун ёришиб кетган эди. Будкада ҳеч ким йўқ, ташқарида эркакларнинг овози эшитилмас, ҳамма қўшчилар аллақачон эгатда, ёлғиз Давидовгина кенг сўрида чўзилиб ётар эди. У чаққонлик билан сапчиб туриб, пайтавасини ўраб, этигини кияркан, бош томонида ювилиб, майда тепчиб моҳирлик билан яマルган тельняшкасини ва тоза каноп кўйлагини кўриб қолди. «Бу ерга кўйлагим қаёқдан келиб қолди? Яхши эслайман, бу ерга ҳеч нарсасиз келганиман. Бу ерда кўйлагим қаёқдан пайдо бўлиб қолди экан? Жин чалдими ўзи!»— таажжуланарди Давидов, бунинг туш эмаслигига узил-кесил қаноат ҳосил қилиш учун муздек канопни ҳатто қўли билан ушлаб ҳам кўрди.

Тельняшкасини кийиб, будкадан чиққандагина унга ҳамма нарса аён бўлди: башанг мовий кофтача ва ҳафсалা билан дазмолланган қора юбка кийган Варя бочканинг олдида оёғини ювмоқда, у худди шу эрта тоңгдек сарин, пушти лаблари билан унга қараб жилмаяр, катта-катта қора қуралай кўзлари ҳам худди кечагидек самимий қувонч билан порлаб турар эди.

— Кечанинг ўзидаёқ тинканг қуриб қолганмиди,

раис? Ухлаб қолибсанми?— деб сўради у баланд овоз билан кулиб.

— Қечаси қаёққа кетган эдинг?

— Хоторга бориб келдим.

— Қачон қайтиб келдинг?

— Ҳозир келиб турганим.

— Кўйлагимни сен олиб келдингми?

Варя индамай бош силкиди. Унинг кўзларида хавотир белгилари кўринди:

— Чакки қилибманми? Ё квартирангга кирмаганим маъқулми? Мен йўл-йўл кўйлагинг иш бермайди деб ўладим...

— Офарин, Варюха! Сенга ҳаммаси учун бир йўла раҳмат. Лекин нима муносабат билан бунақа ясаниб олдинг? Вой-бўй. Бармоғида узуги ҳам бор экан-ку.

Бармоғидаги жўнгина кумуш узукни ийманиб айлантиаркан, Варя шундай деб қўйди:

— Устимдаги кийим-бошим кир-яғир эди. Бориб онамдан хабар олиб, кийимимни алиштириб келдим...—Бирдан хижолатини енгиб кўзларини шўх чақнатди:— Кун бўйи ақалли бир марта қараб қўярсан леб, туфлимни ҳам киймоқчи эдим-у, аммо шудгорда туфлида юриб ҳўқиз етаклаб бўлмайди.

Давидов кулиб юборди:

— Энди сендан кўзимни узмайман, югурук кийиккинам! Хўп, бориб ҳўқизларни қўш, мен ювинаману, етиб бораман.

Шу куни Давидов деярли ишлашга муваффақ бўлломади. Ювиниб бўлмасидан Кондрат Майданников келиб қолди.

— Ахир сен икки кунга жавоб сўраган эдинг-ку, нега бунақа эрта қайтиб келиб қолдинг?— жилмайиб сўради Давидов.

Кондрат қўй силтади:

— Зерикиб кетдим. Хотиним ўрнидан турди. Безгак тутган экан. Хўш, мен нима қилдим. Бурилдиму изимга қайтдим. Варъка қаёқда?

— Ҳўқизларни қўшгани кетди.

— Бўлмаса мен ҳайдагани кетдим, сен меҳмонларни кут. Любишкуннинг ўзи саккиста плуг сургатиб келяпти, мен уларга ярим йўлда етиб олдим. Агафон

ҳам худди Кутузовга ўхшаб ҳаммадан олдинда оқ бия миниб келяпти. Ҳа, яна бир янгилик — кеча кечқурун қоронги тушиб қолганда Нагульневга ўқ узишибди.

— Қандай қилиб ўқ узишади?

— Қандай қилиб узишарди, милтиқдан-да. Биронта жин урган отганга ўхшайди. У лаңг очиқ дераза олдида чироқ ёқиб ўтирган экан, мўлжалга олиб отишшибди. Ўқ чаккасининг ёнидан терисини ялаб ўтиб кетибди, холос. Контузия туфайлими, ё жаҳлданми, боши қалтираб-қалтираб қўяди, аммо ўзи соғ-саломат. Район милициясидан одамлар келиб, изғиб, текшириб юришибди, лекин бир иш чиқиши амри маҳол...

— Эртага сизлар билан хайрлашишимга тўғри келади, хуторга кетаман,— деб қарор қилди Давидов.— Душман бошини кўтаряпти-я, Кондрат?

— Тузук, бу ёмон эмас, кўтарса кўтараверсин. Кўтарилган бошни чопиш осонроқ бўлади,— деди осоийишталик билан Майданников ва пойафзалини бошқатдан кия бошлади.

VIII БОБ

Ярим тундан сўнг юлдузли осмон бўйлаб елкама-елка зич бўлиб қоп-қора қуюқ булутлар сузиб кела бошлади, кузга хос тинкага тегувчи майдада ёмғир севалади, ҳадемай дашт худди чуқур, нам ертўладек қоп-қоронги, салқин ва жимжит бўлиб қолди.

Тонг отардан бир соат бурун шамол эсиб, булутлар гала-гала бўлганча тез юриб кетди, тик ёғаётган ёмғир солланиб, булут билан ер орасида шарқ томонга мойиллашди, кейин эса қандай қўйқисдан бошланган бўлса, шундай тез тиниб қолди.

Қуёш чиқар олдидан бригада будкасига бир отлиқ киши келди. У бамайлихотир отидан тушиб, тизгинни яқин орада ўсиб турган дўлана бутасига боғлади-да, ҳамон ўшандай хотиржамлик билан йўл-йўлакай муҷаларини ёзиб, ерўчақ олдида куйманаётган ошпаз хотин ёнига келди, у билан аста саломлашди. Куприяновна унинг саломига жавоб бермади. У чўккалаб, тирсаклари ва каттакон кўкраги билан ерга тирадланча, бошини қийшайтириб, қорайиб қолган тутантириқ-

ларни зўр бериб пуфламоқда, уни ўт олдиришга уринмоқда эди. Ёмғир ва қалин тушган шудрингдан шалаббо бўлган тутантириқ ўт олмас, хотиннинг зўриқишидан қизарган юзига биқсиган тутун урилар, паға-паға кул чангир эди.

— Қурибгина кетсин овқат қилиш шунаقا бўладиган бўлса!— алам билан хитоб қилди йўтал ва тутундан нафаси тиқилган, фижинган ошпаз хотин. У ўзини орқага ташлаб, рўмоли остидан тўзгиб чиққан сочларини тузатиш учун боши билан қўлларини кўтараркан, олдида турган меҳмонни кўрди.

— Тутантириқни кечаси будкага олиб кириб қўйиш керак, энага пазанда! Ҳўл ўтинни пуфлаб ўт олдириш учун ўпкангда даминг етмай қолади. Қани, сенга бир қарашиб юборай-чи,— деди меҳмон ва хотинни оҳистагина четлатди.

— Далаю даштда сенга ўхшаб изғиган ройкорчиларнинг сон-саноғи йўқ, қани ўт олдириб кўр-чи, ўпкангда даминг кўплигини бир кўриб қўяй,— дея жовради Куприяновна, ўзи эса бажонидил четга чиқиб, нотаниш одамни диққат билан кўздан кечира бошлади.

Меҳмоннинг бўйи ўртачагина, қиёфаси ҳам унча кўримли эмас эди. Эгнида жуда эскириб кетган хушбичимгина бобрик куртка, бели солдатча камар билан танғилган, қунт билан ямаб-ясқалган сабза ранг шими билан қўнжигача лой ёпишган эскигина этиги ҳам, афтидан эгаларига муддатдан ташқари хизмат қилган, бу эса чамаси уни ниҳоясига етказмоқда эди, қошигача бостириб кийган, олифта, ажойиб кумуш ранг қоракўл кубанкаси унинг фақирона либоси ичida мутлақо ажralиб турар эди. Меҳмоннинг қора мағиз юзи очиқ, пучуқ бурни жилмайганида аломат бир тарзда жийирилиб кетар, қуралай қўзлари эса одамга илтифотли ва оқилона табассум билан боқар эди.

У чўнқайиб ўтириб, курткасининг қўйин чўнтагидан зажигалка билан тиқини жипс ёпиладиган каттагина япасқи шиша олди. Бир дақиқадан сўнг устига бир талай бензин қўйилган тарашалар ловуллаб ёниб кетди.

— Ана шундай қилиш керак, энага!— деди меҳмон ошпазнинг сергўшт елкасига ҳазиллашиб уриб қўяр-

кан.— Майли, бу шишани сенга умрбод хотира учун тақдим қиласан. Тутантириқ намиқиб қолгудек бўлса тарашаларга сениб юборсанг иш ўнгидан келаверади. Совғани ол, атала-умочинг пишса, мени меҳмон қиласан! Бир товоқ қуюқ қилиб сузиб берасан!

Шишани қўйнига яшираркан, Куприяновна унга чучмал меҳрибонлик билан миннатдорчилик билдириди.

— Совғанг учун кўпдан-кўп раҳмат, ўргилиб кетай! Таом билан кўнглингни хушлайман. Айтмоқчи, бу шишани нима учун олиб юрасан? Ўзинг ветеринарлардан эмасмисан? Сигирларни боқадиган табиб эмасмисан?

— Йўқ, мен сигир табиби эмасман,— жавоб беришдан қочди меҳмон.— Қўшчилар қаёқда? Ҳали ухлаб ётишибдими?

— Баъзилари ҳовуз томондан ҳўқизларини олиб келгани кетишди, баъзилари аллақачондан бери узоқдаги шудгорда тер тўкишияти.

— Давидов шу ердами?

— Будкада. Ухляяпти шўрлик. Кеча куни билан ҳориди, ўзи ҳам иш деса муккасидан кетган, жуда кечётди.

— Алламаҳалгача нима қилиб юрди?

— Ким билади, шудгордан кеч қайтган эди, зарур экан шекилли, якка хўжаликлик вақтида экилган кузги буғдойларни кўриб келгани кетди. Қўриқ ернинг четидаги тепаликкача бориб келди.

— Ким ғаллани қоронги тушганда кўздан кечи-раркан?— меҳмон жилмайиб бурнини жийирганча, ошпазнинг йилтироқ лўппи юзига диққат билан тикилди.

— У ерга қоронги тушмай етиб борган бўлса, у ёқдан кеч қайтиб келди. Ким билади, нега кеч қайтди экан, эҳтимол булбул сайрашини эшитгандир. Бизнинг Терновая балкадаги булбулларнинг кўрсатадиган ҳунарларини айтсам — ақл бовар қилмайди! Шундай сайрашадики, шундай минг оҳангда наво қилишадики, уйқудан бегона бўлиб қоласан! Юрак-бағрингни эзиб юборишади қуриб кетмагурлар! Баъзан ётган жоийимда туриб-туриб хун-хун йиғлайман.

— Нима сабабдан?

— «Нима сабабдан» деганинг нимаси? Гоҳ ёшлигингни эслаб кетасан, гоҳ ёшлигингда бошингдан ўтган ҳар бало ишларни эслаб кетасан... Хотин кишининг оби дийда қилиши учун арзимаган баҳона кифоя, ўргилай.

— Давидов галлалардан хабар олгани ёлғиз ўзи бордими?

— Раисимиз ҳозирча етовчисиз юрибди, худога шукур — кўр эмас. Ўзинг ким бўласан? Нима иш билан келдинг? — бирдан эҳтиётланди Куприяновна ва сиполик Силан лабларини қимтиди.

— Уртоқ Давидовда ишим бор эди,— деди яна жавобдан қочиб меҳмон.— Менинг ишим ошиғич эмас, уйғонгунча кутиб туришим мумкин, заҳматкаш тўйиб ухлаб олсин. Ўтинлар гуруллаб ёниб кетгунча, сен билан у ёқ-бу ёқдан гаплашиб ўтира турамиз.

— Сен билан гап сотишга тушиб кетсан, бир жаҳон одамга шунча картошкани қачон артиб бўламан? — сўради Куприяновна.

Аммо хушчақчақ меҳмон бу ўринда ҳам гарангсиб қолмади: у чўнтағидан қаламтарош олиб унинг тифини бошмолдоғининг тирноғига тақаб кўрди.

— Картошкангни бу ёққа олиб кел, мен артишиб юборай. Бундай ёқимтой ошпазга умрбод ёрдамчи бўлишга розиман, кечалари менга кулиб қараса бас... Ақалли ҳозиргидек қараса ҳам майли.

Яйраб, яна ҳам қизариб кетган Куприяновна намойишкорона таассуф билан бошини чайқади:

— Нимжонгина экансан, ўрсликкинам! Жуссанг менга нимжонлик қиласди... Аҳён-аҳёнда кечаси бир кулиб боқишим ҳам ажаб эмас-у, лекин сен бари бир илғамайсан, кўролмайсан...

Меҳмон дуб тўнкага ўрнашиб ўтириб олгач, кўзларини қисиб кулаётган ошпазга тикилди.

— Мен кечалари худди уккига ўхшаб кўраман.

— Сен илғай олмаганингдан эмас, ўтқир-ўтқир кўзгиналарингга ҳалқа-ҳалқа ёш тўлганидан кўролмай қоласан...

— Сен ҳали шунақамисан,— оҳистагина кулиб қўйди меҳмон.— Яна мендан олдин ўзинг шашқатор

Йиғлаб юрмагин, гупсонги! Мени кундузлари хушфеъл демасанг, кечалари сенга ўхшаган семизларга омон бермайман. Дод-войингга ҳам қарамайман!

Куприяновна пиқиллаб кулиб юборди, ботир ҳам-суҳбатига сипогина маъқуллаб қараб қўйди.

— Керилган — гар-гар кекиради, куюнчакни ғам куйдиради, дейишади, ўргилай.

— Сарҳисобини эрталаб қиласиз: кимни ғам куйдиради-ю, ким кериша-кериша уйқуни уради. Қани картошкани олиб кел, олаҳакка, бекорчиликни бозор кўтартмайди!

Куприяновна лапанлаганча будкадан бир чеълак картошка олиб келди, ҳамон кула-кула меҳмоннинг қаршисидаги табуреткага ўтирди. Меҳмоннинг қорамағиз чаққон бармоқлари остидан юпқагина картошка пўчоғи буралиб-буралиб чиқаётганини кўраркан, мамнуният билан гапирди:

— Гапга чечан десам, ишга ҳам чечан экансан. Єрдамчим чакки эмас!

Меҳмон қаламтарошини чаққонлик билан ишлатар, индамас эди, бир неча дақиқадан сўнггина сўради:

— Хўш, Давидов қалай? Қазакларнинг дидига ёқдими, ё ёқмадими?

— Тузук, ёқди. У ботир йигит, сенга ўхшаган соддагина. Ичидан пишган писмиқларни биздагилар ёмон кўришади.

— Содда дегин?

— Жуда тўпори!

— Демак, лақмароқ экан-да! — меҳмон кубанкаси остидан муғамбирана тикилди.

— Сен ҳам ўзингни лақма деб ҳисоблайсанми? — деди истеҳзо билан Куприяновна.

— Ундай деёлмайман...

— Нега бўлмаса Давидовни лақма дейсан? Ахир бир-бирларингизга жуда ўхшаб кетасизлар-ку...

Меҳмон яна индамай қолди, мийигида кулганча əхён-аҳёнда сергап ошпазга назар ташлаб қўярди.

Шарқда булат тўсган қизғиши қуёш шафаги яна ҳам кенгайди. Туни билан дам олган шабада қанот ёзиб Терновая балкадан булбул навосининг янгроқ садола-

рини олиб келди. Шу пайт меҳмон қаламтарошининг тифини шимиға артиб, илтимос қилди.

— Бор, Давидовни уйғот. Чаласини қишда ухлар.

Давидов будкадан яланг оёқ чиқди. У уйқусираган ва тунд эди, меҳмонга қараб қўйғач, хирқироқ овоз билан сўради:

— Райкомдан пакет олиб келдингми? Бер.

— Пакетим йўқ, аммо райкомдан келдим. Этигинги кий, ўртоқ Давидов, гаплашиб олишимиз керак.

Сурат чекилган кенг кўкрагини қаширкан Давидов меҳмонга лоқайдгина қараб қўйди:

— Ичимда сезиб турибман, жаноблари — райкомнинг вакили... Мен ҳозир, ўртоқ!

У тезгина кийинди, этигини эса қўлантаёқ кийиб олди, юзини дуб бочкачанинг талх ҳиди келиб турган суви билан апир-шапир ювиб, бир оз намойишкорона таъзим қилди:

— Сталин номидаги колхознинг раиси Семён Давидов.

Меҳмон Давидовга яқин бориб, унинг яғриндор елкасидан қучоқлади.

— Сен ўзингни шунаقا расмий таништирас экансан-да! Мен — райком секретари Иван Нестеренко-ман. Мана, танишиб ҳам олдик, энди бориб, у ёқ-бу ёқни айланиб самимий гаплашиб олайлик, ўртоқ колхоз раиси. Хўш, қалай, ҳайдаладиган ер кўпми ҳали?

— Анчагина...

— Демак, хўжайн мўлжалидан адашибди-да?

Нестеренко Давидовни қўлтиқлаб аста-секин шудгор томонга етаклади. Давидов унга қия қараб босиқлик билан деди:

— Янглишдим.— Ўзи кутмаган ҳолда бирдан қишишиб кетди:— Ахир тушунсанг-чи, қимматли секретарь, мен қишлоқ хўжалик соҳасида аммамнинг бузогиман. Мен ўзимни оқламайману, янглишган ёлғиз мен эмас... Ахир бу иш янги бир иш бўлса...

— Мен кўриб, тушуниб турибман, хотиржамроқ гапиравер.

— Ёлғиз менгина эмас, мен орқа қилган ҳамма йигитлар ҳам мен билан бирга мўлжалдан адашибиди. Кучларни нотўри тақсим қилибман. Тушуняпсанми?

— Тушуняпман. Жуда ҳам ваҳима қиласиган жоий ийүқ. Ўнча ваҳима қиласиган нарса эмас, йўл-йўла-кай тузатиб оласизлар. Одам ва от-улов важидан маддад олдингларми? Яхши. Кучларни жойлаштириш, бу кучларни бригадалар бўйлаб бир меъёрда тақсимлаш важига келсак келажакда, ақалли пичан ўроғи, хусусан ғалла ўроғи вақтида ҳисобга ол. Ҳаммасини олдиндан пухта ўйлаб қўйиш керак.

— Равшан, факт!

— Хўп, энди сен ҳайдаган ерга борайлик, менга пайкалингни кўрсат. Ленинград ишчилар синфининг Дон тупроғида қандай уддабуролик кўрсатаётганини кўрмоқчиман... Ишқилиб Путоловский парткомининг секретарига сенинг парвосизлигингдан шикоят қилиб хат ёзишимга тўғри келмайдими, а?

— Буниси ўзингга ҳавола.

Нестеренко кичкина, аммо кучли қўли билан Давидовнинг тирсагини яна ҳам қаттиқроқ сиқди. Секретарнинг содда, очиқ юзига қия қараб қўяркан Давидов бирдан енгил тортиб, ўзини эркин ҳис қилди. Қатъий лабларида беихтиёр табассум кўринди. Негаки партиявий раҳбарлардан ҳеч бири у билан аллақачонлардан бери бу қадар дўстона содда ва инсонларча самимий сўзлашмаган эди...

— Сифатни текширмоқчимисан, ўртоқ Нестеренко? Астойдилми?

— Нима деяпсан, нима деяпсан! Ишчилар синфи станок тепасида эмас, дастгоҳ тепасида эмас, ер тепасида турса нималарга қодир эканлигини билмоқчиман, кўрмоқчиман, холос. Агар билгинг келса, мен — асли ставрополлик ғаллакорман, шу важдан казаклар сени нималарга ўргатишганини билишга қизиқиб қолдим... Эҳтимолки, сенга ер ҳайдашни бирон казак хотин ўргатиб, чала ҳайдашга ҳам одатлантиргандир? Эҳтиёт бўл, Гремячий жувонларининг заарли таъсирiga берила кўрма! Уларнинг ораларида шунақангилари борки, ҳатто сендек кўпни кўрган денгизчини ҳам ҳар бало йўлга солишлари мумкин... Ҳақ йўлдан адаштиришлари ҳеч гап эмас! Ё биронтаси аллақачон адаштириб бўлганми?

Нестеренко оғзига келган гапни ҳушчақчақлик би-

лан тортиномай гапираётгандек кўринса-да, Давидов ҳазил тарзидаги аллақандай шамани дарҳол пайқаб, ўзини қўлга олди. «Лушка тўғрисида бирон гап билармикан ёки таваккалга қармоқ ташлаяптими?»— хавотир билан ўйлади у. Аммо ҳазил оҳангидаги суҳбатни давом эттириди:

— Агар хотин киши йўлдан чиқиб ёки адашиб қолса «Войдод!» деб қичқиради. Эркак киши, чинакам эркак бўлса, нафасини ичига ютиб йўлини қидиради, факт!

— Сен чинакам эркак бўлсанг керак-да?

— Сен нима деб ўйловдинг, ўртоқ секретарь!

— Мен шундай деб ўйлайман: менга бақироқлардан кўра чинакам эркаклар кўпроқ ёқади, агар сен, Давидов, бехосдан йўлдан адашиб қоладиган бўлсанг, шовқин-сурон кўтармай, менинг қулоғимга шипшиб қўй. Бир амаллаб сенинг тўғри йўлга чиқиб олишинингга ёрдам бераман. Бўптими?

— Кўнглимни кўтарганинг учун раҳмат,— деди энди жиддийлик билан Давидов, ичида эса: «Вой жин урган-эй! Ҳаммасини билиб олибди-я...» деб ўйлади. Охирги жумласининг жиддийлигини таъкидламаслик учун қўшиб қўйди:— Секретаримиз ниҳоятда хушфеъл, асло топилмайдиган!

Нестеренко юриб кетаётган жойида тўхтаб, Давидовга ўгирилди-да, ҳашаматли кубанкасини орқасига сурив, табассумдан бурнини тириштирганча гапирди:

— Шунинг учун хушфеълки, ёшлигига ўзи ҳамгоҳо-гоҳо йўлидан адашиб юрган... Эсимда, шундай бўлардики, чунончи худди параддагидек қадам ташлаб кетяпсан, шахдам қадам ташлаб кетяпсан, кейин қадаминг пойма-пойлашиб, қаёққа тушганини ҳам пайқамай қоласан, хуллас, четга ташлаб, то яхши одамлар сен ёўра аҳмоқни тўғри йўлга олиб чиқиб қўймагунларича қушқўнмасларнинг устидан тасира-тусур кетаверасан. Хушфеъллигимнинг қаёқдан пайдо бўлганини тушундингми, матрос ошна? Лекин мен ҳаммага ҳам бир текисда хушфеъл эмасман...

— Тўрт оёғи бўлгани билан ҳатто от ҳам қоқилали, дейдилар-ку,— эҳтиёт билан луқма ташлади Давидов.

Аммо Нестеренко унга совуққина қараб қўйди:

— Агар яхши от бир-икки марта қоқиладиган бўлса, уни кечириш мумкин, аммо шундай отлар ҳам борки, ҳар қадамда қоқилади. Уни қанча ўргатмагин, қанча жонингни куйдирмагин, у ҳар бир дўнгни тумшуғи билан туртиб ўтишининг пайдан бўлади. Бунақангни қирчанғи билан отхонани банд қилишнинг нима ҳожати бор? Йўқолсин!

Давидов сезилар-сезилмас мийифида кулиб, индамасди. Шама шу қадар ошкора эдики, изоҳнинг ҳожати йўқ эди...

Улар аста-секин шудгор томон қараб боришмоқда, уларнинг ортидан қуёш ҳам баҳайбат бинафша булут орқасига яширинганча аста-секин кўтарилиб келмоқда эди.

— Мана менинг пайкалим,— деди Давидов узоқларга кетган шудгорга ясама бепарволик билан ишора қилиб.

Бошининг сезилар-сезилмас ҳаракати билан кубанкасини қошлиригача тушириб олиб Нестеренко нам шудгорни кўндалангига кесиб, лапанглаганича кета бошлади. Үндан берироқда кетаётган Давидов секретарь қўнжига кириб қолган бурганни олаётгандек бўлиб бир неча марта энгашиб шудгорнинг чуқурлигини ўлчаганини кўрди. Давидовнинг сабри чидамади:

— Очиқчасига ўлчайвермайсанми? Менга дипломатия ишлатиб нима қиласан?

— Кўриб кўрмасликка ола қолсанг бўлмасмиди,— йўл-йўлакай минфиллади Нестеренко.

У пайкалнинг нариги четида тўхтаб, малол кела-диган илтифот билан гапира бошлади:

— Умуман,— дуруст, аммо шудгор бир меъёрда эмас, худди ўсмир бола ҳайдаганга ўхшаб турибди: бир жойи чуқур, бир жойи саёз, баъзи жойлари бўлса жуда чуқур. Ҳар қалай, бу — уқувсизликдан, эҳтимолки, қўшнинг қулоғига хушнудлик билан ёпишиб иш бошламаганингдан. Шуни билиб қўйки, Давидов, баджаҳл одамнинг урушда омади келади, баджаҳллик урушда далда беради, шудгорда бўлса, очиқ кўнгил бўлиш керак, чунки ер вазминн, меҳрибон муюма-

лани яхши кўради. Менга марҳум отам ҳаётлигига шундай деган эди... Хўш, нега ўй суринб қолдинг, даشت биёбон денгизчиси?!— бирдан хушчақчақ қичқирди Нестеренко ва Давидовни кифти билан қаттиқ туртиб юборди.

У гандираклаб кетди, аввал курашга даъват этилаётганини тушунмади. Аммо кулаётган Нестеренко уни яна куч билан итариб юборгач, Давидов чатаноғини кериб туриб олди-да, олдинга сал энгашди.

Улар бир-бирларига ёпишиб, бир-бирларининг камарларини қидира бошлиди.

— Беллашамизми?— нафас олмай сўради Нестеренко.

— Таъбинг, ғирромлик ишлатмасдан, ҳалол тушамиз.

— Бошдан ошириб ташлаш ҳам йўқ,— дея нафасини бўшатди рақибини ёнбошига олишга интилиб, сал-пал пишиллаётган Нестеренко.

Давидов унинг қурч ва серпай гавдасини қучоқлаб оларкан, шу ондаёқ ҳадисидан қархисида чинакам, тажрибали курашчи турганини фаҳмлади. Давидов кучлироқ эди-ю, аммо Нестеренко ҳаракатчанлиги ва эпчиллиги билан ундан устунроқ эди. Икки мартача юзлари тақалишиб келганда Давидов унинг қўнғир қизиллик қоплаган ёногини, шўх чақнаб турган кўзини кўрди, шивирлаб айтган: «Қани, қани, ишчилар синфи! Нега ҳеч турган жойингдан жилмайсан?» деган сўзларини эшиитди.

Улар саккиз минутча шудгорда олишишди, сўнгра фоятда тинкаси қуриган Давидов ҳирқираб деди:

— Ут устига чиқиб олайлик, бўлмаса бу ерда жон таслим қилиб ўтирумайлик...

— Қаерда бошлаган бўлсак, шу ерда тамомлаймиз,— оғир ҳарсиллаб шивирлади Нестеренко.

Давидов охирги кучини йиғиб рақибини амал-тақал билан заранг ерга суриб чиқди, шунда синашишлари ниҳоясига етди: улар бирга йиқилдилар, аммо йиқилиш пайтида Давидов Нестеренкони ёнбошига олди-да, устига бориб тушди. Чатаноқларини кергансча, рақибини гавдасининг бор залвари билан ерга босиб ҳарсиллай-ҳарсиллай аранг гапирди:

— Хўш, қалай, секретарь?

— Нима дердим, тан бераман... Зўр экансан, ишчилар синфи... Мени осонликча йиқитиш қийин, бу нарса билан болалигимдан бери шуғулланиб келаман...

Давидов ўрнидан туриб, мағлуб рақибига илтифот билан қўлини чўзди, аммо униси ростланган пружинадек ўрнидан сапчиб туриб, унга орқасини ўгирди.

— Тупроғини қоқиб қўй!

Давидов Нестеренконинг елкасига ёпишган тупроқ ва ўтган йилги хас-чўпни каттакон қўллари билан, эркакларга хос қандайдир самимият ила, авайлаб қоқиб туширди! Уларнинг кўzlари яна учрашди, икковлари ҳам кулиб юборишиди.

— Сен ақалли менинг партиявий унвонимга риоя қилиб бир оз ён боссанг бўлармиди! Ниманг кетарди? Эҳ, Ленинград айиги! Иззат-хурмат деган нарсани, таъзим-тавозе деган нарсани билмас экансан... Аммо жилмайшишингга борман! Кулгидан оғзинг қулогингда, худди куёв болага ўхшаб ҳузур қилиб турибсан!

Давидов чиндан ҳам яйраб жилмаймоқда эди:

— Иккинчи гал ҳисобга оламан, факт! Аммо сен ҳам қаттиқ қаршилик кўрсатмагин-да, ахир тиззангача ерга ботиб кетсанг ҳам таслим бўлгинг келмади. Эҳ, Нестеренко, Нестеренко! Макар Нагульнов айтмоқчи, ставрополлик бадбаҳт ўртаҳол ва майда хусусий мулкчи. Сен, секретарь сифатида тушунишинг керакки, ишчилар синфи ҳар қандай ишда ҳам юқорида бўлиши керак, бу тарихий жиҳатдан асосланган, факт!

Нестеренко кулиб ҳуштак чалиб қўйди, бошини чайқади. Кубанкаси гарданига сирғала тушиб бориб, унда тасодифан туриб қолгандек бўлди. У кула-кула гапирди:

— Иккинчи марта мен сени албатта йиқитаман! Кўрамиз, ўшанда қандай марксистик далил қидириб қоларкансан! Шуниси ёмон бўлдики, сен билан икковимиз ёш болаларга ўхшаб олишайтганимизни ошпаз хотин кўриб турди. у бизни нима деб ўйлаши

мумкин? Қап-катта одамлар эсларини ебди, деса керак...

— Давидов парвосизлик билан қўл силтади:

— Ёшлигимизни айтсак, тушуниб кечирар... Қани, гаплашиб олайлик, ўртоқ Нестеренко, бўлмаса вақт кетяпти, факт!

— Ўтиришимиз учун қуруқроқ жой топ.

Улар эгасиз суғур уяси устидаги тупроқ уюмига ўтиришди, Нестеренко шошмасдан гап бошлади:

— Бу ерга келишимдан олдин мен Гремячийда бўлдим. Размётнов билан, хоторда ҳозир бўлган активларнинг ҳаммаси билан танишдим, Нагульновни бўлса танийман, у билан хоторга келмасимдан бурун танишган эдим, у райкомга ҳам борган эди. У билан Размётновга ҳам айтган эдим, сенга ҳам такрорлай: сизлар яхши колхозчиларни, бизнинг ишимизга содиқ одамларни партияга тортиш борасида ёмон иш олиб бораётибсизлар. Жуда ёмон иш олиб бораётибсизлар! Ваҳоланки колхозда яхши-яхши одамлар бор, тўғрими?

— Факт!

— Бўлмаса гап нимада?

— Яхшилар ҳам кутиб туришибди...

— Нимани?

— Колхоз масаласи оқибатда нима бўлишини. Ҳозирча — кўпроқ ўз полизларида ўралишишсанти.

— Уларни ишга солиш керак, мияларини карахтликдан чиқариш керак!

— Унча-мунча ишга соляпмизу, аммо иш чиқмаяпти. Ўйлайманки, кузга бориб ячейкамиз ўssa керак, факт!

— Кузгача қўл қовуштириб ўтирасизларми?

— Йўқ, нега энди, ҳаракат қиласиз, аммо сиқиқ-қа олмаймиз.

— Мен ҳеч қандай сиқиқ тўғрисида гапираётганим йўқ. Хуллас, илфорлар жумласидан бўлган баъзи меҳнатсеварларни бағримизга тортиш, уларга партиянинг сиёсатини содда тил билан тушунтириш учун ҳар бир қулай имкониятдан фойдаланишимиз керак.

— Биз шундай қиляпмиз, ўртоқ Нестеренко,— деб ишонтирди Давидов.

— Шундай қилаётган экансизлар-у, ячейка бўлса ўсмаяпти. Бу фаолиятдан кўра фаолиятсизликка ўхшаброқ кетади... Майли, шошмаймиз — кўрайлик-чи, бундан бу ёғига ишларингиз қандай кетар экан. Хўп, энди бошқа нарса тўғрисида гаплашамиз. Мен сенга бошқа хилдаги баъзи бир камчиликларни кўрсатмоқчиман. Мен бу ерга сен билан танишгани, таъбир маъзур кўрилса, искашиб олгани, самимий суҳбатлашиб олгани келдим. Сен саводхон йигитсан, ёшлигингни астойдил баҳона қилиб ўтирамайсан, ёшлигинг ўтиб кетган, шу қадар узоқлашиб кетганки, изидан қувиб бориб қайтариб олиб келолмайсан! Мендан пролетар келиб чиқишингга, тажрибасизлигиннга ва бошқа жиҳатларингга нисбатан ён босишни, шунингдек баъзи партиявий раҳбарлар олифтачилик билан кўз-кўз қилишни ёқтирадиган қаттиқ қўлликни ҳам кутма.— Нестеренко анчагина жонланиб сўзида давом этди:— Бизнинг партиявий турмушимизда, менинг назаримда жўясиз ҳаракатлар ва ўшаларга мос: «пўстини шилиш керак», «қум билан қатронлаш керак», «жилвир билан ишқалаб қўйиш керак» деганга ўхшаган ибораларни ишлатиш одат бўлиб қолди. Гўё гап одам ҳақида эмас, занглаган темир парчаси ҳақида кетаётгандай. Ахир бу нима деган гап ўзи? Шуни билиб қўйки, бу ибораларни кўпроқ умри бино бўлиб на металлнинг, на ёғочнинг пўстини шилган, ажаб эмаски, эговни ушлаб ҳам кўрмаганлар ишлатишиади. Ахир одам — нозик нарса, унга, эҳа, жуда ҳам эҳтиётлик билан муомала қилиш керак!

Сенга бир воқеани гапириб берай. Ўн саккизинчи йилда бизнинг отрядимизда шундай тартиб-интизом ҳукм сурардики, бундан расво тартиб-интизом бўлиши мумкин эмасди! Гапнинг рости бу қизил гвардия отряди эмас, махночи босқинчилар тўдаси эди. Ўн тўққизинчи йилнинг бошида бизга — Донецк шахтёрларидан чиқсан коммунистни комиссар қилиб юборишиди. Ўрта яшар, букчайганроқ киши эди; мўйлови қоп-қора, худди Тарас Шевченконинг мўйловидек салқи. У келиши билан ҳамма ишларимиз бошқача бўлиб кетди. Ўша вақтда отрядни Қизил Армия полкига айлантиришди. Полкдаги одамлар ўша-ўша бўл-

са ҳам, янгидан дунёга келгандек бошқача бўлиб қолишиди. Ревтрибунал судига бериш у ёқда турсин, биронта ҳайфсан, танбеҳ ҳам берилмади, полкда шахтёр-комиссар пайдо бўлгач, атиги бир ойнинг ичидаги шундай бўлса-я! У нима билан ийдиарди? Самимилик билан, шу хислати билан ийдиарди айёр шайтон! Ҳар бир қизил аскар билан гаплашарди, ҳар қайсисига яраша илиқ сўз топиб айтарди. Жанг олдидан қўрқоқлик қилганга далда берарди, тентакларни ҳушига келтириб қўярди — шундай ҳушига келтириб қўярдики, у одам қийиқлик қилиб хафа ҳам бўлмасди. Унинг қулоғига пи chirларди: «Ўзингни беҳудага ўтга, чўққа ураверма, аҳмоқ! Ахир сени ўлдириб қўйишади-ку, унда бизнинг ҳолимиз нима кечади? Ахир сен бўлмасанг бутун взводнинг, ажаб эмаски, бутун ротанинг ҳоли хароб бўлади-ку!» Хўш, ўз-ўзидан маълум, комиссар унинг тўғрисида шундай фикрда эканлигидан қаҳрамон ийиб кетади, палапартиш эмас, мулоҳаза билан жанг қила бошлайди... Комиссаримизнинг атиги бир нуқсони бор эди: биронта каттароқ қишлоқними ёки казак станицасини эгаллаб қолсак, нокаслик қила бошларди..

Давидов бехосдан Нестеренкога шу қадар кескин бурилдики, шамол ялаб кетган тик суғур тепадан йиқилиб тушишига сал қолди. Панжалари ёзилган ўнг қўли ҳўл тупроқдан сирғалиб, унга таянганча, хитоб қилди:

— Нокаслик қўлгани нимаси? Нималар деяпсан? Нестеренко оҳиста кулиб қўйди:

— Таъбирдан адашдим! Нокаслик эмас, бой саводогарларнинг, помешчикларнинг, хуллас, ўша вақтларда китоб сотиб олишга қодир бўлганларнинг кутубхоналарини титкилай бошларди. Ўзига керакли китобларни ажратиб олиб, ҳеч қандай эътиrozга ўрин қолдирмай мусодара қиласди! Айтсан ишонмайсан — тўрт арава китоб, бутун бошли кўчма кутубхона олиб юрарди, китобларни ҳам ўқ-дорилардек эҳтиёғ қиласди: ҳар бир аравага брезент ёлилган, китоблар ҳам расамади билан тахлаб қўйилган, ҳар қайсисининг тагига похол тўшалган. Манзил ташлаганимизда, ҳордиқ чиқараётганимизда, жанг ораларидаги

тиним пайтларида, қурол яроғларни тозалаб, овқатланиб бўлганимиздан кейин ҳар бир бўш дақиқада жангчиларга китоб тутқизарди, ўқишни буюрарди, кейин эса ўқиган-ўқимаганимизни текширади...

Мен ўша вақтда ёшлик қилган эканман, кўпроқ қизларга қизиқардим, ростини айтсан, мутолаага бўйним ёр бермасди... Ўзим бўлсан анчагина чаласавод эдим, оқ-қорани танимасдим. Бир кун у берган китобини ўқимаганимни билиб қолди. Ушандан бери ўша китобнинг автори ҳам, номи ҳам сира-сира эсимдан чиқмайди... Икки кундан кейин китобнинг мазмунини сўраб қолди. Мен оғиз очолсан-чи. У бўлса,— бундай ҳолларда одамни бировларнинг олдида шарманда қилмаслик учун ҳамиша холи топиб гаплашарди,— менга шундай деди: «Хўш, бу дунёда Иванушка-тентак бўлиб яшаб ўтмоқчимисан? Кечакекчурун кўрдим, бир қизнинг атрофида гирди капалак бўлаётганингни. Шуни бўркингда билиб қўйки, саводхон қиз сен саводсиз аҳмоқни бошига ҳам урмайди, сен билан гаплашса, беш минутдан кейин зерикиб қолади; у тентакка сен сира ҳам асқатмайсан: у сендан ақл ўрганолмайди, чунки ақлнинг асари ҳали ўзингда ҳам йўқ, ҳали ақл орттирган эмассан. Эрракларга хос бўлак фазилатларга келсак, улар саводхонларда ҳам саводсизларда борчалик бор, лекин ҳар жиҳатдан қараганда устунлик саводхонлар томонида. Тушундингми, ғўра тўнгак?»

Хўш, мен унинг бу гапига нима деб жавоб қайта-ришим мумкин эди?..

У ярим ойгача менга сира кун бермай калака қилиб юрди, йиғламоқдан бери қилди,— аммо ҳар қалай мутолаага ўргатди, шундан кейин ўзим ҳам китобларга шу қадар муккамдан кетдимки, бошимни кўтармасдан ўқийман. Ҳозиргача уни хушнудлик билан эслайман, сидқидилдан айтсан, менга шунча билим билан тарбияни марҳум отам берганми ёки комиссарим берганми, айттолмайман.

Нестеренко ниманидир ўйлаб, бир оз жим қолди. Унинг кўнгли бузилиб кетди шекилли. Аммо бир дақиқадан сўнг муғамбirona табассумини аранг тийиб, саволларни ёфдира бошлади:

— Сен бўш вақтингда бирон нарса ўқийсанми? Фақат газеталарни кўздан кечириб чиқсанг керак? Бўш вақтинг ҳам кам бўлса керак-а? Айтмоқчи, сизларнинг қироатхоналарнингизда қизиқ китоблар борми? Билмайсанми?! Ҳе, оғайни, уят сенга! Қироатхонага ҳеч кирмаганмисан?. Икки мартагина кирган эдингми? Эҳ, ошнажон, бу гапга ҳеч ақл бовар қилмайди-ку! Мен сенинг тўғрингда бошқача фикрда эдим. Ленинград ишчилар синфининг вакили! Сенинг заводингга шу тўғрида ёзишим мумкин экан. Аммо сен хавотир олма, мен ўз номидан шундай деб ёзaman: «Заводингизнинг собиқ ишчиси, ҳозирда Сталин номидаги колхознинг раиси йигирма беш мингчи Давидов билан у раҳбарлик қилаётган колхозчилар ниҳоятда китобга муҳтожлар. Уларга оммабоп сиёсий ва иқтисодий адабиёт, агрономия, чорвачилик ва умуман қишлоқ хўжалигига оид китоблар фоятда зарур. Шунингдек, ҳам классик, ҳам ҳозирги замон адабиётидан иборат бадиий адабиётлар туркуми бўлса ҳам мақбул бўларди. Оталик тартибида, мумкин бўлса, фалон адресга уч юзтагина китобдан иборат бепул кутубхонача юборсангизлар». Дурустми? Шундай деб ёзайми?.. Ёзмайми? Хоҳламайсанми? Хоҳламаганинг яхши! Бўлмаса ўзинг ҳаракат қилиб, колхоз маблағига икки юз-уч юз китобдан иборат кутубхона сотиб ол. Пул йўқ дерсан? Беҳуда гап! Топилади! Қариб қолган ҳўқизлардан бир жуфтини сот, қашшоқлашиб, ўлар ҳолга етиб қолмассизлар! Ана сенга кутубхона, кутубхона бўлганда ҳам ҳазилакам кутубхона эмас! Кеча мен правлениеда ҳисоблаб кўрдим. Мавжуд ерларингизга нисбатан ошиқча уловларингиз бор экан. Уларга беҳуда ем сарф қилиб нима қиласизлар? Сотиб қутулинглар! Сизларда ўн ёшдан ошган ҳўқизлар қанчалигини биласанми?.. Билмайсанми? Афсуски, билмас экансан, лекин мен жонингга ора киришим мумкин: сизларда ўн ёшдаги ва ундан катта қари ҳўқизлар тўққиз жуфт экан. Мудаббир хўжайнлар бундай дардисар лаш-лушларни қўрада сақлаб турмайдилар, семиртириб сотиб юборадилар. Тушундингми?

— Тушунишга тушуниб турибман-у, аммо биз

яроқсизга чиқарилған молларнинг ҳаммасини, шу жумладан қари ҳўқизларни ҳам кузда сотишга қарор қилганимиз. Менга тажрибакор дәхқонлар шундай деб маслаҳат беришди.

— Ҳозир шу молларингиз боқувда ётибдими?

— Йўқ, қари ҳўқизлар ишлаб турибди, бунисини аниқ биламан.

— Сенга кузда сотишни маслаҳат берган ўша тажрибакор дәхқон ким экан ўзи?

— Хўжалик мудиримиз Островнов билан яна аллаким ҳам эди, эсимда йўқ.

— Ҳм, қизиқ... Хўжалик мудиринг колективлаштиришгача кулакнинг ўзгинаси эди, демак, ишнинг кўзини биладиган одам, нега энди сенга шундай тутуриқсиз маслаҳат берди экан? Ҳўқизлар кузда сотиладиган бўлса-да, ўшангача бўйниларидан бўйинтуруқларини олмасанглар? Тери билан устихон сотар экансизлар-да. Мен бўлсан сенга бошқача маслаҳат берардим: сотишга мўлжалланган ҳамма молларни яйловга ҳайдаб, кейин уларни концентратлар билан сўқимга боқиш керак. Бозорда мол озайиб гўшт нархи ошганда ёзда сотиш керак. Куз куни бўлса, сизларнинг молларингизсиз ҳам гўшт ошиб-тошиб ётади, нархи ҳам арzonроқ бўлади. Сизларда ортиқча фалла бор экан. Нима гап ўзи? Ҳар қалай, ўзларингиз биласизлар, мен сизларнинг ишларингизга аралашмоқчи эмасман. Лекин ҳар ҳолда ўзинг бу тўғрида ўйлаб кўр... Ҳар қалай, бир жуфт қари ҳўқизни боқиб ҳозир сотиш ҳам мумкин. Ахир бундан тушган пул ичкилика эмас, китобга сарф қилинади-ку! Хуллас, икки ойдан кейин кутубхоналарингиз бўлсин. Вассалом, нуқта! Қироатхонани кулбай вайронадан дарҳол кулакларнинг яхши ўйларидан бирига, энг яхшисига кўчир, бу иш хато бўлмайди! Иккинчи нуқта! Сизларга қироатхоначи юбораман, маъқул йигит, унга ҳар куни кечқурун баланд овоз билан газета, китоб ўқиб беришни топшираман. Учинчи нуқта!

— Нуқта қўймай тура тур!— ёлворди хижолатдан қизариб кетган Давидов.— Сенга она тилида айтаманки, кутубхона бўлади, нуқтангни ўчир! Қироатхонани эртагаёқ яхши уйга кўчираман, иккинчисини

ўчир. Аммо учинчи нуқтанг важига андиша қилиб қолдим... Ўзимнинг ҳам кўз остига олиб қўйган қироатхоначим бор, оламшумул йигит, тенги йўқ ташвиқотчи! Аммо ишлаб чиқаришда банд, амалий қийинчилик жойи шунда... Ўйлайманки, округ комсомол комитети бизни қўлласа керак, йигитчани кўндириб олиб келаман!

Нестеренко лоқайд қиёфада бош силкиб, кўзлари жилмайганча, унинг гапларини диққат билан эшилди.

— Командир ғайратли бўлса, шунаقا дарҳол тўғри қарор қабул қилса ўлгудек яхши кўраман... Аммо сен ўз қироатхонанг ҳақидаги гапларни охиригача эшил. Кеча мен у ерга кирган эдим. Сенга очигини айтсам, кирганимдан хурсанд бўлганим йўқ... Ҳамма ёқ қанғиллаб, расво бўлиб ивирсиб ётибди! Деразаларни чанг босган. Поли аллақачонлардан бери ювилмаган. Зах билан яна алланима балоларнинг ҳиди келади. Худо ҳақи, лаҳаднинг дидини беради! Энг муҳими, китоблар бармоқ билан санаарли, шунда ҳам эски. Полкалардан бирида ўраб қўйилган, сарғайиб кетган плакатни кўриб қолдим. Очиб суратларини кўрдим, ўқидим:

Сафимизга қизлар тўймай боқади,
Кемшик кампирларга жуда ёқади,
Оталарнинг баҳри-дили очилар:
— Барака топ! Азamatлар, лочинлар!
Душманларнинг қаншарига боллаб сол,
Қўшчи, ҳайда ерларингни бемалол.
Барча меҳнат аҳли сафда туриб шай,
Меҳнатингни қўриқлагай, сақлагай!

Э-э-э, ахир бу эски танишим-ку, деб ўйладим. Мен бу плакатни йигирманчи йилда Врангель фронтидалигимда ўқиган эдим, ўшандан бери эсимда эди! Демъян Беднийнинг сўзлари ҳозир ҳам яхши-ю, аммо ўзинг инсоф билан айт, ўттизинчи йилда ҳозирги кунларга алоқадор, хуллас, ақалли коллективлаштиришга алоқадор янгироқ нарса бўлиши керак эди-ку...

— Жуда зийрак, серҳафсала одам экансан,— но-

розилик билан эмас, мамнуният билан мингиллаб қўйди ҳамон хижолатдан ўзига келмаган Давидов.

— Мен ишдаги етишмовчиликларни кўришим керак, уларни тузатишга ёрдам беришга мажбурман, бу ишни сенга тўла ихлос қўйган ҳолда бажаряпман, Семён. Аммо булар ҳаммаси гапнинг даромади, хуласаси энди келади... Мана сен ҳамма колхоз ишларини Размётновга ишониб топшириб, колхозни ташлаб, ўзинг бу ерга, бригадага келибсан. Ахир Размётновнинг шундай вақтда ёлғизлик қилиб қолаётганини, ишларни эплайлмаётганини биласан-ку, ахир, биласан-а? Била туриб шундай қилибсан!

— Аммо ўзинг ҳам Тубянской далаларида лобогрейка ҳайдаган экансан-ку! Ё ибратнинг таъсирини инкор этасанми?

Нестеренко ўқинч билан қўл силтади:

— Мен Тубянскойда одамлар билан танишиш учунгина бир неча соат ишлаган эдим,— бу бошқа нарса, сен бўлсанг бригадага шахсий ҳаётингнинг бессаранжомлигидан келгансан. Тафовути бор эканми? Менинг назаримда, сен Лукерья Нагульновадан қочиб келгандайсан... Балки мен хато қилаётгандирман?

Давидовнинг ранги ўчиб кетди. Орқасини ўгириб, гиёҳларни бармоқлари билан маъносиз ўйнаганча мингиллади:

— Қулоғим сенда...

Нестеренко эса қўлинини эҳтиёт ва меҳр билан унинг кифтига қўйиб, ўзига томон оҳиста тортиб, илтимос қилди:

— Хафа бўлиш йўқ! Мени шудгорингни беҳуда ўлчаб кўрди дейсанми? Сен баъзи жойларда трактордан ҳам чуқур ҳайдабсан! Зардангни ерга қилибсан, ала-мингни ҳўқизлардан олибсан. Сени биладиган одамларнинг гапига қараганда, Лукерья билан ораларингдаги муносабат ниҳоясига етай деб қолганмиш. Шу тўғрими?

— Шунақароқ.

— Хўш, тузук, бу нарсага чин кўнгилдан қувониш мумкин. Бу машмашага тезроқ барҳам бер, қимматли Семён! Одамлар сенга яхши кўз билан қарайдилар, аммо шуниси ёмонки, шу бемаъни алоқангни кўриб

сёнга ачинишади, тушуниб ол, ачинишади! Одамлар русларга хос одат билан ҳар қандай етим-есир, бева-бечораларга ачинса, бунинг таажжубланадиган жойи йўқ. Аммо улар ақлли бир йигитга, қолаверса, ўз етакчилариға ачина бошлащса,— одам учун бундан ҳам иснодлироқ, даҳшатлироқ нарса борми? Энг муҳими, сенинг ярамас бир жувонга, қолаверса ўртоғингниң яқингинадаги хотинига аҳмоқона кўнгил қўйганинг, менинг назаримда, ҳамма ишга халал беряпти! Бўлмаса, сенинг ишингдаги, Нагульнининг ишидаги кечириб бўлмас нуқсонларни нима деб изоҳлаш керак? Қалаваларингни йўқотиб,чувалашиб қолибсизлар, тугунни ўзларингиз ечиб олмасаларингиз —райком шартта чопиб ташлашига тўғри келади, шуни билиб қўй!

— Мен Гремячийдан кета қолсаммикан?— журъатсизлик билан сўради Давидов.

— Аҳмоқона гапларингни қўй!— унинг сўзини шартта бўлди Нестеренко.— Булғатиб қўйдингми, аввал ўрнингни тозалаб, кетиш ҳақида кейин гап оч. Яхиси, сен менга шу нарсани айт: комсомолка муаллима Егоровани танийсанми?

— Танийман. Учрашганман.— Давидов бирдан ўринсиз жилмайиб, қиши куни кулакларни тугатиш вақтида, ёш, ниҳоятда тортинчоқ муаллима билан бўлган биринчи учрашувини эслади.

Муаллима у билан танишаркан, унга терлаган, кичкинагина совуқ қўлини фуж қилиб аллақандай қовушмай узатган, кўзидан ёш тирқираб чиққудек қипқизарив кетиб, базўр: «Муаллима Егорова Люда» дея олган эди. Ўшанда Давидов Нагульнинг: «Комсомолка муаллимани ўз бригадангга ол. Қиз бола синфий кураш нима эканлигини кўрсин» деб таклиф қилган эди. Аммо Нагульнин ўзининг қорамагиз қўлларини хўмрайиб кўздан кечирганча, жавоб берган эди: «Сен уни ўз қўл остингга ола қол, бунақа ишда у менга асқатмайди! У биринчи синфларга дарс беради, агар биронта йигитчаси икки олиб қолса, ўша билан қўшилишиб йифлади. Шундай қизни ким комсомолга олди экан? Шу ҳам комсомолка бўлдими? Юбка кийган гўдак!»

Нестеренко илк бор қошларини чимириб, Давидовга таъна билан тикилди:

— Нимага илжаяяпсан ўзи? Менинг саволимда бирон қизиқ нарса бор эканми?

Давидов ўринсиз хушчақчақлигининг сабабини тушунтироқчи бўлиб, беҳуда уриниб кўрди:

— Шунчаки арзимаган гап, шу муаллима ҳақидағи бир беҳуда гап эсимга тушиб кетди... Аммо ўзи жуда ҳам камтар...

— Беҳуда нарсаларни эслаб ўтирибман дегин! Шу вақтда топган эрмагини қаранглар!— аён-ошкор ғижиниб хитоб қилди Нестеренко.— Сен яхшиси бу камтар муаллиманинг хоторларингизда биттаю битта комсомол аъзоси эканлигини эсласанг-чи! Шундай катта хотор бўлса ҳам комсомол ячейкаси йўқ. Бу беҳуда гап эмас! Бунинг учун ким жавоб бериши керак! Биринчи навбатда Нагульнев, сен ҳам, сизлар билан бирга мен ҳам. Сен бўлсанг илжаясан... Бу хунук илжайиш, Семён Давидов! Зарур ишларни баҳона қилмайлик! Партия қўлимиизга топширган ишларнинг ҳаммаси ҳам зарур. Қандай ғайрат кўрсата оламиз — бу иккинчи масала.

Давидов аста-секин ғижина бошлаган эди, аммо ҳар қалай ўзини босиб шундай деди:

— Сен, ўртоқ Нестеренко, Гремячий Логда бир кунгина бўлиб, шу вақт ичиди бизнинг ишимиздаги шунча хато билан камчиликларни топишга улгурибсан, менинг хулқи-атворимни ҳам таъқидлаб ўтдинг. Борди-ю, бу ерда январь ойидан бери яшаган бўлсанг, унда нима бўлар эди? Сендан сурункасига бир ҳафта танбеҳ эшитарканман, факт!

Давидовнинг охирги жумласи Нестеренконинг бироз чиройини очди. У кўзини муғамбirona қисиб, Давидовни тирсаги билан туртиб қўйди.

— Сен, ҳайтовур, шундай деб ўйламайсанми, Семён, борди-ю, мен Гремячийда «бўлиб»гина қолмай, сизлар билан ёнма-ён ишласам, эҳтимолки, хатолар ҳам камроқ бўлармиди?

— Камроқ бўлиши факт, лекин бари бир топиларди. Сен ҳам авлиё эмассан, бемалол янглишиб турган бўлардинг, факт! Биласанми, мен ўзимнинг кўпгина

хатоларимни кўриб тураману, аммо ҳаммасини ҳам бирданига тузата олмайман, менинг нуқсоним шунда, факт! Баҳорда бир куни ўқувчилар мактаб мудири Шпинъ деган одам билан далага юронқозиқ тутгани чиқишиган экан, мен бўлсам ёnlаридан ўтиб кетаётib тўхтамадим ҳам, гаплашмадим ҳам, бу кекса ўқитувчининг кўнглидаги дардини билмадим ҳам, ҳозир ҳам билмайман... Сенга очиғини айтсан, бундан расвороқ ҳам бир иш бўлган. Қишида у менга мактуб юбориб, ўтин олиб келиши учун арава сўраган эди. Мени юборган деб ўйлайсанми? Эсимдан чиқиб кетибди. Бошқа ишлар билан банд бўлиб, чол билан ҳасратлашишга вақт тополмадим... Ҳозиргача ҳам эсласам, ичимдан зил кетаман! Комсомол ҳақидаги гапинг ҳам тўғри. Жуда муҳим бир ишга эътиборсизлик қилибмиз, албатта бу борада мен ҳам жуда гуноҳкорман, факт.

Аммо Нестеренкони тавба-тазаррудан иборат мулоҳазалар билан юмшатиш маҳол эди.

— Хатоларингни тан олишинг ҳам, афтидан, уятингни ҳали унча йўқотмаганлигинг ҳам, буларнинг ҳаммаси яхши, бироқ бу билан сизларда комсомол ҳам ўсмабди, ўқитувчи ўтинлик ҳам бўлмабди.. Гуноҳга иқрор бўлишгина эмас, ишнинг пайдан бўлиш керак, қимматли Семён!— қатъият билан уқтиради у.

— Ҳаммасини тузатиб, бажо келтирамиз, чин сўз бераман! Аммо комсомол ячейкаси уюштиришда сизлар ёрдам берасизлар, яънирайком ёрдам беради, бир-иккита йигитлар билан бирон комсомол қизни ақалли вақтинча ишлашга бўлса ҳам юборасизлар. Мен сенга жиддий айтай — Егорова ташкилотчиликка ярамайди. У ҳатто ерга ҳам истиҳола билан қадам қўяди-ю, ёшларга, айниқса бизнинг ёшларга бас кела олармиди!

Шундан сўнггина Нестеренко мамнуният билан деди:

— Мана бу бошқа гап! Комсомол масаласида ёрдам қиламиз, ваъда бераман, энди рухсатинг билан ўз-ўзингни танқидингга кичкина қўшимча қилай. Биринчи майга яқин сизларнинг кооператорларингиз станицадан мол олиб келгани сендан иккита от-арава сўраганмиди?

— Сўраган эди.
— Бердингми?
— Иложи бўлмади. Биз ўшанда ҳам ер ҳайдоётган эдик, ҳам экин экаётган эдик. Ишимиз кўп эди. Савдо-сотиқ билан шуғулланишга вақтимиз йўқ эди.
— Иккита уловни ажратиб беришнинг ҳам иложи бўлмадими? Беҳуда гап! Тутуриқсиз гап! Даладаги ишга ҳеч қандай халал етказмасдан бемалол ажратиб бериш мумкин эди. Аммо сен шундай қилолмагансан, шундай қилишни хоҳламагансан. «Бу нарса колхозчиларнинг кайфиятларига қандай таъсири қилас экан?» деб ўйлаб кўрмагансан. Оқибатда, Гремячий хотин-қизлари, тағин айни байрам арафасида, совун, туз, гурт ва керосинга ўхшаган энг зарур нарсаларни олиб келиш учун станицага яёв лўкиллашибди. Шундан кейин улар Совет ҳокимияти тўғрисида ўзаро нималар дейишиди экан? Ё бу нарса сенга бари бирми? Сен билан биз жонажон ҳокимиятимизни сўқдириб қўйиш учун жанг қилганимиз йўқ, йўқ, шунинг учун жанг қилганимиз йўқ!— қичқириб юборди Нестеренко бехосдан ингичка овоз билан. Гапини эса пичирлаб тугатди:— Наҳотки, шундай оддийгина гапнинг ҳам фаҳмига бормасанг, Семён? Ҳушиングни йиғ, қимматли ўртоқ, кўзингни оч!..

Давидов ўчиб қолган тамаки қолдигини бармоқла-ри билан эзғилаб ерга тикилганча узоқ жим қолди. Умри бўйи у ичидан гупуриб келган туйғуларини мумкин қадар тийиб олар, уни ҳар нарсада айблаш мумкин бўлса-да, сентименталликда мутлақо айблаб бўлмас эди, аммо ҳозир номаълум бир куч унга далда бериб, Нестеренкони қаттиқ қучоқлаб олди, ҳатто қатъий қимтилган лабларини секретарнинг соқоли ўсган ёноқларига тегизиб қўйди. У гапиаркан овози ҳаяжон билан титрар эди:

— Раҳмат сенга, қимматли Нестеренко! Қаттакон раҳмат! Сен яхши йигитсан, сен билан ишлаш енгил бўлади, Корчжинский билан ишлашдек бўлмайди. Сен менга аччиқ-аччиқ, аммо мутлақо тўғри сўзлар айтдинг, факт! Аммо, худо ҳақи, мени ношуд деб ўйлама! Мен қоидадагидек ишлайман, бизлар ҳаммамиз ҳам қоидадагидек ишлашга тиришамиз; мен кўпгина нар-

саларни бошқатдан кўриб чиқаман, энди кўриб чиқишига вақтим етади... Гапимга ишон, ўртоқ Нестеренко!

Нестеренко ҳам ундан кам ҳаяжонланмаган, аммо сир бой бермас, энди тундлашиб қолган қуралай кўзларини қисганча йўталиб-йўталиб қўяр эди. Бир дақиқа сукутдан сўнг эти увишганча, жунжиб, оҳиста гапириди:

— Сенга ҳам, бошқа йигитларга ҳам ишонаман, сизларга худди ўзимга ишонгандек ишонаман. Сен буни қаттиқ ёдингда тут, Семён Давидов! Райком билан менга панд бера кўрманглар, панд бериб қўйманглар! Ахир биз коммунистлармиз-ку, худди бир ротанинг солдатлариdek ҳар қандай вазиятда ҳам баҳам-жиҳатликни қўлдан бермаслигимиз керак! Сен буни ўзинг жуда яхши биласан. Бундан буён орамизда бундай кўнгилсиз суҳбатлар бўлмасин энди, жин урсин бундай суҳбатларни! Гарчанд, баъзан бундай суҳбатларни ўтказиб туриш зарур бўлса ҳам мен уларни ёмон кўраман. Чунончи, сенга ўхшаган бирон ошна билан шунаقا тикилашиб суҳбатлашасан-да, кейин кечаси билан ухлаёлмай юрагинг ачишиб чиқади...

Нестеренконинг қизғин қўлини қаттиқ сиқиб Давидов унинг юзига диққат билан тикиларкан, ҳайратда қолди: ҳозир унинг ёнида бояги қувноқ ҳангомачи эмас, ҳазил-мутоиба қилишга, кураш тушишга тайёр турган ҳушчақчақ, очиқ кўнгил йигит эмас, ўрта ёшлардаги ҳорғин одам ўтирап эди. Нестеренконинг кўзлари нечукдир бирдан кексайиб қолган, оғзининг четларида чуқур излар пайдо бўлган, ҳатто ёноқдор юзларидаги қўнғир қизиллик ҳам гўё бўзарив сарғайиб қолгандек эди. Бир лаҳза ичиде Нестеренко бошқа одам бўлиб қолгандек эди.

— Мен энди жўнай, сенда узоқ меҳмон бўлиб қолдим,— деди у суғур тепадан вазмин тураркан.

— Тобинг қочиб қолгани йўқми?— хавотир билак сўради Давидов.— Нечукдир бирпасда бўшашиб қолдинг.

— Топдинг,— деди ғамгин Нестеренко.— Безгагим тутай деб турибди. Буни анчагина илгари Ўрта Осиёда илаштириб олган эдим, лаънатидан ҳалигача қутуломмайман!

— Сен Ўрта Осиёда нима иш қилган эдинг? У ёқ-ка нима қилиб бориб қолган эдинг?

— Мени шафтолихўрликка борган экан, демайсанми ҳали? Босмачиларни тугатишда иштирок этдим, ўзимнинг жонажон безгагимни бўлса тугатолмаяпман. Докторлар уни ичимга қамаб қўйишиди, энди еру кўкка ишонмайман. Бу бир омади гап, гапимизнинг охирида мен сенга шуни ҳам айтиб қўймоқчи эдим: бизнинг округда контралар ғимирлаб қолишиди, Сталинград областида ҳам аҳвол шу. Бирор нарсага орқа қилишаётганга ўхшайди, жин урган каллаварамлар! Қўшиқда ҳам айтилган-ку... «Бизни савамоқ бўлиб уриндилар кўп марта...»

— «Биз ҳам қўл қовуштириб ўтирмадик албатта...»— деб хотима қилди Давидов.

— Худди шундай. Аммо ҳар ҳолда огоҳ бўлиб, қулогимизни динг тутишимиз керак.— Нестеренко ўйчанлик билан қошини қашиб, жаҳл билан томогини қириб қўйди:— Сенга бир гап дейиш қийин экан, ардоқли буюмимнинг баҳридан ўтишимга тўғри келади... Сен билан ажралмас дўст бўлдикми, энди шу ўйин-коқни совға ўрнида қабул қиласан. Асқатиб қолар. Нагульнозвни огоҳлантиришибди, сен ҳам эҳтиёт бўл. Ҳиссангга ундан ёмонроқ нарса тегиб қолиши мумкин...

У курткасининг чўнтагидан хира йилтираб турган иккинчи номерли браунинг олиб, Давидовнинг кафтига қўйди.

— Бу кичкина нарса мудофаада слесарлик асбобидан кўра дурустроқ иш берса керак.

Давидов Нестеренконинг қўлини қаттиқ сиқиб, таъсиrlanganча пойма-пой ғўлдиради:

— Раҳмат сенга ўртоқларча, нима десам экан... хўш, дўстона меҳрибонлигинг учун, факт! Каттакон раҳмат!

— Яхшиликка буюрсин,— ҳазиллашди Нестеренко.— Аммо, эҳтиёт бўл! Йўқотма! Негаки, кекса жангчилар ёшлари ўтган сари паришонхотир бўлиб қолишиади...

— Тирик эканман — йўқотмайман, борди-ю йўқотганимда ҳам каллам билан бирга йўқотаман,— дея

ишонтирди Давидов, тўппончани шимининг орқа чўн-тагига яшиаркан.

Аммо уни шу ондаёқ яна олди-да, аввал тўппончага, кейин Нестеренкого қаради:

— Ноқулай иш бўляпти-ку... Ўзинг қуролсиз қолсанми? Қайтиб ола қол, менга керакмас!

Нестеренко унинг узатилган қўлини енгилгина четлатди.

— Ташвишланма, менда бошқаси бор. Бунисини тутиб юрардим, унисини кўз қорачиғимдек асрайман, унисига номим ёзилган, мукофотга олганман. Нима, сенингча мен армияда бекорга беш йил хизмат этиб, жанг қилибманми?— Нестеренко кўзини қисиб, ҳатто жилмаймоқчи бўлди, аммо табассуми зўраки ва эриш чиқди.

У яна эти увишиб жунжикди. Қалтироқни енгишга ҳаракат қилиб елкаларини қимирлатди, энтикиб-энтикиб гапирди:

— Кеча Шалий менга сенинг совғангни кўрсатиб мақтанди. Мен унга меҳмон бўлган эдим, асал билан чойхўрлик қилдик, турмуш ҳақида ҳангомалашдик, бир вақт у сандиқдан сенинг слесарлик асбоб-ускунагни олиб шундай деб қолди: «Мен умрим бино бўлиб иккита совға олганман: бири — кампиримдан, ҳали қиз болалигига ёш тақачига маҳлиё бўлиб юрган өақтларида олган тамаки ҳалтам, иккинчиси, темирчилик ишида зарборлигим учун шахсан ўртоқ Давидовнинг ўзидан олган мана шу асбоб-ускунам. Узоқ умрим мобайнида иккита совға! Дуд билан қорайган шу умрим давомида қўлимда қанчадан-қанча темиртёрсакни парвариш қилдим, сон-саноғи йўқ! Шунинг учун ҳам бу совғалар сандигимда эмас, бамисоли юрагимнинг ёнгинасида турибди!» Яхши чол! Меҳнат билан кўркам ҳаёт кечирган, қолаверса, ҳар кимга ҳам шу кекса темирчи ўз қудратли қўллари билан одамларга қанча фойда келтирган бўлса, шунча фойда келтиришни насиб қилсин. Демак кўриб турибсанки, сенинг совғанг меникидан бебаҳороқ экан.

Бригада будкасига улар тез юриб келишмоқда эди. Нестеренконинг вужудига қаттиқ қалтироқ кирган эди.

Фарбдан яна ёмғир келмоқда. Ҳаво айнишининг илк даракчилари — булат увадалари пастлаб сузмоқда Майса-гиёҳнинг маст қилувчи бўйи, намхуш қора тупроқ ҳиди анқимоқда. Бир фурсатгина мўралаган қуёш булат орқасига яширинди, мана сарин шабадани кенг қанотлари билан қамраганча иккита дашт миққийси аллақайдаги юксаклик томон парвоз қилди. Ёмғир арафасидаги сукунат даштни юмшоқ наматдек бўлиб қоплади, фақат тўхтовсиз ёмғирдан дарак бериб юмонқозиқларгина ҳаяжон билан пайваст чийилларди.

— Бизнинг будкада ёта тур, кейин кетарсан. Йўлда ёмғирда қолсанг, шалаббо бўлиб, мутлақо ётиб қоласан,— қатъият билан маслаҳат берарди Давидов.

Аммо Нестеренко қатъиян рад этди:

— Қололмайман. Бизда соат учда бюро бор. Ёмғирда қолмайман. Отим жуда яхши!

У тизгинни ечиб олиб айилни тортиб боғлаётганида қўллари худди кекса чолларнинг қўлларидек қалтирас эди. У Давидовни қучоқлаб қўйди-да, узоқ туриб қолган отига кутилмаган енгиллик билан сапчиб миниб:

— Йўлда исиб кетаман!— деб қичқирди ва отини елдириб кетди.

От туёқларининг юмшоқ дупурини эшишиб Куприяновна худди хурмачадан тошиб чиқсан хамирдек будкадан пилдираб чиқиб, ҳасрат билан қўлларини бирбирига урди:

— Кетиб қолдими?! Нонушта қилмай кетиб қолгани нимаси!?

— Тоби қочиб қолди,— деди Давидов, секретарни нигоҳи билан узоқ кузатаркан.

— Шўргиналаримга шўрва тўкилсин!— ўкинарди Куприяновна.— Шундай туппa-тузук одамни оч-наҳор жўнатдик-а! Ўзи хизматчилардан бўлса ҳам сен раис фафлат босиб ётганингда мен билан бирга картошка артишдан ор қилмади. Уни бизнинг казакларга ўхшатиш у ёқда турсин, тенглаштириб ҳам бўлмайди! Бизнинг эркаклар ўла қолсалар ҳам ёрдам беришмас! Улар ёрилгунча еб олиб, ойга қараб акиллашни били-

шади, ошпазга қарашиш қаёқда — оғзингни оғритиб ҳам ўтирмай қўя қол! Бу меҳмон менга шундай илиқ-иссиқ сўзлар айтдики. Шундай самимий, илиқ сўзлар айтдики, бошқа одам ўлса ҳам бундай топиб гапиролмайди!— Қизғиши лабларини истиғно билан қимтигандча мақтанаарди Куприяновна, ўзи эса, бу Давидовга қандай таъсир қилаётган экан, дегандек унга кўз қирини ташлаб қўяр эди.

У эса унинг галини эшитмай, Нестеренко билан яқинда қилган суҳбатларини хаёлидан ўтказарди. Куприяновна бир гапга тушиб кетгандан кейин тўхташи қийин, шунинг учун ҳам давом эттирас эди:

— Сен, вабо теккур Давидов, қилифинг ҳам дуруст, менга ақалли, бу одам кетяпти, деб қўймайсанми. Мен лақма ўлгур ҳам шўргинам қурсин, бехабар қолибман! Ошпаз хотин мендан жўрттага будкага кириб яшириниб олди, деб ўйлаган бўлса ҳам ажаб эмас, ваҳоланки, мен унга ихлос билан қараётган эдим...

Давидов ҳамон индамасди, Куприяновна bemalol гапириб олмоқда эди:

— Отнинг устида ўтиришини қара! Бамисоли отнинг тагида туғилиб, отнинг устида катта бўлгандек! Қылт этмайди-я, лочингинам, қимир этмайди-я! Чинакам казак, қадимги тоифадаги казакнинг ўзи!— завқ билан гапиради у узоқлаб кетаётган суворийдан маҳлиё қўзларини олмай.

— У казак эмас, украин,— деди фаромушлик билан Давидов ва хўрсиниб қўйди. Нестеренко жўнаб кетгандан кейин унинг кайфи бузилиброқ қолди.

Унинг сўзларидан Куприяновна ўқ доридек повуллаб кетди:

— Бу чўпчакларингни менга эмас, катта бувингга айт! Мен сенга галининг очиғини айтяпман. У асл казак! Нима, қўзингни шапоқ босганми? Узоқдан қараб эгарда ўтиришидан ҳам, яқиндан қараб қиёфасидан, абжирлигидан, хотин кишига муомаласидан биласанки, у зуваласи пишиқ казаклардан, қўрқоқлардан эмас...— маънодор илова қилди у.

— Хўп, сенинг айтганинг бўла қолсин. Қазак бўлса казакдир, бунинг менга сира даҳли йўқ,— деди ён босиб Давидов.— Яхши йигит-а? Сенга қандай кўринди? Сен мени уйғотгунингча у билан роса тўйиб гаплашиб олган бўлсанг керак?

Энди хўрсиниш навбати Куприяновнага келди, у қудратли кўкрагини тўлдириб шунақангни астойдил хўрсиндики, эски кофтасининг қўлтифи чокидан тирсиллаб сўклилиб кетди.

— Бунақаси топилмайди!— чуқур ҳаяжон билан жавоб берди Куприяновна бир оздан сўнг ва бирдан бехосдан-бехос идиш-товоқларни столга беҳуда тарақлатиб, тўғрироғи, тўғри келганча улоқтириб тарақлата бошлади...

IX БОБ

Давидов эран-қаран, аммо катта-катта қадам ташлаб кетмоқда эди. Дўнгликка чиққач, тўхтаб, куннинг шу пайтида кимсасиз бўладиган бригада қўшхонасига, қаршидаги ёнбағирдан то уфқача чўзилиб кетган шудгорга қаради. Ҳар қалай, бу кунларда у кучини аямай ишлади, етовчи Варюха ҳам, Кондратнинг ҳўкизлари ҳам ҳаддан ташқари кўп ишлатгани учун ундан хафа бўлишмасин... Бу массив октябрда қизиқ манзара касб этса, уни бўлиқ кузги буғдой майсалари қопласа, уларни эрталабки аёз кумуш қирови билан безаса, тушда оқиш кўкда пастгина сузаётган қўёш қиздира бошлагач, кузги экинлар худди шаррос жаладан кейинги камалакдек ранго-ранг товланса, ҳар бир қатра ўзида салқин куз осмонини ҳам, кўпикдек оппоқ булут увадаларини ҳам, хиралашаётган қўёшни ҳам акс эттирса керак...

Бу ердан узоқда, ям-яшил ўт-ўланлар қуршаган шудгор бор бўйича ёзиб юборилган каттакон қора баҳмалдек ястаниб ётарди. Унинг энг четида, ер юзасига соғ тупроқ чиқиб турган шимолий ёнбағрида — қўнғир нақшли эгри-буғри сарғиши ҳошия чўзилиб кетган эди. Эгатлар бўйлаб плугларнинг тишлари оқартириб кетган қора тупроқ палахсалари хира ялтираб

ётар, улар тепасида зоғлар учиб юрар, қора шудгордā якка-ёлғиз бойчечакдек мовий нуқта кўринар: Варя Харламова ўзига ҳеч қандай қизиги қолмаган ишни ташлаб бошини қўйи солганча аста-секин қўшхона томон кетмоқда эди. Кондрат Майданников эса эгатда қимирламай ўтириб чекмоқда эди. Атрофини бир гала сўна қуршаб олган ҳўқизларни эплаёлмаётган экан, етовчисиз нима қила олиши мумкин эди?

Тепа белида тўхтаган Давидовни кўраркан, Варя ҳам тўхтади, дуррасини бошидан дарҳол олиб аста силкитди. Бу сассиз ва журъатсиз даъватдан Давидов жилмайди. Ў ҳам кепкасини силкитди-да, орқасига қарамай юриб кетди.

«Вой ўзбошимча қиз-эй! Ўзи лобаргина қизу, амалда эрка-тантис, ўзбошимча. Аммо эрка-тантисмас қизлар ҳам бўладими? Ҳеч ноз-карашма қимайдиганлари ҳам бўладими? Ўмрим бино бўлиб нечукдир бундайларини тушимда ҳам кўрганим йўқ, ўнгимда ҳам учратганим йўқ... Шунақанг барноларнинг ҳар қайсиси ўн олти ё ўн еттига кирдими, дарров ясан-туссанга киришиб, ўзига минг хил оро беради, бизга ўхшаганларга ҳукмини ўтказиш пайидан бўла бошлайди, буниси — факт!— деб ўйларди Давидов йўл-йўлакай.— Мана Варюха-куюнчак ҳам мени домига илинтираман деб димоф-фироқ қиляпти. Аммо хомтама бўлади. Болтиқ денгизчилари пихини ёрган одамлар! Ў нимага будка томонга кетяпти? Шошмасдан, эранқаран кетяпти, демак, унга Кондрат иш буюрган эмас, ўз хоҳиши билан, қизларга хос тентаклик билан, инжиқлик қилиб кетяпти. Балки мен бригададан кетганим учундир? Ҳе, бу—амалий бемазагарчилик, меҳнат интизомини мутлақо бузиш бўлади-ку! Агар ўринли сабаб билан кетаётган бўлса, марҳамат, бемалол бораверсин, борди-ю, аллақандай тантислик билан кетаётган бўлса, ёшлигига ҳам, чиройлилигига ҳам қарамасдан бригаданинг биринчи мажлисидаёқ таъзирини бериш керак! Ер ҳайдаш — якшанба кунги ўйинкулги эмас, марҳамат қилиб, эл қатори ишла»— деяғижиниб ўйларди энди Давидов.

Шу дақиқада унинг кўнглини икки хил ғалати туйгу чулғаган эди: бир томондан, у Варянинг ўзбошим-

чалигидан ғазабланар, иккинчи томондан эса, қиз боланинг уни деб ишни вақтинча ташлаганини сезиши эркаклик иззат-нафсига хуш ёқар эди...

Ленинграддаги ўзига ўхшаган собиқ матрос ошнасининг биронта қизга хушомад қила бошлагандан айтадиган гапларини эслади, у Давидовни бир четга тортар, жиддий қиёфага кириб: «Семён, мен рақиб билан тўқнашишга кетдим. Бардош беролмай қолган тақдиримда менга ён томонлардан мадад бер, борди-ю, енгилсам — менинг шармандаларча чекинишими пана қилиб тур», деб хуфия шивирларди. Узоқ ўтмишни эслаб жилмайди-да, шу ондаёқ ўйлади: «Йўқ, менинг бу «рақиб» билан, Варюха билан «тўқнашишга» ҳаққим йўқ. Мен унинг тенги эмасман, ўзи ҳам бошқа кеманинг одами... Мен унинг яқинига йўламасимданоқ, колхозчилар дарров мени аллақандай модабоз учарлардан экан, деб ўйлаб қолишлири мумкин. Жин урсин, учар бўлиб бўлман, шу битта Лушкадан қутулишнинг йўлини тополмаяпман-у. Йўқ, лобар Варюхани жиддий севиш керак, у билан шунчаки кўнгилхушлик қилиб юришга виждоним йўл қўймайди. У очиқ куннинг тонгидек бус-бутун мусаффо, менга иффатли кўзлари билан тикилади-я. Хўш, ҳозирча жиддий севишни ҳали ўрганмаган эканман, бунга ақлим етмас экан, қиз боланинг бошини айлантиришимдан на ҳожат. Бу масалада, матрос Давидов, тезроқ елканингни ростлаб қол!.. Умуман, мен ундан қочиброқ юришим керак. Уни хафа қилмаслик учун эҳтиётлик билан гаплашиб, ўзимни олиб қочишим керак», — дея беихтиёр хўрсинди Давидов.

Ўзининг Гремячий Логда бошланган, унча кўркам бўлмаган турмушини, янги райком секретари олдига қўйга вазифаларни ўйларкан, хаёли яна Лушкага қайти: «Бу чандиқ тугунни қандай қилиб безарар ечсан экан? Бир ҳисобда Макар ҳам ҳақли: қўл билан ҳам, тиш билан ҳам ечишнинг иложи бўлмаса — шартта чопиш керак! Бу қандай фалокат бўлди ўзи! Ундан умрбод ажрашишим қийин бўлади, жуда қийин бўлади. Нима учун? Бу ишни Макар осонгина амалга сширган эди-ку, нимага мен мунча қийналяпман? Иродасизлик қиляпманми? Ўзимни ҳеч шундай деб

ўйламаган эдим! Эҳтимол, Макар ҳам қийналгандири сирини бой бермагандир? Шундай бўлса ҳам ажаб эмас, аммо Макар ўз туйғуларини яшира билган, мен бўлсам яширишни билмайман, яшира олмайман. Ҳамма гап шунда экан!».

Давидов ўзи бехабар ҳолда анчагина йўл босиб қўйди. Йўл бўйидаги бир туп дўлана соясига дам олгани ва чеккани чўзилди-да, чекиб Нагульнинг ким ўқ узиши мумкинлигини узоқ ўйлаб ётди, кейин эса ғижиниб ҳамма тахминларидан воз кечди: «Хуторда ҳатто кулаклар битирилгандан кейин абллаҳларнинг қолган-қутгани борлиги ўқ узилмаса ҳам маълум. Макар билан гаплашиб, ҳаммасини батафсил била-ман, балки ўшанда баъзи нарсалар маълум бўлар, бе-худа бош қотиришимнинг ҳожати йўқ».

Йўлни қисқартиш учун бурилиб тўппа-тўғри қўриқдан кета бошлади, аммо ярим километрча юрар-юрмас бирдан аллақандай кўзга кўринмас чегарадан ўтиб, бошқа бир дунёга келиб қолгандек бўлди: энди бўлиқ ажриқ этигининг қўнжига урилмас, атрофида живир-живир гуллар кўринмас, қулф уриб гуллаётган ўт-ўланларнинг хушбўй атри аллақаёқларга учиб гойиб бўлган, қаршисида тақирип кул ранг ҳазин дашт узоқларга чўзилиб кетган эди.

Гўё яқиндагина бўлган ёнғин тап-тақирип қилиб кетгандек бу ташландиқ ер шу қадар ғамгин эдики, Давидовнинг кўнгли аллақандай орзиқиб кетди. У атрофида аланглаб Бирючья балканинг тепасига, фойдасиз қўриқ ерга чиққанини пайқади. Бу ер тўғрисида Яков Лукич бир куни правление мажлисида шундай деган эди: «Худойи таоло Қавказда нима учундир тоғларни қалаштириб бутун ерни ўнқир-чўнқир қилиб ташлаганки, на отда, на пиёда ўта оласан. Аммо бизни, яъни Гремячий казакларини нега ғазабига олганига тушунолмай гарангман. Беш юз десятинага яқин туппа-тузук ерни шу қадар шўр бостирганки, азалазалдан уни на ҳайдаб бўлади-ю, на экиб бўлади. Кўкламда ўтлоқ вазифасини бажаради, шунда ҳам озгина вақт, шундан кейин бу лаънати ерга туфурасан-да, келаси кўкламгача қадам босмайсан. Ундан келадиган бор фойда шу: хуторнинг қўй-қўзиларини

ярим ойча чала қурсоқ боқади. Шундан кейин рўйхатда бизга дардисар бўлиб, ҳар хил газандаларга — калтакесаклар билан илонларга макон бўлиб ётади».

Давидов шўрхок кенг ўнгиrlарни четлаб ўтиб, сиғирлар ва қўйларнинг туёқларидан пайдо бўлган, улар дағал тиллари билан ялаб ялтиратган чуқурчалардан ҳатлай-ҳатлай секинроқ кета бошлади. Бу чуқурчалардаги аччиқ, шўр тупроқ серчизиқ кул ранг мармарга ўхшарди.

Бу ҳазин дашт беш километрча жойга — Мокрий буераккача чўзилиб кетган эди. У чаловларнинг ҳарир шокилаларидан, жазирамадан чатнаб кетган шўрхокларнинг қақраган тақирларидан оқариб турар, кўкка титроқ ҳовур ўрлатиб, жазирама иссиқда оловли нафас олмоқда эди. Аммо бу ғариб тупроқда ҳам ўзига хос мангуб ҳаёт ҳукм сурар: Давидовнинг оёқлари остидан ўқтин-ўқтин пириллашиб қизил қанот чигирткалар учиб чиқар, ер рангидаги калтакесаклар сассиз ўрмалар, юмонқозиқлар безовта чийиллар, чалов тусидаги бўктарги қайрилаётганда қанотини лопиллашиб, дашт устидан пастлаб учар, ювош тўрғайлар эса Давидовни бехавотир яқинларига келтириб, кейин гўё истар-истамас парвоз этиб булутсиз осмоннинг мовий сут ранг бағрида фойиб бўлар, уларнинг бўғиқ, аммо ёқимли наволари пайваст эшитилар эди.

Баҳор арафасида қор эриб ер бети унда-бунда қорайиб кўринди дегунча тўрғайлар диққинафас, аммо нима учундир ўзларига ёқиб қолган бу бир парча ерга учиб келиб, ўтган йилги қовжироқ ўт-ўландан уя солиб, бола очиб чиқишиади-да, киши қулоғига болаликдан қадрдон бўлиб қолган наволари билан даштни кеч кузаккача қувонтиришади. Қачонлардир от туёғидан пайдо бўлган изга моҳирона ясалган шундай уялардан бирини Давидов босиб олаёди. У чўчиб оёғини тортиди-да, ерга энгашди. Бу тарк этилган эски уя ҳекан. Унинг атрофида ёмғирдан ерга ёпишиб қолган патчалар, майдатухум пўчоқлари сочилиб ётарди.

«Онаси палапонларини учириб кетибди. Кичкина тўрғайчаларни кўрсам эди! Уларни болалигимда бирон марта кўрганимни нечукдир эслолмайман,— деб ўйлади Давидов ва ғамгин кулимсиради:— Ҳар бир

майдада парранда ҳам ин солиб насл урчитяпти, меш бўлсам қирқ йилдан бери сўққабош санғиб юрибман, ўз палапонларимни кўришга мусассар бўламанми-йўқми — буниси номаълум... Қариган чоғимда уйлана қолсанмикан?»

Давидов ўзини Куприяновнага ўхшаган баҳайбат хотини ва турли ёшдаги кўпдан-кўп болалари қуршовидаги басавлат эр сифатида тасаввур этиб, барада кулиб юборди. Бунаقا оиласий фотосуратларни у чет-ёқа шаҳарлардаги фотовитриналарда жуда кўп кўрган эди. Ҳаёлига қўққисдан келиб қолган уйланиш ҳақидаги бу фикр унга шу қадар кулгили ва бемаъни туюлдики, қўлини силтаб, хушчақчақлик билан хутор томон йўл олди.

Давидов уйига кирмай, тўппа-тўғри колхоз правлениесига қараб кетди. Бўлган бор воқеани Нагульневдан тезроқ суриштириб билмоқчи эди. Правлениенинг ўт-ўлан ўсиб ётган кенг ҳовлиси бўм-бўш, фақат отхона олдида қўшни қўра товуқлари эринчоқлик билан гўнг титмоқда, отхона томи остида нима учундир Трофим деб лақаб берилгам така худди чолларга ўхшаб чуқур хаёл сурганча қимирламай турар эди. Давидовни қўриши билан така жонланиб, соқолини шўх силкитди-да, депсиниб олгач, зинфиллаганча унинг йўлини кесиб чиқа бошлади. Яirim йўлга етганда бошини ~~егиб чўлтоқ думини~~ ликиллатди-да, олатасир чопа бошлади. Унинг нияти шу қадар ошкор эдикӣ, Давидов жилмайганча тўхтаб соқолли жанг гарининг ҳужумини даф қилишга тайёрланиб турди.

— Колхоз раисини ҳали шундай қарши оласаними? Сени ҳозир шундай бир футбол қиласи, қари иблис! — деди кулиб Давидов ва чаққонлик билан таканинг сербўғин бурама шохидан ушлади. — Қани энди правлениега юр, таъзиiringни бериб қўяй, Шчукарнинг ошнаси, такасалтанг жангари!

Трофим бўйсuna қолди. Давидовнинг ёнида итоат билан кета бошлади, аҳён-аҳёнда бошини силкитиб, шохларини одоб билан бўшатиб олишга уринади. Аммо зинапоянинг биринчи босқичида у бирдан тўрт оёгини тираб кескин тихирлик қилди, Давидов тўхтагач, унга ётсирамай сузилиб кўкиш лабларини ғалати

бир тарзда қимирлатганча унинг чўнтагини ҳидлади.

Давидов таъна билан бош чайқаб, овозини мумкин қадар маънодор қилишга тиришиб унга дашном берди:

— Эҳ, Трофим, Трофим! Ахир сен чолсан-ку, колхоз пенсионери десак ҳам бўлди-ю, аҳмоқлигинг ҳали ҳам қолган эмас, уришмоқчи бўлиб ҳаммага ёпишсан, буни эплай олмасанг, нон тана қиласан. Бу ишинг яхши эмас, ҳатто уят, факт! Хўш, ҳидлаб нима топдинг?

Давидов тамаки халтаси билан гугурт тагидан чўнтагида қолиб кетган бир бурда нонни пайпаслаб топди-да, уни ёпишиб қолган тамаки ушоқларидан тозалагач, бу арзимас туҳфани кафтида узатишдан олдин нима учундир аввал ўзи ҳидлаб кўрди. Така ялтоқланиб ва илтижо билан бошини қуий солганча Давидовга қари сатирнинг ибосиз кўзлари билан тикилиб, нонни аранг ҳидлади-да, пишқирганча жирканиб сиполик билан зинапоядан тушиб кетди.

— Оч эмас экансан-ку,— деди ғижиниб Давидов.— Солдат бўлган эмассан-да, лаънати иблис, бўлмаса жон-жон деб туширадинг-а! Нондан тамаки ҳиди келган бўлса нима бўлти! Вужудингда дворян қони кўпга ўштайди, ярамас, ўтакетган инжиқсан, факт!

Давидов қоқ нонни ташлаб салқин даҳлизга кирди, чўян қозондан бир кружка сув олиб ютоққанча симирди. Иссиқ ва йўл ниҳоятда ҳоритганини эндигина сезди.

Правлениеда Размётнов билан ҳисобчидан бошқа ҳеч ким йўқ эди. Размётнов Давидовни кўриши билан илжайди:

— Келдингми, йигит? Уҳ, елкамдан тоғ ағдарилгандек бўлди! Колхоз хўжалиги даҳмаза экан — бу ташвишдан худонинг ўзи асрасин! Гоҳ темирчиликда кўмир йўқ, гоҳ экин бошидаги чиририқ синиб қолган, гсҳ биттаси бир важ билган, гоҳ биттаси бошқа арз билан... Бунақанги сердағдаға вазифа менинг табиатимга сира ҳам тўғри келмас экан. Бу ерда яна бир ҳафтача ўтирадиган бўлсам, шундай тутқалоқ дардига дучор бўлардимки, ҳолимни ҳузур қилиб томоша қилардиларинг!

- Макар қалай?
- Тирик.
- Тириклигини ўзим ҳам биламан, контузияси нима бўлди?

Размётнов юзини тириштирди:

— Ўқдан ҳам контузия бўларканми? Ахир унга уч дюймли тўпдан ўқ узишмаган-ку. Хўш, бошини бир оз лиқиллатиб, тирнаб кетган жойига ароқ суркади, яrim литрдан қолганини нафсига урди, вассалом — иш тамом.

- Ҳозир ўзи қаерда?
- Бригадага кетган.
- Бу воқеалар қандай юз берди?
- Қандай юз берарди: Макар кечаси ланг очиқ дераза олдида ўтирган экан, янги саводхон Шчукарь бобо бўлса, столнинг иккинчи томонида ўтирган экан. Хўш, Макарга милтиқдан ўқ узишибди. Ким отганлигини қоронги кеча билади, лекин шуниси аниқки, ношуднинг қўлидаги милтиқ экан.

— Нима учун аниқ бўлади?

Таажжубдан Размётновнинг қошлари чимирилди.

— Бу нима деганинг? Сен ўттиз қадам жойдан ўқ узсанг хато кетказармидинг? Эрталаб биз ўқ узилган жойни топдик. Гильзадан аниқладик. Ўзим ўлчаб кўрдим: четан девордан уй тагигача роппа-роса йигирма саккиз қадам.

— Кечаси ўттиз қадам жойдан ҳам хато кетказиш мумкин.

— Йўқ, мумкин эмас! — қизғин эътиroz билдиРазмётнов.— Мен хато кетказмас эдим! Ҳоҳласанг си nab кўрамиз: кечаси Макар ўтирган жойда ўтирасан, менга милтиқ берасан. Бир патроннинг ўзи биланоқ қоқ қаншарингдан туйнук очиб қўяман. Шунисидан аниқки, чинакам солдат эмас, аллақандай бир йигитча отган.

— Сен батафсилоқ гапириб бер.

— Ҳаммасини бир чеккадан айтиб бераман. Яrim кечага яқин хуторда отишма бўлаётганини эшишиб қолдим: бир милтиқ овози, кейин икки марта бўғиқроқ ўқ овози эшитилди, худди тўппончадан отилганга

ўхшади, яна янгроқ милтиқ овози эшитилди, овозидан билиш мумкин эди. Мен ёстиғимнинг тагидан тўппончани олиб, шимимни йўл-йўлакай кийганимча, кўчага югуриб чиқдим. Макарнинг квартирасига қараб чопдим: отишма ўша томондан эшитилгандек бўлди. Макар бир бало қилаётган бўлса керак, деб ўйлабман...

Бир зумда етиб бордим. Эшикни тақиллатсам — ёпиқ, аммо уйдан бирорнинг инграётгани эшитиляпти. Хўш, елкам билан икки мартагини яхшилаб итариб, эшикнинг зулфинини уздим, уйга чопиб кириб гугурт чақдим. Ошхонада каравотнинг тагидан бирорнинг сёғи чиқиб турибди. Қаттиқ тортдим. Бафармони худо, каравотнинг тагидан бирор чўчқачага ўхшаб чинқирворса бўладими! Мен бошда гарангсиб қолдим, аммо ўша тахлитда тортавердим. У одамни ошхонанинг ўртасига сургаб олиб чиқдим, мутлақо одам эмас, яъни эркак эмас, уй бекаси кампир экан. Ундан, Макар қаёқда деб сўрасам, қўрқиб кетганидан тили сўзга келмайди.

Мен Макарнинг хонасига қараб югурдим, қандайдир юмшоқ нарсага қоқилиб йиқилиб тушдим, ўрнимдан сапчиб турдиму юрагим орқамга тортиб кетди: «Демак,— деб ўйладим,— Макарни ўлдиришибди, ётган шу». Амал-тақал билан гугурт чақиб қарасам — Шчукарь бобо ерда узала тушиб ётибди, бир кўзи менда, бир кўзи юмуқ. Бобонинг пешанаси билан ёноғи қон. Ундан: «Тирикмисан? Макар қани?» деб сўрадим. У ҳам ўз навбатида мендан: «Андрюша, худо ҳақи, айт-чи, мен тирикманми, ё тирик эмасманми?» деб сўради. Овози ҳам шундай нозик-ингичкаки, гўё чол ҳақиқатан ҳам жон таслим қилаётгандек... Шундан кейин мен унга таскин бериб: «Тилинг гапга келяптими — демак, ҳали тириксан. Аммо ҳозирданоқ сендан мурда ҳиди анқияпти...» дедим. У аччиқ йиглаб шундай деди: «Охирги нафасим етиб, жоним таним билан видолашаётганга ўхшайди, шу сабабдан ҳам ҳаво диққинафас бўлса керак. Борди-ю, мен ҳозирча тирик бўлсан ҳам, ҳадемай албатта ўламан: калламда ўқ бор».

— Нима бало ўзи! — сабрсизлик билан унинг гапи

ни бўлди Давидов.— Унинг юзи нега қон бўлди экан?
Гарангман! У ҳам яраланган эканми?

Размётнов кула-кула гапида давом этди:

— Ҳеч ким яраланган эмас, ҳеч нарса қилмабди.
Шу билан, мен ҳар эҳтимолга қарши чиқиб деразанинг дарчасини ёпиб келдим, чироқни ёқдим. Шчукарь қандай ётган бўлса, ўшандай чалқанчасига хотиржам ётибди, фақат иккинчи кўзини ҳам юмиб, қўлларини қорнига қовуштириб олибди. Худди тобутда ётгандек қимир этмайди, мурданинг ўзгинаси, вассалом! Инграганича эҳтиром билан мендан илтимос қилди: «Худо ҳақи бориб кампиримни чақириб келсанг, ўлар олдимда у билан хайр-хўшлашиб қолсам».

Унга энгашиб чироқни тутдим.— Размётнов пиқиллаб, кулгисини аранг тийиб олди.— Ёруғда кўрсам унинг, яъни Шчукарнинг пешанасида қарагай пайраҳа санчилиб турибди... Ўқ деразанинг четига тегиб пайраҳа учирив юборган экан, у учиб бориб Шчукарнинг пешанасига санчилибди, терисини тешиб ўтибди, лақма чол буни ўқ деб ўйлаб ўзини ерга отибди. Чол кўзимнинг ўнгида ажалсиз ўлиб боряпти, мен кулгидан қаддимни кўтаролсам-чи, хўш, пайраҳани суғуриб олиб, бобога: «Санчилган ўқни суғуриб олдим, энди ўрнингдан тур, беҳуда ётаверма, хўш айт-чи, Макар қаёққа кетди?» дедим.

Қарасам, Шчукарь бобомнинг чеҳраси очилиб қолди, бироқ нима учундир менинг олдимда ўрнидан туришга ийманиб, ётган ерида ижирғанади-ю, турмайди... Аммо лаънати ёлғончи ётган жойида ҳам мени лақиллатади: «Душманлар,— дейди,— мени отиб, ўқ қоқ пешонамга келиб текканда, бор бўйим билан йиқилиб ҳушимдан кетдим, Макар бўлса, шу орада чироқни ўчириб деразадан сакраганча аллақаёққа ғойиб бўлди. Дўстлигимизни кўриб қўй: мен ўлар ҳолатда ярадор бўлиб ётибману қўрққанидан мени душманларнинг панжасига ташлаб қочиб кетди. Мени ўлдираёзган ўша ўқни бир кўрсат, Андрюша. Худо ёрлақаб тирик қолсам — уни хотира учун кампиримнинг иконаси остида умрбод сақлаб юраман!»

«Йўқ,— дейман унга.— Ўқни сенга кўрсатолмай-

ман. Унинг ҳамма ёғи қон, кўришинг билан яна ҳушиңдан кетиб қолмагин. Биз бу машҳур ўқни музейда сақлаш учун Ростовга жўнатамиз». Шундан кейин чолнинг ҷеҳраси яна ҳам очилиб кетди, чаққонлик билан ёнбошлаб сўраб қолди: «Нима дейсан, Андрюша, қаҳрамонона яраланиб, душманларнинг шундай ҳужумига бардош берганим учун каттакон бошлиқларимиздан битта-яримта медаль тегиб қолмасмикан?» Шундан кейин менинг қаттиқ ғашим келди; қўлига пайраҳани тутқазиб: «Мана сенинг «ўқ»инг, бу музейга ярамайди. Уни иконанинг тагида сақлайвер, ҳозир қудуққа қараб равона бўл-да, қаҳрамонлигининг артиб, ўзингни ўнглаб ол, бўлмаса худди лаҳадга ўхшаб сасиб кетяпсан» дедим.

Шчукарь қўрага чиқиб кетганча ғойиб бўлди, шу орада ҳадемай Макар келиб қолди, ҳориган отек ҳаллослади, столга ўтирди, фиқ этмайди. Кейин нафасини ростлаб олиб гапирди: «Аблаҳга тегизолмадим! Икки марта ўқ уздим. Қоронғи, тўппончанинг қоровули кўринмайди, милига қараб мўлжалга олган эдим — тегмади. У тўхтаб, менга яна бир марта ўқ узди. Бамисоли гимнастёркамни бирор юлқигандек бўлди». Макар гимнастёркасининг этагини тортид, дарҳақиқат, ўнг томонида гимнастёркасининг камаридан юқори бир жойини ўқ тешиб ўтибди. Мен, кимлигини билолмадингми, деб сўрадим. У бўлса кулади: «Менинг кўзим бойўғлининг кўзидай ўткир эмас. Шунисини биламанки, ёш йигит, чунки жуда ҳам чопқир экан! Еши катта одам бундай чополмайди. Орқасидан югуриб кўрган эдим — қаёқда! Унга отлиқ одам ҳам етолмайди». — «Бу нима қалтис иш қилганинг? — дейман унга. — Уларнинг нечталигини билмай, изидан югурибсан-да? Борди-ю, четанинг панасида сени яна ўшанга ўхшаган иккита йигит пойлаб турган бўлса, унда нима бўларди? Ҳатто биттасининг ўзиёқ яқинлаштириб туриб шартта отиб ташлаши мумкин эди». Макарга гап кор қиласмиди? «Сенингча нима қилишим керак эди? — дейди у. — Чироқни ўчириб каравотнинг тагига кириб ётишим керакмиди?» Содир бўлган бор воқеа шу. Шундан кейин Макар тумов бўлиб қолди, холос.

— Бунга тумовнинг нима дахли бор?

— Ким билади дейсан, ўзи шундай дейди, мен ҳам ҳайронман. Ҳа, нега куляпсан? Ўшандан кейин у, дарҳақиқат, расво бир тумовга дучор бўлиб қолди. Бурнидан сел бўлиб оқяпти, худди пулемёт отгандек бетўхтов аксиргани аксирган.

— Бориб турган билимсизлик,— деди ранжиб ҳисобчи, собиқ полк мирзаларидан бўлган ўрта яшар казак. Тутилаверганидан кумуш банди хиралашиб қолган кўзойнагини пешанасиға кўтариб қўйиб, совукқина тақрорлади:— Ўртоқ Нагульнов ўзининг билимсизлигини кўрсатяпти, вассалом!

— Ҳозир оғирликнинг ҳаммаси кўпроқ билимсизларга тушяпти,— деб заҳарханда қилди Размётнов.— Мана сен ўтакетган билимдонсан, чўтни ҳам шунаقا шарақлатасанки, дарз кетай дейди, ҳар битта ҳарфни жимжимадор қилиб ёзасан, лекин ўқни сенга узмай Нагульновга узишибди... — У яна Давидовга қараб, давом этди:— Эрталаб барвақт ундан хабар олгани кирсам, фельдшер билан шундай баҳслашаптики, иблис ҳам тушунолмайди бунга! Фельдшер Макарнинг тумовини, кечаси деразани ланг очиб қўйиб елвизакда ўтириб шамоллаганингиздан, дейди. Макар бўлса, тумов ўқ бурун асабига шикаст етказганидан, дейди. Фельдшер: «Ўқ қандай қилиб бурун асабингизга шикаст етказиши мумкин, ахир, қулоғингизнинг тепасидан чаккангизни ялаб ўтиб кетибди-ку?» деб сўрайди. Макар бўлса унга жавоб беради: «Қандай шикаст етказгани билан сенинг ишинг бўлмасин, шикаст етказгани факт, сенинг ишинг — билмаган нарсанг тўғрисида мулоҳаза юргизиш эмас, бу асаб тумовини даволаш».

Макар иблисдан ҳам қайсар, бу чол фельдшер бўлса ундан ҳам баттар экан. «Сиз аҳмоқона гапларингиз билан менинг бошимни қотирманг,— дейди у.— Асабдан одамнинг икки қовоғи эмас, бир қовоғи, икки юзи эмас, бир юзи учади. Ундай бўладиган бўлса, нима учун назлангиз бурнингизнинг бир катагидан келмай, иккала катагидан баббаравар келяпти? Ўз-ўзидан равшан — бу шамоллаганингиздан».

Макар бир оз жим тургач, кейин: «Менга қара, ро-

та табиби, сени ҳеч ким қулофингга урганми?» деб сўради.

Мен ҳар эҳтимолга қарши Макарнинг қўлини вақтида ушлаб қолиш учун унга яқинроқ бориб ўтиридим, фельдшер бўлса, аксинча, ундан нарироққа сурилиб эшикка қараб-қараб, журъатсизлик билан: «Йў-ў-ўқ, худонинг марҳамати билан, ҳеч ким урган эмас. Бунга мунча қизиқиб қолдингиз?» дейди.

Макар ундан яна сўради: «Мана мен сенинг чап қулофингга муштум билан тушурсам, чап қулоғимнинг ўзи шанғиллайди, деб ўйлайсанми? Хотиржам бўл, иккала қулоғинг ҳам пасхада жом чалинганидек даранг-дурунглаб кетади!»

Фельдшер стулдан секин туриб эшик томонга қия бўла бошлади, Макар бўлса: «Сен қизишка, стулга ўтири, мен сени урмоқчи эмасман, мисол учун тушунтиряпман-да. Уқдингми?» дейди.

Фельдшер қизишиб нима қиласди? У эҳтиёти шарт эшик томонга қочган эди, аммо Макарнинг сўзларидан кейин стул четига омонатгина ўтириди, аммо эшикка ҳар қалай қараб-қараб қўярди... Макар муштумини туғиб, уни умрида биринчи бор кўраётгандек ҳар томондан кўздан кечирди-да, яна: «Бу тухфани сенга иккинчи марта тақдим этсам унда нима бўлади?»— деб сўради. Фельдшер яна ўрнидан туриб эшик томонга қараб жўнади. Қўли эшикнинг қабзасида-ю, ўзи бўлса: «Топган аҳмоқона гапларингизни қаранг! Медицина билан асабга сизнинг муштумларингизнинг ҳеч қандай даҳли йўқ!» дейди. «Жуда ҳам даҳли бор»,— деб унга эътиroz билдиради Макар, уни яна ўтиришга илтимос қилиб эҳтиром билан стулга ўтқизади. Шундан кейин фельдшер нима учундир беҳосдан-беҳос қора терга тушиб, ниҳоятда ишим қисталанг, дарҳол касалларни қабул қилгани жўнашим керак, дейди. Аммо Макар қатъий оҳангда, касаллар бир неча минут кутиб туришлари мумкин, медицина мавзуидаги баҳс давом этади, аминманки, бу фанда мен сендан беш қадам олдинроқдаман, дейди.

Давидов ҳорғин жилмаяр, ҳисобчи оғзини кафти билан тўсиб кампирлардек оҳиста кулар, Размётнов эса жиддиятни сира бузмай давом эттирас эди:

«Гап шу,— дейди Макар,— борди-ю ўша жойингга иккинчи марта туширсам, бир кўзимдангина ёш чиқаркан, деб ўйламагин. Худди пишган помидорнинг шираси отилгандек иккала кўзингдан ҳам тирқираб ёш чиқиб кетади, бунинг ҳар қалай, кафилини оламан! Асаб тумови ҳам шунга ўхшаган гап: агар буруннинг чап катагидан назла келаётган бўлса, ўнг катагидан ҳам келиши керак. Уқдингми?» Шундан кейин фельдшер дадилланиб: «Медицинадан тамом омисиз, мумкин бўлса, менга ақл ўргатмасангиз, мен ёзиб берган томизғи дори билан даволансангиз» дейди. Макар бир сапчиб тушса бўладими! Боши шифтга тегай деди, овози борича бўкирди: «Мен медицинадан оми эканманми?! Ҳаҳ, эски хуқна! Мен герман урушида тўрт марта яраланганман, икки марта контузияланиб, бир марта газ билан заҳарланганман, гражданлар урушида уч марта яраланганман, ўтиз лазарет, госпиталь, касалхонада ётиб чиқсанману медицинадан оми бўлар эканманми? Мени қандай докторлар билан профессорлар даволаганини биласанми, сурги дори? Сен қари аҳмоқ унақа билимдон одамларни тушингда ҳам кўрмагансан!» Шундан кейин қаёқдан журъати ошли, фельдшер ҳам баланд келиб, Макарга қараб шанғиллади: «Гарчанд,— дейди,— сизни билимдон одамлар даволаган бўлса ҳамки, аммо сиз, муҳтарам биродар, медицинада бамисоли пўқаксиз!» Макар унинг бу гапига шундай жавоб берди: «Сен бўлсанг медицинада — тешиккулчанинг ўртасисан! Сен янги туғилган чақалоқларнинг киндигини кесиш билан чолларнинг чуррасини ростлашни биласан, асаб важига бўлса қўй инжилни фаҳмлаганчалик фаҳминг етади! Сен асаб ҳақидаги илмдан мутлақо бехабарсан!»

Хуллас, гапдан гапчувалиб улар роса туфук сочишди, фельдшер Макарнинг хонасидан бир копток ипдек пилдираб чиқиб кетди. Макар бир оз ҳовридан тушгач, менга: «Сен правлениега кетавер, мен қўлбала дорилар билан бир оз даволаниб, бурнимга ёғ суркайману ҳозир бораман» деди. Сен унинг бир соатдан кейин қандай қиёфада кириб келганини кўрсанг эди, Давидов! Бурни худди бақлажондек кўм-кўк кўкариб шишиб кетибди, бир томонга қийшайиб қо-

либди. Еф суркайман деб зўриқтириб юборганга ўхшайди. Макардан, тўғрироғи, унинг бурнидан бутун правленини қўй ёғи ҳиди босиб кетди. У ўзига шундай дори ўйлаб топибди... Унга кўзим тушиши билан — хоҳ ишон, хоҳ ишонма, кулгум қистаб кетди. Хуллас, йигит ўзини-ўзи бадбашара қилиб қўйибди! Ўзингни ўзинг нима қилиб қўйдинг, деб сўрамоқчи бўламану кулгидан нафасим чиқса-чи. Унинг астойдил жаҳли чиқиб мендан сўрайди: «Сен нега куляпсан, аҳмоқ меров, кўчадан ялтироқ тугма топиб олдингми дейман? Мунча терингга сифмаяпсан, Трофимвачча? Сенинг ақлинг такамиз Трофимнинг ақлича-ю, ажабтовор одамдан кулганингга бало борми!»

У отхонага қараб йўналди, мен кетидан чиқдим. Қарасам, Макар эгарни олиб, жийрон отини эгарлаб, отхонадан етаклаб чиқиб келяпти, фиқ этмайди. Хуллас, менинг кулганимдан жаҳли чиқяпти: «Йўл бўлсин, қаёққа?» деб сўрайман. Тундлик билан жавоб беради: «Олатоққа, хивич кесиб келиб сени савамоқчиман!»—«Нега энди?» деб сўрайман. Индамайди. Мен уни кузатиб кета бошладим. То квартирасигача индамай бордик. Эшик олдида юганни менга тутқазиб, ўзи уйга кириб кетди. Қарасам, у ёқдан кифтига филюфли тўппонча осиб белига камар боғлаганча, қўлида сочиқ билан чиқиб келяпти...

— Сочиқ? — таажжубланди Давидов.— Сочиқ нимаси?

— Сенга боя айтганимдек расво тумовга йўлиқ-қан, дастрўмол кор қилмайди, бизга ўхшаб соддагина қилиб ерга бурун қоқиб ташлашдан далада ҳам орқиласди.— Размётнов нозиккина кулиб қўйди:— Сен уни ерга урма, ҳар қалай, инглиз тилини ўрганяпти, билимсизларга ўхшаб иш тутиши керакмас-да... Шунинг учун дастрўмол ўрнига сочиқ олиб чиқибди. Мен унга: «Сен бошингни дока билан танғиб ярангни бер-китсанг бўларди, Макар», дедим. Унинг жини қўзиб, бўкирди: «Бу нега яра бўларкан, жин урган! Кўзинг чиққанми, кўрмаяпсанми, бу яра эмас, терим шилиниб кетган холос! Менга хотинчалиш назокатлар кетмайди! Бригадага борсам, шамол қуритиб чанг босса, қари байталнинг ярасидай битади-кетади! Сен ҳадеб

бировнинг ишига тумшуғингни тиқавермай, аҳмоқона маслаҳатларинг билан түёғингни шиқиллатиб қол!»

Қарасам, фельдшер билан жиқиллашганидан, менинг кулганимдан феъли қаттиқ айниган, эҳтиёт билан, тўппончасини панароқ жойга тақиб олишини маслаҳат бердим. Қаёқда! Мени дарров волидамга ҳавола қилиб, шундай деди: «Менга ҳар қандай аblaҳ ўқ узади-ю, нима мен ёш болаларнинг сопқонини кўтариб юришим керакми? Тўппончамни чўнтағимда саккиз йил олиб юриб чўнтақларимни илма-тешик қилиб юбордим, энди бас! Шу кундан эътиборан ошкора тақиб юраман. Тўппончам ўғирлик эмас, унга қон тўка-тўка муссар бўлганман. Уни менга қимматли ўртоқ Фрунзе номидан, қолаверса, сопида номим ёзилган кумуш пластинкаси билан бекорга тақдим қилишган эканми? Хомтама бўласан, оғайни, яна бировнинг ишига тумшуғингни тиқяпсан». Шундай деди-ю, отига миниб жўнаб қолди. То хутордан чиқиб кетгунича сочиққа бурун қоққани эшитилиб турди, худди карнай чалаётганга ўхшарди. Сен унга тўппонча важини айтиб қўй, Семён. Ҳар ҳолда халқнинг кўз ўнгидаги яхши эмас. У сенинг гапининг киради-ку.

Размётновнинг сўзлари Давидовнинг ҳушига етиб бормас эди. Ёноқларини кафтига қўйиб, тирсакларига суянганча, сиёҳ томчилари билан қопланган чақа стол тахтасига тикилганча, Аржановнинг ҳикоясини эслаб, ўйларди: «Хўп дуруст, фараз қиласлилар, Яков Лукич — кулак, лекин нима учун мен келиб-келиб ўшандан гумон қилишим керак? Унинг ўзи қўлига милтиқ ушламайди, ёши ўтиб қолган, эҳтиёткор; Макар, мени кўриб қочган одам чопқир ёш йигит, дебди. Борди-ю Лукичнинг ўғли отаси билан биргаликда қилган бўлса-чи? Яков Лукични бари бир аниқ исботсиз хўжалик мудирлиги вазифасидан олиб ташлаб бўлмайди, бу билан уни чўчитиб қўйиш мумкин, борди-ю, у биронта фитнага аралашиб қолган бўлса, бошқаларни ҳурkitиб юбориш мумкин. Лукич бундай ишга ёлғиз ўзи қўл урмайди. Жин урган ақлли одам, ёлғиз ўзи бундай ишга сира ҳам журъат қилмайди: демак, у билан бояги-боягисидек муомала қилиб, уни зинҳор бад олдирмаслик керак, акс ҳолда бутун ишни барбод қилиш

мумкин. Ўйинга энди козирлар ҳам тушяпти... Тез орада районга тушиб, райком секретари ва ГПУ бошлиги билан гаплашиш керак. Бизнинг ГПУмиз оғзини очиб лалайиб ўтириби, бу ерда бўлса кечалари милтиқдан ўт очишга киришишяпти. Бугун — Макарга ўқ узиши, эртага бўлса менгами ё Размётновга қараб отишар. Йўқ, бу иш ярамайди. Агар ҳеч қандай чора кўрмасак, биронта ярамас бизни уч кундаёқ кетма-кет қулатиб қўйиши мумкин... Аммо Лукич контрреволюцион ўйинга ҳар ҳолда аралашмас, дейман. Ниҳоятда ишига пишиқ, факт — унга нима нафи ҳам бор эди? Хўжалик мудири, правление аъзоси бўлса, туппа-тузук маъмур турмуш кечираётган бўлса. Йўқ, унинг эски замонни қўмсашига сира ҳам ишонгим келмайди. Эски замонга қайтиш йўқ, ахир у буни тушуниши керак-ку. Борди-ю, биз ҳозир қўшниларимизнинг биронтаси билан уришаётган бўлсак ҳам бошқа гап эди,— у тақдирда бу активлашиши мумкин эди, ҳозир мен унинг активлашганига ишонмайман».

Давидовнинг мулоҳазаларини Размётнов бўлди. У дўстининг сўлғин юзига анчагача индамай қараб турди, кейин дангал сўради:

— Бугун нонушта қилганмидинг?

— Нонушта қилганмидинг? Нима эди?— деди фаромушлик билан Давидов.

— Шундай ориқлаб кетибсанки, одамнинг ваҳимаси келади! Диккайган ёноқ суюкларинггина қолибди, улар ҳам офтобда қоқланган.

— Яна эски гапни бошлайсанми?

— Йўғ-а, мен жиддий айтяпман, гапимга ишон!

— Нонушта қилганим йўқ, вақтим бўлмади, кўнглим ҳам тортмай туриби, буни қара, эрталабданоқ жазирама иссиқ бошланиб кетди.

— Мен нима учундир очқаброқ турибман. Юр мен билан, Сёма, бир оз тамаддиқ қилиб оламиз,— дея таклиф этди Размётнов.

Давидов истар-истамас кўнди.

Улар бирга ҳовлига чиқдилар. Уларнинг юзларига ёвшан иси сингиб кетган қуруқ ва иссиқ оловли дашт шамоли келиб урилди.

Кўча эшик олдилда Давидов тўхтаб, сўради:

— Сен кимдан гўмон қиласан, Андрей?

Размётнов кифтини чиқариб, аста-секин қўлларини ёзди:

— Ким билади дейсан! Узим бир неча марта тусмоллаб кўриб, бирон тўхтамга келолмадим. Хугордаги ҳамма казакларни бирма-бир хаёлимдан ўтказдиму жўяли бир фикрга келолмадим. Бизни аллақайси иблис гангитиб қўйди-ю, энди бошимизни қотиришимиз керак. Бу ерга район ГПУсидан бир ўртоқ келиб, Макарнинг уйи агрофига изғиди, Макардан, Шчукарь бободан, Макар турадиган уйдаги кампирдан, мендан баъзи нарсаларни сўради, биз топиб олган гильзани кўздан кечирди, ахир унда бирон белги йўқ-ку... Шу тахлитда қайтиб кетди. «Қишлоғингизга биронта душман оралаганга ўхшайди» дейди. Макар ундан сўраб қолди: «Сенга баъзан дўстларинг ҳам ўқ узишганми, донишманд? Бу ердан тезроқ қорангни ўчириб, йўқол! Сенсиз ҳам тагига етамиз». Ҳалиги лақма индалмай қолди, яккаш бурнини тортади, шу билан отига миниб жўнаб қолди.

— Нима дейсан, бу ҳунар Островновдан чиқмадимкан?— эҳтиёт билан сўради Давидов.

Аммо эшик ҳалқасини ушламоқчи бўлган Размётнов ҳайратдан ҳатто қўлинин тушириб, кулиб юборди.

— Нима, эсингни едингми? Яков Лукич-а? Қаёқдан юрак ютиб бу ишга журъат қиласди? Араванинг фижирлашидан қўрқади-ю, сен бундай бемаъни гапни гапириб ўтирибсан! Калламни чопиб ташласанг розиманки, аммо у бу ишга қодир эмас! Бу ишни ким қилса ҳам, у қилмайди.

— Унинг ўғли-чи?

— Яна мўлжалдан адашдинг. Бунақа тусмоллаб ким кўрганни бармоғинг билан нуқаверадиган бўлсанг, мендан кўришинг ҳам ажаб эмас. Йўқ, бу мушкул жумбоқ. Бу худди тилсимли қулфга ўхшайди.

Размётнов халтасини олиб тамаки ўради-ю, аммо яқингинада уй бекаларига кундуз куни пеъ ёқишни, эркакларга эса кўчада чекишини тақиқлайдиган мажбурий қарорга ўзи қўл қўйганини эслаб қолиб, ўраган тамакисини фижинганча фижимлаб ташлади. Тааж-

жубланиб қараган Давидовға гүё ўзи ҳақида эмас, бегона бир одам ҳақида гапираётгандек фаромушлик билан жавоб берди:

— Ҳар хил аҳмоқона қарорлар чиқаришади! Қўра-да чекиш мумкин эмас, юр, менинг уйимда чекамиз.

*
* * *

Нонуштага Размётновнинг кампир онаси фақирона озгина туюлган, ёғ солингган одатдаги суюқ сўк бўтқани торти. Бу Давидовнинг меъдасига тегиб кетган эди. Аммо у полиздан бир товоқда янги узилган бодринг олиб келган эди, Давидовга жон кирди. У ер ва қуёш ҳиди келиб турган мазали бодрингдан иккитаени ҳузур қилиб еб, устидан бир кружка қиём сув ичди-да, столдан турди.

— Раҳмат, онажон, жуда қорним тўйди. Бодринг учун — алоҳида раҳмат. Бу йил янги бодрингга биринчи марта оғзим тегиши. Яхши экан, сўз йўқ, факт!

Меҳрибон, сўзамол кампир ҳасрат билан ёноғини кафтига тиради:

— Сен шўрликкинада бодринг нима қилсин? Хотининг йўқ-ку?

— Ҳозирча уйланганим йўқ, ҳеч вақтим бўлмаяпти, — деб жилмайди Давидов.

— Уйланишга вақтинг бўлмаса, эртапишар бодринг тاما қиласидиган жойинг ҳам йўқ экан. Экину кўчатлар билан ўзинг овора бўлишинт керак эмас-ку, ахир! Мана менинг Андрюшкам ҳам хотинисиз қолди. Онаси бўлмаса очидан ўларди. Онаси бор экан, ҳар қалай, унча-мунча боқиб турибди. Сизларга қараб туриб куйиб кетаман. Менинг Андрюшкам ҳам тоқ ўт япти. Макарка ҳам, сен ўзинг ҳам. Наҳотки учаловларинг ҳам уялмасанглар? Хоторда ҳўқиздай-ҳўқиздай бўлиб юрибсизлар-у, хотиндан омадларинг келмаган. Наҳотки биронталаринг ҳам уйланмасанглар? Ахир бу иснод-ку!

Размётнов кула-кула онасига тегажаклик қилди:

— Бизга ҳеч ким тегмаяпти, ойижон.

— Бўлмасам-чи, агар яна беш йилча бўйдоқ юрадиган бўлсанглар ҳеч ким ҳам тегмайди. Ёшлиниг

ўтиб қолгандан кейин хотин киши сизларни бошига урадими, қизларни гапирмай ҳам қўя қолай, қизларга оғиз соладиган вақтларинг ўтиб кетган!

— Бизга қизлар тегмасмиш — ўзинг айтяпсан: қариб қолибмиз, бевалар бўлса керакмас. Бирорларнинг боласини боқамизми? Жин урсин уларни! — ҳазилга олди Размётнов.

Афтидан у бундай ҳангамаларга кўникиб қолган, аммо Давидов эса индамас, ўзини нима учундир ноқулай сезар эди.

У очиқ кўнгил мезбонларга миннатдорчилик билдириб, улар билан хайрлашди-да, темирчиликка қараб кетди. Ў қабул қилувчи комиссия келгунча пичан ўроғига ремонт қилиб қўйилган лобогрейкалар ҳамда от қўшиладиган хаскашларни шахсан ўзи яхшилаб кўздан кечирмоқчи, чунки ремонт ишига у ҳам ўз меҳнати билан озгина ҳисса қўшган эди.

X БОБ

Хуторнинг энг четида жойлашган темирчилик уни таниш ҳидлар ва садолар билан қарши олди: эгаси-нинг ҳар бир ҳаракатига итоаткор болға Ипполит Сидоровичнинг қўлларида ҳамон боягисидек жаранглаб ўйнарди, умри тугаётган дамнинг ҳарсиллаган нафаси узоқданоқ эштилди, ланг очиб қўйилган эшикдан ҳамон аччиқ кўмир иси ва совимаган тўполнинг ажойиб ёқимли ҳиди келиб туради.

Овлоқдаги темирчиликнинг атрофи кимсасиз ва бўй-бўш. Яқин орадан ўтган эски йўлдан қизиган тупроқ ва олабўта ҳиди келмоқда. Темирчиликнинг зич қилиб чим бостирилган, чўккан четан томида ёввойи зифир билан бурган ўсмоқда. Уларнинг орасида бир талай чумчуқ уймалашмоқда. Улар эски темирчиликнинг бўғотида, ҳатто қиши кунлари ҳам яшар, уларнинг тинимсиз чирқиллашлари болғанинг жарангдор саси билан сандоннинг жарангига жўр бўлар эди.

Шалий Давидовни қадрдан ошнасидек қарши олди. Бутун куни ёлғиз ўсмир дамкаш билан ўтиб зери-карди. Ў Давидовнинг келганидан астойдил севиниб

кетди, темирдек қаттиқ ва бақувват қўлини узатаркан, йўғон овоз билан хушчақчақ гапирди:

— Анчадан бери дарагинг йўқ, дарагинг йўқ, раис! Пролетаръятни эсингдан чиқариб қўяяпсан, кириб ха-бар олай ҳам демайсан, ғуурланиб кетганга ўхшай-сан, йигит. Ҳали, хабар олгани кирдим ҳам дерсан? Бекор айтибсан! Ўроқ машиналарни кўргани келган-сан, мен сени яхши биламан, йигит! Хўп, юр, кўрасан. Мен уларни худди параддагидек, кўрикдаги казаклар-дек сафга тизиб қўйдим. Юр, юр, лекин тирфишлик қилмай кўздан кечирабсан. Ўзинг менга кўмакчи бў-либ ишлагансан, бинобарин, энди бирорга тўнкаб бўл-майди.

Давидов ҳар бир ўроқ машинасини синчиклаб узоқ кўздан кечирди. Аммо қанчалик тирфишлик билан кўздан кечирмасин, бир-иккита майда камчиликдан мустасно, ремонтдан ҳеч қандай нуқсон топмади. Аммо кекса темирчини қаттиқ хафа қилиб қўйди. У Давидовнинг орқасидан изма-из машинадан машина-га ўтиб, бўриқдан юзидағи терни чарм фартуғи би-лан арта-арта норози оҳангда гапиради.

— Ниҳоятда эринмаган хўжайн экансан! Бу тир-фишликларингнинг мутлақо ҳожати йўқ. Хўш, булар-нинг нимасини титкилайсан? Нима қидиряпсан ўзинг? Нима, мен сенга лўлимидим? Болғани наридан-бери тарақлатиб, ишни юмалоқ-ясси қилиб, кейин соявон аравасига тушганча отини чухлаб қорасини кўрсатмай кетадиган лўлимидим? Йўқ, йигит, бу ишларнинг ҳам-маси худди ўзимнинг ишимдек ҳалол бажарилган, минг ёғини титкилаб тирфишлик қиласверишингнинг ҳожати йўқ.

— Мен сенга тирфишлик қиласётганим йўқ, Сидоро-вич, нега ундей дейсан?

— Агар тирфишлик қилмай кўздан кечирганингда аллақачон кўриб бўлган бўлардинг, ваҳоланки, ҳар бир ўроқ машинанинг атрофида ўралашиб, яккаш тит-килайсан, яккаш пайпаслайсан...

— Менинг ишим шунаقا; кўзимга ишонаману қў-лим билан ушлаб кўраман,— ҳазиллашди Давидов.

Аммо у умумлаштирилгунча Антип Грачга тегиши-ли бўлган кўҳна, чақа лобогрейкани, айниқса диққат

билан кўздан кечира бошлаганида Шалийнинг чехраси очилиб кетиб, норозилигидан асар ҳам қолмади. У соқолини тутамлаб, кимгадир кўз қисиб, муғамбirona илжайганча, истеҳзо билан гапирди:

— Сен ёт, ерга ёт, Давидов! Нега унинг атрофида хўроздек гир айланяпсан? Мукка тушиб ётиб унинг тишини тишлаб кўр. Уни қиз болага ўхшаб силаб-сий-паб нима қиласан? Тишиңг билан тишлаб кўр, тишиңг билан! Эҳ, ношуд темирчи! Ўз қўлингдан чиқсан нарсани таниёлмаяпсанми? Ахир, бу ўроқ машинани бошдан-оёқ ўзинг ремонт қилган эдинг-ку! Мен сенга узил-кесил айтяпман, йигит, туриш-турмуши билан ўзингнинг қўлингдан чиқсан, сен бўлсанг кўрмаяпсан, таниёлмаяпсан. Бунақада, йигит, кечқурун уйланиб, эрталаб келинчак хотинингни ҳам таниёлмай қолсанг керак...

Ўз ҳазилидан мамнун бўлган Шалий қаттиқ қаҳ-қаҳлаб кулди. Йўтали тутиб қўлларини силкиди, Давидов эса сира ҳам хафа бўлмай жавоб берди:

— Бекорга куляпсан, Сидорович. Камқувват ўрта ҳолнинг ўроқ машинасини дарров танидим, ўзимнинг қўлимдан чиққанини ҳам пайқадим. Шунинг учун жиддий текширяпманки, ўроқ вақтида уялиб қолмайлик. Бу шарти кетиб, парти қолган ўроқ машинаси бирон аварияга учрагудек бўлса, элдан бурун ўзинг, ўроқ-чиларнинг олдида: «Мана, Давидовга болға билан омбурни ишониб топширган эдим, у пала-партиш иш қилибди», дейсан. Шундайми ё шундаймасми?

— Албатта. Бўлмаса-чи? Ким қилган бўлса ўша жавоб беради-да.

— Сен бўлсанг: «Таниёлмадинг» дейсан. Қадрдон-гинамни танидим, аммо ўзимдан талабим қаттиқ.

— Ўзингга ўзинг ишонмас экансан-да?

— Баъзан шундай ҳам бўлиб туради...

— Шундай бўлгани ҳам дуруст, йигит,— дарров унинг фикрига қўшилди бирдан жиддийлашиб қолган темирчи.— Бизнинг темирчилик ишимиз жуда масъулиятли иш дейиш мумкин, унда маҳоратингни ҳам бирданига оширолмайсан, э-ҳа, бирданига оширолмайсан... Биз темирчиларнинг орасидаги: «Танавору қўлинг билан болғага ишон, аммо ёшлигингдан

ақл-ҳушиңгга бино қўйма», деган мақол бежиз эмас. Катта заводдаги иш ҳам, кичкина устахонадаги иш ҳам, ҳаммаси ҳам бир — масъулиятли иш, мен сенга узил-кесил айтяпман. Бўлмаса ўтган йили район жунтери тайёрлаш бўлимининг мудирини менинг уйимга квартирага киритиб қўйиши; уни бизнинг хоторга вакил қилиб юборишган эди. Хотиним билан биз уни худди ўз боламиздек қарши олдик, аммо у бўлса кампирим билан ҳам, мен билан ҳам чурқ этиб гаплашмади, буни ўзига ор деб билди. Столга овқатлангани келиб ўтиrsa ҳам индамайди, столдан турса ҳам индамайди, қишлоқ Советидан келади — индамайди, кетади — индамайди. Сиёсатдан ёки хўжалик тўғрисида нима гап сўрасам ҳам, менга тўнғиллаганча: «Бунинг сенга даҳли йўқ, чол» деб жавоб беради. Шу билан гапимиз калтаи кўтаҳ бўлади. Квартирантимиз уч сутка чурқ этмай осойишта яшаганидан кейин, тўртинчи куни тилга кирди... Эргалаб камоли кибр-ҳаво билан менга нима дейди дегин: «Сен кампирингга айтиб қўй, менга картошкани товада эмас, тарелкада олиб келсин, столга ҳам сочиқ эмас, биронта салфетка қўйсин. Мен,— дейди,— маданий одамман, қолаверса, район миқёсидаги масъул ходимман — бунақангиджўн муомалани ёмон кўраман».

Мен ундан астойдил жаҳлим чиқиб кетиб шундай дедим: «Сен маданий одам эмас, қўланса мағзаксан! Агар сен маданий бўлсанг, олдингга қўйган идишдаги овқатни еявер, қўлингга тутқизган нарсага артиавер, чунки салфетка деган нарса бизнинг уйда асло бўлган эмас, тарелкаларни бўлса кампирим ҳаммасини синдириб қўйган. Мен сендан бир тийин ҳам пул олмайман; кампирим сенинг қандай кўнглингни олишни, сени қаерга ўтқазиб, қаерга юмшоқроқ жой солиб беришини билмай ўлиб бўляпти-ю, сен бўлсанг: «Мен — масъул ходимман!» деб кеккаясан. Хўш, қандай масъул ходимсан?— деб сўраб қолдим.— Ишхонангда қуёнтери билан юмронқозиқ терисини эзғиласанг керак, сенинг бор-йўқ масъулиятинг шундан иборат. Сен сира ҳам масъул ходим эмассан, мана мен—масъул ходимман! Раис билан ячейка секретаридан кейин хоторла энг биринчи шахсман, чунки менсиз ер ҳам ҳайдал-

майди, ўроқ ҳам ўрилмайди. Мен темири пўлатни бий-лайман, сен бўлсанг терини ийлайсан, қайси биримизнинг ишимиз муҳимроқ?— дедим.— Сен ўзингни масъул ходим деб танийсан, мен ҳам ўзимни шундай деб санайман. Иккала масъул ходим битта хонада қандай қилиб чиқишамиз! Қани,— дедим,— портфолингни қўлтиқла-чи, ўргилай, туёғингни шиқиллатиб қол, менга бунаقا кеккайган одамнинг мутлақо кераги йўқ».

Давидов кўзларини шундай қисдики, кўзлари мижжалари орасидан аранг йилтираб кўринарди. Овози кулгидан тўлқинланганча аста сўради:

— Ҳайдаб чиқардингми?

— Узил-кесил! Ўша заҳотиёқ чиқиб кетди, ноннамагимиз учун раҳмат ҳам айтмади, итвачча масъул ходим.

— Хўп шоввозсан-да, Сидорович!

— Бунинг шоввозлик жойи йўқ, уйимда бунаقا одамнинг истиқомат қилиши жуда малол келди.

Чекишиб олганларидан кейин Давидов яна асбобускуналарни кўздан кечиришга тушиб, бу ишни тушдан кейингина тугатди. Шалий билан хайрлашаркан, ишни сидқидилдан бажаргани учун унга самимий миннатдорчилик билдириб, суринтириди:

— Ремонт учун сенга неча меҳнат куни ёзишибди?

Кекса темирчи қовоғини солиб, ўгирилиб олди.

— Яков Лукич жуда ёлчишиб ёзиб беради...

— Бу ишга Яков Лукичнинг нима дахли бор?

— Даҳли шуки, ҳисобчига ўз амрини ўтказяпти. У қанча деса, ҳисобчи шунча ёзади.

— Ҳар қалай қанча ёзишиди?

— Арзимайди, йўқча ҳам келмайди, йигит.

— Нега ахир, бундай қилишади? Нима учун?

Одатда хушфеъл темирчи бу гал шу қадар ўқра-йиб қарадики, гўё унинг олдида Давидов эмас, Яков Лукичнинг ўзи тургандек эди.

— Шунинг учунки, улар менинг ишимни ҳеч ҳисобга олгилари келмаяпги. Кунимни темирчиликда ўтказсам — бир меҳнат куни ёзишади. Ишладимми, тамаки чекиб ўтирдимми — уларга бари бир бир меҳнат куни ёзишади. Сандоннинг олдида икки букилиб

синиб кетсанг ҳам бари бир бир меҳнат кунидан ошиқ ишлаёлмайсан. Хуллас, сенинг тўлайдиган ҳақингдан очдан ўлмай яшаб юрасану, уйланишга ҳушинг келмайди!

— Бу мен тўлайдиган ҳақ эмас! — деди Давидов кескин. — Бу колхоз тўлайдиган ҳақ эмас! Сен бу bemazagarchilikni менга нега илгарироқ айтмадинг?

Шалий иккиланиб тургач, истар-истамас жавоб берди:

— Сенга нима десам экан, йигитча, юзим чидами. Виждоним йўл бермади десаммикан. Сенга узилкесил шикоят қилмоқчи бўлдиму, кейин: «Жуда ҳам еб тўймас экан, ҳеч кўзи тўймайди» дермикансан, деб ўйлаб қолдим. Шунинг учун ҳам индамадим. Мана энди гапираман, гапнинг очиғини айтаман: улар кўнгилларига келганча — хўш, чунончи, плуглар, прошниклар, хуллас, қўзга кўринадиган асбоб-ускуналарнинг ремонтига ўҳшаган меҳнатни ҳисобга олишади-ю, чунончи, отларни тақалаш, ёки тақа, тўқмоқ, омборлар учун зулфин, ҳар хил икир-чикир майдачуда нарсаларни ясасанг — улар бундай ишларни сира ҳам ҳисобга олишмайди, гапирсанг қулоқларига ҳам кирмайди. Мен бу нарсани нотўғри деб ҳисоблайман, чунки бунақанги икир-чикирларга вақтинг кўп кетади.

— Сен яна «улар» деяпсан, «улар» деганинг кимлар ўзи? Ҳисобга олиш ишини ёлғиз ҳисобчигина олиб боради, бу иши учун правление олдида жавобгар, — деди ўқинч билан Давидов.

— Ҳисобчи олиб боради-ю, Лукич бийлайди. Сен менга қандай бўлиши кераклигини айтяпсан, мен бўлсам амалда нима бўлаётганини айтяпман.

— Агар амалда шундай бўлаётган бўлса, жуда ёмон.

— Бунинг учун мен эмас, сен айбдор, йигит.

— Мен айбдор эканлигимни ўзим ҳам биламан. Бу ишни тезроқ тузатиш керак. Эртагаёқ правление мажлисини чақираман, биз Яков Лукичдан суриштириб кўрамиз. Биз у билан астойдил гаплашамиз! — деди Давидов кескин.

Аммо Шалий мийиқлари орасидан кулибгина қўя қолди.

— Гаплашганда у билан гаплашиш керак эмас...

— Сенингча ким билан гаплашиш керак бўлмаса? Ҳисобчи биланми?

— Сен билан.

— Мен билан? Ҳм.. Ҳўп, қани.

Шалий Давидовнииг кучини чамалаб кўраётган-дек уни бошдан-оёқ синовчан назар билан кўздан ке-чирди-да, оҳиста гапира бошлади:

— Дадил бўл, йигит! Мен сенга аччиқ сўзлар айтаман... Айтгим келмаган эди-ю, айтиш зарур. Қўрқаманки, бошқа одамлар сенга бунаقا сўзларни айтишга ботинишмайди.

— Қани, қани,— унга далда берди Давидов, ўзи эса бўладиган ҳангама хуш ёқадиган ҳангама бўл-маслигини ичидан сезди. Ҳаммадан ҳам Шалий унинг Лушка билан муносабатлари ҳақида гап очиб қолишидан кўпроқ хавотирланди.

Аммо унинг кутганига зид ўлароқ Шалий бошда бўлак нарса ҳақида гапирди:

— Сенга сиртдан қараса — чинакам раиссан, лекин синчиклаброқ қараса — сен колхозга раис эмас, халқнинг таъбири билан айтганда ямоқ-ясқоқсан.

— Мана бунинг қойил гап! — ясамароқ хушчақ-чақлик билан хитоб қилди Давидов.

— Ҳеч қойил эмас,— жиддий давом қилди Шалий.— Бунинг ҳеч қойиллик жойи йўқ, мен сенга узил-кесилини айтсан. Сен яхши хўжайинга хос иш қилиб, ўроқ машиманинг тагига кирасан, текширасан, далада ҳам яшаб, ўзинг ер ҳайдайсан. Аммо правле-ниенгда нима ишлар бўлаётганини ҳеч кўрмайсан ҳам, Ҳилмайсан ҳам. Сен далада камроқ санғиб, бу ерда, хуторда қўпроқ бўлсанг, ишлар дуруст кетарди. Қўшчилик ҳам қиласан, темирчилик ҳам қиласан, хуллас, қўшиқда айтилганидек: «Қўлингда ўроқ, бир касбинг машвоқ»сан, бутун хўжаликни сенинг ўрнингга Островнов бийлаяпти. Сен изминингни қўлинг-дан бериб қўйгансан, Островнов қўлига киргизиб олган...

— Гапиравер,— деди совуққина Давидов.— Гапир, тортинма!

— Гапиравераман,— бажонидил рози бўлди Шалий. У ўроқ машинанинг таҳтасига ўринлашиб ўтириб олиб, имо билан Давидовни ҳам ёнига ўтиришга таклиф қилди, оstonада уларнинг гапига қулоқ солиб турган дамкаш болани кўриб қолиб, депсинганча бақириб берди:— Йўқол бу ердан, шайтонвачча! Бошқа ишинг йўқми? Нуқул гап пойтайсан, чўчқавачча! Камаримни суғуриб олиб, боплаб савалай, эсинг кириб қолсин! Ўшанда қулоғинг диккаймайдиган бўлиб қолади. Тавба, бола деган ҳам шунчалик бебош бўладими!

Кир-яғир ўсмир кулиб турған кўзларини чарақлатиб сичқондек физиллаганча қоронғи устахонага кириб кетди, шу ондаёқ у ёқдан дамнинг хирқироқ нафаси эшиғилди, кўрадан сапчиётган аланганинг қизғиши шуъласи кўринди. Шалий эса энди хушфөйлик билан жилмайганча, гапира бошлади:

— Етим болага темирчилик ҳунарини ўргатяпман. Катта йигитлардан биронтаси ҳам темирчиликка келмаяпти. Совет ҳокимияти уларни узил-кесил эрка қилиб юборди! Ҳар бири ё докторлик, ё агрономлик, ё ҳар хил инженерликнинг пайдан, биз чоллар ўлиб кетсанк ҳалқа ким этигу ким чоловор тикиб беради, отини ким тақалаб беради? Менда ҳам аҳвол шу: ҳеч кимни темирчиликка олиб келолмаяпман, ким бўлса темирчиликнинг дудидан заҳраси учеб қочади. Мана шу Ваняткани олишимга тўғри келди. Қурмагур шудлик бола-ю, касофатидан тортаётган кўргиликларимнинг сон-саноги йўқ! Ёзнинг куни гоҳ бирорнинг боғига тушади, балога қолган мен, гоҳ темирчиликни ташлаб қармоқ билан балиқ тутгани жўнаб қолади, гоҳ узил-кесил ҳеч нарсага ярамайдиган бир балони ўйлаб чиқаради. У холасининг қўлида туради, холасининг унча кучи етмайди, шу сабабдан бутун қилғиликларига чидаб сабр қилиб келяпман. Коийиман холос, етим болани уришга қўлим бормайди. Ишлар шунаقا, йигит. Бирорларнинг боласига, айниқса етимларга таълим бериш — жуда мушкул иш. Аммо мен шу ёшгача улардан ўнтачасини узил-кесил

чинакам темирчи қилиб етиштирдим, ҳозир Тубянскойда ҳам, Войсковойда ҳам, бошқа хуторларда ҳам менинг темирчи шогирдларим темирчиликларини юргизиб туришибди, биттаси, ҳатто Ростовда заводда ишлалайти. Бу — ҳазил гап әмас, йигит, ўзинг ҳам заводда ишлагансан, биласан; у ерда ким кўринганни ишга қабул қиласверишмайди. Шунисига fuурурлана-манки, ўлиб кетсам ёруғ дунёда ҳунаримни ўргангандан-қанча ворисларим қолади. Гапим тўғрими?

— Кел, иш тўғрисида гаплашайлик. Менинг ишимда яна қандай тартибсизликлар бор?

— Сендаги тартибсизлик битта: сен фақат мажлислардагина раиссан, кундалик ишларда бўлса Островнов раис. Ҳамма бало шунда. Менинг фаҳмлашимча, сен қўшчилар билан баҳорда бирга яшашинг, умумий хўжаликда қандай ишлаш лозимлигини кўрсатиб, ўрнак бўлишинг, ўзинг ҳам ер ҳайдашни ўрганишинг керак эди, бу иш колхоз раиси учун зиён қилмайди. Аммо ҳозир ҳам нима учун далада юрганингга узил-кесил тушунолмай гарангман. Наҳотки сен ишлаган заводнинг директори кун-узун кун токарлик становининг олдидаги турса! Ҳеч ақлим бовар қилмайди!

Шалий колхоздаги кам-кўстлар, Давидов кўрмай қолаётган, Яков Лукич, ҳисобчи ва омборчининг саъйи-ҳаракатлари билан ундан яширилаётган нарсалар ҳақида узоқ гапирди. Ҳамма гапидан чиқсан холоса шу бўлдики, колхоз тузилгандан бошлаб, то шу кунгача қилингандан ёмон ишларнинг ҳаммасига сиртдан ёввош кўринган Яков Лукич бошли экан.

— Сен нима учун бирон марта ҳам мажлисда чиқиб гапирмадинг? Наҳотки колхознинг ишига жонинг ачимаса? Яна: «Мен—пролетарьятман!» дейсан. Ўзинг гапириб ўзинг эшитсанг, мажлисларда қорангни ҳам кўрсатмасанг, пролетариат бўлиб қаёқка бординг?

Шалий бошини қўйи солганча узоқ индамай қолди, узиб олган гиёҳини ўйнатди, мўрт ва еп-енгил гиёҳ унинг каттакон, қарийб эгилмайдиган қора бармоқларида шу қадар ғалати кўринидики, Давидов

бейхтиёр жилмайиб қўйди. Шалий оёғи остидаги ниманидир диққат билан кўздан қечиради. Унинг жавоби гўё шунга алоқадордек эди. Узоқ жимликтан сўнг сўради:

— Сен баҳордаги бир мажлисда, Атаманчуковни колхоздан ҳайдаш керак, деган эдинг-а?

— Ҳа, шундай масала қўйган эдим. Ҳўш, нима эди?

— Уни ҳайдадингларми?

— Йўқ. Таассуфки, ҳайдаш керак эди.

— Таассуф ўз йўли билану, гап таассуфда эмас..

— Нимада бўлмаса?

— Бу нарсага ким қарши чиқиб сўзлаганини эслагин. Эслолмайсанми? Бўлмаса мен эслатиб қўяй: Островнов ҳам, Афонька омборчи ҳам, Люшня ҳам, яна ўн бештacha одам гапирган эди. Сенинг яхши маслаҳатингни мажлисда ўшалар чиппакка чиқариб, халқни сенга қарши қилиб қўйишиди. Бинобарин, Островнов ёлғиз иш кўраётгани йўқ. Буни фаҳмляяпсанми?

— Гапир.

— Гапираман. Сен нима учун мендан, нега мажлисда чиқиб гапирмайсан, деб сўраяпсан? Мен бир марта чиқарман, икки марта чиқарман. Учинчи марта чиқиб гапиришга мұяссар ҳам бўлолмайман. Мени шу устахонанинг ўзида яқингинада оловга қиздириб ўз қўлимда тоблаган бир парча темир билан сулайтиришади-ю, нутқларим ҳам, нотиқликларим ҳам адойи тамом бўлади. Йўқ, йигит, мен нотиқлик қилишга қариб қолдим, ўзларинг нотиқлик қилаверинглар, мен ҳали темирчиликда тўполнинг ҳидига роса тўйиб олмоқчиман.

— Сен хавфни ваҳима билан жуда кўпиртириб юбординг, ота, факт!— деди қатъиятсизлик билан Давидов, у бус-бутун темирчи ҳозиргина айтиб берган гапларнинг таъсирида эди.

Аммо темирчи бақрайган қора кўзларини Давидовга тикканча кулиб турарди:

— Чоллик қилиб кўзим ўтмай, ўзинг айтганинг дек кўпиртираётгандирману, ҳўш, сен бўлсанг, улардан келаётган бу хавф-хатарни мутлақо кўрмаяпсан

Ёшлик ташвиши узил-кесил кўзингни тиндириб қўйибди. Мен сенга бу гапни узил-кесил айтяпман.

Давидов индамай қолди. Энди ўй суриб қолиш навбати унга келди. У узок ўй суриб қолди, энди Шалий эмас, ўзи қўлида гиёҳ ўрнига ердан олган аллақандай занглаган шурупчани ўйнамоқда эди... Ўй суриш дақиқаларида кўзга илк бор тушиб қолган нарсани қўлда ўйнатиш ёки юлқилашдек бу таърифи қийин одат кўпчиликка хос...

Вақт аллақачон тушдан оғиб кетган. Соялар қочган, тикка тушаётган жазирама қуёш нури темирчиликнинг чим билан ёпилган, бурган босган, чўккан томини, яқин орада турган ўроқ машиналарни, йўл бўйидаги чанг босган ўт-ўланларни иссиқ тафти билан қиздирмоқда. Гремячий Логни жимжит тушки сукунат чулғаган. Уйларнинг дарчалари ёпиқ, кўчаларда ҳеч ким ўйқ, ҳатто эрталабдан бери тор кўчаларда дайдиб юрган бузоқлар ҳам анҳор томонга қочиб, оқтол билан самбиттолнинг қуюқ соясига яширинишган. Давидов билан Шалий эса ҳамон офтоб шувоқда ўтиришарди.

— Темирчиликка, сояга кирайлик, бўлмаса мен бундай офтобга кўникмаганман,— деди жазирама иссиққа чидаёлмаётган Шалий, юзи билан ёрғоқ бошидаги терни артиб.— Қари темирчи ҳам — бамисоли қари бекаойимнинг ўзи: улар офтобдан қочишади, бутун умрларини ҳар қайсилари ўз кўйларича соядা ўтказишади...

Улар сояга ўтиб темирчиликнинг шимол томонидаги илиқ ерга ўтиришди. Шалий Давидовга яқинроқ ўтириб, худди печакка кириб қолган аридек ғўнғиллаб гапира бошлиди.

— Хопров билан хотинини ўлдиришдими? Үлдиришди. Нима учун ўлдиришди? Мастбозлик қилибми? Йўқ, мутлақо ундан эмас, йигит... Бир балоси бор. Бирорни беҳудадан-беҳудага ўлдиришмайди. Мен эсини еган чол буни шундай деб ўйлайман: агар у Совет ҳокимиятининг хушига ёқмай қолган бўлса, уни қамоққа олиб, зимдан эмас, ҳукм чиқариб ўлдиришарди, модомики, уни кечаси ўғринчасига, зимдан, қолаверса хотини билан бирга ўлдиришган экан, у

Совет ҳокимияти душманларининг хушига ёқмай қолган, худди шундай! Қани, айт-чи, унинг хотинини нима учун ўлдиришган? Шунинг учунки, у ўша қотилларни ҳукуматга тутиб бериши мумкин эди, уларни яхши танирди. Ўликларнинг тили йўқ, улардан хавотир олмаса бўлади, йигит... Бўлган гап шу, мен сенга гапнинг узил-кесилини айтсам, худди шундай!

— Эҳтимол, биз уларнинг ҳаммасини сенсиз ҳам билармиз, фаҳмлаётгандирмиз, аммо ким ўлдирганлигини эса ҳеч ким билмайди.— Давидов индамай қолди, айёрлик ишлатиб, илова қилди:— Ҳеч ким ҳеч қаҷон билолмайди ҳам!

Шалий унинг охирги сўзларини гўё эшитмагандек бўлди. У оқи кўпайиб кетган соқолини тутамлаб, яйраб жилмайди:

— Соя жуда ҳам роҳат-а. Эски замонда бошимдан шундай бир воқеа ўтган эди, йигит. Бир вақт мен ғалла ўрими арафасида тавриялик бир бойнинг саккизта ғилдирагига чамбарак солиб бердим. Ҳали, ҳали эсимда, чоршанбамиди, жумамиди, ҳар қалай, бегим куни араваларни олиб кетгани келди. Ҳақими ни тўлади, ишимни мақтади, ширинкома чиқариб, меҳмон қилди, араваларни олиб кетгани от келтирган хизматкорларини ҳам чақирди. Ичдик. Кейин мен меҳмон қилдим. Буни ҳам ичиб бўлдик. У бадавлатгина хоҳол эди, бойлардан бўлса ҳам жуда хушфеъл одам эди. Шундай қилиб, унинг айш қилгиси келиб қолди, йигит. Менинг ишим бор эди, қўл-қўлга тегмайдиган пайт, бало-баттар буюртмаларнинг сонсаноғи йўқ. Мен унга: «Сен Трофим Денисович, хизматкорларинг билан ичавер, мени маъзур тутасан, йигит, иложим йўқ, ишим кўп» дедим. У рози бўлди. Улар ароқ билан овора бўлиб қолишибди, мен эса темирчиликка қараб кетдим. Қаллам ғувиллаб кетяпти, аммо гандиракламай оёқ устида бемалол юрибман. Қўлим ҳам ихтиёrimда, лекин ўзим роса мастман, йигит. Бу фалокатнинг устига устахонанинг олдига қўнғироқли уч отли тараантас келиб тўхтади. Чиқдим. Енгилгина четан тараантаснинг соявони тагида бизнинг машҳур помешчик Селиванов ўтирибди; ўтакетган димогдор, бу дунёда ўхшаши йўқ қанжиқ

одамлардан эди... Унинг девордек оппоқ оқариб кетган кучери қўли қалтираганча чап томондаги шатак отнинг ён қайишини ечяпти. Бехабар экан, йўлда отнинг тақаси тушиб қолибди. Тўра шунинг учун унга роса дашном беряпти: «Унақасану, бунақасану, ишдан ҳайдаб юбораману, қаматтириб қўйману, сенинг касофатингдан поездга кеч қоладиган бўлдим»,— хуллас, шунақсанги гаплар. Аммо бизнинг Донда, йигит, чоризм даврида казаклар помешчикларга унча таъзим-тавозе қилишмасди. Селиванов важи ҳам шундай эди: зотан у энг бой помешчик бўлгани билан мен бир туфуриб қайтиб кириб кетаверсам ҳам бўларди. Мен ароқдан кайфим тарақ ҳолда ташқарига чиқиб, тўранинг эшик олдидага кучерини бўралаб сўкиб, унга дашном бераётганига қулоқ солиб турдим. Жаҳлим чиқиб узил-кесил ғазабим қўзиб келяпти, йигит. Селиванов мени кўриб қолиб: «Хой, темирчи, бу ёққа кел!» деб қичқирди. Мен ҳам унга: «Ишинг бўлса ўзинг кела қол» демоқчи бўлдиму, бошқа фикрга келдим: яқин кишимнинг олдига кетаётгандек илжайиб кетяпман, тарантасининг олдига бориб, қўлимни узатдим-да, «Саломатмисан, биродар! Ҳол-аҳволларинг қалай?» дедим. Таажжубланганидан қаншаридаги олтин қўзойнаги тушиб кетди; агар қўзойнаги қора тасма билан боғлаб қўйилмаганида чил-чил бўлиши турган гап эди. У қўзойнагини қаншарига яна қўндириб олди, мен бўлсам қўлимни узатганимча турибман, қўлим қоракуядан қоп-қора, кир-яғир. У бўлса менинг қўлимни худди кўрмагандай, ароқ ичиб юборгандай башараси тиришган, тишини гириҳ қилганча: «Нима, мастмисан? Панжангни кимга узатяпсан, исқирт башара?» дейди. «Нега билмас эканман,— сенинг кимлигингни жуда яхши биламан! Сен билан биз оға-ини биродардекмиз: сен қуёшдан зонт тагига қочасан, мен бўлсам — тупроқ томли темирчиликка қочаман: мен бегим куни бўлса ҳам ичганман, буни жуда яхши пайқабсан, аммо сен ҳам, афтидан, меҳнаткаш одамлар ичадиган якшанба кунларигина ичмасанг керак: бурнинг қип-қизил бўлиб турибди... Шундан маълум бўладики, сен билан икковимиз оқсуюк зотиданмиз, бошқаларга сира ўхшамаймиз.

Хўш, борди-ю, сенинг қўлинг оқ бўлиб, менинг қўлим қора бўлгани учун менга қўлингни беришдан ҳазар қилаётган бўлсанг — бу сенинг виждонингга ҳавола. Ўлсак, икковимиз ҳам баб-баравар оқариб кетамиз».

Селиванов индамайди, фақат лабларини қисиб-қимтайди, турқи бузилади. «Нима, отингни тақалаб берайми? — деб сўрайман. — Биз бу ишни бирпасда боплаймиз. Аммо кучерни беҳуда сўкяпсан; кучеринг ювони одамга ўхшайди. Сен ундан кўра мени сўк. Сен билан темирчиликка кириб эшикни зичлаб ёпамиз, ана ундан кейин сен мени сўкиб кўр, биродар. Мен довюрак одамларни яхши кўраман», — дейман.

Селиванов индамайди, аммо турқи борган сари гоҳ ундей, гоҳ бундай бўлиб ўзгаряпти. Гоҳ оқариб кетади, гоҳ қизариб кетади, — аммо индамайди. Мен унинг шатак отини тақалаб, тарантаснинг олдига бордим. У худди мени кўрмагандай, кучерга кумуш бир сўмликни узатиб: «Анави сурбетга бер», дейди. Мен кучердан пулни олиб тарантасда ўтирган Селивановнинг оёқлари остига улоқтиридим, ўзим бўлсам таажжублангандай илжайиб: «Бу нима қилганинг, биродар, ахир шу арзимаган ишга ҳам қариндошдан пул олиб бўладими? Сенга инъом-эҳсон қиласман, қовоқхонага кириб менинг соғлифимга ич!» дейман. Шундан кейин менинг помешчигим оқармади ҳам, қизармади ҳам, кўм-кўк бўлиб кўкарди-кетди; менга қараб чийиллаганча чинқирди: «Сенинг соғлигиннгами... ҳаром қоттур, аблаҳ, сурбет, сицилист, э фалонингга писмадон! Станица атаманига шикоят қиласман! Қамоқда чиритаман!»

Давидов шу қадар қаттиқ қаҳ-қаҳлаб юбордики, темирчиликнинг томидан бир гала чумчуқ чўчиб учиб кетди. Шалий мийифида кулганча тамаки ўрай бошлиди.

— Демак, «биродаринг» билан мўроса қилолмаб-сизлар-да? — сўзларни аранг айтиб сўради Давидов.

— Муроса қилолмадик.

— Пул нима бўлди? Тарантасдан улоқтириб юбордими?

— Улоқтириб кўрсин-чи... Пули билан бирга жўнаб қолди. Гап пулда эмас, йигит...

— Нимада бўлмаса?

Давидов ёшларга ўхшаб шундай хушчақчақ кулардики, Шалийнинг ҳам нашъаси ошиб кетди. Ўхшабданчада, қўл силтади:

— Мен бир оз ножӯя иш қилиб қўйдим.

— Гапирсанг-чи, Сидорович. Мунча чўздинг?— Давидов жиққа ёш кўзлари билан Шалийга тик қараб туарди.

У бўлса, яккаш қўлини силтаб, соқол босган оғзи ни катта очганча йўғон, янгроқ овоз билан куларди.

— Қани гапир, гапирсанг-чи, мунча маҳтал қилдинг!— деб ёлворарди шу лаҳзада яқиндагина бўлиб ўтган жиддий суҳбатни унтиб, ўзини бирдан бошланган оний хушчақчақлик ҳукмига топширган Давидов.

— Нимасини гапирдим... Нима дедим! У мени, сурбет ҳам деди, ярамас ҳам деди, ҳар бало деди, йигит. Охири мутлақо жазаваси тутиб, тарантасни оёғи билан тепганча: «Сицилист, фалон-пистон! Турмага қаматаман!» деб бақирди. Мен ўша пайтларда сицилист нима эканлигини билмас эдим... Революция нима эканлигини билардим-у, «сицилист»ни билмас эдим, мен бу энг ёмон, қаттиқ тегадиган ҳақорат деб ўйлабман... Мен унга: «Ўзинг сицилистсан, итвачча, дабдалангни чиқармасимдан қорангни ўчир!» дедим.

Давидов янги қаҳқаҳадан мук тушиб олди. Шалий у тўйиб кулиб олгунча индамай турди-да, кейин гапини тугатди:

— Эртасига мени станица атамани чақиртирди. У мендан бор гапни суриштирди, сенга ўхшаб кулди, станица маҳкамасидаги қамоқхонага қамамай жўнатиб юборди. Ўзи камбағалроқ оиласдан чиқсан офицер эди, оддий бир темирчининг бой помешчикни шу қадар шарманда қилгани унга хуш келди. Фақат мени жўнатаётганда насиҳат қилди: «Сен эҳтиёт бўл, казак, тилингни тийиброқ юр, ҳозир шундай замонки, бугун сен тақа қоқаётган бўлсанг, эртага сенинг тўрт оёғингни шундай тақалаб қўйишадики, этап билан то Сибирга етгунингча тайғанмай кетасан. Тушундингми?»— «Тушундим,— дедим,— жаноби олийлари».— «Хўп, жўна, қорангни кўрсата кўрма, Сели-

вановга, роса таъзирини бердим, деб қўяман». Ана, шунаقا ишлар бўлган эди, йигит...

Давидов сўзамол темирчи билан хайрлашмоқчи бўлиб ўрнидан турган эди, аммо темирчи унинг кўйлаги енгидан тортиб, яна ёнига ўтқазди-да, туйқусдан сўраб қолди:

— Шундай қилиб, Хопровларни ким ўлдирганлигини ҳеч қачон билишолмайди дейсанми? Янглишяпсан, йигит. Билиб олишади. Узил-кесил билиб олишади, вақти келиб узил-кесил билиб олишади.

Афтидан чол бир нарсани биладиганга ўхшарди. Шунинг учун ҳам Давидов очигига кўча қолди.

— Сен кимдан гумон қиласан, Сидорович?— дангал сўради у, Шалийнинг оқи қизғиши қора кўзларига синовчан назар билан тикилиб.

Шалий унга қараб қўйиб, чалғитиб жавоб берди:

— Бу масалада, йигит, янглишиб қолиш ҳеч гап эмас...

— Хўш, ҳар қалай-чи?

Энди Шалий иккиланмай қўлини Давидовнинг тиззасига қўйди-да, деди:

— Менга қара, кўмакчим, лафз деган нарса пулдан ҳам қиммат: бирон гасодиф бўлгудек бўлса, мени айтди демайсан. Бўптими?

— Бўпти.

— Бўлмаса, бу ишда ҳам Лукичнинг қўли йўқ эмас. Мен буни сенга узил-кесил айтяпман.

— Ҳе, биро-да-а-ар...— деди ҳафсаласи пир бўлиб Давидов.

— Мен Селивановга «биродар» эдим, сенинг отанг тенгиман,— деб қўйди фижиниб Шалий.— Ахир мен сенга, Хопровлари Яков Лукич чопиб ташлаған, деяётганим йўқ-ку, бу ишда унинг қўли бўлиши керак, деяпман. Агар худо ақлингни кам қилиб яратмаган бўлса, буни тушунишинг керак, йигит.

— Ислоти қани?

— Нима, сен терговчи бўлиб кетганмисан?— ҳазиллашиб сўради Шалий.

— Гапни бир бошладингми, Сидорович, ҳазилга олмай, бир чеккадан ҳаммасини айт. Бекинмачоқ ўйнаб ўтиришимизнинг ҳожати йўқ.

— Терговчиликка ярамас экансан, йигит,— деди Шалий қатъият билан.— Сен жин чалгур ҳовриқмай тургин, мен сенга ҳаммасини айтиб бераман, узилкесил айтиб бераман, сен ҳанг-манг бўлишингни билсанг бўлгани. Мана сен ҳа йўқ, ҳу йўқ, Лушка билан топишиб қолдинг, уни бошингга урасанми? Сенга шу шалақдан бошқа хотин топилмадими?

— Ҳе, бу ишнинг сенга дахли йўқ,— унинг гапини чўрт кесди Давидов.

— Йўқ, йигит бу ишнинг менгагина эмас, бутун колхозга дахли бор.

— Нима учун энди?

Шунинг учунки, сен бу дайди қанжиқ билан топишганингдан бери ёмонроқ ишлайдиган бўлиб қолдинг. Шапкўр бўлиб қолдинг... Яна, сенга дахли йўқ, дейсан. Бу сенинг бошингга келган фалокат эмас, йигит, ҳаммамизнинг, бутун колхознинг бошига келган фалокат. Сен, ҳойнаҳой, Лушка икковимизнинг ошиқ-маъшуқлигимиз ими-жимида, деб ўйласанг керак, ҳолбуки, хутордагилар сизларнинг мирларингдан сирларингача билишади. Мана, биз чоллар ҳам баъзан йифилишиб қолсак, сени офат теккур бу Лушкадан қандай қилиб ажратиб олишни гаплашиб қоламиз. Нима учун бундай қиласиз? Шунинг учунки, Лушкага ўхшаган хотинлар эркакларни ишга ундумайди, аксинча, ишдан алақситади, шу сабабдан биз сендан ташвишланяпмиз... Сен ювош, ичмайдиган, яхши йигитсан, хуллас — унча чакки эмассан, у абраҳ бўлса шундан фойдаланяпти: сенинг бўйнингга миниб олиб, ниқтаётганини ўзинг ҳам биласан, йигит, ниқтагани ниқтаган, яна эл-юртга: «Мен мана шунақаларни миниб олганман!» деб кеккяди. Эҳ, Давидов, Давидов, топган хотининг ярамайди... Бир якшанбада биз чоллар Бесхлебновнинг уйи тагида ўтирган эдик, олдимиздан сен ўтиб қолдинг, Бесхлебнов бобо орқангдан қараб шундай деди: «Бизнинг Давидовни бир тарозида тортиб кўриш керак эди — унинг оғирлиги Лушкагача қанча бўлди экану, ҳозир қанча экан. Лушка уни ярим этидан тушириб элаб олган бўлса ҳам ажаб эмас, бу инсофданмас, чоллар, унга — эланган ун тегиб, биз-

га — кепаги қоладими...» Гапимга ишонасанми, йигит, шу гапларни эшитиб сен учун орим келиб кетди! Нима десанг де, орим келиб кетди. Агар сен менинг устахонамда шогирд бўлганингда, хутордагиларнинг биронтаси ҳам «Финг» деёлмасди, ахир сен бутун хўжалигимизнинг бошисан-ку... Бош деган — ҳазил гап эмас, йигит. Эски вақтда гуноҳ қилиб қўйган казакларни халойиқнинг ичидаги калтаклаётганда айтиладиган бир матал бўлгувчи эди: «Танингга дард тегса ҳам, бошингга гард тегмасин». Бизнинг колхозимизнинг бошига келсак, гард тегмаган деб бўлмайди, унга сал чирк теккан. Бу бош Лушкага суркалиб қора юқтириб олган. Сен биронта дурустроқ қизми ёки беваними топганингда сенга ҳеч ким ҳеч нарса демасди, сен бўлсанг... Эҳ, Давидов, Давидов, кўзингни шапоқ босиб қолибди! Мен шундай деб ўйлайман, сен Лушканинг ишқи-муҳаббати туфайли эмас, виждонинг азобланиб этдан тушяпсан, вижданан азобланяпсан, мен гапнинг узил-кесилини айтяпман.

Давидов темирчилик олдидан ўтган йўлга, тупроқда афанаётган чумчуқларга қаради. Унинг юзи хийла оқаринқираган, пўст ташлаётган ёноқларида кўкимтири доғлар пайдо бўлган эди.

— Хўп, гапни калта қил! — деб ғудирлади у ва Шалийга ўгирилди. — Кўнглим бусиз ҳам беҳузур бўлиб турибди, чол!

— Кайф тарқаётганда кўнгил беҳузур бўлса, одам енгил тортади,— деди гап қистириб Шалий.

Ноқулайлик ва хижолатдан ўзини бир оз ўнглаб олиб, Давидов қуруққина гапирди:

— Сен менга Островновнинг иштирокчи эканлиги ҳақида исбот келтир. Исбот ва фактсиз бу тухматга ўхшаб кетяпти. Островнов сенинг дилингни оғритгани учун унинг фийбатини қиляпсан, факт! Хўш, қандай исботларинг бор? Айт!

— Беҳуда валақлаяпсан, йигит,— жиддий жавоб берди Шалий.— Менинг Лукичга қандай адватим бўлиши мумкин? Меҳнат куни важиданми? Мен бари бир ўз ҳақимни кетказмайман, ҳақимни албатта оламан. Исботим йўқ. Хопровнинг хотинига суиқасд қи-

либ, ўлдираётганларида каравотнинг тагида ётган эмасдим.

Қудратли, яғриндор чол девор орқасидаги шарпага қулоқ солди-да, бирдан енгилгина ўрнидан турди. Бир минутча диққат билан қулоқ солиб, кейин эринчилик билан эран-қаран кир чарм фартуфини бошидан ошириб ечар экан, гапирди:

— Менга қара, йигит, меникига борайлик, бир кружкадан муздек сут ичиб, гапимизни ўша ерда, соя салқинда тугата қолайлик. Қулоғингга айтадиган гапим бор...— У Давидовга энгашди. Унинг қаттиқ шивири хуторнинг яқин қўраларигача эшитилган бўлса керак:— Менинг шайтонваччам қулоқ солиб турганга ўхшайди... У ҳар бир кавакка тиқилиб одамни гаплашгани ҳам қўймайди, қулоғини тутгани тутган. Худойим-эй, бунинг касофатидан кўрган кўргиликлиримнинг сон-саноги йўқ! Ўзи бебош, ялқов, ўтакетган тантиқ, аммо темирчилик ишига уқуви зўр! Шайтонвачча нимага ёпишса ҳамки, уддалайди! Бир чекаси етимча. Шу сабабдан ҳамма қилиқларига чидайман, уни одам қилмоқчиман, ўлиб кетсам орқамда ҳунарими биладиган шогирдим қолсин.

Шалий темирчиликка кириб куядан қорайиб кетган дастгоҳга фартуфини ташлади-да, Давидовга қисқагина: «Кетдик!» деганча уйига қараб йўл олди.

Давидов Шалийдан эшитган ҳамма гаплар тўғрисида ўйлаб кўриши учун тезроқ ёлғиз қолгиси келар, аммо Хопровларнинг ўлдирилишига алоқадор бўлган гап тугамаганлиги учун, айнқу ўхшаб лапанглаб кетаётган темирчининг орқасидан борарди.

Давидов йўл бўйи индамай боришни ноқулай ҳисоблади, шунинг учун сўради:

— Оиланг каттами, Сидорович?

— Ўзиму гаранг кампирим, бутун оиласам шу.

— Фарзанд кўрган эмасмисан?

— Ёшлигимда иккита фарзанд кўрган эдим-у, умрларини бермаган экан, ўлиб кетишиди. Учинчи болани хотиним ўлик туғди, ўшандан кейин бўйида бўлмади. Ёш, соппа-соғ эди-ю, нечукдир пушти қуригандек туғмас бўлди-қолди, вассалом! Нималар қилмадик, қанча уринмадик — ҳеч бир иш чиқмади. Ўша

йиллари хотиним фарзанд тилаб Киевдаги лаврага пиёда борди, бари бир фойдаси бўлмади. Кетаётганида мен унга: «Сен менга ҳароми хохолвачча олиб келсанг ҳам майли» дедим.— Шалий вазминлик билан димоф қоқиб, гапини тугатди:— У мени, яғир аҳмоқ, деб қарғади-да, иконага чўқиниб чиқиб кетди. Баҳордан кузгача юриб, овора бўлиб қайтиб келди. Ўшандан буён мен етим болаларни тарбиялаб, темирчилик ҳунарини ўргатадиган бўлдим. Болаларни ўлгудек яхши кўраман, аммо худо ўзимга ҳеч фарзанд ато қилмади; шундай ҳам бўлар экан, йигит...

Озода меҳмонхона қоронғи, жимжит салқин эди.

Ёпиб қўйилган дарчаларнинг тирқишиларидан сарғиши нур тушиб турарди. Яқинингинада ювилган полдан тошчўп ва сезилар-сезилмас ёвшан ҳиди анқирди. Шалий ҳовурдан нам босган хурмачада ертўладан сут олиб чиқиб, столга иккита кружка қўйди-да, хўрсинди:

— Кампирим полизга равона бўлибди. Қасофатга иссиқ ҳам кор қилмайди. Қандай исботларинг бор, деб сўраяпсанми? Узил-кесил айтаман: Хопровларни ўлдириб кетишган куни эрталаб мен уларни кўргани бордим, Хопровнинг марҳума хотини, ҳар нечук, менинг кумам бўларди. Аммо уйга ҳеч кимни киргизишмаяпти, эшикнинг олдида милиционер турибди, терговчи келишини кутяпти. Мен ҳам зинапоя олдида турдим... Қарасам, зинапоядаги бир из кўзимга таниш кўриняпти... Зинапояга кўп из тушгану, аммо бир изчетроқда, панжарага яқин.

— Сенга унинг нимаси таниш кўринди?— сўради дарҳол қизиқиб қолган Давидов.

— Пошнасидаги нағали. Из яп-янги, кечаси тушган, худди муҳр босгандек, нағали ҳам таниш... Хуторда бундай нагал биргина одамнинг этигига бор эди, шекилли. Танимаслигим ҳам мумкин эмасди, чунки бу — нағални мендан олган эди.

Давидов сути ичилмай қолган кружкани сабрсизлик билан бир четга қўйди.

— Тушунмаяпман. Очиқроқ гапирсанг-чи.

— Бунинг тушунмайдиган жойи йўқ, йигит. Бундан икки йилча муқаддам, яккахўжалик вақтимизда баҳор арафасида бир куни Яков Лукич устахонамга

кириб, бричкасининг филдиракларига чамбарак солиб беришимни илтимос қилиб қолди. «Олиб кела қол, ҳозирча ишим кам», дедим. Олиб келди, устахонамда ярим соатча ўтирди, у ёқ-бу ёқдан ҳангамалашдик. У кетмоқчи бўлиб ўрнидан турди, қўранинг олдида темир-терсакка қизиқиб, уни титкилади, темир-терсакларимнинг ичидаги ҳар хил эски-туски, қақир-қуқирлар бор эди. У инглиз ботинкаларидан суғуриб олинган, бутун пошнани эгаллайдиган иккита эски нағал топиб олди, улар гражданлар урушидан бери ётган эди — менга шундай деди: «Сидорович, мен шу нағалларингни олсан, буларни этигимга қоқаман, бўлмаса, қариб қолганимданми яккаш товонимни сургаб босиб, этигим билан чўқойимга пошна қоқаверишдан зерикиб кетдим». Мен унга: «Ола қол, яхши одамдан расво матоҳни аярмидим, Лукич. Бу нағаллар пўлатдан, агар тушириб қўймасанг ўла-ўлгунингча ҳам соб қи-лолмайсан» дедим. Нағалларни чўнтағига солиб, чиқиб кетди. Бу албатта унинг ёдидан кўтарилиб кетган, менинг бўлса, эсимда турибди. Изда худди ўша нағалнинг аксини кўрдим... Бу менинг дарров шубҳамни ошириди. Бу ерда бу из нима қиласди, деб ўйладим...

— Хўш, ундан кейин-чи? — вазмин суҳбатдошини қистади Давидов.

— Шундан кейин: «Қани Лукич билан учрашиб кўрай-чи, пойафзалларини қандай тутаркан» деб ўйладим. Мен уни, лемех учун темир сўрамоқчи бўлиб иш билан қидириб юргандек, атайлаб излаб топдим, оёғига қарасам, оёғида — пийма! Ўшанда қаттиқ со-вуқ эди. Гап орасида айтган бўлиб: «Ўлдирилганларни кўрдингми, Лукич?» деб сўрадим. «Йўқ, ўликларга, айниқса ўлдирилганларга ўлсан ҳам қараёлмайман,— дейди.— Буни юрагим кўтармайди,— дейди.— Аммо бари бир ҳозир бориб келишга тўғри келади». Мен яна, бошқа гапларнинг орасида айтган бўлиб: «Марҳумни кўрганингга кўп бўлганмиди?» деб сўрайман. «Ҳа, анча бўлди,— дейди,— ўтган ҳафта кўрган эдим. Орамизда шунаقا ёвузлар бор экан! — дейди.— Шундай паҳлавон одамни ўлдиришибди, нима учунлиги но-маълум. Ўзи ювощади эди, ҳеч кимга озор берган эмасди. Лаънатиларнинг қўли синсин!»

Аъзойи баданим титраб-қақшаб кетди! У шу мунофиқона сўзларни айтяпти-ю, мен тиззаларимгача қалтираб, ичимда ўйлаляпман: «Сен ўзинг кечаси ўша ерда бўлгансан, итвачча, агар Хопровни ўзинг чопмаган бўлсанг, биронта қўли эпчилроқ одамни бошлаб олиб боргансан». Аммо мен унга сира ҳам сир бой бермадим, шу йўсинда ажralишдик. Бироқ унинг изини текшириш фикри миямга худди тақаддаги михдек ўрнашиб қолди. У этигидан мен берган совғани тушириб қўйдимикан ё йўқми? Мен унинг лиймасини ташлаб, этигини кийишини икки ҳафтагача кутиб юрдим. Кун бир оз илиб, қор сал-пал эриши билан мен устахонадаги ишимни ташлаб атайи правлениега бордим. Лукич ўша ерда экан, оёғида этик! Бир оздан кейин қўрага чиқди. Мен орқасидан чиқдим. У сўқмоқдан бурилиб омбор томонга қараб кетди. Дарров изига қарадим — нағалларимнинг изи босиляпти, икки йил мобайнида ҳам тушиб қолмабди!

— Сен, лаънати чол, нега ўшанда ҳеч нарса демаган эдинг? Нега тегишли жойга бориб айтмаган эдинг? — Давидовнинг юзига қон қуюлиб кетди. Алам қилганидан фижиниб, столни муштуми билан бир урди.

Аммо Шалий энсаси қотганча уни бошдан-оёқ кўздан кечириб, сўради:

— Сен нима, мени ўзингдан аҳмоқроқ деяпсанми, йигит? Мен буни сендан олдинроқ ўйлаган эдим. Хўш, мен қатлдан уч ҳафта ўтиб кетгандан кейин терговчига айтсам, зинапоядаги изни қаёқдан топардим? Панд еганимча қолаверардим.

— Сен ўша куниёқ айтишинг керак эди! Ярамас қўрқоқ, сен очиқдан-очиқ Островновдан қўрққансан, факт!

— Бу томони ҳам бор,— унинг фикрига қўшила қолди Шалий.— Островнов билан орани бузиш хатарли, йигит... Бундан ўн йил бурун, у ҳали ёшроқ пайтида Антип Грач билан икковлари келишолмай, уришиб кетишиди, Антип ўшанда унинг роса таъзирини берган эди. Бир ойдан кейин кечаси Антипнинг ёзлик ошхонасига ўт кетди. Ошхонаси уйига яқин жойга солинган, ўша кечаси шамол ҳам қулай, ошхонадан ўй томонга қараб эсаётган эди, хуллас, уйни ўт олиб кетди. Бутун

қўра ловиллаб ёнди. Омборлар ҳам омон қолмади. Илгари Антипнинг туппа-тузук уйи бор эди, ҳозир бўлса сомонли лойдан урилган кулбада яшайди. Лукич билан олишсанг шунаقا бўлади. У аллақачонлардаги кекини ҳам кўнглидан чиқармайди, ҳозиргилари тўғрисида гапирмай ҳам қўя қолай. Аммо гап бунда эмас, йигит. Мен ўзимнинг шубҳамни дарров милиционерга айтишга ботинолмадим: ҳеч юрагим бетламади, бундай нағаллар Яков Лукичдагина борлигига қатъий амин эмас эдим. Текшириб кўриш керак эди — чунки гражданлар уруши вақтида хуторимиздагиларнинг ярмиси инглизча ботинка кийиб юради. Бир соатдан кейин Хопровларнинг зинапоясига шу қадар кўп из солиб юборишибдики, туюнинг изини отнинг изидан ажратиб олиш маҳол эди. Ана шунаقا гап, йигит, ҳар томонлама яхшилаб ўйлаб кўрилса, бу унча-мунча жўн иш эмас. Мен бугун сени ўроқ машиналарни кўргани эмас, ҳасратлашгани чақирган эдим.

— Жуда кеч ўйлабсан, ҳафтафаҳам... — деди таъна билан Давидов.

— Ҳали ҳам кеч эмас, сен тезроқ кўзингни очмасанг, ана унда кеч бўлади, мен буни сенга узил-кесил айтяпман...

Давидов бир оз жим тургач, ётифи билан гапиришга тиришиб жавоб берди:

— Менинг тўғримда, Сидорович, менинг ишим тўғрисида сен жуда кўп тўғри гапларни айтдинг, бунинг учун сенга раҳмат. Мен ишимни бошқача олиб боришим керак, факт! Одам янги ишни бирданига олиб кетавермас экан!

— Бу тўғри, — унинг фикрига қўшилди Шалий.

— Ҳўш, сенинг ишингга тайинланган иш ҳақи масаласини ҳам кўриб чиқамиз, бу ишни тузатамиз. Островновни жиноят устида қўлга туширмадикми, энди атрофида овора бўлишимизга тўғри келади. Бу ишга анча вақт керак бўлади. Аммо бу гапларимизни ҳеч кимга айта кўрма. Эшитдингми?

— Унимни чиқармайман! — деб ишонтирди Шалий.

— Яна биронта айтадиган гапинг йўқми? Бўлмаса мен ҳозир мактабга кетаман, мудирда ишим бор.

— Айтаман. Сен узил-кесил Лукеръянинг баҳридан ўт! У сени хароб қиласди, йигит...

— Ҳе, жин урсин сени! — фижинганча хитоб қилди Давидов. — Унинг тӯғрисида шунча гаплашдик, бўлдида. Мен сени суҳбатимизнинг охирида биронта жўяли маслаҳат айтарсан десам, сен яна эски гапни бошлайпсан...

— Сен қизишка, қари одамнинг гапига яхшилаб қулоқ сол. Мен сенга беҳуда гапирмайман, шуни билб қўйки, кейинги пайтларда у сен билангина апоқчапоқлашаётгани йўқ... Агар қоқ пешанамдан ўқ емай десанг, у қанжиқдан узил-кесил воз кеч!

— Мен кимдан ўқ ерканман?

Давидов ишонқирамаганидан қатъият билан қимтилган лаблари илжайди, бироқ Шалий буни сезиб ғазаби қўзиб кетди:

— Сен нега тиржаясан? Ҳозирча тирик юрганинг учун худога шукур қил, кўзи кўр гумроҳ! Тушунолмай гарангман: у нега сен туриб, Макарга ўқ узди экан?

— «У» деганинг ким?

— Ким бўларди, Тимошка Тиртиқ! Ҳайронман, Макарни бошига урадими! Мен сени огоҳлантириб қўйгани чақирган эдим, сен бўлсанг менинг Ваняткамдан баттар тиржаясан.

Давидов беихтиёр чўнтағини ушлаб, кўкраги билан столга ётди.

— Тимошка? У қаёқдан келади?

— Қочиб келган. Қаёқдан келарди бўлмаса?

— Сен уни кўрдингми? — оҳиста шивирлаб сўради Давидов.

— Бугун чоршанбами?

— Ҳа, чоршанба.

— Мен уни шанба куни кечаси сенинг Лушканг билан бирга кўрган эдим. Ўша куни подадан сигиримиз қайтиб келмади, ўша фалокатни қидиргани чиққан эдим. Лаънатини ярим кечага яқин уйга ҳайдаб келаётсам, хуторнинг ёқасида уларга дуч келиб қолдим.

— Сен янглишмадингмикан?

— Тимошканни мен билан адаштириди деб ўйлајсанми? — заҳарханда қилди Шалий. — Йўқ, йигит, чол бўлсан ҳам кўзим ўткир. Улар, молнинг ўзи қо-

ронғида қанғиб юрган бўлса керак, деб ўйлашди шекилли, мен унинг орқасидан келаётган эдим. Хўш, аввал улар мени кўришмади. Лушка: «Вой, қуриб кетгур сигир экан, Тимоша, мен одам деб ўйлабман», дейди. Мен ҳам етиб келдим. Дастлаб у сапчиб турди, унинг кетидан дарров Тимошка ҳам турди. Қулоқ солсам,— затворни шағақлатяпти. Ўзи бўлса индамайди. Хўш, мен уларга осойиштагина «Ўтираверинглар, ўтираверинглар, яхшилар! Сизлар билан ишим йўқ, сигиримни ҳайдаб келяпман, подадан адашиб қолибди...» дейман.

— Хўп, энди ҳаммаси тушунарли,— деди Давидов Шалийдан кўра ҳам ўзига, вазминлик билан скамъдан турди.

У темирчини чап қўли билан қучоқлаб, ўнг қўли билан унинг тирсагини қаттиқ сиқди.

— Ҳаммаси учун сенга раҳмат, қимматли Ипполит Сидорович!

Кечқурун у Шалий билан қилган сухбатини Нагульнов ва Размётновга айтди, хуторда Тимофей Тиртиқнинг пайдо бўлганини дарҳол ГПУнинг район бўлимига маълум этишни таклиф қилди. Аммо бу янгиликни ажойиб бир осойишталик билан қарши олган Нагульнов, эътиroz билди:

— Ҳеч қаерга маълум қилишнинг ҳожати йўқ. Улар бутун ишимизни барбод қилиб қўйишади, холос. Тимошка аҳмоқ эмас, у хуторда яшамайди, район гучиларидан биронтаси пайдо бўлди дегунча дарров жуфтакни ростлаб қолади.

— ГПУдагилар яшириқча, кечаси келишса, у буни қаёқдан билиши мумкин?— сўради Размётнов.

Нагульнов унга хушфеъллик билан кулиб қаради:

— Ақлинг болаларнинг ақлига ўхшайди, Андрей. Ҳамиша овчини олдин бўри кўради.

— Сенда қандай таклиф бор?— деб савол берди Давидов.

— Менга беш-олти кун муҳлат беринглар, сизларга Тимошкани тирикми-ўликми олиб келиб топшираман. Андрей икковларинг кечалари, ҳар қалай, эҳтиёт бўлинглар: квартиralарингдан бемаҳалда чиқманг-

лар, чироқ ёқманглар, сизлардан талаб қилинадиган нарсалар шу. У ёғини менга қўйиб бераверинглар.

Нагульнов ўзининг режаларини муфассал гапириб беришдан қатъян бosh торти.

— Хўп, майли, ишга кириш,— рози бўлди Давидов.— Аммо билиб қўй, агар Тимофеини қўлдан чиқариб юборсанг, кейин ўла-ўлгунимизча ҳам қидириб тополмаймиз.

— Хотиржам бўл, қочиб қутулолмайди,— мулойим жилмайиб ишонтирди Нагульнов ва кўкиш қовоқларини пастга туширди, бир лаҳзагина кўзларида чақнаган учқун ўчди.

XI БОБ

Лушка ҳамон холасиникида яшарди. Сариқ дарчалари майишган, деворлари кўхналиктан қийшайиб ерга чўккан, қўфа томли уй анҳор ўтган жарнинг ёқасидагина қўнқайиб турар эди. Кичкинагина қўрани ўт-ўлан билан бурган босган. Лушканинг холаси Алексеевнанинг хўжалигида сигири билан кичкина полизчасидан бошқа ҳеч нарсаси йўқ эди. Қўрани анҳор томондан иҳота қилиб турган пастаккина четанининг бир жойидан раҳна очиб қўйилган эди. Ўрта яшар уй бекаси ўша ердан қатнаб анҳордан сув ташир, полиздаги карам, бодринг ва помидорларни суғорар эди.

Раҳнанинг олдидаги говтиканнинг қирмизи ва бинафша каллалари мағрур қаққайиб турар, қалин бўлиб кетган наша ўсар, четан бўйлаб қозиқлар орасида қовоқ палаклари чирмашиб ётар, уни қўнгироқдек сариқ гуллар нақш бўлиб безаган, эрталаблари очилаётган кўк карнай гулларнинг мавжиidan товланар, узоқдан аломат бир гиламга ўхшар эди. Бу овлоқ жой эди. Эртасига эрталаб анҳор қирғоғи бўйлаб Алексеевнанинг қўраси олдидан ўтиб кетаётганида Нагульнов худди шу жойни мўлжаллаб қўйди.

Тумови тузалишини кутиб у икки кунгача ҳеч нарса қилмади, учинчи куни қоронғи тушиши биланоқ, пахталигини кийиб, киши билмас кўчага чиқди-да, анҳор томонга тушди. Қоп-қоронғи ойсиз кечада туни

бўйи четан олдидаги наша тагида ётди, аммо раҳна олдига ҳеч ким келмади. Тонгда Макар уйига кетди, бир неча соат ухлаб, кундузи пичан ўроғини бошлаган биринчи бригадага жўнади, қоронғи тушиши билан эса у яна раҳна яқинида ётарди.

Ярим кечада уй эшиги оҳиста фирчиллади. Четанинг тирқишиларидан Макар зинапояга чиққан қора дуррани танғиб ўраган хотин кишининг қорасини кўрди. Макар Лушкани таниди.

Лушка зинапоядан аста-секин тушиб, бир оз турди-да, кейин кўчага чиқиб, тор кўчага бурилди. Макар қадамини оҳиста босиб ундан ўн қадамча берироқда кетмоқда эди. Ҳеч нарсадан хабарсиз Лушка алангламасдан ўтлоқ томонга қараб кета бошлади. Улар хутор ташқарисига чиқишган ҳам эдикӣ, шу пайт лаънати тумов Макарга панд бериб қўйди: у қаттиқ аксириб юборди — дарҳол муккасидан ерга қапишиб олди. Лушка шахт билан орқасига қаради. У қўлларини кўксига босганча, нафаси тиқилиб ҳансираб, бир дақиқача қимирламай серрайиб турди. Лиғчиғи бирдан торлик қилиб қолди, чакка томирларида қон тепа бошлиди. Лушка саросимани енгиб, хавотир билан майдага йўргалаганча Макарга қараб келди. У тирсакларини тираганча ерда ётар, Лушкани ер остидан кузатар эди. Лушка уч қадамча нарида тўхтаб, бўғиқ овоз билан сўради:

— Кимди?

Тўнқайиб турган Макар индамай бошини пахталигининг бари билан яширмоқда эди. Лушка уни таниб қолишини мутлақо истамас эди.

— Вой, ўлай! — қўрқиб кетиб шивирлади Лушка ва хуторга қараб чопди.

... Тонгга яқин Макар Размётновни уйғотди, скамейкага ўтираётиб тундлик билан гапирди:

— Бир марта аксириб, бутун ишни расво қилиб қўйдим!.. Ёрдам бер, Андрей, бўлмаса Тимошкани қўлдан чиқариб юборамиз!

Ярим соатдан кейин улар иккови қўш отли арава-да Алексеевнанинг қўрасига етиб келишди. Размётнов отларнинг тизгинини четанга боғлаб, ҳамроҳидан олдин зинапояга чиқди-да, қийшиқ эшикни тақиллатди.

— Ким? — сўради уй бекаси уйқусираб.— Ким керак?

— Тур, Алексеевна, сигир соғадиган маҳал бўлди,— дадил гапирди Размётнов.

— Кимсан?

— Менман, Совет раиси, Размётновман.

— Қаллаий саҳарлаб нима жин уриб изғиб юрибсан?— деди норозилик билан хотин.

— Иш бор, эшикни оч!

Эшикнинг илгаги шарақлади, Размётнов билан Нагульнов ошхонага киришди. Хотин наридан-бери кийиниб, индамасдан чироқни ёқди.

— Квартирантканг уйдами?— Размётнов кўзлари билан меҳмонхона эшигини имо қилди.

— Уйда. У сенга саҳар мардондан нима учун керак бўлиб қолди?

Размётнов жавоб бермай эшикни тақиллатиб баланд овоз билан гапирди:

— Ҳой, Лукерья! Тур ўрнингдан, кийин. Ҳарбийчасига беш минутда отланиб бўласан!

Лушка яланғоч елкасига рўмол ташлаганча оёқ яланг чиқди. Қора магиз оқиши болдирларида ички юбкасининг уқаси оппоқ бўлиб турарди.

— Кийин,— буюрди Размётнов таъна билан бошини чайқаб:— ақалли устки юбкангни кийиб чиқмайсанми... Ўлгудек беҳаё жувонсан-да!

Лушка келганларни туスマол ва диққат билан кўздан кечириб, очилиб жилмайди:

— Бу ердагиларнинг ҳаммаси ўзимизга тегишли одамлар-ку, кимдан тортинишим керак?

Ҳатто уйқули юзи билан ҳам қизлардек дуркун ва сўлим эди, бу лаънати Лушка! Размётнов жилмайиб, завқини яширмай сўзсизгина унга суқланиб боқар эди. Макар печкага суюниб турган бека хотинга мижжака қоқмай қаттиқ тикилмоқда эди.

— Нима важдан келдинглар, қимматли меҳмонлар?— сирғилиб тушаётган рўмолни Лушка елкасини карашма билан қимирлатганча тузатиб қўйди.— Одам ҳодис, сизлар Давидовни қидириб юрганларинг йўқми?

Энди у сурбетларча намойишкорона илжайиб, чақ-

наган шўх кўзларини мағрур сузганча, собиқ эри билан кўз уриштиromoқчи бўлиб турар эди. Аммо Макар унга ўғирилиб вазминлик билан хотиржам қаради-да, сўзларни ўшандай вазминлик ва хотиржамлик билан салмоқлаб жавоб берди:

— Йўқ, биз сенинг уйингдан Давидовни эмас, Тимофеј Тиртиқни қидирияпмиз.

— Уни бу ердан қидириш керак эмас,— деди сурбетлик билан Лушка, аммо нечукдир сесканиб елкаси қалтираб кетди.— Уни совуқ юртлардан қидириш керак, менинг лочингнамни сизлар ўша ёқларга жўнатиб юборгансизлар, ҳайдаб юборгансизлар...

— Ўзингни гўлликка солма,— деди ҳамон ўшандай хотиржамлик билан, ўзини тийиб турган Макар.

Макарнинг Лушка учун сира ҳам кутилмаган бу хотиржам осойишталиги унинг жинини қўзитди, у баланд келмоқчи бўлди:

— Бугун кечаси хутор ташқарисига чиқиб кетаётганимда изимдан қувган сенмасмидинг, эргинам?

— Ҳар қалай танибсан-да?— Макарнинг лабларида сезилар-сезилмас заҳарханда кўринди.

— Йўқ, қоронғида таниёлмадим, ўтакамни ёриб юбординг, ўргилай! Югурга-югурга хуторга келганимдан кейингина, сен эканлигингни фаҳмладим.

— Шундай довюрак абллаҳ нега қўрқасан?— қўполлик билан сўради Размётнов, Лушканинг қитиқловчи кўрки туфайли пайдо бўлган маҳлиёликка жўрттага қўполлик билан барҳам беришга тиришиб.

Лушка қўлларини биқинига тираб, унга еб юборгудек бўлиб ўқрайди:

— Сен мени абллаҳ дема! Сен бу сўзни Маринканга бориб айт, ажаб эмаски, Демид Индамас абжагингни чиқарса. Менга озор бериш осон, менинг ёнимда ҳимоячиларим йўқ...

— Ҳимоячиларинг керагидан ортиқ,— заҳарханда қилди Размётнов.

Аммо Лушка унга заррача ҳам эътибор қилмай, Макардан сўради:

— Нега орқамдан кетаётган эдинг? Мендан муддаонг нима? Мен дориламон қушман, қаёққа учсам шу ёққа учавераман. Агар ёнимда ёrim Давидов кетаёт-

ган бўлса, изимизда изғиб юрганинг учун ундан яхшилик кўрмасдинг!

Макарнинг оқариб кетган ёпоқлари остида қаттиқ тугунлар ўйнади, аммо у бутун иродасини йифиб, ўзини тийиб олди, индамади. Ошхонада унинг мушт бўлиб қисилган бармоқлари қирсиллагани аниқ эшитилди. Размётнов хавфли томонга бурилиб кетаётган суҳбатни тугатишга ошиқди:

— Шунча гаплашдик, бас! Қани, отланинглар, сен ҳам Лукерья, сен ҳам, Алексеевна. Сизлар қамоққа олиндинглар, ҳозир сизларни районга олиб борамиз.

— Нима учун энди? — суринтириди Лушка.

— Ӯша ерда биласан.

— Борди-ю, бормасам-чи?

— Оёқларингни худди қўйдек боғлаймиз-у, олиб кетаверамиз. Тепингани ҳам қўймаймиз. Қани, бўл!

Лушка бир неча секунд иккиланиб турди-да, кейин тисарила бориб чаққонлик билан эшикдан ичкарига кириб кетди, уни ёпиб ичкарисидан илгагини солмоқчи бўлди. Аммо Макар вақтни бой бермай эшикни унча куч сарф қилмасдан юлқиб очди-да, меҳмонхонага кириб, овозини кўтариб огоҳлантириди:

— Сен билан бирор ҳазил-мазақ ўйнаётгани йўқ! Кийин, қочишини хаёлингга ҳам келтирма. Мен сенинг кетингдан қувиб ҳам юрмайман, сен аҳмоққа ўқ етиб олади. Тушундингми?

Лушка ҳарсиллаганча ғижим тўшакка ўтириди.

— Чиқиб тур, мен кийинаман.

— Кийинавер. Уялишингнинг ҳожати йўқ: мен сенинг минг оҳангда кўрганман.

— Хўп, жин урсин сени,— деди ғижинмай, бўшшиб Лушка.

У кечасилик кўйлаги билан юбкасини ечиб ташлаб, яланғоч ҳолда жувонларга хос кўрки билан савлат тўкканча bemalol юриб сандиқ томонга ўтди-да, уни очди. Макар унга қарамас, лоқайд ва ҳаракатсиз нигоҳи деразага тикилган эди...

Беш минутдан кейин оддийгина чит кўйлак кийган Лушка:

— Мен отланиб бўлдим, Макарушка,— деди. У

Макарга ювош бўлиб қолган ғамгинроқ кўзлари билан қаради.

Ошхонада, кийинган Алексеевна сўради:

— Уйни кимга қолдираман? Сигирни ким соғади? Полизга ким қарайди?

— Буни биз ўз зиммамизга оламиз, холажон, сен қайтиб келгунингча ҳамма ёқ ҳозирдагидек саранжом-саришта бўлади,— тинчтди уни Размётнов.

Улар қўрага чиқиб, аравага ўтиришди. Размётнов тизгинни қўлига олиб қамчинни жаҳл билан силтадида, отларни қаттиқ елдириб кетди. У қишлоқ совети олдида тўхтаб аравадан сакраб тушди.

— Қани, ойимчалар, тушинглар!— Дастрлаб ўзи йўлакка кириб, гугурт чақди-да, қоронги ҳужранинг эшигини очди.— Ичкарига кириб, жойлашинглар.

Лушка сўради:

— Районга қачон борамиз?

— Тонг отсин, борамиз.

— Нега бўлмаса бу ерга яёв олиб кела қолмай, аравада олиб келдинглар?— деб суриштиришини қўймасди Лушка.

— Савлат учун,— жилмайди қоронғиликда Размётнов.

Чунки у ҳар нарсани билгиси келаверадиган бу хотинларга асл муддаоларини айтиши мумкин эмас эди-да, уларни қишлоқ советига келаётганларида йўлда битта-яримта кўриб қолишини истамаганликлари учун аравада олиб келишган эди.

— Бу ерга экан, пиёда келаверсак ҳам бўлар эди,— деди Алексеевна ва чўқиниб ҳужрага кирди.

Ҳазин ҳўрсиниб Лушка ҳам индамай унинг орқасидан кирди. Размётнов ҳужрани қулфлади, шундан кейингина баланд овоз билан хитоб қилди:

— Лукеръя, менга қара: сизларни едириб-ичириб турдикан, эшикдан чап томондаги бурчакда ҳар хил ҳожатлар учун пақир турибди. Шовқин солмай, эшикни дукиллатмай хотиржам ўтиришларингни илтимос қиласман, бўлмаса, худо ҳақи, қўл-оёқларингни боғлаб, оғизларингга латта тиқамиз. Масала жиддий. Ҳўп, ҳозирча хайр! Мен эрталаб келиб хабар оламан.

Иккинчи қулфни қишлоқ советининг кўча эшиги-

га солди-да, зинапояда кутиб турган Нагульновга гапирди — унинг овозида илтижо оҳанги сезилди:

— Мен уларни бу ерда уч сутка ушлаб турман, ундан ортиқ ушлаб туролмайман, Макар. Билганингни қил, борди-ю, Давидов билиб қоладиган бўлса — икковимиз ҳам балога қоламиз!

— Билмайди. Отларни олиб бориб қўйиб, кейин муваққат маҳбусаларга бирон егулик нарса олиб кел. Хўп, раҳмат, мен уйга кетдим...

... Йўқ, тонг олдидағи кўкиш қоронгиликда Гремячий Логнинг бўм-бўш тор кўчаларида кетаётган илгариги азамат ва адл қомат Макар Нагульнов эмас эди... У ғамгин мунқайиб, бошини қуи солганча, аҳён-аҳёнда каттакон кафтини кўкрагининг чап томонига боса-боса сургалиб кетмоқда эди...

* * *

Давидовнинг кўзига кўринмаслик учун Нагульнов кундузларини пичан ўроғида ўтказиб, хоторга кечқурун қайтиб келарди. Иккинчи куни кечқурун пистирмага боришидан олдин Размётновнинг олдига келиб сўради:

— Мени Давидов қидиргани йўқми?

— Йўқ. Уни ўзим ҳам кўрганим йўқ. Икки кундан бери анҳордаги кўприкни тузатяпмиз, қиладиган ишим кўприкда бўлишу, маҳбусаларимиздан югуриб бориб хабар олиб келиш.

— Улар қалай?

— Кеча кундузи Лушка ёмон қутурди! Эшикка яқинлашсам — менга ҳар бало отларни тақади. Аммо лаънати маст казакдан ҳам баттар сўқинади! Бунақа ҳикматларни қаёқдан ўрганиб олди экан? Аранг ти-йибман. Бугун тинчиб қолди. Йиғлаити.

— Йиғлайверсин. Ҳадемай аза тутади.

— Тимошка қорасини кўрсатмас,— гумонсиради Размётнов.

— Келади!— Нагульнов мушти билан тиззасига урди, уйқусиз тунлардан салқиган кўзлари чақнаб кетди.— Лушкадан кўнгил узиб қаёққа кетарди? Келади!

—... Дарҳақиқат, Тимофей келди. Эҳтиёткорликни унутиб, учинчи куни кечаси соат иккиларга яқин у раҳна олдида пайдо бўлди. Уни хоторга рашк ҳайдаб ҳелдимикан? Еки очликми? Эҳтимолки, иккаласи ҳамдир, ҳар қалай, у сабри чидамай келди...

У анҳор томондаги сўқмоқдан худди йиртқич ҳайвондек сассизгина биқиниб келди. Макар унинг оёқлари остида кесак шитирлаганини ҳам, қуруқ бурган шохи қирсиллаганини ҳам эшитмади, ўзидан беш қадам нарида бирдан олдинга энгашганроқ одамнинг қораси пайдо бўлар экан, Макар бехосдан сапчиб тушди.

Ўнг қўлида милтиқ ушлаган Тимофей қимиrlамай сергаклик билан қулоқ солиб туради. Макар нафас олмай наша орасида ётарди. Юраги бир лаҳзагина қаттиқ уриб, кейин яна бир маромда тепа бошлади, аммо оғзи қақраб тахир бўлиб кетди.

Анҳор томонда чуриллаб мошак сайради. Хоторнинг бир четида сигир маъради. Анҳор орқасидаги аллақайси пичанзорда бедана янгроқ овоз билан сайрай кетди.

Макар учун отиш қулай эди: Тимофей гавдасини ўнгга буриброқ унга чап томонини тутганча ҳамон эҳтиёт билан ниманидир тинглаб туради.

Тирсагидан букилган чап қўлига Макар оҳистагига наған милини қўйди. Паҳталигининг енги шудрингдан ҳўл бўлган эди. Макар бир лаҳзагина ҳаяллади. Йўқ, Нагульнов аллақандай аblaҳ кулакларга ўхшаб душманга орқаворатдан ўқ узмайди! Макар қимиrlамай турганича, баланд овоз билан хитоб қилди:

— Ажалга юзингни ўгир, газанда!

Худди трамплин кўтариб ташлагандай Тимофей олдинга қараб четга сакради. Милтигини ўқталди-ю, аммо Макар чаққонлик қилиб қолди. Намхуш сўкунатда нағандан отилган ўқнинг овози унча қаттиқ янгра-май, бўғиққина эшитилди.

Милтиқни тушириб юбориб тиззалири букилганча Тимофей аста-секин, Макарнинг назаридаги, чалқанчасига йиқилиб тушгандек бўлди. Макар унинг заранг сўқмоқца орқаси билан залварли гурсиллаб тушганини эшилди.

Макар яна ўн беш минутча қимирламай ётди. «Бир хотинга тўп-тўп бўлиб келишмайди, эҳтимол, анҳор бўйида дўстлари яшириниб уни кутишаётгандир?»— деб ўйларди у қулоғини ниҳоятда динг қилиб. Аммо чор атрофда сукунат ҳукм сурарди. Ўқ отилгандан кейин индамай қолган мoshак, бўлиб-бўлиб журъатсизгина яна чуриллай бошлади. Суръат билан тонг яқинлашиб келмоқда эди. Тим кўк осмоннинг шарқий уфқидаги энсизгина қизғишилик кенгайиб, ёйилиб бормоқда. Анҳор орқасидаги толларнинг шох-бutoқларини ҳам кўз илғайдиган бўлиб қолди. Макар ўрнидан туриб, Тимофейнинг олдига борди. У ўнг қўлини чўзиб юборганча чалқанча ётарди. Унинг қотиб қолган, аммо ҳали жилосини йўқотмаган кўзлари бақрайиб туради. Улар бу ўлик кўзлар сўниб бораётган хира юлдузларни ҳам, тиккада таралиб бораётган, ости кумушнамо тусдаги қўнғир булутни ҳам, енгилгина ҳарир туман ҳовури қоплаган бепоён осмон сатҳини ҳам гўё завқдан лол бўлиб ҳайрат билан томоша қилаётгандек эди.

Макар ўликни этигининг учи билан итариб кўриб, оҳиста сўради:

— Хўш, ўйнаб-ўйнаб муродингга етдингми, ярамас?

Ўлик бўлса ҳам кўркам эди бу хотин-халажнинг эркатойи ва арзандаси. Қуёш тегмаган оппоқ ва мусаффо пешанасига бир тутам қора сочи тушиб ётар, лўппи юзи енгилгина ним пуштилигини йўқотиб ултurmagan, қора мўйлов майсаси босган, чўччайтан юқори лаби бир оз кўтарилиб, йилтироқ тишларини кўрсатиб туар, бундан бир неча кунгина бурун Лушкани ютоқиб ўпган кўркам лабларига ҳайратли табасум шарпаси яширган эди. «Анча эт қўйибсан, йигит!»— деб ўйлади Макар.

Ўликни бамайлихотир кўздан кечираётган Макар ҳозир яқингинадаги қаҳрини унугташ, ўзини мамнун ҳам ҳис қилмас, диққат ва ҳорғин эди, холос. Уни узоқ кунлар ва йиллар давомида ҳаяжонлантирган нарсаларнинг ҳаммаси, юрагини қизғин қондан жўшдириб, алам, рашк ва дарддан титратган нарсаларнинг ҳамма-ҳаммаси Тимофейнинг ўлими билан бирга ҳозир

аллақаёқдаги йироқларга қайтмас бўлиб кетган эди.

У ердан милтиқни олди, ҳазар билан ижирғаниб чўнтақларини тинтиди. Пиджагнинг чап чўнтағини пайпаслаб ғадир-будур «лимонча» граната топди, ўнг чўнтағида тўртта милтиқ патронлари обоймасидан бошқа ҳеч нарса йўқ эди. Тимофейнинг ҳеч қандай ҳужжати йўқ эди.

Кетишдан олдин Макар ўликка охирги марта қаради ва шундагина унинг устидаги каштали кўйлаги янгиана ювилганини, сабза ранг шимининг тиззалари — афтидан хотин кишининг қўли билан бўлса керак — пухта қилиб ямалганини қўрди. «Афтидан, у сени дурустгина боқиб парвариш қилганга ўхшайди», — алам билан ўйлади Макар, раҳнага аранг оёқ қўяркан.

Жуда барвақт бўлишига қарамай, Размётнов Макарни эшик олдидаги қарши олди, унинг қўлидаги милтиқ, патронлар ва гранатани оларкан, мамнуният билан гапирди:

— Демак қулатдингми? Довюрак йигит эди, бехавотир яшарди... Мен сенинг ўқ узганингни эшишиб, ўрнимдан туриб кийиндим. Югуриб бормоқчи эдим, қарасам — ўзинг келяпсан. Анча енгил тортдим.

— Менга қишлоқ советининг калитини бер, — илтимос қилди Макар.

Размётнов нима эканлигини фаҳмласа ҳам, сўради:

— Лушкани чиқариб юбормоқчимисан?

— Ҳа.

— Бекор қиласан!

— Ишинг бўлмасин! — деди бўғиққина Макар. — Мен уни бари бир яхши кўраман, ярамасни...

У калитларни олиб индамай бурилди-да, этикларини сургаб босганча қишлоқ советига қараб кетди.

* * *

Қоронги йўлакда Макар қулфнинг оғзини дарров топа қолмади. Ҳужра эшигини очгаҳ, секингина чақирди:

— Лукерья! Бу ёққа чиқ.

Бурчакда похол шитирлади. Лушка чурқ этмай остонага келиб, эринчоқлик билан бошидаги оқ дуррасини тузатди.

— Зинапояга чиқ.— Макар четланиб унга йўл берди.

Зинапояда Лушка қўлларини орқасига қилиб, индамай панжарага суюнди. Суюнчиқ қидирдимикан? Индамай кутиб турди. У ҳам худди Андрей Размётновга ўхшаб туни билан ухламаган, тонгда бўғиқ ўқ овозини эшитган эди. Афтидан ҳозир унга Макар нимани айтишини фаҳмлаган бўлса керак. Унинг ранги ўчган, чуқур тушган қуруқ қўзларида Макарга таниш бўлмаган янги бир ифода яширинган эди.

— Мен Тимофейни ўлдирдим,— деди Макар унинг азоб чеккан қора қўзларига тик боқиб, аммо назари беихтиёр равишда шу қадар қисқа фурсат ичида — икки куннинг ичидаёқ Лушканинг эҳтиросли, серистигно дудоқлари четидан умрбод ўрин олган аламли ажиниларга кўчди.— Ҳозир уйингга бориб лаш-лушларингни бўғчага туг-да, хотордан бутунлай жўнаб қол, бўлмаса аҳволинг ёмон бўлади... Сени суд қилишади.

Лушка индамай туради. Макар хижил бўлиб ҳовлиққанча чўнтакларидан ниманидир қидирди. Сўнгра аллақачонлардан бери ювилмай кирдан қорайиб кетган, ғижимланган уқали дастрўмолни кафтида узатди.

— Бу сеники. Мендан чиқиб кетганингда қолган экан... Ол, бу энди менга керак эмас...

Лушка совуқ бармоқлари билан дастрўмолни ғижим кўйлагининг енгига тиқиб қўйди. Макар нафасини ростлаб, гапирди:

— У билан видолашмоқчи бўлсанг — қўраларингнинг олдида, раҳнанинг тагида ётибди.

Улар бир-бирлари билан энди ҳеч қачон учрашмайдиган бўлиб индамай ажралишди. Макар зинапоя босқичларидан тушаётиб, унга бепарволик билан бош ирғаб қўйди. Лушка эса уни қўзлари билан кузатиб қоларкан, узоқ тикилиб, мағрур бошини таъзим билан қўйи эгди. Ҳамиша шиддатли ва бир оз одамовироқ бу одам ҳаётларидаги охирги учрашув пайтида кўзига бошқачароқ бўлиб қўриндимикан? Ким билади...

Очиқ жазирама кунлар қуруқ водийлардаги пи-чанларни ҳам етилтириб юборди, даштдаги пичан ўроғига ниҳоят Гремячий колхозининг охириги, учинчи бригадаси ҳам киришди. Бу бригаданинг ўроқчилари даштга жума куни эрталаб чиқиб кетишиди, шанба қуни кечқурун эса Давидовнинг квартирасига Нагульнов кириб келди. Худди сўнгги кунларда қариб қолгандек, мункайган, соқоли ўсиб кетган Нагульнов анчагача индамай ўтирди. Унинг қора тук босган тик энгагида Давидов илк марта мўйсафидлик қировининг жилосини кўрди.

Мезбон ҳам, меҳмон ҳам ўн минутча индамай чекиб ўтиришиди, бу вақт ичида биронталари ҳам чурқ этишмади, ҳеч қайсилари ҳам олдин сўз бошлагилари келмас эди. Аммо кетар олдидан Нагульнов сўраб қолди:

— Любишкиннинг ҳамма одамлари ўроққа чиқиб кетдимикан, сен текширмадингми?

— Кимларни ажратган бўлсак ҳаммаси чиқиб кетган, нима эди?

— Сен эртага эрталабдан унинг бригадасига бориб ишлари қай йўсиндалигини кўрсанг бўларди.

— Жўнашлари биланоқ дарров бориб текширамизми? Барвақт эмасми?

— Эртага якшанба.

— Хўш, якшанба бўлса нима бўпти?

Нагульновнинг қурғоқ лабларида сезилар-сезилмас заҳарханда кўринди.

— Унинг бригадасидагиларнинг ҳаммаси черков афюнинга мубтало бўлган диндорлар, хотин зотидан бўлганлари айниқса мубтало. Жўнашга-ку жўнаб кетишиди-я, аммо байрам куни ўла қолишса ҳам ўришмайди! Қараб тур, хотин-халаждан битта-яримтаси Тубянской черковига жўнаб қолса ҳам ажаб эмас, вақт бўлса ғанимат, об-ҳаво ҳам панд бериб қўйиши мумкин. Ана унда хашак эмас, итнинг тагига тўшайдиган поҳол ўрамиз.

— Дуруст. Мен эрталаб барвақтроқ бориб текшириб келаман. Ҳеч кимнинг ишни ташлаб кетишига

йўл қўймайман! Огоҳлантирганинг учун раҳмат. Сенинг гапингга қараганда, нега фақат Любишкиннинг одамларигина ҳаммаси диндор?

— Ҳўш, бу матоҳ бошқа бригадаларда ҳам етиб ортади-ю, аммо учинчиде сероброқ.

— Тушунарли. Сен эртага нима иш қилмоқчисан? Биринчига бориб кела қолсангмикан?

Нагульнов истар-истамас жавоб берди:

— Мен ҳеч қаёққа бормайман, бир неча кун уйда ётаман. Аъзойи баданим ланж... Худди уч каррадан калтакланиб, беш каррадан эзғилангандайман...

Гремячий ячейкасида шу нарса одат ҳукмига кириб қолган эдики, дала ишлари вақтида ҳар бир коммунист далада бўлиши керак эди. Одатда далага райкомдан кўрсатма олинмасидан анча бурун чиқиб кетар эдилар. Бу гал ҳам Нагульновнинг бригадалардан биронтасида ҳозир бўлиши зарур эди-ю, аммо Давидов ўртоғининг аҳвол-руҳиясини яхши тушунганилиги учун шундай дея қолди:

— Майли, уйингда қола қол, Макар. Шундай қилганимиз дурустроқ ҳам шекилли: ахир раҳбарлардан биронтаси ҳар эҳтимолга қарши хуторда бўлиши керак-ку.

Охирги жумлани Давидов Макарга очиқ тарзда ҳайриҳоҳлик билдиrolмаганлиги учунгина айтди. Нагульнов ҳам гўё шу нарса учунгина келгандек ҳайрлашмасдан чиқиб кетди. Аммо бир дақиқадан кейин хонага қайтиб кириб, гуноҳкорона кулди:

— Эсим киравли-чиқарли бўлиб қолибди, ҳайрлашиш ҳам эсимдан чиқибди. Любишкиннинг олдидан қайтиб келганингдан кейин менга келиб гапириб бер, у ерда диндорлар қандай яшашётган экан, кўзлари қаёқда экан: отларнинг оёқлари тагидами ёки Тубянской черковининг тепасидаги бутдами. Сен ўша чўқинган тентакларга айтиб қўй, Исо қадимги одамлар-гагина очарчилик йили, шунда ҳам қанча замонлардан бери атиги бир мартагина осмондан манная ёрмаси ёғдирган, казакларга қишлиқ хашак тайёрлаб бермайди, унга ишониб юришмасин! Хуллас, у ерда динга қарши пропагандани бор бўйича йўлга қўй! Бундай пайтларда хусусан нималарни гапириш керак-

лигини ўзинг ҳам биласан. Афсуски, сен билан бирга кетаётганим йўқ-да, бўлмаса динга қарши ишда мен сенга катта фойда етказишим мумкин эди. Ҳар қалай, мен унча ўткир нотиқ эмасману, аммо, оғайнини, менинг муштим ҳар қандай мунозарада иш бериб қолади, Бир мартағина тушириб қўйсам, рақибим эътиroz билдиrolмай қолади, чунки тикка туриб эътиroz билдиргани дуруст, чўзилиб ётганча эътиroz билдириб бўларканми? Чўзилиб ётиб айтилган эътиrozлар инобатга олинмайди!

Нагульнов бирдан жонланиб, хушчақчақ қўзларини чарақлатди-да, шундай деди:

— Кел, Сёма, мен ҳам сен билан бирга бора қолай! Бир бало бўлиб диний англашилмовчилик баҳо-насида хотин-халаж билан ораларингда ишкал чиқиб қолгудек бўлса, мен сенга жуда ҳам асқатишим мумкин. Сен бизнинг хотин-халажни биласан-ку: улар сени баҳорда аввал чала чўқишган бўлса, энди албатта чўқий-чўқий ўлдиришади. Мен бўлсан жонингга ора кираман! Мен бу иблисваччаларга қандай муомала қилишни яхши биламан!

Ўзини кулиб юборишдан аранг тийиб Давидов чўчиганча қўлларини силтади:

— Йўқ, йўқ! Нима деяпсан! Менга сенинг ҳеч қандай ёрдаминг керак эмас, ўзим эплайман! Балки беҳуда хавотир олаётгандирсан? Халқ коллективлаштиришнинг дастлабки ойларидагига қараганда анчагина онгли бўлиб қолган, факт! Сен бўлсанг, Макар, эски андоза билан ўлчаяпсан, буниси ҳам — факт!

— Ўзинг биласан, борсам ҳам бўлади, бормасам ҳам бўлади. Сенга иш бериб қоларман, деб ўйлаган эдим, агар сен шунаقا мағрур қаҳрамон бўлсанг — ўзинг эплайвер.

— Сен хафа бўлма, Макар,— деди ён босиб Давидов.— Сен диний хурофотларга қарши курашга ярамас экансан, аммо бу соҳада чатоқ иш қилиб қўйишинг, эҳ-ҳа, жуда чатоқ иш қилиб қўйишинг мумкин экан!

— Бу масалада сен билан тортишишни истамайман,— деди Нагульнов қуруққина.— Қўзингга қара, панд еб юрма! Сен бу кечаги хусусий мулкчиларнинг

оғзига анқайишга ўрганиб қолгансан, мен бўлсам, уларни паргизанлик виждоним амр этганидек ташвиқот қиласан. Хўп, мен кетдим. Яхши қол!

Улар худди анчагача кўришмайдигандек эркакчасига қаттиқ қўл сиқишиши. Нагульновнинг қўли тошдек қаттиқ ва совуқ, яқингинада шўх чақнаб турган кўзларида яна изҳор этилмаган, сир тутилган бир дард намоён бўлди. «Ҳозир унинг аҳволи оғир...»— деб ўйлади Давидов ачиниш ҳиссини базур енгиб.

Эшикнинг қабзасини ушлаганча Нагульнов Давидовга ўгирилди, аммо унга эмас четроққа қараб турарди, гапира бошлаганида ҳам овозида енгил хирқириқ пайдо бўлди.

— Менинг собиқ рафиқам, сенинг жононинг хутордан аллақаёққа чиқиб кетди. Эшигдингми?

Лушканинг бир неча кун муқаддам Гремячий Лог билан, ўзига қадрдан таниш жойлар билан умрбод видолашганидан сира ҳам хабарсиз Давидов ҳангманг бўлиб, ишонч билан деди:

— Бундай бўлиши мумкин эмас! У ҳужжатсиз қаёққа кета оларди? Холасиникида, Тимофеј ҳақидаги гап-сўзлар бости-бости бўлишини кутиб ётгандир. Дарҳақиқат, одамларга қандай юз билан кўринади. Тимофеј важида иши хунукроқ бўлиб чиқди..

Макар кулиб қўйди. «Мен билан сенинг важимиздан иши чиройлироқ чиққанмиди?» демоқчи ҳам бўлди-ю, аммо бошқа гапни айтди:

— Паспорти қўлида эди, хутордан чоршанба куни чиқиб кетди, мен сенга гапнинг анигини айтяпман. Тонгда катта йўлга чиқиб олганини ўзим кўрдим, қўлида тугунча, кийимлари бўлса керак, тепада бир оз туриб хуторга бир қараб қўйди-да, кўздан гойиб бўлди алвасти! Холасидан, Лукерья қаёққа қараб равона бўлди, деб суриштирдим. Аммо холаси ҳеч балони билмас экан. Лукерья унга, бошим оққан томонга кетаман, деганиш. Вассалом. Бу лаънати шалоқнинг оқибати келиб-келиб шундай бўлди...

Давидов индамасди. Илгари Макардан хижолат бўлиб, уялиб юрарди, уни яна шу туйғу чулғаб олди. Лоқайд кўринишга тиришиб, ўзи ҳам Макарнинг юзига қарамай, четга тикилганча оҳиста гапирди:

— Хўп, оқ йўл тилаймиз! Унга ҳеч ким ачин-майди.

— У умри бино бўлиб бироннинг ачинишига муҳтож бўлган эмас, аммо ҳар хил ишқ-муҳаббат важида Тимошка сен билан икковимизни йўлда қолдириб кетди, оғайни. Буниси, сенинг таъбиринг билан айтсак, факт! Хўш, нега бурнингни жийирасан? Ёқмаяптими? Бу иш менга ҳам унча ёқмайди, оғайни, аммо ҳақиқатдан қочиб қутула оласанми! Сен билан менинг Лукеръяни қўлдан чиқариб юборишимиз ҳеч гап эмас эди. Нима учун? Шунинг учунки, у шундай бир хотин, шайтондан ҳам баттар, хотин эмас! Уни жаҳон революциясининг дардида куйган деб ўйлайсанми? Ула қолса ҳам куймас! У колхозларни ҳам, совхозларни ҳам, Совет ҳокимиятининг ўзини ҳам бошига урмайди! Унга фақат сайилгоҳларга бориш, камроқ ишлаш бўлса, кўпроқ ликилласа, унинг бутун партиясиз программаси ана шундан иборат! Бундай хотинни ёнингда тутадиган бўлсанг — қўлларингни қора мойга булғаб унинг юбкасига шартта ёпишиб, кўзингни чиртта юмиб, бутун ёруғ дунёни эсингдан чиқариб юборишинг керак. Мен ўйлайманки, сал мудраб кетсанг борми, бамисоли заҳарли илон пўстини ташлаб чиққанидек, у ҳам дарров юбкасидан сирғилиб чиқиб, ширяланғочлигича саийлгоҳга физиллаб қолади. Худою худоваччаларнинг қаҳрига учраган бу Лукеръя шунаقا! Шунинг учун ҳам Тимошкага ёпишиб олган эди. Тимошка гармонини кўтарганича хуторда ҳафталаб изғигувчи эди, менинг квартирамнинг рўпарасида айланарди, бу орада Лушкани дағ-дағ титроқ тутиб, шўрлик менинг ўйдан чиқиб кетишимга маҳтал бўларди. Сен билан икковимиз бу ликконгбозни нима илинж билан ушлаб турошлишимиз мумкин эди? Уни деб революция билан кундалик совет ишимиздан воз кечишимиз керакмиди? Шериклик пул йиғиб трёхрядка гармонь сотиб олишимиз керакмиди! Бу ҳалокатнинг ўзи. Ҳалокат билан буржуазияча айнишнинг ўзи! Йўқ, биринчи дуч келган бутоққа ўзини уч марта осса ҳам оссинки, сен билан биз, Сёма, уни деб, ўша ярамасни деб ўз гоявий партиявийлигимиздан воз кечмаймиз!

Нагульноб яна жонланиб, қаддини ростлади.

Унинг ёноқлари қизарди. У эшик кесакисига суюниб тамаки ўради-да, икки-уч марта қаттиқ-қаттиқ сўриб тортгач, осойишта ва секинроқ, гоҳо шивирлаб гапира бошлади:

— Сенга очифини айтсам, Семён, мен собиқ хотиним Тимошканинг ўлигини кўрса, йиғлаб юборар, деб қўрқкан эдим... Йўқ! Холасининг гапига қараганда, Лушка йиғламай, дод-вой қилмай унинг олдига борибди-да, тиз чўкиб оҳистагина: «Менга қараб қанот қоқдинг, десам, сени ажал ҳайдаб келган экан, лочингинам... Сени бало-қазодан сақлаб қололмаганим учун мени кечир»,— дебди. Кейин бошидан дуррасини ечиб, тарогини олибди-да, Тимошканинг сочини тараб кокилини тузатибди. Лабидан ўзибди-да, жўнаб қолибди. Ундан йироқлашибди-ю, бирон марта ҳам орқасига қарамабди!

Узоқ давом этмаган жимликдан кейин Макар яна баландроқ овоз билан гапира бошлади. Давидов унинг хирқироқ овозида бирдан унча яширинилмаган фуурланиш оҳангини сезиб қолди:

— Шундай хайрлаша қолибди. Қалай, ажойиб-а? Лъянати хотиннинг дийдаси жуда ҳам қаттиқ экан! Хўп, мен кетдим. Яхши қол!

Макар шунинг учун келган экан-да... Давидов уни кўча эшиккача кузатиб қўйиб, ним қоронғи хонасига қайтиб кирди-да, ечинмасданоқ ўзини ўринга ташлади. Унинг ҳеч нарсани эслагиси, ўйлагиси келмас, тезроқ ухлаб қолиб шу билан қутулгиси келар эди. Аммо уйқу келмас эди.

Пала-партишлик, эҳтиётсизлик қилиб Лушка билан алоқа боғлаганига хаёлида ўзини нечанчи бор ҳам койир эди! Уларнинг муносабатларида ишқ-муҳаббатдан ҳатто асар ҳам йўқ эди-я... Тимофей пайдо бўлган эдики, Лушка у билан, Давидов билан ўйлаб турмай дарров алоқасини узиб, яна Тимофейнинг пинжига кирди-да, ҳеч нарсага қарамай, хушторининг этагини тутди-кетди. Афтидан, дарҳақиқат, илк муҳаббат кўнгилдан чиқмас экан... Бир оғиз сўз айтмай, хайрлашмай хутордан жўнаб қолибди. Дарҳақиқат, буни бошига урармиди? Лушка ўзига ардоқли бўлган марҳум одами билан хайрлашибди. Бунда

Давидовнинг нима даҳли бор? Ҳамма иш ўз расамади билан. Лушка билан ораларида бўлиб ўтган бу нопок воқеа бамисоли тугамай чала қолган ёмон бир мактуб. Вассалом!

Давидов энсизгина каравотда безовталаниб ағдарилар, иҳрар эди, икки марта ўрнидан туриб тамаки чекди, тонгга боргандагина уйқуга кетди, кун ёришиб кетганда уйғонди. Қисқагина уйқу уни тетиклаштиргмаган эди, йўқ! У худди қаттиқ мастиликдан кейин бўладигандек ланжлик билан турди: чанқаган, боши зирқираб оғрир, оғзи қақраган, ўқтин-ўқтин енгил ўқчиқ тутар эди. Аранг, тиз чўкиб узоқ вақт этигини қидирди, каравотнинг тагини, столнинг тагини қўли билан пайпаслади, хонанинг бўш турган бурчакларини таажжубланиб кўздан кечирди, қаддини ростлаб этиклари оёғида эканлигини кўргандан кейингина, фижиниб томогини қирганча шивирлади:

— Бўларинг бўлсан, матрос, муборак бўлсин! Бўлса шунчалик бўлади-да, факт! Лаънати Лушка! Хутордан жўнаб кетганига тўрт кун бўлибди-ю, ҳали ҳам миямдан чиқмайди...

Кудуқнинг олдida белигача яланғочланиб терлаб, қизиб кетган елкасидан узоқ сув қуийб оҳ-воҳлади, ингради, бошини чайди—ҳадемай ўзини бир оз енгил ҳис қилиб, колхоз отхонасига қараб кетди.

XIII БОБ

Бир соатдан кейин у учинчи бригаданинг қўшхонасига яқинлашиб қолган эди. Аммо узоқданоқ бригадада аҳвол чатоқ эканлигини пайқади: ўроқ машиналарнинг ярмидан кўли бекор турар, дашт бўйлаб у ер-бу ерда тушовланган отлар юрар, қувраган пичан уюмларини ҳеч ким йифмас, уфққача биронта ҳам ғарам кўринмас эди...

Бригада будкаси яқинига тўшалган шолча устида олтида казак карта ўйнамоқда, еттинчиси — дабдала бўлиб кетган чориғини ямамоқда, саккизинчиси эса будканинг орқа гилдираги яқинида сояга чўзилиб, фижим ва кир брезент плашчга юзини қўйганча ух-

ламоқда эди. Давидовни кўришлари билан ўйинчилар, биттаси мустасно, ҳаммалари эринчоқлик билан ўринларидан турдилар. Биттаси тирсагига ёнбошлаганча, афтидан, ҳозиргина ютқазиб қўйгани алам қилганча ўй суриб, картани аста-секин чийла-моқда эди.

Ғазабидан оқариб кетган Давидов ўйинчиларнинг тепасига яқин бориб, овози қалтираганча қичқирди:

— Қилаётган ишларинг шуми?! Нега ўрмаяпсизлар? Любишкин қान?

— Ахир бугун якшанба-ку,— журъатсизгина жавоб берди ўйинчилардан аллаким.

— Нима, об-ҳаво сизларга қараб ўтирадими?! Ёмғир ёғиб қолса-чи?!

Давидов отнинг бошини тез бурган эди, от ёнбоши билан келиб шолчани босаркан, оёғи остидаги нарсаннинг ғайри оддийлигидан бирдан чўчиб кетиб, сапчи-ди-да, четга қараб сакради. Давидов қаттиқ қалқиб кетди, оёғи узангидан чиқиб кетай деди-ю, ҳар қалай ўзини эгарда тутиб қолди. У орқага ташланиб тизгинни таранг тортди-да, бир жойда ўйноқлаётган отни аранг эплаб олгач, яна ҳам қаттиқроқ қичқирди:

— Любишкин қаёқда деяпман?

— Ҳов ана ўряпти, дўнгликдаги чапдан иккинчи ўроқ машина. Бунча шовқин соласан, раис? Эҳтиёт бўл, яна кекирдагинг йиртилиб кетмасин...— деди кесатиб, лўппи юзини қалин сепкил босган оқиш қоши қаншарига туташиб кетган пастак бўйли ўрта яшар казак Устин Рикалин.

— Нега танбаллик қиляпсизлар?! Мен ҳамманглардан сўраяпман!— Давидов ғазаб ва қичқириқдан энтикиб кетай деди.

Бир оз жимлиқдан сўнг хуторда Давидов билан ён қўшни бўлиб яшайдиган дардчил ва ювош Александр Нечаев жавоб берди:

— Отларни ҳайдайдиган одам йўқ, гап шу. Хотин-халаж билан қизлар черковга кетишиди, хўш, биз чорночор байрам қилишга мажбур бўляпмиз. Лаънатилардан, бу ишни қўя туринглар, деб илтимос қилган эдик, сира-сира кўнишмади, яқинларига ҳам йўлатишмади! Яъни, уларни ушлаб туришнинг эвини қилол-

мадик. Ундаи деб ҳам, бундай деб ҳам ялиниб кўрдик, ҳеч кўндиrolмадик, сўзимизга ишон, ўртоқ Давидов!

— Ишондим ҳам дейлик. Аммо нега сиз эркаклар ўзларингиз ишламаяпсизлар? — энди бир оз босиқлик билан, аммо ҳамон беҳуда қичқириброқ сўради Давидов.

Отнинг ҳеч тинчлангиси келмас, мункиб кетиб, ҳурраклик билан қулоқларини чимирап, териси тагидан майда титроқ ўтар эди. Давидов тизгинни тараңг тортганча отнинг бошини бўшатмай, унинг ипакдек майин, иссиқ бўйини силар, сабр билан жавоб кутар эди, аммо бу гал сукут нечукдир чўзилиб кетди...

— Бирга ишлагани одам йўқ. Хотин-халаж йўқ, деяпман-ку,— деди энди истар-истамас Нечаев бошқаларга аланглар экан, чамаси уларнинг қувватлашларини умид қилиб.

— Нега ҳеч ким бўлмас экан? Саккиз киши бекор ўтирибсизлар. Тўртта ўроқ машинани ҳайдашларинг мумкинми? Мумкин эди. Сизлар бўлса, карта ўйнаб ўтирибсизлар. Сизларнинг колхоз ишига шундай муносабатда бўлишиларингизни кутмаган эдим, шундай қиласизлар деб ўйламаган эдим, факт!

— Сен нима деб ўйлаган эдинг бўлмаса? Бизни, булар одам эмас, иш ҳайвони, деб ўйлаганмидинг? — писанда билан сўради Устин.

— Бу билан нима демоқисан?

— Ишчиларнинг дам олиш кунлари борми?

— Бор, аммо заводлар якшанба кунлари ҳам тўхтамай ишлаб туради, ишчилар ҳам сизлар бу ерда карта ўйнаб ўтиришмайди. Тушундингми?

— У ерда якшанба кунлари бошқа сменалар ишласа керак, бу ерда бўлса, биз худди тавқи лаънат осилгандек, ёлғиз ўзимиз ишлаймиз! Душанбадан шанбагача — бўйнимизда хомут, якшанба куни ҳам тушмайди, бу қандай тартиб ўзи ахир? Совет ҳокимияти шундай амр қилганми? У, меҳнаткашларнинг орасида турли тафовутлар бўлмаслиги керак, деб амр қилган, сизлар бўлса қонуиларни бузиб ўз фойдаларингга буришнинг пайдансизлар.

— Нима деб валақлаяпсан? Нималар деб валақлаяпсан? — ғижиниб хитоб қилди Давидов. — Мен бутун колхоз моллари билан ҳаммаларингизнинг сигирларингизни қишилик хашак билан таъминламоқчиман. Тушундингми? Нима, бу менинг фойдам эканми? Шахсан менга нафи тегарканми? Нималар деб валақлаяпсан, ҳовлиқма?!

Устин парвосизгина қўл силтади:

— Сизларга планни вақтида бажарсанглар бўлгани. У ёғига дунёни ўт олиб кетса ҳам ишларинг йўқ. Бизпинг молларимиз жуда тушларингизга кириб чиққан бўлса керак. Мен гапингга дарров ишониб қўя қолдим! Кўкламнинг бошида станциядан Войсковойга уруғ ташиганимизда қанча ҳўқиз йўл-йўлакай узала тушиб ўлиб қолди? Сон-саноғи йўқ! Сен бўлсанг бизни лақиллатяпсан!

— Войсковойдаги колхознинг ҳўқизлари шунинг учун йўлда ўлиб қолдики, сенга ўхшаган унсурлар фаллани ерга кўмиб қўйишган эди. Колхозга киришган эди-ю, фаллаларини яшириб қўйишган эди. Ахир, ерга уруғ сепиш керакмиди? Шу сабабдан уруғлик олиб келгани ҳўқизларни узундан-узоқ жойга ҳайдаб боришига тўғри келди. Шу сабабдан улар қирилди, факт! Бу нарсани ўзинг билмайсанми?

— Сизлар планни тўлдирсанглар бўлгани, шунинг учун пичан деб жон кўйдиряпсан,— деб ўжарлик билан ғўнфиллади Устин.

— Нима, пичанни мен ўзим ейманми? Кўпчиликнинг фойдаси учун ҳаракат қиляпман! Бунга планнинг нима даҳли бор? — тоқати тоқ бўлиб, сабри тугаб қичқирди Давидов.

— Сен дағдаға қилма, раис, мени шовқин-сурон билан қўрқитолмайсан. Мен артиллерияда хизмат қилганман. Хўп, майли кўпчиликнинг фойдаси учун ҳаракат қиляпсан ҳам дейлик, одамларнинг тинкамадорини қуритиб уларни кечаю кундуз ишлашга мажбур қилишнинг нима ҳожати бор? Планнинг даҳли бор жойи шу! Сен район бошлиқларининг олдида ўзингни кўрсатишга тиришасан, райондагилар бўлса, ўлкадагиларнинг олдида ўзларини кўрсатишнинг пайдан, сизларни деб биз жабр тортишимиз керак. Сен

халқ ҳеч нарсани кўрмайди, деб ўйлайсанми, халқни кўр деб ўйлайсанми? У кўриб турибди, аммо сизларга ўхшаган амалпаратлардан қочиб қутулиб бўлармиди! Чунончи, сени, сенга ўхшаган бошқаларни ҳам амалдан тушира олармидик? Йўқ! Шу сабабдан сизлар кўнгилларингга келганини қиляпсизлар, Москва бўлса — узоқ. Москва сизлар бу ерда нима ҳунарлар кўрсатаётганларингизни билмайди...

Нагульнев тахминларининг акси ўлароқ Давидов тўқнашганда ҳам хотин-халаж билан тўқнашмади. Аммо бу билан унинг иши енгиллашмаган эди. Казакларнинг сергакланиб жим турганларидан Давидов бу ерда бақириқ-чақириқ фойда бермаслигини, қайтага ишни бузиб қўйиши мумкинлигини пайқади. Камоли сабр-тоқат қилиб, энг ишончли восита билан ҳаракат қилиш — уқтириш керак эди. Устиннинг забли юзини диққат билан кўздан кечираркан, енгил тортиб ўйлади: «Яхши ҳам Макарни бирга ола келмаганим! Бўлмаса ҳозир муштлашиш, дўппослашиш бошланиб кетаркан...»

Қандай бўлмасин вақтдан ютиш, Устин билан бўладиган, эҳтимолки, унинг ёнини олиши мумкин бўлганлар билан бўладиган олишиш режасини пишитиш учун, Давидов сўради:

— Мени раисликка сайлашаётганида ёқлаб овоз берганмидинг, Устин Михайлович?

— Йўқ, бетараф қолган эдим! Мен сенга нима учун овоз берарканман? Сени худди қопдаги мушукдай ўтказиб кетишиди.

— Мен ўзим келганман.

— Бари бир, қопдаги мушук бўлиб келгансан, мен сенинг қандай одамлигинги кўрмай-бilmай туриб, сенга қандай овоз беришим мумкин эди!

— Ҳозир сен менга қаршимисан?

— Бўлмаса-чи? Албатта қаршиман!

— Унда мени вазифамдан тушириш ҳақида колхознинг умумий мажлисида масала қўй. Мажлис қандай қарор қилса, шундай бўлади. Лекин ўз таклифингни яхшилаб асосла, бўлмаса шарманда бўласан!

— Шарманда бўлмайман, хавотир олмай қўя қол, бу ишнинг ҳам мавриди келар, ҳозир қисталанг эмас.

Сен ҳозирча раисмисан, бизга жавоб бер: бизнинг дам олиш кунларимизни нима қилдинг?

Бундай саволга жавоб бериш осон эди-ю, аммо Устин Давидовга оғиз ҳам очирмади.

— Нима учун районда, яъни станицада хизматчи ойимчалар якшанба кунлари башараларига упа-элик чалиб, кун-узун кун кўчама-кўча ўйнаб юришади, кеч-қурунлари ўйинга тушишади, кино кўргани бориша-ди-ю, бизнинг хотинларимиз билан қизларимиз якшанба кунлари ҳам қора терга тушиб шалаббо бўлишла-ри керак?

— Ёз куни иш мавсумида...

— Бизда ҳамма вақт иш мавсуми — қишида ҳам, ёзда ҳам, йил ўн икки ой — иш мавсуми.

— Мен айтмоқчиманми...

— Чакагингни қариштирмай қўя қол! Гапири-шингнинг ҳам ҳожати йўқ!

Давидов таъкид билан қўл кўтарди:

— Туратур, Устин!

Аммо Устин бидирлаганча унинг гапини бўлди:

— Мен ҳали ҳам олдингда худди хизматкордек тикка турибман, сен бўлсанг, худди тўрадек эгарда ўтирибсан.

— Сабр қилсанг-чи, сени одам деб илтимос қиляп-ман!

— Сабр қилишимнинг ҳожати йўқ! Сабр қилас-қилмасам сендан бир жўяли гап эшлиш қийин!

— Мени гапиргани қўясанми, йўқми? — тутақнб қичқирди Давидов.

— Сен менга бўкирма! Мен сенга Лушка Нагуль-нова эмасман! — Устин керкиб кетган бурун катаклари билан ютоқиб нафас олди-да, қандайдир синиқ овоз билан бақириб гапира кетди: — Бари бир сенинг бе-ҳуда акиллашингга йўл қўймаймиз! Мажлисларда меъданнга текканча гап соту, бу ерда гапни биз гапирамиз. Сен бизнинг карта ўйнаганимизни юзимизга солма, раис! Биз колхозда ўзимиз хўжайинмиз: хоҳласак ишлаймиз, хоҳламасак дам оламиз, бизни бай-рам куни зўрлик билан ишлатолмайсан. Чогинг кел-майди!

— Гапингни тамом қилдингми? — ўзини аранг ти-
йиб сўради Давидов.

— Йўқ, тамом қилганим йўқ. Гапимнинг охирида
айтиб қўйай: сенга бизнинг тартиб-қоидаларимиз ёқма-
ётган бўлса — қаёқдан келган бўлсанг ўша томонга
қараб йўқол! Сени ҳеч ким хоторимизга чақириб кел-
ган эмас. Худо хоҳласа, сенсиз ҳам кунимиз ўтиб қо-
лар. Сен кўрар кўзимиз эмассан!

Бу очиқдан-очиқ ифво эди. Давидов Устиннинг гап-
ни қаёққа бураётганини жуда яхши биларди, аммо ға-
забини тийиб туролмади. Унинг кўзлари тиниб кетди, Устиннинг қошлари тулашган қаншарига, нечукдир
ялпайиб кетган лўппи юзига бир лаҳзача илғамай ти-
килиб турди, қамчи сопини қаттиқ сиқиб ушлаган ўнг
қўлига қон қуюлаётганини, оғирлашиб, бармоқларин-
нинг бўғинларигача санчиқли қаттиқ оғриқ кираёт-
ганини аранг ҳис қиласди.

Устин қўлларини бепарвогина шимининг чўптақ-
ларига тикиб, оёқларини керганча унинг қархисида
туради... Нечукдир, яқингинадаги сиполиги дарров
ўзига қайтиб келган Устин ҳозир уни казаклар сўз-
сиз қувватлаб турганларини пайқаб, устунлик ўзи
томонидалигига ишонганча сурбетлик билан осойиш-
та илжаяр, чуқур тушган мовий кўзларини сузар эди.
Давидов эса тобора бўзариб борар, оқариб кетган
лабларини индамай қимиirlатар, бирон оғиз сўз ай-
толмас эди. У зўр бериб ўзи билан курашар, бир нима
бўлиб ўзини тутолмай қолишдан сақлаш учун бе-
бош, бемулоҳаза қаҳрини тийиб олиш учун бутун иро-
дасини ишга солар эди. Устиннинг овози аллақаёқ-
дандир, худди йироқлардан эшитилаётгандек бўлар,
Давидов Устиннинг гапларининг маъносини, унинг
овозидаги таҳқир оҳангларини ҳам аниқ пайқамоқда
эди...

— Сен нега оғзингни каппа-каппа очасану ўзинг
балиқдек фиқ этмайсан, раис? Тилинг лол бўлиб қол-
дими ёки айтадиган гапинг қолмадими? Гапирмоқчи
бўлгандек эдинг шекилли, ўзинг бўлсанг оғзингга тал-
қон солгандек индамайсан... Ҳақиқатга қарши чиқол-
майсан деганлари тўғри экан! Йўқ, раис, сен яххиси
биз билан олишма, беҳуда нарсалар учун қизишишма.

Сен яхшиси осойиштагина отингдан туш-да, биз билан карта ўйна, «ким қолса — аҳмоқ» деган ўйинни ўйнайлик. Бу, оғайни, ақл ишлатадиган ўйин, бу сенга колхозга раҳбарлик қилиш эмас...

Устиннинг орқасида турган казаклардан бири оҳиста кулиб юборди-ю, бирдан тўхтади. Будка олдида бир лаҳзагина хунук сукунат ҳукм сурди. Фақат Давидовнинг ҳансираф нафас олаётгани, узоқдаги лобогрейкаларнинг шитир-шитири билан зангори осмондаги кўз кўрмайдиган тўргайларнинг кишини аллалаб бепарволик билан сайрашлари, наво қилишларигина эшитиларди, холос. Ҳар қалай, уларнинг будка яқинида тўпланишиб турган, ҳаяжонланган одамларнинг орасида нима бўлаётгани билан ишлари йўқ эди...

Давидов қамчини аста-секин баланд кўтариб, отини пошнаси билан ниқтади, шу ондаёқ Устин шахт билан олдинга қадам ташлаб чап қўли билан отнинг сўлифи тагидан ушлади-да, ўзи ўнгга ташланиб, Давидовнинг оёғига тақалиб келди.

— Урмоқчимисан дейман? Қани уриб кўр-чи! — деди у таҳдид билан секин.

Бирдан унинг ёноқ суюклари бўртиб чиқди, кўзларида хушчақчақ писанда йилтиради, тоқатсиз кутиш белгилари кўринди.

Аммо Давидов сарғайиб кетган этигининг қўнжи-ни қамчини билан қаттиқ уриб, Устинни бошдан-оёқ кузатганча жилмайишга тиришиб, баланд овоз билан деди:

— Йўқ, сени урмайман, Устин, йўқ! Буни умид қилма, оқ унсур! Агар менинг қўлимга бундан ўн йил бурун тушганингда унда бошقا гап эди... Унда умрбод унингни ўчирган бўлардим, контра!

Устинни оёғи билан енгилгина четга суриб, Давидов отдан тушди.

— Хўп, майли, Устин Михайлович, юганни ушладингми, энди отни етаклаб бориб боғлаб кел. Биз билан карта ўйна, дейсанми? Марҳамат, жоним билан! Қани сузинглар, факт!

Иш мутлақо кутилмаган томонга бурилиб кетди. Казаклар бир-бирларига қараб олишди, иккиланиш-

ди, кейин индамай шолча атрофига ўтира бошлашди. Устин отни будка ғилдирагига боғлаб келиб, қалмоқ-часига чордона қурганча Давидовнинг рўпарасига ўтирди, унга аҳён-аҳёнда тез қараб қўяр эди. Йўқ, у мутлақо Давидов билан тўқнашганимда мағлуб бўлдим, деб ўйламасди, шунинг учун ҳам гапни давом эттиришга аҳд қилди:

— Сен дам олиш кунлари тўғрисида бари бир ҳеч нима демадинг, раис! Масалани пайсалга солдинг...

— Сен билан ҳали кейин гаплашамиз,— маънодор писандა қилди Давидов.

— Буни қандай тушуниш керак? Менга пўписа қилияпсан дейман?

— Йўқ, нега энди! Карта ўйнагани ўтирдикми, демак, бошқа гапларни четга қўя турамиз. Гаплашиб олишга вақт топамиз...

Аммо энди Давидов хотиржам бўлган сари Устиннинг ҳаяжони ортиб бораарди. Ўйинни охиригача ўйнамай картани ўкинч билан шолчага ташлади-да, тиззаларини қучоқлади.

— Ўйин кўнгилга сифармиди, келинглар, яхшиси дам олиш кунлари тўғрисида гаплаша қолайлик. Сен, бу дам олиш кунлари тўғрисида фақат одамларгина ташвишланяпти, деб ўйлайсанми, раис? Кошки эди! Кеча эрталаб мен отларни қўшгани борсам, саман биянинг ҳасратидан чанг чиқиб, одамга ўхшаб тилга кириб нима дейди дегин: «Эҳ, Устин, Устин, бу колхоздаги турмуш қандай турмуш бўлди! Мени бегим кунлари ҳам ишлатишади, кечаю кундуз бўйнимдан хомут тушмайди, байрам кунлари ҳам қўшишади. Илгариги вақтда унақа эмасди! Илгари мени якшанба кунлари ишлатишувчи эмасди, мени қўшиб ё меҳмондорчиликка, ёки бўлмаса тўй-ҳашамга боришувчи эди. Илгари мен минг чандон яхши кун кўрардим!»

Казаклар паст овоз билан бўлса ҳам баравар кулиб юборишди. Улар Устинга хайриҳоҳдек эдилар. Аммо Давидов кекирдагини қўли билан силаб, секингина:

— Ўша аломат бия колхозгача кимники экан? — дегач, улар унинг оғзини пойлаб жим бўлиб қолишиди.

Устин муғамбирона кўз сузиб, ҳатто Давидовга им ҳам қоқиб қўйди:

— Меники деб ўйлаётгандирсан ҳали? Менинг сўзларимни айтган деб ўйларсан? Йўқ, раис, бу важига янгишдинг! У Титокнинг бияси эди, бу кулаклардан мусодара қилинган ҳайвон. У эгасининг қўлида якка хўжаликлик вақтида колхоздагидек тамаддиқ қилмас эди: қишининг кунлари нишхўрдга қайрилиб ҳам қарамасди, ҳамма тиши фақат сули кавшаб ейи-либ кетган. Кун кечирган эмас, айш-ишрат қилган деса ҳам бўлади!

— Демак, тиши ейилиб кетган бўлса, қари бия экан-да?— бехосдан сўраган бўлди Давидов.

— Қари, қари, ёши анчага бориб қолган,— унинг фикрига қўшила қолди рақибининг панд беришини хаё-лига ҳам келтирмаган Устин.

— Унда бу сўзамол биянинг гапига қулоқ солиб беҳуда иш қилибсан,— деди ишонч билан Давидов.

— Нега беҳуда бўлар экан?

— Шунинг учунки, кулак биясининг гап-сўзлари ҳам кулакча бўлади.

— Ҳозир у колхозчи-ку...

— Сиртдан қараганда сен ҳам колхозчисан, асли-да бўлса — кулакларнинг хушомадгўйисан.

— Ҳе, сен жуда қаттиқ кетдинг, раис...

— Ҳеч қаттиқ кетганим йўқ, факт фактлигича қолади. Ундан кейин, қари бия бўлса гапига қулоқ солиб нима қиласдинг? Қариб, миясини еб қолганга ўхшайди! Ёшроқ, ақллироқ бўлса — у сен билан бу йўсинда гаплашмаслиги керак эди!

— Қандай гаплашиши керак эди?— энди сергак-ланиб сўради Устин.

— У сенга шундай дейиши керак эди: «Эҳ Устин, Устин, кулакларнинг думи! Сен итвачча, қишининг куни мутлақо ишламадинг, кўкламда ҳам ишламадинг, ўзингни касалликка солдинг, ҳозир ҳам астой-дил ишлагинг келмаяпти. Мен саман бияни қишида нима билан боқасан-у, ўзинг ҳам қишида нима ейсан? Шу тариқа меҳнат қиласиган бўлсак, икковимиз ҳам очликдан ҳаром ўламиз!» У сен билан ана шундай деб гаплашиши керак эди!

Давидовнинг охирги сўзларини умумий қаҳқаҳа кўмиб кетди. Нечаев худди нўхат афдараётган қизларга ўхшаб куларди, қизларга ўхшаб ингичка овоз билан қийқиради Йўғон овозли Герасим Зяблов ҳатто ўрнидан сагчид туриб, ғалати чўнқайиб, хаҳолар, худди рақс вақтидагидек этигининг қўнжини шапатилаб-шапатилаб қўяр эди. Кекса Тихон Осетров кўкиш соқолини тутамлаганча чинқириб юборди:

— Ерга мукка туш, Устин, бошингни кўтарма! Давидов сени тупроқ билан қориштириб юборди!

Аммо сира хижолат бўлмаган Устиннинг ўзи ҳам давидовни таажжубда қолдириб кулар, унинг кулгиси сира ҳам зўраки ва ясама эмас эди.

Бир оз жимлик чўккач, Устин биринчи бўлиб гапирди:

— Ҳа, мени йиқитдинг, раис. Тағимдан бу қадар чаққонлик билан чиқиб кетарсан деб ўйламаган эдим. Аммо, кулакнинг думисан, деганинг беҳуда гап, мени кўкламда ўзингни касалликка солдинг, деганинг ҳам бўғтон. Сен бу важдан, раис, мени кечиру, ёлғон гапиряпсан!

— Испот қил!

— Нима билан испот қиласман?

— Фактлар билан.

— Бизнинг ҳазил-мазақ гапларимизга фактнинг қандай дахли бўлиши мумкин? — журъатсиз илжайиб сўради бир оз жиддийлашиб қолган Устин.

— Сен лақиллатмай қўя қол! — деди жаҳл билан давидов. — Бизнинг гапларимиз мутлақо ҳазил эмас, сен бошлаб қўйган иш ҳам мутлақо ҳазилакам иш эмас. Фактлар бўлса — очиқ-ойдин кўриниб туриди: сен колхозда деярли ишламаяпсан, онгиз унсурларни орқангдан эргаштиришга тиришяпсан, ўзинг учун хавф-хатарли бўлган гапларни гапиряпсан, масалан, мана бугун бўлса, ишга чиқиши барбод қилишга муваффақ бўлдинг: сенинг касофатинг билан бригаданинг ярми пичан ўрмаяпти. Жин урсин, бунинг нимаси ҳазил?

Устиннинг қизиқ чимирилиб турган қошлари яна қаншарида туташди-да, қатъий бир тўғри чизиқ ҳосил қилди:

— Дам олиш кунлари тўғрисида гап очиб бирдан кулакнинг думи билан контрага айланиб қолдимми? Демак, фақат сенинг гапиришинг мумкин экан-у, биз ғиқ этмай, тилимизни тишлаб ўтиришимиз керак экан-да?

— Бунинг учунгина эмас! — қизғин эътиroz билдириди Давидов.— Сен ўзингнинг бутун хатти-ҳаракатинг билан инсофсизлик қиляпсан, факт! Сен нега дам олиш кунлари ҳақида гап сотасан, ахир қишда ойига йигирма кундан дам олгансан-ку! Ёлғиз сен эмас, бу ерда ҳозир бўлганларнинг ҳаммаси ҳам. Сизлар қишида молларнинг тагини тозалаш билан уруғлик саралашдан бошқа нима иш қилдинглар? Бошқа ҳеч қандай иш қилганларинг йўқ! Ҳеч нарса! Иссик печкада маза қилиб ётдинглар! Ҳар соат ғанимат бўлган бир пайтда, пичан ўрими хавф-хатар остида турган қизғин бир пайтда ўзларингга маҳсус дам олиш куни ўйлаб чиқаришга нима ҳақларинг бор? Хўш, вижданан айтинглар-чи!

Устин индамасдан мижжа қоқмай Давидовга тик боқиб туради. Унинг ўрнига Тихон Осетров гапирди.

— Ҳозир тўнгиллаб ўтиришнинг ҳожати йўқ, донликлар. Давидов тўғри айтяпти. Ўзимиз хато қилиб қўйдикми, хатомизни ўзимиз тузатишимиш керак. Бизнинг ишимиз шунақаки, ҳамма вақт ҳам байрам қилишга муваффақ бўлавермаймиз, кўпинча қиши кунларигина байрам қиласиз. Илгари, якка ҳўжалик вақтимизда ҳам шундай эди Қайси биримиз Покровдан олдин ҳўжалигимиздаги ишларимизни саранжом қилиб олардик? Фаллани ўриб-йифиб олмасингдан — шудгор кўтаришга тушишинг керак эди. Давидов тўғри айтяпти, биз бугун хотин-халажни бекорга черковга жўнатдик, ўзимиз қўшхонада якшанбалик қилиб ўтирганимиз важига келсак — буни гапирмасак ҳам бўлади. Гапнинг қисқаси, хато қилиб қўйдик! Ўзимизга ўзимиз гуноҳ қилиб қўйдик, вассалом! Буларнинг ҳаммаси сендан, Устин, бизни сен йўлдан урдинг, ғаламис иблис!

Устин худди ўқ доридек повуллаб кетди. Унинг мовий кўзлари тиниб ғазаб билан чақнади;

— Сен паҳмоқ соқол аҳмоқнинг ақлинг ўзингдами ё эсдан чиқариб уйингда қолдирғанмисан?

— Эсдан чиқариб қолдириб келганга ўхшайман...

— Бўлмаса хоторга физиллаб бориб, олиб кел!

Нечаев илжаяётганини кўрсатмаслик учун оғзини энсиз кафти билан тўсиб, бир оз хижолат бўлған Осетровдан чийиллаганича сўради:

— Сен, ақлингни пухтароқ яшириб келганмидинг, ишқилиб, Тихон Гордеич?

— Сенга нима ташвиши тушди?

— Ахир бугун якшанба-ку...

— Хўш, нима бўпти?

— Келининг эрталабдан у ёқ-бу ёқни йиғишириб, полларни супириб-сидирган бўлса, сен ақлингни сўри ёки печканинг тагига яшириб қўйган бўлсанг, албатта, супургига илаштириб, қўрага супуриб олиб чиқиб ташлайди. Қўрада ақлингни товуқлар бирпасда титпит қилиб ташлашади. Яна ўла ўлгунингча ақлсиз ўтмагин, Гордеич, мен шунинг ташвишини қиляпман...

Ҳамма, Давидов ҳам кулди, аммо казакларнинг кулгилари нечукдир унча ҳушчақчақ эмас эди... Бироқ яқингинадаги жиддият кўтарилган эди. Бундай ҳолларда одат бўлганидек, ҳушчақчақ ҳазил-мутойиба бошланиб кетиши мумкин бўлган жанжалнинг олдини олиб қолди. Дили оғриган Осетров бир оз ҳовридан тушгач, Нечаевга мурожаат қилиб, шундай деб қўйди:

— Чамамда, Александр, сенинг уйда қолдириб келгулик ҳеч нарсанг йўққа ўхшайди, ўзингда ҳам ақл зотидан асар йўққа ўхшайди. Сен мендан ақллироқ экансанми? Ҳозир сенинг хотининг ҳам Тубянскойга равона бўлганча йўлни одимлаб кетяпти, ўзинг ҳам карта ўйнашдан воз кечганинг йўқ.

— Гуноҳкорман! Гуноҳкорман! — ҳазил билан қутулмоқчи бўлди Нечаев.

Аммо Давидов суҳбатнинг оқибатидан қаноатланмаган эди. У Устинни чинакамига мулзам қилгиси келарди:

— Хўп, келинглар, дам олиш кунлари тўғрисидаги гапни узил-кесил тугатайлик,— деди у Устинга қаттиқ тикилиб.— Сен қишида кўп ишладингми, Устин Михайлович?

— Қанча ишлаш керак бўлса шунча ишладим.

— Аниқроғи-чи?

— Ҳисоблаганим йўқ.

— Қанча меҳнат кунинг бор?

— Эсимда йўқ. Менга бунча ёпишиб олдинг? Агар қиласиган ишинг бўлмаса, бекорчиликдан зерикаётган бўлсанг ўзинг ҳисоблаб кўра қол.

— Ҳисоблаб ўтиришимнинг ҳам кераги йўқ. Агар сен унуган бўлсанг, мен колхоз раиси сифатида унугим мумкин эмас.

Ёнидан ҳеч қўймайдиган қўйин дафтарчаси бу гал Давидовга жуда ҳам иш берди! Давидовнинг бармоқлари қўйин дафтарчанинг кирсаҳифаларини шошашиша варақларкан яқингинадаги ҳаяжондан ҳамон титраб туради.

— Фамилиянгни топдим, меҳнатсевар! Мана сенинг ишлаганларинг: январь, февраль, март, апрель ва майда ҳаммаси бўлиб, ҳозир айтаман, ҳаммаси бўлиб йигирма тўққиз меҳнат куни. Хўш, қалай? Дўндириб ишлабсанми?

— Ишингнинг учча чўғи йўқ, Рикалин!— деди ўкинч ва таъна билан казаклардан бири, Устинга қараб.

Аммо Устин бўш келмоқчи эмас эди:

— Менинг бу ёқда ҳали ярим йил вақтим бор, жўжани кузда санайдилар.

— Жўжани кузда санаймизу, меҳнат кунини — ҳар кун ҳисоблаймиз,— деди Давидов кескин.— Сен, Устин, бўркингда билиб қўй: биз колхозда ишёқмасларга ўрин бермаймиз! Ҳар қандай саботажчиларни тепиб ҳайдаймиз. Колхозда бизга текинтомоқлар керакмас! Ўзинг ўйлаб кўр: қаёққа қараб кетяпсан, қаёққа қараб буриляпсан? Осетровнинг меҳнат куни — икки юзга боради, бригадангиздаги бошқа одамларники ҳам юздан ошади, ҳатто Нечаевга ўхшаган дардчилларники ҳам, беморларники ҳам юзга яқин, сеники бўлса — атиги йигирма тўққизга! Ахир бу шармандалик-ку!

— Менинг хотиним бетоб, хотин-қизлар касалига чалинган, ҳафталаб бош кўтаролмай ётади. Бундан

ташқари -- олтита болам бор,— деди тундзик билан Устин.

— Ўзинг-чи?

— Нима ўзим?

— Нима учун ёлчитиб ишламайсан?

Устиннинг ёноқлари яна олчадек қип-қизариб кетди, ғазабли сузилган мовий кўзларида хунук учқунлар кўринди.

— Нега менгагина бақрайиб, менинг кўзим билан башарамга тикилиб қолдинг?— мушт бўлиб қисилган чап қўлини ғазаб билан силтаб қичқирди у, унинг ғўлабир калта бўйнидаги кўк томирлари қабариб чиқди.— Нима, мен сенга Лушка Нагульнаваманми ёки дардингда куяётган Варька Харламоваманми?! Сен аввал менинг қўлимни бир кўриб, ундан кейин мендан иш талаб қил!

У куч билан қўлларини олдинга чўзди. Давидов шундагина Устиннинг дабдала бўлган ўнг қўлида ёлғизгина кўрсаткич бармоғи қаққайиб, қолган бармоқларининг ўрни бужмайиб қорайиб турганини кўрди.

Давидов гарантсиб қаншарини қашиди:

— Ҳали шунақами... Бармоқларингдан қаерда ажрагансан?

— Қримда, Врангель фронтида. Сен мени оқ деб атадинг, мен бўлсан — худди қўнғир тортган тарвуздек — пуштиман: оқларда ҳам бўлганман, икки ҳафтача яшиллар билан ҳам апоқ-чапоқлашганман, қизилларда ҳам бўлганман. Оқларда хизмат қилганимда — хушёқмаслик билан жанг қилдим, кўпинча орқа томонларда дайдиб юрдим, оқларга қарши урушганимда — севинсанг арзиди — бармоқларимдан ажрадим. Ичирадиган, яъни рюмка ушлайдиган энагам бутуны.— Устин чап қўлининг калтабақай йўғон бармоқларини қимиirlатди.— Тўйдирадиган энагам бўлса ногирон — чўлтоқ...

— Үқ парчаси олиб кетганми?

— Қўл гранатаси.

— Шаҳодат бармоғинг қандай қилиб омон қолган?

— Тепкини босиб турган эдим, шунинг учун омон қолган. Ўша куни мен иккита врангелчини ўлдирган

эдим. Бир нима билан хун тўлашим керак эдими? Бу қон тўкканим учун худонинг қаҳри келди, унга тўртта бармоғимни инъом қилишимга тўғри келди. Ҳали ҳам осон қутулдим, деб ўйлайман. Аҳмоқлик қилиб калламнинг ярмисини даъво қилиб қолса ҳам ажаб эмасди.

Давидовнинг хотиржамлиги аста-секин Устинга ҳам ўтди. Улар энди бамайлихотир гаплашишар, та-касалтанг Устин аста-секин ҳовридан тушмоқда эди, ҳатто унинг лабларида одатдаги кинояли табассуми ҳам пайдо бўлди.

— Охиргисини ҳам бериб қўя қолмабсан-да, битта ўзини нима қиласан?

— Бирорвнинг ғаниматига жуда ҳам жўмард экансан, раис! У битта бўлса ҳам хўжалигимга жуда-жуда керак.

— У сенга нима учун керак? — сўради Давидов кулгисини тийиб.

— Керак бўладиган ўрни озмунчами... Хотинимнинг бирон феъли ёқмай қолса кечаси у билан хотинимга пўписа қиламан, кундузлари у билан тишимни кавлаб, одамларни лақиплатаман. Қамбағал бўлганим учун карам шўрвада гўштни йилига бир марта кўраман, ҳолбуки, ҳар куни тушликдан кейин кўчада кетаётганимда шу бармоғим билан тишимни кавлаб туфураман, одамлар ҳойнаҳой, «Бу лаънати Устин хўп бадавлат-да! Ҳар куни гўшт ейди, уйидан сира гўшт аrimайди!», дейишса керак. Сен бўлсанг, битта бармоқни нима қиласан, дейсан... У менга хизмат қилиб турибди! Одамлар мени бадавлат деб ўйлашсин. Ҳар қалай, бу менга хуш ёқади!

— Гапга печан экансан,— деди беихтиёр илжайиб Давидов.— Бугун пичан ўрасанми?

— Шундай ёқимли суҳбатдан кейин — албатта!

Давидов Осетровга ўгирилди. Унга ёши катта бўлгани учун мурожаат қилди:

— Хотин-қизларингиз Тубянскойга кетганига анча бўлдими?

— Бир соатча бўлиб қолди.

— Улар кўпчиликмиди?

— Ўн иккитача. Бу хотин-қиз зоти бамисоли қўй-

нинг ўзи: биттаси бир ёққа қараб кетса, қолганлари ҳам уюри билан ўша ёққа қараб жўнайди. Баъзан тиррақи совлиқ ҳам бутун уюрни эргаштириб кетади. Биз фалокатга йўлиққур Устиннинг гапига кириб ўроқ вақтида байрам қилиб ўтирибмиз!

Устин хушфеълик билан кулиб қўйди.

— Яна мен гуноҳкор бўлдимми? Сен паҳмоқ соғол, бировларнинг гуноҳини менга ағдарма! Хотин-халаж ибодат қилгани кетган бўлса бунинг менга нима дахли бор? Уларни Атаманчукова кампир билан хоторимиздаги яна бир кампир тўғри йўлдан оздирди. Тонг отиши биланоқ, бизнинг қўшхонамизга келиб ташвиқот қилишга тушди! Бугун муқаддас фидойи биби Глиkerиянинг байрами, сизлар гуноҳ қилиб қўйишдан қўркмай пичан ўрмоқсизлар, эгачилар, дейди... Хуллас йўлдан уришди. Мен кампирлардан: қайси Глиkerия? Нагульнова эмасми? У дарҳақиқат фидойи, умри бино бўлибдики, ким кўрганга жонини фидо қиласи, деб қоларманми... Вой-бў, кампирларим тўс-тўполон кўтариб мени қуршаб қолишиди-ку! Атаманчукова кампир ҳатто қўлтиқ таёfinи ўқталиб урмоқчи эди, хайриятки, чап бериб қолганим, бўлмаса пешанам голланд ғозининг қаншаридек ғурра бўлиб чиқарди. Бу орада ўзимизнинг хотинлар итнинг думига тўнғиз тароқ ёпишгандек менга шундай ёпишиб олишдики, қўлларидан аранг қутулиб чиқдим... Мен нега бу қадар бадбаҳт одам эканман? Бугун ҳеч омадим келмаяпти! Буни қаранглар яхшилар, эрталабнинг ўзиданоқ кампирлар билан ҳам, хотин-халаж билан ҳам, раис билан ҳам, кўк соқол Гордеич билан ҳам уришиб қолдим. Бунга ҳунар керак ахир!

— Сен бучга ҳунарвандсан! Сен бу ҳунарни қўшилиарингдан қарз олиб ўтирмаисан. Сен кичкиналиғингдан бери худди уришқоқ хўроздга ўхшаб ҳамма билан юлқишиб келасан. Уришқоқ хўрознинг, сўзим эсингда бўлсин, тожи доим қонаб юради...— деди огоҳлантириб Осетров.

Аммо унинг гапи Устиннинг қулоғига кирмади ҳам. У шўх, ботир кўзлари билан Давидовга тикилганча гапида давом этди:

— Аммо бугун агитаторлар вожидан омадимиз келиб, ёлчиб қолдик: бизга яёв ҳам келишяпти, уловда ҳам келишяпти... Темир йўл яқинроқ бўлганида — паровозда ҳам келишарди! Лекин сен чинакам ташвиқотни бизларнинг кампирларимиздан ўрганишинг керак экан, раис... Уларнинг сендан ёшлари ҳам каттароқ, айёроқ, тажрибалари ҳам кўпроқ. Улар осоишишта гаплашишади, мулоиймлик билан, ниҳоятда хушмуомалалик билан уқтиришади; шунинг учун ҳам муддаоларига эришишади. Улар қоқ мўлжалга уришади! Сен бўлсанг қандай иш кўряпсан? Қўшхонага етиб келмасингдан бутун даштни бошингга кўтариб: «Нима учун ишламаяпсизлар?» деб бўкирасан. Ҳозирги замонда ким халқа бундай муомала қиласди? Ҳозир у, яъни халқ, Совет ҳокимияти даврида, илгари сандиқда ётган ғурурини ишга яратяпти. Бирор унга ўшқириб, пўписа қилса ёқтирмайди. Галнинг қисқаси, бирор ғашига тегишини хуш кўрмайди, раис! Дарвоqe, ўрни келганда қистириб ўтай, казакларга илгари, подшоҳ замонида ҳам атаманлар унча ўшқиришмасди — кексаларнинг дилини оғритиб қўйишидан қўрқишишарди. Нагульнев икковларинг ҳам аллақачон пайқаб олишларинг керак эди, ҳозир замон ўзгариб кетган, эски одатларни ташлашнинг фурсати етган... Агар сен пастроқ тушмаганингда, мени бугун пичан ўришга рози бўларди, деб ўйлайсанми? Ула қолсам ҳам рози бўлмасдим! Сен ўзингни бир оз тийличиг, қаҳрингдан тушиб юмшадинг, биз билан карта ўйнашга рози бўлдинг, ётиғи билан гаплашдинг. Шунинг учун нима десанг мен розиман! Мени нима кўйга солсанг сол, нима десанг розиман: карта ўйна десанг, карта ўйнайман, ғарам бос десанг, ғарам босаман.

Устиннинг гапини диққат билан тинглаб турган Давидов ўқинч билан ўзини койиди, аччиғланиб ғижинди. Ўтакетган шўх бу казак баъзи бир нарсаларда дарҳақиқат ҳақли эди, шекилли. Ақалли шу нарсада ҳақли эдик, Давидов бригадага келиши биланоқ, уқтиришни сўкиш билан ўшқиришдан бошлиглиги керак экан. Шунинг учун ҳам, Устин шама қилганидек, дастлаб мўлжалдан адашиб қолди. Нима

юз бердики, у ўзини туголмай қолди? Давидов холис-лик билан, сидқидилдан, ўз-ўзига иқрор қилиши ке-рак эдики, у аста-секин Нагульнининг одамлар билан муомала қилишдаги қўйполлигини ўзлаштириб олибди, Андрей Размётнов қўллаши мумкин бўлган таъбир билан айтганда, жиловсиз бўлиб кетибди,—мана бунинг оқибати: унга кесатиқ билан аллақандай кампирлардан ўrnak олишни маслаҳат беришяпти, улар эҳтиёт билан, мулойимлик билан ҳаракат қилиб, мўлжалдан ҳеч адашмай, ўз мақсадлари йўлида муқаррар равишда муваффакиятга эришишармиш. Ҳаммаси очиқ-оидин равшан. У ҳам қўшхонага осойишта келиб, осойишта гапириши, одамларга байрам кайфиятларининг ҳозир ўринисиз эканлигини уқтириши керак экан, у бўлса ҳаммага бақириб-чақириб, ҳатто қамчинни ишга солишига ҳам оз қолди. Бир лаҳзагина вақтнинг ичидаги колхозни барпо қилишдек ҳамма ишини ҳайф кетказиши, кейин бўлса райком столига партия билетини қўйиши ҳам ажаб эмас экан... Мана бу нарса ҳаётида чинакам даҳшатли ҳалокат бўларди!

Агар ўзини вақтида босиб қолмаганида нима ахволга тушиши мумкинлигини ўйлаши биланоқ Давидов сесканиб кетди, бир лаҳзагина елкасидан жунжиктирувчи совуқ титроқ жимиirlab ўтганини сезди...

Бутун вужудини кўнгилни ғаш қилувчи ташвишлар чулғаб олган Давидов шолчада сочилиб ётган карталарга кўз узмай тикилиб турар, нечукдир гражданлар уруши йиллари «очко» ўзининг ишқибоз бўлганлигини бирдан эслаб: «Мен чув тушдим! Ўн олти очконинг устига яна ўнтача олиб қўйдим, факт!» деб ўйлади. Ўзининг енгилтаклик қилиб қўйганига иқрор бўлиш унинг учун анча ҳоқулай эди, аммо у журъат қилиб, гарчи ичидаги бунга қарши бўлса-да, ҳар қалай шундай деди:

— Амалда мен беҳуда кекирдақ чўзибман, бу масалада сен ҳақлисан, Устин! Сизларнинг ишламаёт-гандарингиздан хафа бўлиб кетдим-да, ахир, нима дейсан? Қолаверса, сен ҳам мен билан мулойим гаплашганинг йўқ. Биз сўкишсиз ҳам бир муомала қилишимиз мумкин эди. Хўп, буни бас қилайлик! Бор,

аравага энг чопқир отлардан қўш, сен Нечаев, бир жуфт дурустрони мана бу дрожкига қўш.

— Хотинларниң изидан қувасанми? — таажжубланганини яширмасдан сўради Устин.

— Шундай. Хотинларга ҳам уқтириб, уларни ҳам бугун ишлашга унатмоқчиман.

— Улар сенга бўйсунишармикан?

— У ёғи бир гап бўлар. Уқтириш — буйруқ эмас.

— Хўп, майли, сенга худойи таоло билан Ченстохов маъбуласи ёр бўлсин! Менга қара, раис, мени ҳам ўзинг билан бирга ола кет! А?

Давидов иккиланмай, рози бўлди.

— Бирга борамиз. Аммо сен хотинларни ишга кўндиришимга ёрдам берасанми?

Устин иссиқдан пўрсилдоқ бойлаган лабларини тиришириб илжайди:

— Сенга менинг ўринбосарим ёрдам беради, мен уни албатта бирга ола кетаман!

— Қанақа ўринбосаринг? — Давидов гарангсиб Устинга қаради.

Устин аста будка томонга борди-да, уйилиб ётган зипунлар тагидан сопида ҳашаматли шокиласи бор янги узун қамчини суғуриб олди.

— Ўринбосарим шу бўлади. Дурустми? Шу қадар ҳайбатлики қўяверасан! Бир шарангғласа бир йўла уқтириб, йўлга солиб қўя қолади. Менинг чапақайлигимга қарама!

Давидов қовоғини солди:

— Сен бу қилиғингни ташла! Мен сенга хотинларни черттирмайман ҳам, аммо ўринбосарингни ярринингда бажонидил синаб кўрардим!

Аммо Устин кулуңч билан кўзини суза қолди:

— Бир чол маза қилиб иримчик чучвара емоқчи экан, ит пок-покиза қилиб тушириб кетибди... Менинг гражданлар уруши инвалиди сифатида имтиёзларим бор, хотинларни қанча савассанг шунча семириб, шунча ювощ тортишади. Хотинимдан қиёс қилиб айтипман. Бўлмаса кимни савалайсан? Турган гапки хотинларни! Нега қўрқасан? Мен иккита-учтасини боллаб ачитиб қолсам қолганлари лип этганча аравага чиқиб олади!

Шу билан гап тамом леб ҳисоблаб у будка тагида ётган юганларни олди-да, отларни тутгани тепаликка қараб кетди. Унинг орқасидан Нечаев билан бошқа казаклар ҳам жўнаб қолишиди, ёлғиз Осетровгина қолди.

— Сен, Тихон Гордеич, нима учун пичан ўргани бормаяпсан? — сўради Давидов.

— Сенга Устиннинг важидан илтимосим бор эди. Мумкинми?

— Гапир.

— Сен у аҳмоқдан хафа бўлма, худо ҳақи! Ёнқайиш думининг тагига тушиб қолса, тентак бўлади-қолади,— илтимос билан гапирди Осетров.

Аммо Давидов унинг гапини бўлди:

— У ҳеч ҳам аҳмоқ эмас. Колхозча турмушнинг ошкора душмани! Биз бундайлар билан курашиб келганмиз, бундан буён ҳам беомон курашамиз!

— У нега душман бўларкан? — ҳайрат билан хитоб қилди Осетров.— Сенга айтиб қўйай, жаҳли чиқса ўзини йўқотиб қўяди, вассалом! Мен уни кичкиналигидан биламан, азалдан шунаقا ўжар. Лаънатини революциягача чолларимиз қайсарлиги учун хотор маъракаларида жуда кўп савашган. Савашгандা ҳам на ўтира оладиган, на ёта оладиган қилиб савашарди,— у бўлса парвойига келтирмасди! Бир ҳафтача бўксасини қўнқайтириб юрарди-да, яна эски ҳунарига тушарди: ҳеч кимга кун бермайди, ҳаммадан иллат қидиради, яна жон-жаҳди билан қидиради! Бамисоли ит бурга қидиргандай қидиради! Нега энди у колхознинг душмани бўларкан? Умри бино бўптики, бойларга кўз очирмай келди, ўзининг турмуши бўлса — кўрсанг кайфинг учади! Ўйи қийшайиб қолган, қулай-қулай деб турибди, хўжалигига битта сигири билан бир жуфт қўтир қўйи бор, қўли сира пул кўрган эмас. Қаширга тирноғи-ю, кавшашга тиши — бутун бойлиги шундан иборат, холос! Бунинг устига хотини дардчил, болалари қийнаб, муҳтоҗлик мутаб юборди... Эҳтимолки, шу сабабдан ҳаммага тиш қайрайверса керак. Сен бўлсанг — душман дейсан. Саф-сатабоз-у, душман эмас.

— У сенга қариндош әмасми? Уни нега ҳимоя қиляпсан?

— Гап шундаки, қариндош-да, жияним бўлади.

— Шунинг учун жон куйдиряпсанми?

— Бўлмаса-чи, ўртоқ Давидов? Бири-биридан кичик олтига боласи бор, тили бўлса — бир қулоч. Мен унга неча марта: «Тилингни тий, Устин! Тилинг бошингга етмасин. Жаҳл устида бир бало деб алжиб қўйиб, бирдан Сибирга жўнаб қолмагин, унда ич-этингни ейсан-у, фойдаси бўлмайди!» деганман. У бўлса менга: «Сибирда одамлар тўрт оёқлаб эмаклаб юришадими? Мени у ерда ҳам ел емайди, мен — пишиқман!» дейди. Шунақанги аҳмоқки, бир пулга қиммат! Унинг болаларида нима гуноҳ? Уларни тарбиялаш маҳол. Уларни ҳозирги замонда етим қилиб қўйиш ҳеч гап әмас.

Давидов кўзларини юмиб, узоқ ўйланиб қолди. Бу дақиқада у ўзининг баҳтсиз, аччиқ, ўксиз болалик даврини эсламадимикан?

— Унинг аҳмоқона гапларидан жаҳлинг чиқмасин,— тақрорлади Осетров.

Давидов юзини қўли билан силаб, ҳушига келгандек бўлди.

— Менга қара, Тихон Гордеич,— лўнда-лўнда қилиб оҳиста гапирди у.— Ҳозирча мен Устинга тегмайман. Колхозда бақадри ҳол ишлаб турсин, биз унга оғир иш бермаймиз, кучи етган ишни қилиб турсин. Борди-ю, йилнинг охирида меҳнат кунлари камлик қилиб қолса, қарашамиз: болалари учун умумколхоз фондидан ғалла ажратиб берамиз. Тушундингми? Лекин сен унга менинг номимдан хуфия айтиб қўй, агар у яна бир марта бригадада бузуқилик қилиб, одамларни йўлдан уриб, ҳар бало ишларга ундар экан, унда яхшилик кўрмайди! Вақт ғаниматда эсини йиғсин! Мен у билан ортиқ ҳазиллашмоқчи әмасман, унга худди шундай деб қўй. Мен Устинга әмас, унинг болаларига ачиняпман!

— Яхшилигинг учун раҳмат, ўртоқ Давидов! Устинга кек сақламаганинг учун ҳам раҳмат — Осетров Давидовга таъзим қилди.

Унинг бирдан ғазаби қўзиб кетди:

— Сен нега таъзим қиласан? Мен сенга икона эмасман! Менга таъзимнинг ҳожати йўқ, айтдимми, ваъдамнинг устидан чиқаман!

— Бизда эски замонлардан бери таомил шу: миннатдорчилик билдиранг таъзим қиласан,— жавоб берди сиполик билан Осетров.

— Хўп, майли, отахон, менга шу гапни айтсанг: Устиннинг болаларининг кийим-кечаклари қандай? Улардан нечгаси мактабга қатнайди?

— Қиши кунлари қўрага чиққудек кийимлари йўқ-лигидан ҳаммалари печкадан тушмай ўтиришади, ёзда увадаларини оқизиб чопқиллаб юришади. Мусодара қилинган буюмлардан унча-мунча тегиб қолган эди, аммо бу билан уларнинг устини бутлаб бўлармиди? Бу йил қишида Устин йигитча ўғлини ҳам мактабдан чиқариб олди: на устида бору на оёғида. Йигитча кап-катта бўлиб қолган, ўн иккиларда, лўлиларга ўхшаб чувринди бўлиб юришдан уялади...

Давидов шахт билан гарданини қашиди-да, Осетровдан тез ўғирилиб олди.

— Бор, ўроғингни ўр.

Унинг овози бўғиқ, хунук янграр эди. Осетров Да-видовнинг мункайган гавдасига диққат билан қаради-да, яна бир марта қуюқ таъзим қилиб, аста-секин ўроқчилар томонга қараб кетди.

Давидов бир оз тинчланиб, йироқлашаётган Осетровнинг орқасидан узоқ қараб қолганча, ўйлади: «Бу казаклар аломат халқ! Устиннинг қанақа одам эканлигини пайқаб, билиб ол-чи. Ашаддий душманми ёки тили дилида борини яширмайдиган маҳмадона жангарими? Шу тариқа улар кун сайин менга янгидан янги жумбоқлар беришгани-беришган... Бу жин ургурларнинг ҳар бирини синчиклаб билиб ол-чи. Нима ҳам қилардим, билиб оламан-да! Зарур бўлса, булар билан бир пуд эмас, бир қоп тузни бирга еб бўлса ҳамки, бари бир синчиклаб билиб оламан, факт!»

Унинг ўйларини Устин бўлди. У от чоптирганча иккинчисини етаклаб келди.

— Дрожкига қўшиб нима қиласамиз, раис? Қел, бошқа ғравага қўша қолайлик. Агар хотинлар қай-

тишга кўнадиган бўлса, аравада ичак-чавоқлари узилиб қолмас!

— Йўқ, дрожкини қўш,— деди Давидов. У ҳамма режасини ўйлаб бўлган, иши ўнгидан келган тақдирда дрожки нима иш бериши мумкинлигини билар эди.

*
* *

Аравани қирқ минутча тез ҳайдаб боргандаридан кейин улар узоқдан ола-қуроқ ясаниб олган бир тўп аёлларни кўришди, аёллар сойнинг нариги беткайида-ги ёзлик йўлдан аста-секин тепага чиқиб кетишмоқда эди.

Устин Давидовга ёндашди.

— Қани, раис, ерга қапишиб ол! Ҳозир хотинлар сени иккинчи марта сазои қилишади!..

— Бир кўр: «Қўрамиз!» деган экан,— деди дадил Давидов, отларни тизгин билан саваркан.

— Така-пука бўлмаяпсанми?

— Нега така-пука бўларканман? Улар атиги ўн иккита-ку, эҳтимол, сал ортиқроқдир.

— Уларга мен ҳам қўшилсам-чи?— деб сўради Устин нечукдир илжайиб.

Давидов унинг юзига диққат билан тикилди. Аммо унинг гапи жиддийми ёки ҳазиллашялтими,— буни аниқлаёлмади.

— Унда иш қанақа тус олади? Унда нима бўлади?— яна сўради Устин, аммо энди илжаймас эди.

Давидов отларини шартта тўхтатиб, аравадан тушди-да, дрожкининг олдига келди. Қўлини пиджагининг ўнг чўнтағига тиқиб, ундан Нестеренко совға қилган тўппончани олди-да, Устиннинг тиззасига қўйди.

— Мана бу ўйинчоқни олиб, кўздан нарироқقا яшириб қўй. Бирор гап бўлиб, сен хотинларга қўшилиб кетадиган бўлсанг, васвасамни босолмай, ҳаммадан олдин сенинг каллангдан туйнук очиб қўймай, деб қўрқаман.

Ў қамчи солини Устиннинг терлаб кетган қўлидан

оёонликча суғуриб олди-да, қулочкашлаб туриб қамчини йўлдан узоқроқ жойга улоқтириб ташлади.

— Энди жўнайлик! Сен ниқтаброқ ҳайда, Устин Михайлович, қамчининг бориб тушган жойни ҳам яхшилаб эслаб қўй. Қайтаётганингда ола кетамиз, факт! Тўлпончани бўлса қўшхонага қайтиб борганимизда берасан, чуҳ де!

Хотин-қизларга етиб олгач, Давидов уларни чақонлик билан четлаб ўтди-да, аравани йўлга кўндаланг қилди. Устин отларини араванинг олдида тўхтатди.

— Барно ойимчалар, саломатмисизлар!— ясама хушчақчақлик билан саломлашди диндор хотинлар билан Давидов.

— Саломатмиз, ҳазиллашмаётган бўлсанг,— ҳамманинг ўрнига жавоб берди шаддод бир хотин.

Давидов аравадан сакраб тушиб, кепкасини олдида, бошини қўйи солди:

— Колхоз правлениеси номидан сизларнинг ишга қайтишларингизни илтимос қиласман. Мени сизларнинг олдингизга эркакларингиз юборишди. Улар аллақачон ўроққа тушишган.

— Биз сайилгоҳга эмас, ибодатга кетяпмиз!— дея тутақиб қичқирди қип-қизил юзи тердан йилтираб турган ўрта яшар бир хотин.

Давидов ғижимланган кепкасини икки қўли билан кўкрагига босди:

— Ўримдан кейин тўйгуналарингча ибодат қилинглар, ҳозир мавруди эмас. Уни қаранглар — булат босиб келяпти, ўроққа тушган жойларингизда биронта ҳам ғарам уйилмабди. Пичан нобуд бўлади-ку! Ҳаммаси чириб кетади-ку. Агар пичан нобуд бўладиган бўлса қишида чорва ҳам нобуд бўлади. Буни мендан кўра ўзинглар ҳам яхши биласизлар!

— Сен булатни қаерда кўрдинг?— кулиб сўради ёшгина бир қиз.— Осмон худди ювилгандек мусаф-фо-ку!

— Барометр ёмғирдан дарак беряпти, бунга булатнинг дахли йўқ,— яккаш чап берарди Давидов.— Ҳадемай албатта ёмғир ёғади! Юринглар, ўргилай ойимчалар, келар якшанбага бориб ибодат қила қо-

ларсизлар. Сизларга нима фарқи бор? Чиқинглар, елдирганча учириб кетаман! Чиқинглар, ўргилиб кетайлар, бўлмаса иш қолиб кетяпти.

Давидов илиқ-иссиқ сўзларини аямай колхозчи аёлларга ялиниб-ёлворарди. Улар ҳам иккиланиб, грангсиб, бир-бирлари билан шивирлаша бошлишди. Шу пайт Davидов мутлақо кутмаган бир ҳолда Устин унинг жонига ора кирди: У Нечаевнинг лўппи ва бўйдор хотинининг орқасидан сездирмай келиб даст кўтариб олди-да, кулиб, зўр бериб муштлаганига ҳеч эътибор қилмай, уни ғизиллаганича олиб бориб эҳтиёт билан араванинг орқасига ўтқазиб қўйди. Хотин-қизлар кула-кула қийқирғанларича ҳар томонга тўзиб кетишиди.

— Аравага ўзинглар чиқинглар, бўлмаса ҳозир қамчинимни оламан!— кўзларини ола кула қилиб, овози борича бўкирди Устин. Аммо шу ондаёқ хахолаб кулиб юборди:— Лекин чақон-чақон бўлинглар, рўдано алвастилар!

Аравада тик турганча бошидан сирғилиб тушган рўмолини тузата-тузата Нечеевнинг хотини қичқирди.

— Қани, чиқинглар, эгачилар, тезроқ! Нима, сизларни кутиб туравераманми? Қадри-қимматимизни кўрдингларми, бизни олиб кетгани раиснинг ўзи келиби!

Хотин-қизлар уч томондан келиб бир-бирларини турткилай-турткилай, кулиша-кулиша, Давидовга қараб-қараб қўйиб бемалол аравага чиқиб олишди. Йўл устида иккита кампир қолди.

— Тубянскойга ёлғиз ўзимиз боришимиз керакми, қуриб кетгур бетавфиқ?— Атаманчукова кампир Давидовга еб юборгудек ўқрайди.

Аммо Давидов ўзининг собиқ матрослик вақтидағи ҳамма илтифоткорлигини ишга солиб, таъзим-тавозе қилганча пошналарини бир-бирига уриштириди:

— Нега энди пиёда борарканлизлар, бибигиналарим? Мана сизлар учун маҳсус дрожки, шунда жўнанглар. Бемалол ибодатларингни қилинглар. Сизларни Устин Михайлович олиб боради. Ибодат тугагунча кутиб туради, кейин хуторга олиб келиб қўяди.

Ҳар бир дақиқа ғанимат, кампирларнинг розилиги-ни кутиб ўтиришнинг ҳожати йўқ эди! Давидов уларнинг қўлларидан етаклаб дрожкининг олдига олиб борди. Атаманчукова кампир яккаш тархашлик қилас, аммо Устин унинг орқасидан одоб билан секингина ниқтаб бормоқда эди. Қампирларни бир амаллаб ўтқазиши, Устин тизгинни қўлига оларкан оҳиста, жуда оҳиста гапириди:

— Шайтондан ҳам айёр экансан, Давидов!

Шунча вақтдан бери у илк мартагина раисининг фамилиясини атади.

Давидов буни кўнглидан ўтказиб, хомушгина жилмайди: уйқусиз кечириган ташвишлар кор қилиб, энди уни уйқу босмоқда эди.

XIV БОБ

— Бу йил пичан хўп бўлиб берди-да! Ёғингарчилик ишимизни расво қилмай, ўроқни қурғоқчиликда битириб олсак борми — пичанга маяргаб бўлиб қоламиз! — деди Агафон Дубцов Давидовнинг соддагина кабинетига кириб, чоллардек томоқ қирганча ҳоргинлик билан скамъяга ўтиаркан.

Яхшилаб ўрнашиб ўтиргандан сўнггина офтобда айниб кетган фуражкасини ёнига қўйиб, чит кўйлагининг енги билан қуёшдан қорайган чўтири юзидағи терни артди-да, жилмайганча Давидов ва унинг столи олдида ўтирган ҳисобчи ва Яков Лукичга мурожаат қилди.

— Саломат бормисан, раис, сизлар ҳам саломатмисизлар, маҳкамама каламушлари!

— Галлакор Дубцов келди! — пиқиллаб кулди ҳисобчи. — Бу амакимга диққат билан назар солинг, ўртоқ Давидов! Сен ҳам ғаллакормисан, Агафон?

— Сенинг фикрингча, бўлмаса мен кимман? — Дубцов ўқрайганча ҳисобчига тикилди.

— Ким бўлсанг ҳамки, галлакор эмассан.

— Ҳар қалай-чи?

— Сенинг кимлигингни айтишга тил ҳам бормайди...

Дубцов қовоғини солиб яна ҳам тундлашиб кетди, унинг қорайган юзи гүё баттар қорайиб кетгандек бўлди. Фазаби ичига сиғмай гапирди:

— Ҳой, кўп тантиқлик қиласкерма, фикрингча мен ким эканлигимни тезроқ айт. Агар сўзинг томоғингга тиқилиб қолган бўлса, яғринингга бир тушираман, дарровгина тилга кирасан!

— Сен худди лўлининг ўзисан!— деди ҳисобчи қатъий.

— Ия, нега энди лўли бўларканман? Нима учун лўли бўларканман?

— Беҳуда эмаслиги кўриниб турибди.

— Бурга ҳам беҳуда чақмайди, бир ният билан чақади. Сен ҳам менга малол келадиган муддаонгни очиб айт.

Ҳисобчи кўзойнагини олди-да, қалами билан қулоғининг орқасини қашиди.

— Сен гижинма, Агафон, сўзларимнинг мағзини чақ. Ғаллакорлар далада ишлашади, шундайми? Лўлилар бўлса, хуторма-хутор дайдиб, тиланчилик қилишади, бежо турган нарса бўлса — ўғирлаб кетишади. Мана сен ҳам: нима учун хуторга келдинг? Ўғирлик қилгани келмагандирсан-ку? Демак, бирон нарса тилагани келгансан. Тўғри айтдимми?

— Тилагани эмиш...— деб қўйди журъатсизгина Дубцов.— Нима, сизларни кўриб кетгани келишим ҳам мумкинмасми? Ўзим шунчаки, ёки, чунончи, биронта иш билан келиб-кетишим ҳам мумкинмасми? Сен менга изм бермайсанми, тўрткўз каламуш?

— Дарҳақиқат, нима учун келдинг?— жилмайиб сўради Давидов.

Аммо Дубцов саволни эшиитмагандек бўлди. У ним қоронғи хонани кўздан кечириб, ҳавас билан хўрсишиб қўйди:

— Онангни эмгур баъзи одамларга хўп маза! Деразаларининг дарчалари ёпиб қўйилган, уйларига муздек сувни шакароб қилиб сепиб қўйишган: жимжит, ним қоронғи, салқин; биронта пашша ҳам йўқ, биронта чивин ҳам гингилламайди... Фалонингга писмадон даштда бўлса тонгдан шомгача офтоб куйдиради, кундуз куни бўлса сўна худди молга ўхшатиб

қонингни сўради, ҳар хил ярамас пашшалар худди хира хотинингдан ҳам баттар ёпишиб талайди, кечаси бўлса чивин тинчлик бермайди. Чивин бўлганда ҳам расмона чивин эмас, гвардияча жуссали чивин! Айтсан ишонмайсизлар, оғайнилар, ҳар биттаси—нақ чумчуқдек келади, қонга тўйғандан кейин ҳатто чумчуқдан ҳам катта бўлиб кетади, рост айтяпман! Турқига қарасанг аллақандай сарғиш шумшук, тумшуғи ҳам салкам бир вершокча келади. Бу лаънати зипунинг устидан чақиб қолса борми — найзасини бир суқишидаёқ худо ҳақи, эт-этингдан ўтказиб юборади! Биз ҳар қандай қанотли газандалардан шу қадар азоб чекяпмизки, уларнинг дастидан шу қадар кўп қон тўкяпмизки, ростини айтсан, гражданлар урушида ҳам бунчалик бўлмаган эди.

— Ёлғонни ҳам роса дўндирадиган бўлибсан-да, Агафон! — кула-кула қойил бўлди Яков Лукич. — Сен бу борада ҳадемай Шчукаръ бобони ҳам йўлда қолдириб кетасан.

— Ёлғон гапириб нима қиласман? Сен бу ерда соясалқингинада ўтирибсан-да, даштга чиқиб боргин — ўшанда кўрасан, — деб ғижинди Дубцов, аммо сузилган шўх кўзларида анчагача табассум аrimай турди.

У бригаданинг мاشаққатлари ва эҳтиёжлари ҳақидаги ясама, ҳасратли ҳикоясини яна давом эттиравериши ҳам мумкин эди-ю, аммо Давидов унинг гапини шартта бўлди:

— Бас! Айёрлик ишлатиб оби дийда қилмай, бизни лақиллатма. Очигини айт: нима учун келдинг? Ердам сўраганими?

— Берсанглар ошиқчалик қилмасди-я.

— Нимадан сиқилган жойинг бор, етимча: даданми ё ойиданми?

— Ҳазилни хўп боплайсан-да, Давидов, аммо бизнинг зуваламиз йифи-сиғидан эмас, кулги-қаҳқаҳадан йўғрилган.

— Мен сендан астойдил сўраяпман: сизларга нима етишмаяпти? Одамми?

— Одам ҳам етишмайди. Терновая балканинг ёнбағирларида — ўзинг ҳам кўргансан — пичан жуда яхши ўсган, аммо қияликлар билан ҳар хил ўнгирлар-

га ўроқ машина солиб бўлмайди, бригададаги чалгичиларнинг баракаси йўқ. Шундай пичаннинг бекорга нобуд бўлиб кетаётгани жуда алам қиляпти!

— Бўлмаса сенга яна иккита-учта ўроқ машина юбора қолайлик, чунончи, биринчи бригададан олиб бўлса ҳам? — қувлик билан сўради Давидов.

Дубцов ҳасратли хўрсиниб, ўзи эса Давидовга ғамгин ҳолда синовчан назар билан узоқ қараб турди. Ҳадеганда жавоб бермай, охирги марта хўрсинди-да, деди:

— Йўқ демасдим. Қари қиз сўқир куёвни ҳам қайтармас экан... Мен шундай деб ўйлайман: колхоздаги ишимиз кўпчиликнинг иши, кўпчиликнинг фойдасига лизмат киласди, бошқа бригададан ёрдам олишни орномус деб билмайман. Тўғрими?

— Мулоҳазанг тўғри. Аммо бегона отлар пичан ўриш, икки суткалаб пичан ўриш ор-номус эмасми?

— Бегона отларинг нимаси? — Дубцовнинг овозида шундай самимий ҳайрат оҳанги янградики, Давидов кулиб юбораёзди:

— Билмагандай ўсмоқчилайсан-а? Любишкиннинг икки жуфт отини ўтлаб юрган жойидан ҳайдаб олиб кетган ким, билмайсанми? Бир жиҳатдан, ҳисобчимиз ҳам ҳақли: сенинг табиатингда лўлиларга хос бир нарса бор: тиланишни ҳам яхши кўрасан, бирорларнинг отларига ҳам лоқайд қаролмайсан...

Дубцов ўғирилиб, нафрат билан туфурди:

— Шулар ҳам от бўлдими! Бу қирчангилар бизнинг бригадамизга ўzlари адашиб келиб қолишиди. Уларни ҳеч ким ҳайдаб олиб келгани йўқ, қолаверса — ўзимизнинг колхозимизга тегишли бўлгандан кейин нега бегона бўларкан?

— Нега бўлмаса ўша қирчангиларни дарров учинчи бригадага жўната қолмай то эгалари келиб ўроқ машиналарингдан чиқариб олиб кетгунларича қараб турдинг?

Дубцов кулиб юборди:

— Эгаларини қаранглар! Ўз томонларидан отларини икки кунгача қидириб топишолмабди! Эга деган ҳам шұнақа бўладими? Улар эга эмас, лапашанг!

Хўп, бу ўтиб кетган гап, биз Любискин билан ярашиб ҳам олдик, ўтган ишга салавот. Мен бўлсам, бу ерга ёрдам сўраб эмас, муҳим бир иш билан келдим, Муҳим бўлмаса ўримни ташлаб кела олармидим? Қолаверса, биз ҳеч қандай ёрдамсиз ҳам ишни ўз кучларимиз билан эплаймиз. Бу қари каламуш ҳисобчи Михеич бўлса мени дарров лўлига чиқариб қўйди. Бу адолатдан эмас! Биз жуда қўлимиз қисқалик қилиб қолгандагина ёрдам сўраймиз. Шунда ҳам тишимизни тишимизга қўйиб ёрдам сўраймиз, бўлмаса иззатнафсимиз йўл қўймайди... Бу шўрлик Михеичнинг қишлоқ хўжалиги бобида нимага ҳам фаҳми етарди? У чўтнинг соққасидан бунёдга келган, ўлганда ҳам шу билан ўлиб кетади. Сен уни менга бир ҳафтағагина бериб тур, Давидов, бригадамга олиб чиқиб кетай. Уни лобогрейкага пичан ирғитгани ўтқазиб қўйиб, отларни ўзим ҳайдайман. Мен унга қандай ишлаш кераклигини ўргатиб қўяман! Ўмри бино бўлиб ақалли бирон марга қўзойнагини тер боссин-да!

Ҳазиломуз суҳбат жанжалга ўтиб кетиш хавфи ҳам бор эди-ю, аммо Давидов шоша-пиша савол бериб бунинг олдини олиб қолди:

— Қандай муҳим ишинг бор эди, Агафон?

— Нима десам экан энди... Бу иш биз учун, албатта, муҳим, аммо сизлар бунга қандай қарар экан-сизлар, буниси бизга узил-кесил номаълум... Хуллас, мен учта ариза олиб келдим, улар, албатта сиёҳ билан ёзилган. Ҳисобчимииздан чўлтоққина бўёқ қалам сўраб олиб ўзагини доғ сувда эритдик-да, ҳаммамиз бир тариқада шу аризаларимизни битдик.

«Текинхўрлик кайфиятлари» учун Дубцовнинг қаттиқ таъзирини беришга тайёрланиб турган Давидов энди қизиқиб қолиб сўради:

— Қандай ариза?

Унинг саволига эътибор бермай, Дубцов гапида давом этди:

— Буларни менинг фаҳмимча, Нагульнинг олиб бориш керак эди-ю, аммо у уйида йўқ, биринчи бригадада экан. Шунинг учун бу қофозларни сенга беришга қарор қилдим. Қайтиб олиб кетолмайман-ку!

— Аризаларинг нима тұғрисида? — сабрсизлик билан қайта сұради Давидов.

Дубцовнинг жицдийлашган юзида бояги хушчақ-чақликтан асар ҳам қолмади. У ошиқмасдан күкрак чүнтагидан синиң сүяқ тароқ парчасини олиб тердан ёпишиб қолган соchlарини юқорига тараб ўзини тузатди-да, шундан сүнггина ички ҳаяжонини босганча сўзларини лўнда-лўнда қилиб гапира бошлади:

— Биз ҳаммамиз, яъни уч киши шу ишга талабгор бўлиб қолдик, партияга кирмоқчимиз. Биз Гремячий ячейкамиздан бизни большевистик партиямизга қабул қилишини сўраймиз. Биз узоқ вақт кечалари билан ҳар қанақасига мулоҳаза қилиб қўрдик, ўзаро ҳар хил музокаралар ўтказдик, бир оғиздан қарорга келдик — кирамиз! Ётар олдидан даштга қараб кетамиз-да, бир-биримизни танқид қилишга тушамиз, аммо бари бир ҳар қайсимиз бир-биримизни партияга муносиб деб топдик, энди сизлар ўзаро қандай қарорга келсанглар — шу қарор, қарор. Бизларни биттамиз оқларда хизмат қилганини пеш қиласверди, мен унга шундай дедим: «Сен оқларда муте оддий аскар бўлиб беш ой хизмат қилгансан. Қизил Армияга бўлса ўз ихтиёринг билан қочиб ўтиб, унда икки йил командир бўлиб хизмат қилдинг, демак, сенинг кейинги хизматинг ёнгиг кетади, сен партияга муносибсан». Иккичимиз айтдикни, сен Давидов, аллақачонлароқ уни партияга таклиф қилган экансан-у, у ҳўқизларидан кўнглини узолмаганлиги учун кўнмаган экан. Ҳозир у ҳам шундай дейди: «Қулакларнинг болалари қўлларига қурол олиб эски замонни қайтармоқчи бўлиб турганида хусусий мулкдан кўнгил узолмаслик яратадими! Ўзимнинг собиқ хусусий ҳўқизларим билан бошқа молларимга ачинишдан астойдил воз кечиб, худди бундан ўн йил илгаригидек Совет ҳокимиятини ёқлаб, коммунистлар билан бир сафда туриш учун партияга ёзиламан». Мен ҳам шундай фикрдаман, шу тариқа ҳаммамиз ариза ёздик. Сидқидилдан айтганда, ҳаммамизнинг аризамиз ҳам унча лўнда қилиб ёзилган эмас-у, аммо... — шу орада Дубцов Михеич томонга кўз қирини ташлаб қўйиб, галини тугатди: — ахир бизлар ҳисобчилик билан мирзаликдан таълим

олган эмасмиз-да. Бироқ битганларимизнинг ҳаммаси чин ҳақиқат.

Дубцов индамай қолди, пешанасини босган герни яна бир марта кафти билан артди-да, чап томонига энгashiброқ, шимининг ўнг чўнтағидан газетага ўралган аризаларни олди

Бу нарса мутлақо ҳаёлга келмаган эдики, хона бир дакиқача жимжит бўлиб қолди. Ҳозир бўлганлардан биронтаси ҳам чурқ әтмади, аммо Дубцовнинг сўзларини ҳар қайсилари ўзларича кутиб олдилар: ҳисобчи навбатдаги маълумотдан бошини кўтариб, ҳайрат билан кўзойнагини пешанасига суриб қўйти ва мижжа қоқмай ҳанг-манг бўлганча шашкурлари билан Дубцова гикилиб қолди; Яков Лукич нафратли ва гунд истеҳзосини яширолмай угиришиб олди, Давидов эса хурсандликдан яйраб жилмайганча ўзини стулнинг суюнчиғига шундай ташлаб юбордики, остидаги стул ўйноқлаб, зорлангандек ғижирлади.

— Бизнинг ҳужжатларимизни қабул қилиб ол, ўртоқ Давидов,— Дубцов газетани очиб Давидовга қингир-қийшиқ йирик ҳарфлар билан тўлатилган бир неча варақ дафтар қофозни узатди.

— Кимлар ариза ёзи?— янгроқ овоз билан сўради Давидов.

— Кичик Бесхлебнов, мену Кондрат Майданников.

Аризаларни қабул қилиб оларкан, Давидов ҳаяжонини босганча гапирди:

— Бу жуда таъсири факт, бу сиз ўртоқ Дубцов билан Майданников ва Бесхлебнов ўртоқлар учун ҳам, биз — Гремячий партячейкасининг аъзолари учун ҳам кайта воқеа. Шу бугуноқ аризаларингизни Нагульнога топшираман, сен ҳозир бригадага жўнаб ўртоқларни огоҳлантириб қўй, якшанба куни уларнинг аризаларини очиқ партия мажлисida қўрамиз. Кечқурун соат олтида мактабда бошлаймиз. Ҳеч қандай амалий кечикиш бўлмаслиги керак, вақтида етиб келинглар. Айтмоқчи, бу ишдан ўзинг кўзгулоқ бўласан. Тушданоқ дурустроқ отларни қўшиб хуторга тушиб келинглар. Яна бир гап. Қўшхонала-

рингда тушиб келишларингиз учун аравадан бошқа-роқ нарса борми?

— Бричка бор.

— Хўп, ана ўшанга тушиб хуторга марҳамат қиласизлар.— Давидов яна қандайдир гўдакларча яйраб жилмайиб қўйди. Аммо шу ондаёқ Дубцовга имо қилди:— Мажлисга куёвлардек ясаниб келасизлар! Бундай иш одамнинг умрида бир марта бўлади, ошнажон. Бу шундай воқеаки, ошина... Бу худди ёшликка ўхшайди, азизим; қайта такрорланмайди.

Афтидан, у сўз тополмас эди, астойдил ҳаяжонланганча индамай қолди, кейин бирдан ташвишланиб сўради:

— Бричканг тузуккинами?

— Тузуккина, тўртта филдираги бор. Унда гўнг ташиса бўлади, кундуз куни одам тушса бўлмайди, ори келади, фақат кечаси қоронғида юрса бўлади. Шалаги чиқиб, сўлогои ўйнаб кетган, ўзи ҳам мен билан тенгқур бўлса керак. Кондратнинг айтишига қараганда, уни хуторимиздаги казаклар Наполеондан Москванинг яқинида тортиб олишган экан..

— Ярамайди!— деди Давидов қатъий.— Сизларга рессорли дрожки қўшдириб Шчукарь бобони юбораман. Айтялман-ку, бундай воқеа одамнинг умрида бир марта бўлади, деб.

У ўзи яхши кўрган, ишонган одамларнинг партияга киришларини тантаналироқ нишонлагиси келарди. Шунинг учун ҳам, бу ажойиб кунни ҳашаматлироқ қилиш учун яна қандай чоралар кўриши мумкинлигини ўйлаб қолди.

— Якшанбага мактабни суваб, оқлаш керак, япянгидек бўлиб турсин,— деди ниҳоят у Островновга фаромушлик билан қараб.— Атрофини супуриб-сидириб, майдонча билан мактаб ҳовлисига қум сепиш керак. Эшитдингми, Лукич? Ичкаридаги поллар, парталар қиртишлаб тозалансин, шифтлар ювилсин, хоналар шамоллатилсан, хуллас тўла-тўкис тартибга келтирилсан!

— Борди-ю, халойиқ кўпайиб кетиб ҳамма мактабга сифмай қолса-чи, унда нима бўлади?— деб сўради Яков Лукич.

— Клуб қуриш керак эди — ўшанда соз бўларди! — деди Давидов оҳиста, жавоб бериш ўрнига ширин хаёл суреб. Аммо дарҳол ҳуши ўзига келди: — Болалар билан ўсмиirlар мажлисга киргизилмаса ҳамма сиғади. Лекин мактабни бари бир шундай бир... хўш, чунончи, байрамдагидек қилиб қўйиш керак!

— Кафолатчиларни нима қиласиз? Бизнинг томонимизни ким олади? — савол берди Дубцов кетишидан олдин.

Давидов унинг қўлини қаттиқ сиқиб жилмайди:

— Сен кафолат берувчиларни айтаяпсанми? Топилади! Бугун кечқурун сизларга гавсиянома ёзамиз, факт! Хўп, оқ йўл. Биздан ҳамма ўроқчиларга салом айт, улардан илтимос қилки, пичанин тобидан ўтказиб юборишмасин, пичанлар ғарамга уюлмай қувраб қолмасин. Иккинчи бригадага ишонса бўладими?

— Бизга ҳамма вақт ишонавер, Давидов, — деб жавоб берди Дубцов ўзига хос бўлмаган жиддийлик билан ва хайрлашиб чиқиб кетди.

* * *

*

Эртасига эрталаб жуда барваҳт Давидовни квартирасининг эгаси уйғотди:

— Тур, истиқоматчим, сенга жанг майдонидан отлиқ чолар келди... Устин Мўлоқ учинчи бригададан яйдоқ от чоптириб келибди, калтак еганроқ, кийими ҳам бежороқ...

Уй эгаси оғзи қулоғида тиржаярди. Аммо Давидов уйқусираб нима гаплигини дарҳол тушуна қолмади; ғижимланган ёстиқдан бошини кўтариб, лоқайдик билан ланжгина сўради:

— Нима дейсан?

— Сенга чолар келди, деяпман, афти-башараси дабдала, ёрдам сўраб келганга ўхшайди...

Давидов уй эгаси сўзларининг маъносини шундан кейингина фаҳмлаб, шоша-пиша кийина бошлиди. У даҳлизда кечаси билан ҳам совимаган илиқ сув билан башарасини апир-шапир чайнб, зинапояга чиқди.

Пастки босқичнинг олдидаги бир қўлида тизгинни ушлаб, иккинчи қўли билан эса чопиб келганидан

ўйноқлаётган ёш бияга қамчи ўқталиб Устин Рикалии турарди. Офтобда ўнгиб кетган кўк кўйлагининг бир неча жойи этагигача йиртилиб тушган, кифтида аранг турар, чап юзи ёноғидан энгагича кўм-кўк мўматалоқ бўлиб кетган, кўзи бўлса, қип-қизариб шишиб чиққан, ўнг кўзи ғазаб ва қаҳр билан чақнамоқда эди.

— Буни қаердан орттириб келдинг?— қизиқиб сўради саломлашишни ҳам унутиб зинапоядан тушган Давидов.

— Талон, ўртоқ Давидов! Талон-торожнинг ўзи, вассалом!— дея қичқирди хирқираб Устин.— Итваччаларни қара, шундай ҳам иш қиласдими, а?! Ўйноқлайвермасанг-чи, лаънат теккан!— Устин оёгини босиб олаёзган отга яна қаҳр билан қамчи силтади.

— Тушунтириброқ гапирсанг-чи,— илтимос қилди Давидов.

— Бундан ортиқ тушунтириброқ гапириш ҳам қийин! Кўшни эмиш булар, уйинг куйгур, офат теккур, текинхўрлар! Мана бунга нима дейсан? Тубянскойликлар, тишинг тўкилгур қўшниларимиз бугун кечаси ўгринча, Калинов Уголга ўғринча келиб ўттиз ғарамча пичанимизни олиб кетишибди. Тонг ёришганда қарасам — иккита кеч қолган аравага пичанимизни бошиялти, атроф эса шип-шийдам, биронта ҳам ғарам кўринмайди! Мен отга минганимча олдиларига югуриб бордим: «Бу нима қилганларинг, фалон-писмадонлар?! Нимага асосланиб бизнинг пичанимизни ортапсизлар?!», дедим. Улардан берироқдаги аравада турган бир газандаси кулиб: «Сизларники эди — энди бизларники бўлди. Бироннинг еридаги пичанни ўрманглар» дейди. «Нега биронники бўларкан? Қўзинг оқиб тушганми, чек қозиги қаерда турганини кўрмаяпсанми?» дедим. У бўлса: «Ўзинг кўзингни яхшилаб очиб қара, қозиқ сенинг орқангда турибди-ку. Бу ер азалдан бизники. Тубянскойга қарайди. Гайрат қилиб бизга пичан ўриб берганларингиз учун сизларни худо ёрлақасин» дейди. Ҳали шунақами? Қозиқ масаласида фиригарлик ишлатмоқчимисизлар? Хўш, мен уни оёғидан тутиб аравадан сургаб туширдим-да, бироннинг ери билан ўз ерини адаштирмай кўзини очиброқ юриши учун чўлтоқ қўлим билан қаншарига бир

түширдим... Боплаб бир туширган эдим, қулаб тушди, туриш беролмади. Шундан кейин қолган учтаси чопиб келди. Яна биттасини ер тишлатдим, ўшандан кейин уларни уришга вақтим бўлмади, чунки улар мени тўртловлашиб уришди. Ахир бир одам тўрт одамга бас кела оларми? То бизникилар муштлашгани етиб келгунларича улар мени худди пасҳадаги тухумдай безаб ташлашди, кўйлагимни ҳам дабдала қилишди. Ахир, бу газандалик эмасми? Энди хотинимга қандай қилиб кўринаман? Хўп, уришса ура беришмайдими, гирибонимга ёлишиб кўйлагимни нега шилишади? Энди мен уни нимага яратаман? Полиздаги қўриқчига бера қолай десам бунаقا жулдур увадани устига илишдан қўриқчи ҳам ор қилади, қизларга лента қилиб улашиб берай десам — тақишимайди: тўғри келмайдиган мата... Хўп, ўша тубянскойликлардан биронтаси даштда ёлғиз ўзимга рўпара келиб қолмасмикан! Ўшанда худди менга ўхшаб хотинининг олдинга кўм-кўк мўматалоқ бўлиб борарди!

Давидов Устинни қулоқлаганча кулиб юборди:

— Хафа бўлма, кўйлак топилиб кетади. Мўматалогинг бўлса тўйгача тузалиб қолади.

— Сенинг тўйинггачами? — деб кесатди Устин.

— Хуторда бўладиган биринчи тўйгача. Мен ҳали ҳеч кимга совчи қўйганимча йўқ. Якшанба куни сенга тоғанг нима дегани эсингдами? «Жангари хўрозвонинг тожи ҳамиша қонаб юради».

Давидов жилмаяр, ичиди эса ўйлар эди: «Сен азим, Устин, ўз хусусий пичанинг учун эмас, колхоз пичани учун уришиб кетганинг жуда ҳам соз-ку. Бу жуда ҳам таъсирили факт-ку!»

Аммо Устин хафа бўлиб четланди:

— Сен зўр бериб тиржаяяпсан-у, Давидов, менинг ҳамма қовурғаларим зирқираб кетяпти. Сен ҳиринг ҳиринг билан қутулиб қўя қолмай, дарров отга миниб Тубянскойдан пичани олиб кел. Икки аравасини биз олиб қолдик, улар кечаси қанча олиб кетишган экан?! Талончилик қилганлари учун пичанларимизни худди хоторимизнинг ўзига олиб келиб беришсин, шунда адолатли иш бўлади.— Лат еб қонаган, шишган лабларини табассум билан аранг очди:— Кўриб туарсан,

пичанни хотин-халажнинг ўзи олиб келади, казаклари бизга келгани ботинишолмайди. Ўғирликка бўлса нуқул казакларнинг ўzlари келишибди. Шундай йигитлар сараланиб келишибди, тўртовлашиб муштлари билан парваришлишга тушганларида, ҳатто беҳузур бўлиб кетдим... Мени ерга яқинлаштиришмайди, йиқилгани қўйишмайди, хун бўлиб кетай дедим! То бизникилар етиб келишгунча қўлма-қўл ўтказиб туришди. Мен ҳам чўлтоқ қўлимни аямадим-у, аммо зўрдан-эўр чиқса зўр думини қисади, деган гап бор.

Устин яна жилмайишга ҳаракат қилган эди, ижирғанибгина қўл силтаб қўя қолди:

— Бизнинг Любишкунни кўрсанг борми, кула-кула ичагинг узиларди, ўртоқ Давидов: атрофимизда зир югуриб айланади, девордан сакраб ўтишга чоғланган теватдай тисарилади, «Уларнинг дабдаласини чиқар, болалар! Ур, улар калтак кўтарадиган, мен уларни биламан!» деб бўкиради. Ўзи бўлса уришга аралашмай, ўзини тийиб турибди. Менинг тогам Осетров тутақиб кетиб, унга: «Бизга ёрдамлашсанг-чи, бесўнақай ахта! Ё орқангга чипқон чиққанми?» деб қичқиради. Любишкун бўлса йиғламоқдан бери бўлиб унга жавобан бўкиради: «Иложим йўқ! Мен партия аъзосиман, қолаверса — бригадирман! Уларни уриб дабдаласини чиқаринглар, мен бир амаллаб сабр қиласман!» Ўзи бўлса нуқул атрофимизда гир айланади, ўзини босиш учун тишини фижирлатади... Хўп, вақт кетмасин, бор тезроқ, нонушта қилиб ол, бу орада мен сенга биронта от топиб эгарлаб келаман, бригадага бирга борамиз. Чолларимиз, уни топиб келмасанг кўзимизга ҳам кўринма, дейишди. Биз ўзимизнинг ҳалол пичанимизни ҳаромтомоқларга туҳфа қилмоқчи эмасмиз!

Тубянскойга бориш масаласини ҳал бўлган деб ҳисоблаган Устин бияни зинапоя панжарасига боғлади-да, правление қўрасига қараб кетди. «Поляница-нинг олдига бориш керак,— деб ўйлади Давидов.— Агар пичанни унинг изми билан олиб кетишган бўлса, у билан жанжаллашишимиз турган гап. У эшакдан ҳам баттар қайсар, лекин бари бир боришга тўғри келади».

Давидов янги соғилган бир кружка сутни апир-шапир ичиб бир бурда суви қочган нонни кавшаб бўлиши билан кўча эшик олдига Нагульнининг саман отида янги кўйлак кийган, одатдан ташқари чаққон бўлиб кетган Устиннинг келганини кўрди.

XV БОБ

Гарчанд улар райкомда бир неча мартагина учрашган, бир-бирларини кўпроқ орқаворотдангина билсалар-да, Тубянскойдаги «Красний луч» колхозининг раиси — йигирма беш мингчи, Днепропетровскдаги металлургия заводларидан бирининг собиқ токари — Никифор Поляница Давидовни колхоз правлениеси биносида худди қадрдан ошинасидек қарши олди:

— Э-э-э, қимматли ўртоқ Давидов! Болтиқ денизчиси! Бизнинг ҳамма кўрсаткичлар бўйича қолоқ колхозимизга сени қайси шамол учирди? Қани тўрга чиқ, ўтири, қадрли меҳмонимиз бўласан!

Поляницанинг сепкил босган ялпоқ юзида муғам-бирана ясама табассум ўйнар, қора кўзларида кўр-кўронга мулоимлик йилтиллар эди. Учрашувдаги ҳаддан ташқари икром-эъзоздан Давидов бад олди, у қуруққина саломлашиб столга ўтирида, ошиқмасдан атрофга кўз ташлади.

Давидовнинг назарида колхоз раисининг қабинети ғалати кўринди: кенггина хонага охра билан бўялган кадка ҳамда сопол туваклардаги чанг босиб кетган гуллар қалаштириб қўйилган, уларнинг ораларида кир табуреткалар билан бирга эскигина вена стуллари ғарифона мунгайиб турибди; эшик олдида занглаған пружиналари ўйнаб чиқсан, доғ бўлиб кетган, алломат бир шаклдаги диван, деворлар «Нива»дан қирқиб олинган суратлар ва гоҳ Руснинг Киевда чўқинтирилишини, гоҳ Севастополь қамалини, гоҳ Шипкадаги жангни, гоҳ 1904 йилдаги уруш вақтида япон пиёда аскарларининг Ляоян яқинидаги атакасини тасвирлайдиган жўн литографиялардан ола-қуроқ бўлиб кетган.

Раис столи тепасида Сталиннинг сарғайиб кетган

портрети, рўпарадаги ёвбордә эса Морозов ип фабрикасининг пашшалар чаплаштириб юборган рангдор реклама сурати осилган. Суратда қирмизи нимчали азамат тореодор қутурган ҳўқизнинг шохини ип сиртмоқ билан чирмаб олганча сапчиётган ҳайвонни бир қўли билан ушлаган, иккинчи қўли билан эса bemalol қиличига сунниб турган эди. Тореодорнинг оёғи остида оқ ипининг ярми чувалган катта ғалтак ётарди, наклейкасидаги «Номер 40» деган ёзув аниқ кўриниб турарди.

Қабинетнинг жиҳозини бурчакдаги оқ тунука тасмалар қоқилган каттакон сандиқ мукаммаллаштирган. Афтидан, у ҳойнаҳой, Поляница учун пўлат сандиқ вазифасини бажарса керак: ҳажми сандиққа муносиб, ялтиратиб тозаланган баҳайбат омбор қулфи сандиқда биринчи даражадаги энг муҳим ҳужжатлар сақланайтганидан дарак берарди.

Давидов Поляницанинг кабинетини тезгина кўздан кечириб чиқаркан, ўзини жилмайишдан тиёлмади, аммо Поляница унинг кулгисини ўзича тушунди:

— Кўриб турибсан, қулайликларга эга бўлган ҳолда ўрнашдим,— деди у мамнуният билан.— Ҳамма нарсани илгариги кулак хўжайн вақтида қандай бўлса, шундайлигича сақлаб қолдим, хонанинг бутун ташқи қиёфасини сақлаб қолдим, фақат пар тўшакли каравот билан ёстиқларни фаррош хотиннинг хонасига олиб чиқиб қўйишиларини буюрдим, умуман эса файзини сақладим, шуни билиб қўй, ҳеч қандай маъмуриятчилик йўқ! Ҳеч қандай расмиятчилик йўқ! Ҳа, очиғини айтсам, ўзим ҳам уй-жой шароитини яхши кўраман, хоҳлайманки, одамлар ҳам ҳузуримга кирганларида ийманишмасин, ўзларини худди уйларида гидек сезишин... Гапим тўғрими?

Давидов жавоб беришдан қочиб елкасини қисдида, дарҳол муддаога кўчди:

— Менинг сенга айтадиган бир кўнгилсиз гапим бор эди, қўшни.

Поляницанинг кичкина айёр кўзлари терисининг гўштдор қатларида йўқолиб кетаёди, худди майда антрацит парчаларидек қоп-қорайиб товланди, қуюқ қора қошлари юқори кўтарилди, чимирилди.

— Яхши қўшниларнинг орасида кўнгилсиз гап нима қиласди? Сен мени қўрқитяпсан, Давидов! Сен билан биз ҳамиша сув билан балиқдек тутув бўлиб келган эдик, ҳозир дабдурустдан, кўнгилсиз гапим бор, деб ўтирибсан. Мен бунга сира ҳам ишонмайман! Нима десанг де, аммо мен ишонмайман!

Давидов Поляницанинг кўзларига тикилиб турарди, аммо-лекин улардан ҳеч бир маъно уқолмади. Поляницанинг юзи ҳамон илгаригисидек мулоийм ва сир бермас, лаблари мулоийм, осойишта жилмайиб турар эди. Афтидан «Красний луч» колхозининг раиси түгма артист бўлса керакки, ўзини усталик билан тутиб, сирини бой бермас, ўйинни ҳам устомонлик билан олиб бормоқда эди.

— Бугун кечаси бизнинг пичанимизни сенинг кўрсатманг билан олиб келишдими?— дангал сўради Давидов.

Поляницанинг қошлари яна ҳам юқорироқ кўтарилиди:

— Қанақа пичан, дўстим?

— Расмона, даштда ўсадиган пичан.

— Энди эшитиб турганим! Олиб келишибдими? Бизнинг тубянскойликлар-а? Мумкин эмас! Ишонмайман! Ўлдирсанг ҳам, отиб ўлдирсанг ҳам ишонмайман. Шуни билиб қўйки, Семён, дўстим, «Красний луч»нинг колхозчилари социалистик далаларимизнинг ниҳоятда соф виждонли заҳматкашлари, сенинг гумонларинг уларнинг шаънигагина эмас, колхоз раиси сифатида менинг шаънимга ҳам ҳақорат! Бу нарсани жиддий равишда билиб қўйишингни илтимос қиласман, дўстим.

Фаши келганини билдиримай Давидов осойишта гапирди:

— Менга қара, қалбаки дўстим, мен сенга Литвинов эмасман, сен ҳам менга Чемберлен эмассан, дипломатиябозлик қилишимизнинг ҳам ҳожати йўқ. Пичанини сенинг кўрсатманг билан олиб келишганми?

— Яна гапирасан-а, дўстим, қайси пичанни айтяпсан ўзи?

— Ахир бу оқ новвос ҳақидаги эртакка ўхшаб кетяпти-ку!— ғазаб билан хитоб қилди Давидов.

— Билиб қўй дўстим, мен жиддий сўраяпман, сен қандай пичан ҳақида гапиряпсан?

— Калинов Уголдаги пичан ҳақида. У ердаги пичанзорларимиз ёнма-ён, сизлар бизнинг пичанимизни ўғирлаб келибсизлар, факт!

Поляница англашилмовчилик яхшиликча ойдинлашганидан севиниб кетгандек ориқ сонларини қаттиқ шапатилаб урди-да, қаҳ-қаҳлаб кулиб юборди.

— Гапни шундан бошлаб қўя қолсанг бўлмасмили, ошна! Бўлмаса яккаш — пичан-пичан дейсан, қандай пичанлигини айтмайсан. Сизлар Калинов Уголда янгилишибми ёки жўрттагами бизнинг еримиздаги пичанни ўрибсизлар. Биз ўша пичанни мутлақо қонуний равишда олиб келдик. Тушундингми, дўстим?

— Йўқ, қалбаки дўстим, тушунмадим. Агар ўша пичан сизларники бўлса, унда нега ўғринчасига кечаси олиб кетдинглар?

— Бу бригадирнинг иши. Ҳайвон учун, одамлар учун ҳам кечаси ишлаш яхши, салқин бўлади, пичани шунинг учун ҳам кечаси ташишган бўлса керак. Сизлар кечаси ишламайсизларми? Чакки қилибсизлар! Жазира маънавиати кун ўртасида ишлашдан кўра, кечаси, айниқса ойдин кечада ишлаш анча енгил.

Давидов заҳарханда қилди:

— Ҳозир кечалар ҳам қоронғи, факт!

— Ҳе, биласанми, қоронғи кечада ҳам қошиқни янгилишмасдан оғзингга олиб борасан.

— Айниқса, қошиқда бегонанинг бўтқаси бўлса...

— Сен бу гапингни қўй! Била б қўйки, сенинг шамаларинг «Красний луч»нинг соф виждонли, анчагина онгли колхозчиларининг шаънига ҳам, раис сифатида менинг шаънимга ҳам қаттиқ ҳақорат. Ҳар қалай, биз заҳматкаш одамлармиз, фирибгар эмасмиз, шуни билаб қўй!

Давидовнинг кўзлари чақнаб кетди, аммо у ҳамон ўзини босиб гапирди:

— Сен дабдабали сўзларингни қўй, қалбаки дўстим, бўладиган гапга кўчайлик. Шу йилнинг баҳорида Калинов Уголда сойнинг икки томонидаги чек қозиқлари жойидан кўчирилганлиги сенга маълумми? Сенинг соф виждонли колхозчиларинг уларни кўчириб, чега-

ра чизигини түғрилаб, бизнинг тўрт-беш гектарча еримизни тортиб олишган. Шу сенга маълумми?

— Дўстим! Бу гапни қаёқдан топиб гапиряпсан? Сенинг гумонсирашинг, билиб қўйки, ҳеч қандай гуноҳсиз одамларнинг шаънига...

— Ҳадеб валақлаб ўзингни гўлликка солаверма!— Поляницанинг гапини бўлди беихтиёр қизиша бошлиган Давидов.— Нима, сен мени анойи лақма деб ўйла-япсанми? Сен билан жиддий гаплашсам, сен майна-возчиликка олиб, иззат-нафсингни пеш қиляпсан. Бу ёққа келганимда Қалинов Уголга шахсан ўзим кириб, менга колхозчилар айтган нарсаларни ўзим текшириб кўрдим: пичан ташиб кетилган, қозиқлар кўчириб қўйилган, факт! Сен бу фактдан ҳеч бир қочиб қутуломайсан.

— Мен ҳеч қаёққа қочмоқчи ҳам эмасман. Мана мен қаршингда туриш-турмушим билан турибман, менга билак яланғочлаб ёпишавер, аммо... ёпишишдан бурун қўлларингни яхшилаб ғудур қилиб ол! Қўлларингни яхшилаб ғудур қилиб ол, дўстим, бўлмаса мен, шуни билиб қўйки, бўлмаса налим балиққа ўхшаб шилт этиб чиқиб кетаман...

— Тубянскойликлар қилган иш баримта деб аталади, бунинг учун сен жавоб берасан, Поляница!

— Бу нарсани, дўстим,— чек белгиларининг кўчириб қўйилганлигини исботлаш керак ҳали. Сенинг гапинг, дўстим, исботсиз гап, холос. Пичанингга эса тамға босиб қўйилган эмас.

— Бўри тамғалик қўйни ҳам ўнгариб кетади.

Поляница сезилар-сезилмас жилмайиб, ўзи эса таъна билан бош чайқар эди:

— Аттанг, аттанг! Мана энди бизни бўрига ҳам ўхшатяпсан! Нима десанг деявер, аммо қозиқларни бирор суфуриб олиб кўчириб қўйганига ишонмайман.

— Сен ўзинг бориб текшириб кўр. Ахир белгиларнинг эски ўрни қолганми? Қолган! Ўша жойнинг тупроғи ҳам юмшоқроқ, ўт-ўлани ҳам пастакроқ, айланмаси ҳам кафтдагидек кўриниб туриди, факт! Хўш, бунга нима дейсан? Хоҳлайсанми — ўша ерга бирга бора қоламиз. Бўптими? Йўқ, ўртоқ Поляница, мени

чалғитолмайсан! Хўш, нима дейсан, борамизми ёйўқми?

Давидов жавоб кутганча индамай чекмоқда, Поляница ҳам ҳамон бамайлихотир жилмайганча индамай туарар эди. Гуллар қалаштириб ташланган хона дим. Деразаларнинг хира ойналарига пашшалар урилиб бир оҳангда ғўнгилларди. Фикуснинг ялтироқ яшил вазмин япроқлари орасидан Давидов зинапояга чиққан ёш жувонни кўриб қолди, жуда барвақт тўлишиб кетган, аммо ҳамон кўркли бу жувон нимдошигина юбка кийган, енги калта ичкўйлагини юбкаси ичига тиққан эди. Кафти билан кўзини қуёшдан тўсганча у кўчанинг аллақаеригадир қараб туарди. Бирдан жонланиб, ёқимсиз чийилдоқ овоз билан чинқириди:

— Фенька, қиз бўлмай ўлгур, бузоқни ҳайдаб чиқ!
Сигир подадан қайтганини кўрмаяпсанми?

Поляница ҳам деразадан жувоннинг елкасигача очиқ яланғоч лўппи, сутдек оппоқ қўлига, дурраси остидан тўзиб чиқиб шамолда ўйнаётган майин қўннир соchlарига қаради-да, нима учундир лаблари билан тамшаниб, хўрсиниб қўйди:

— Правлениенинг фарроши, шу ерда истиқомат қилиб, бу ерни озода тутиб, супуриб-сидириб туради. Туппа-тузук хотин-у, аммо жуда шанғи, шанғиллашини ҳеч ташлатолмаяпман... Далага боришимнинг эса ҳожати йўқ, Давидов. Сен бориб кўрган бўлсанг шунинг ўзи бас. Мен сенга пичанни қайтариб бермайман, қайтариб бермайман, бўлган гап шу, вассалом! Бу жанжалли иш: бу ерда ер тузиш ишлари беш йил бурун ўтган экан, тубянскойликлар билан гремячий-логликларнинг ўртасидаги бу довни ажрим қилиш сен билан бизнинг ишимиз эмас.

— Бундай бўлса — ким ажрим қилиши керак?

— Район ташкилотлари.

— Яхши, мен сенинг фикрингга қўшиламан. Аммо ер жанжали — ўз йўлига-ю, сен пичанни қайтариб бер. Уни биз ўрганмизми, у бизники.

Афтидан, Поляница ўз нуқтаи назарида беҳуда кўринган сухбатга барҳам бермоқчи бўлди шекилли. У энди илжаймасди. Столда чўзилиб ётган ўнг қўли-

нинг бармоқлари бирин-сирин қимирлаб бош бармоғи аста-секин шаҳодат бармоғи билан ўрта бармоғининг ўртасидан чиқди. Буни кўзи билан имо қилиб қўйиб, Поляница нима учундир ўз она тилида гапирди:

— Бунинг нималигини биласанми? Бу — зорманда. Менинг сенга жавобим шу! Ҳозирча хайр, мен ишлашим керак. Яхши бор!

Давидов заҳарханда қилди:

— Сенга қараб турсам, тентакнамороқ баҳсчи экансан... Наҳотки сўз тополмасдан, менга бозордаги чайқовчи хотинларга ўхшаб қўлингни шунаقا қилиб кўрсатсанг? Бу исбот эмас, оғайнничалиш! Ҳўш, шу лаънати пичанни деб устингдан прокурорга шикоят қиласми?

— Хоҳлаган одамингга шикоят қил, марҳамат! Хоҳлассанг — прокурорга, хоҳлассанг — райкомга, мен сенга пичанни қайтариб бермайман, ерни ҳам бермайман, шуни билиб қўй,— яна рус тилига кўчиб жавоб берди Поляница.

Бошқа гапирадиган гап қолмаган эди, Давидов ўрнидан туриб, мезбонга ўйчанлик билан қаради.

— Сенга қараб туриб таажжубланаман: сен ишчи, большевик одам бўлсанг-у, қисқа фурсат ичиде кекирдагингача майда хусусий мулкчилик ботқоғига ботиб қолсанг? Сен дастлаб кулакнинг жиҳози билан мақтаниб, бу хонанинг ташқи қиёфасини сақлаб қолдим, дединг, аммо фикримча, сен кулак уйининг ташқи қиёфасинигина эмас, ички руҳини ҳам сақлаб қолганга ўхшайсан, факт! Бу руҳ ярим йилнинг ичиде ўзингнинг ҳам суяк-суягингача сингиб кетибди! Агар йигирма йил олдинроқ туғилганингда борми, сен албатта бориб турган кулак бўларкансан, сенга амалий гапни айтяпман!

Поляница елкасини қисиб, ўткир чақнаётган кўзларини яна териси қатига яширди.

— Мендан кулак чиқиши-чиқмаслигини билмайман-у, аммо сен, Давидов, билиб қўйки, сен поп бўлмаганингда ҳам албатта черков оқсоқоли бўлардинг.

— Нега энди? — самимий таажжубланди Давидов.

— Шунинг учунки, сен, собиқ матрос кекирдагингача диний хурофотларга ботиб кетибсан. Шуни билиб

қўйки, агар мен райком секретари бўлганимда — бу ҳунарларинг учун партия билетингни столимга қўйиб қўйган бўлардинг.

— Қанақа ҳунарларим учун? Сен нималар деяпсан?— Давидов таажжубдан ҳатто елкаларини кўтариб қўйди.

— Ўзингни гўлликка солма! Нима тўғрисида гапи-раётганимни жуда яхши биласан. Биз бу ерда бутун ячейка билан динга қарши курашяпмиз, икки марта колхоз билан хоторнинг умумий мажлисида черковни ёпиш ҳақида масала қўйсаг-у, сен бўлсанг нима қил-япсан? Сен, билиб қўй, бизнинг йўлимизга тўғоноқ соляпсан, сен шундай қиляпсан!

— У ёғини ҳам гапир, эшишиб олай-чи, сенга қарши қандай тўғоноқлар солаётган эканман.

— Сен нималар қиляпсан, ўзи?— деб давом этарди энди анчагина қизиша бошлаган Поляница.— Сен якшанба кунлари кампирларни колхоз отлари қўшилган аравада черковга ибодат қилгани олиб боряпсан. Шундай қиляпсан! Бизнинг хотин-қизлар, билиб қўйки, буни менга пеш қилиб кўз очиришмаяпти: «Сен, фалон-писмадон, черковни ёпиб, уни клуб қилмоқчисан. Гремячийнинг раиси бўлса, диндор хотинларни иззат-икром қилиб, ҳатто байрам кунлари уларни от-аравада черковга юборади».

Давидов беихтиёр қаҳ-қаҳлаб кулиб юборди:

— Шуни айтиётганимдинг ҳали! Мен шунақа диний хурофотларга берилиб гуноҳ қилиб қўйган эканман-да! Бу унча ваҳима қиладиган нарса эмас-ку!

— Эҳтимол, сен учун унча ваҳима қиладиган нарса эмасдир, аммо биз учун, билиб қўйки, энг расво нарса!— тутикашиб гапида давом этди Поляница.— Сен колхозчиларга валламатлик қилиб, ҳамманинг кўзига яхши кўринишни истайсан. Бизнинг динга қарши ишимизга рахна соляпсан. Тавба, коммунист ҳам шунақа бўладими! Бошқаларни майда хусусий мулкчилик кайфиятлари учун қоралайсан-у, ўзингнинг қилаётган ишларинг бўлса, расвойи радди маърака. Сиёсий онгинг қани? Большевистик мафкуравийлигинг, динга нисбатан муросасизлигинг қани?

— Шошма, мафкурали ҳовлиқма! Оғзингга қараб-

роқ гапир!.. «Валламатлик қиласан» деганинг нимаси? Қампирларни нима учун от-аравада жўнатганимнинг сабабини биласанми? Нима мақсадда бундай иш тутганимни биласанми?

— Сенинг ўша мақсадларингга каттакон минорадан туриб туфурдим! Қўнгилга келган мақсадингни амалга оширавер-у, лекин бизнинг динга қарши курашда кўзда тутган мақсадларимизга футур етказма. Ўзинг биласан, нима десанг деявер, сенинг хулқ-атворинг масаласини райком бюросига қўйдирман, шуни билиб қўй!

— Мен, очигини айтсам, сени ақллироқ одам бўлсанг керак деб ўйлаган эдим, Поляница,— деди ўкинч билан Давидов ва хайрлашмасдан чиқиб кетди.

XVI БОБ

Давидов Гремячийга келаётганида йўлдаёқ, тубянскойликларнинг ери босиб олиб пичанни ташиб кетганиклиари ҳақидаги ишни район прокуратурасига бермасликка қарор қилди. У бу борада район партия комитетига ҳам мурожаат қилмоқчи эмас эди. Энг аввал Қалинов Уголнинг этагидаги бу жанжалли ернинг илгари аслида кимга қарашли бўлганини пухта аниқлаш керак, шундан кейингина, масаланинг ҳал этилиши оқибатига қараб ҳаракат қилиш керак эди.

Поляница билан ораларида бўлиб ўтган суҳбатни ўкинч билан эсларкан, Давидов фикран мулоҳаза қиласди. «Ҳа, бу гуллар билан хонадонча файзнинг ишқибози роса сурбет экан! Ақли бир дунё деёлмайсану, қувроқ, кўпчилик аҳмоқларга ўхшаб кўр-кўронга қувлиги бор. Аммо бунақалар анои бўлмайди. Пичанни унинг розилиги билан ташиб кетишган, аммо масаланинг муҳим жойи бунда эмас, қозиқларда. Қозиқларни унинг фармойиши билан кўчириб қўйган бўлишлари мумкин эмас. Бундай ишга у журъат қилмайди: қалтис. Борди-ю, қозиқларнинг кўчириб қўйилганидан хабардор бўлиб, кўз юмиб қўя қолган бўлса-чи? Унда бу иш жуда ҳам хунук гап! Колхознинг тузилганига яrim йил бўлмай, ишни қўшниларнинг ерларини бо-

сиб олиш билан ўғирликдан бошласа — колхозчиларни роса йўлдай уради-ку! Ахир, бу уларни яккахўжалик ҳаётидаги илгариги одатларга қайтариш деган гап-ку: ҳеч нарсадан ҳазар қилмасликка, ҳар қандай йўллар билан мумкин қадар кўпроқ юлиб олишга унлаш-ку. Иўқ, бу иш ярамайди! Ер худди бизники эканлигини аниқлашим биланоқ райкомга тушиб бораман; икковимизнинг ҳам эсимизни киргазиб қўйишсин: меникини кампирлар учун, Поляницанини — колхозчиларни зараркунандаларча тарбиялаётгани учун.

Отнинг бир маромда йўртиб боришидан Давидов мудраб кетди, бирдан мудроқ ичида Тубянскойдаги зинапояда турган семиз хотин тасаввурида аён кўринди, у жирканиб лабини буриштирганича уйқусираф ўйлади: «Қанчадан-қанча беҳуда эт билан ёғни ортмоқлаб олибди... Бундай иссиқда, ҳойнаҳой, бижгиб юрса керак, факт!» Шу ондаёқ ҳаддан ташқари хушомадгўй хотираси гўё қиёслаш учун қилгандек унинг кўз ўнгига Лушканинг қизларнинг вужудидек тиқмачоқ тик қоматини, мулойим хиромини, кулиб турувчи зийрак ёқимтой кўзлари билан ер остидан қараганча одатда сочини тузатаётгандаги латиф қўлларининг таърифлаш қийин бўлган жозибадор ҳаракатини аниқ-очиқ намоён қилди... Давидов туйқусдан қалқиб кетгандек сапчиб тушиб, эгарда қаддини ростлаб ўтириди, қаттиқ оғриқдан ижирғангандек отига ачитиб қамчи урди-да, уни чоптириб кетди...

Шу кунлар ичида омонсиз хотираси ўзи унугиси келган, аммо ҳозирча унуголмаётган Лушканинг қиёфасини гоҳ иш устида суҳбатлашаётганида, гоҳ ўйлар билан банд бўлган дақиқаларида, гоҳ уйқуси ичида эсига келтириб bemavrid қаттиқ ҳазиллашмоқда эди...

У тушда Гремячийга етиб келди. Островнов билан ҳисобчи нима учундир қизғин суҳбатлашмоқда эдилар, аммо Давидов эшикни очиши билан — хона ичida, гўё команда берилгандек, бирдан жимжитлик чўқди.

Їўл ва иссиқдан толиққан Давидов столга ўтириб, сўради:

— Сизлар нима тўғрисида баҳлашаётган эдинглар? Нагульнов правлениега кирмадими?

— Нагульнов келгани йўқ,— ҳаяллаб жавоб берди Островнов ва дарров ҳисобчига қаради.— Биз баҳлашаётганимиз йўқ эди, ўртоқ Давидов, назарингизда шундай туюлганга ўхшайди, умуман, у ёқ-бу ёқдан, асосан хўжалик ишларидан гаплашаётган эдик. Хўш, тубянскойликлар пичанимизни берадиган бўлишдими?

— Яна тайёрлаб қўйишимизни сўрашяпти... Сенинг фикрингча бу кимнинг ери?

Островнов елкасини қисди:

— Ким билади дейсиз, ўртоқ Давидов, бу қоронги иш. Дастрраб бу ер Тубянской хуторига кесиб берилган эди, бу революциягача бўлган эди, Совет ҳокимияти даврида бўлса, Калинов Уголнинг бош томони бизга тегди. Йигирма олтинчи йилдаги охирги бўлишда эса тубянскойликларни яна ҳам нарироқча суришди, чегара қаердан ўтганлигини мен билмайман, чунки менинг еrim бошқа томонда эди. Бундан икки йилча бурун у ернинг пичанини Титок ўриб олиб юрди. Ўз билгича ўриб олармиди ёки ўша ерни камбағалларнинг биронтасидан енг ичиде сотиб олганми — бунисини айтмолмайман, билмайман. Осон йўли — район ер тузувчиси ўртоқ Шпорtnойни таклиф қила қолайликда? У эски карталарга қараб чегара қаерлан ўтганини дарров аниқлаб беради. Йигирма олтинчи йилда худди унинг ўзи бизда ер тузиш ишларини ўтказган эди, ўша билмас бошқа ким биларди?

Давидов хурсандчилик билан қўлларини бир-бираiga ишқаб, чеҳраси очилиб кетди:

— Жуда соз! Ер кимга қаравши эканини Шпорtnой билиши кераклиги факт. Мен бўлсан ер тузиш ишларини биронта келгинди ер тузувчилар гуруҳи ўтказган бўлса керак, деб ўйлабман. Ҳозир Шчукарни қидириб топиб айтгин, дарҳол айгирларни линейкага қўшсин-у, станицага бориб, Шпорtnойни олиб келсин. Мен унга хат ёзиб бераман.

Островнов чиқиб кетди, аммо беш минутдан сўнг мийиғида кулганча қайтиб кириб Давидовни бармоғи билан имлаб чақирди:

— Пичанхонага юринг, аломат бир ишни кўрасиз...

Правление қўрасини хутордаги ҳамма ерлардаги-дек ёз ойларининг энг жазирама кунларидағина бўла-диган тушки сассиз жимжитлик чулғаган эди. Қуёшда сўлаётган ўт-ўланларнинг ҳиди анқимоқда, отхонадан қурғоқ от тезагининг ҳиди келмоқда эди. Давидов пи-чанхонага яқинлашаркан, унинг димогига янгиғина ўрилиб қурғаброқ қолган сергул пичаннинг талх атри урилдики, бир лаҳзагина назарида гўё даштда ҳозир-гина уйилган хушбўй пичан гарами олдида тургандек туюлиб кетди.

Эшикнинг бир тавақасини эҳтиёт билан очиб Яков Лукич ўзини четга олди-да, Давидовни олдинга ўтка-зиб юбориб, паст овоз билан гапирди.

— Мана буларни томоша қилинг. Буларнинг бир соат бурун қирғин бўлиб уришганларига одам сира ҳам ишонмайди. Улар ухлаётганларида ярашишади, шекилли.

Кўзлари қоронғиликка кўникмагунча Давидов дастлабки дақиқада омборхонанинг ўртасига тартиб-сизгина уйиб қўйилган пичаннинг тепасига томнинг тирқишидан тўғри тушиб келиб санчилган қуёш шуъ-ласидан бошқа ҳеч нарсани кўрмади, кейин эса пичан устида ухлаётган Шчукарь бобо ва унинг ёнида — фу-жанак бўлиб ётган Трофимнинг қорасини илгади.

— Эрталабдан бери бобо такани қамчи билан ти-риқтириб юрган эди, ҳозир бўлса — кўриб турибсиз, бирга ётишибди,— деди энди шанғиллаб Яков Лукич.

Шчукарь бобо уйғониб кетди. У тирсагига суял-масданоқ Трофим хашакдан тўрт оёқлаб сапчиганча ерга сакраб тушди-да, бошини пастга эгганча, бир не-ча марта пўписа ва таҳдид билан соқолини силкитиб қўйди.

— Шохдор иблисни кўрдингларми, яхшилар?— деди мажолсизгина бўшашган овоз билан Шчукарь, жангга тайёрланган Трофимни кўрсатиб.— Қечаси билан сурункасига хашакнинг устида изғиб ғужғон ўйнади, аксириб, тишларини ғижирлатди. Мени бир секунд ҳам ухлатмади, лаънати! Эрталаб бўлса бир неча марталаб олишдик, мана ҳозир келиб тиқилибди, уйғотиб юборган эдингларки, уришишга шайланяпти,

алвости. Шу тариқа изимдан қолмаса қандай кун кўрдим? Үлим-йитим бўладиганга ўхшаб турибди. Бир кунмас-бир кун ё мен ўлдираман ёки у менинг оч биқинимга шохини ботиради-да, Шчукарь бобонинг фотиҳасини ўқийверасизлар! Хуллас калом, бу шохдор иблис билан оқибатда яхшилик билан ажралишмаймиз, бу қўрадан ўлик чиқмай иложи йўқ.

Шчукарнинг қўлида бирдан қамчи пайдо бўлди, бироқ у қамчини силтаб ҳам улгурмаган эдики, Трофим икки сапчишда омборхонанинг қоронғи бурчагига етиб бориб, ғашга тегиб ери түёқлари билан тўқиллатганча, у ёқдан ёнган қўзларини ўқрайтириб Шчукарга тикилди. Чол қамчини бир четга қўйиб, ҳасрат билан бош чайқади.

— Бу газанданинг побакорлигини кўрдингларми? Ундан фақат қамчи билан жон сақлайман, шунда ҳам ҳамма вақт эмас, чунки бу алвости лаънати ҳеч кутмаган жойларимда олдимдан чиқиб қолади! Эртаю кеч қамчини қўлимдан қўймайман. Бу така мени бир қадам ўз ихтиёrim билан одим бостирмайди! Ҳеч ақл бовар қилмайдиган жойларда пайдо бўлиб қолади. Чунончи, кечаги кунни мисолга олиб қўрайлик: омборхонанинг орқасидаги овлоқ бурчакка катта ҳожат билан борадиган бўлиб қолдим. Атрофга кўз ташласам — така кўринмади. «Ҳа, худога шукур, лаънати Трофим бирон ерда салқинда ётганга ўхшайди ёки қўранинг орқасида ўт чимдиб юргандир» деб ўйладим. Қўнглим хотиржам бўлиб омборхонанинг орқасига ўтиб, эндиғина яхшилаб ўрнашиб ўтиришим билан у лаънати ҳозири нозир бўлиб, калласини бир томонга қийшайтирганча мен томонга қараб диконглаб келяпти, менга ҳамла қилиб биқинимдан сузмоқчи. Чор-ночор ўрнимдан турдим... Уни қамчи билан ҳайдаб юбориб яна бошқатдан ўрнашган эдимки, яна муюшдан чиқиб келяпти... Шу тариқа мени бир неча бор васвасага солди! Ҳафсалаларимни пир қилди. Шу ҳам тирикчилик бўлдими? Оёғимда бод касали бўлса, ўзим ҳам ўшгина бўлмасамки, худди машқ қилаётган солдатларга ўхшаб бир неча марта ўрнимдан туриб қайтиб ўтираверсам. Бундан оёқларимни қалтироқ босиб, белимга санчиқ киради. Мен бу Трофимнинг касофа-

тидан, очигини айтсам, охирги саломатлигимдан ҳам ажралиб, ажаб эмаски, ҳожатхонада ўлиб қолишим мумкин! Бир вақтлари кун-узун кун ҳам бургутдек қаққайиб ўтираверишм мумкин эди, ҳозир битта-яримтани чақириб қўлтиғимдан суяб туришини илти-мос қилсан ҳам бўладиган бўлиб қолган... Бу лаънати Трофим мени шундай шармандан-шармисорликка ду-чор қилди! Туф-э!

Шчукарь ғазаб билан туфурди ва пичани қўллари билан пайпаслаганча узоқ тўғифиллаб сўкинди.

— Маданий яшаш керак, бобо, омборхоналарининг орқасида изғиб юрмай, ҳожатхонага бориш керак,— кула-кула маслаҳат берди Давидов.

Шчукарь унга ғамгингина қараб қўйиб, умидсизлик билан қўл силтади.

— Ўтиrolмайман! Кўнглим кўтармайди. Мен сенига шаҳар табааси эмасман. Умрим бино бўлибдики, очиқ ҳавода ёзилишга одатланганман. Теварак-атрофимдан фир-фир шабада эсиб турмаса бўлмайди! Қишининг қаҳратон совуғида ҳам мени каталагингга ҳайдаб киргизолмайсан, сизларнинг ҳожатхоналарингга кирдим дегунча бадбўй ҳиддан димогим тарс ёрилиб, кўнглим айниб кетади-да, йиқилиб тушаёзаман.

— Хўп, бу масалада жонингга ора киришим қийин экан. Билганингни қилавер. Ҳозир линейкага отларни қўшгин-да, станицага бориб ер ўлчовчини олиб кел. Бу бизга жуда зарур. Лукич, сен Шпорtnойнинг қаерда квартирада туришини биласанми?

Жавоб ололмай, Давидов ўгирилиб қараган эди, Островнов чиқиб кетган экан: Шчукарнинг йўлга узоқ отланишини яхши билгани учун отхонага отларни қўшгани чиқиб кетган эди.

— Станицага бир секундда жўнаб қоламан, бу иш — менга пучакча ҳам эмас,— деб ишонтириди Шчукарь.— Лекин сен менга бир масалани тушунтириб берсанг, ўртоқ Давидов: нима учун собиқ кулакларнинг ҳамма маҳлуғи ҳам, улардан ҳар бирининг феъли ҳам эгаларининг феълига ўхшайди, яъни ўтакетган ёвуз, учига чиққан маккор бўлади? Чунончи, мана шу ғаддор Трофимни олиб кўрайлик; нима учун у бирон марта бўлса ҳам, хўш, чунончи, Яков Лукичнинг

думғазасидан сузиб қолмаса-да, яккаш таниб олгани мен бўлсам? Чунки унинг ҳидидан кулакларга яқинлигини билиб олган, шу сабабдан унга тегмайди, бутун аламини мендан олади.

Ёинки, дуч келган кулак сигирини олиб кўрайлик: у ҳеч қачон колхоз сут соғувчисига ўзининг кулак сифатида тугатилган меҳрибон бекасига берганчалик сут бермайди. Хўп, бу бир ҳисобда тўғри ҳамдир: бекаси уни лавлагими, ювиндими, шунга ўхшаган, ҳар хил тар мевалар билан боққан, сут соғувчи бўлса унга ўтган йилги қурғоқ хашакдан бир тутам ташлайди-да, елинининг олдида мудроқ босганча ўтириб, сут кутади.

Чунончи, кулакларнинг дуч келган теватини олиб кўр-чи: у нима учун фақат жулдур кийимда юрган камбағалларга ташланади? Хўш, чунончи, мана менга дейлик? Бу жиддий масала. Мен бу тўғрида Макардан сўрасам, у: «Бу — синфий кураш» дейди. Синфий кураш нима эканлигини бўлса — тушунтирмади, кулганча ишига қараб кетди. Бу синфий курашингни бoshимга ураманми, хутордаги ҳар бир теватдан олазарак бўлиб хавотир олиб юрсам? Унинг соғ виждонли теватми ёки кулак сифатида тугатилганларга мансуб эканлиги манглайига ёзиб қўйилмаган бўлса. Борди-ю, у кулакнинг тевати, Макарнинг таъбирича, менинг синфий душманим бўлса, мен нима қилишим керак? Кулак сифатида тугатишм керак! Хўш, чунончи, уни қандай қилиб тугатасан, яъни тириклай пўстинини шилиб оласанми? Ҳеч иложи йўқ! У сендан олдинроқ теригинангни шилиб олади. Демак, масала равшан: аввал бу синфий душманинси сиртмоқ солиб ўлдириб, кейин пўстинини шилиш керак. Мен яқинда Макарга шу таклифни айтган эдим, у: «Сен бунақада хутордаги итларнинг ярмисини қириб ташлайсан, тентак чол» дейди. Икковимиздан қайси биримиз тентак эканлигимиз — номаълум, буни аниқлаш керак. Менингча, мен эмас, Макар сал тентакроқ бўлса керак... «Заготсирие» ит терисини ошлаш учун қабул қиласми? Қабул қиласми! Бугун давлат бўйлаб кулак сифатида тугатилганларнинг қанчадан-қанча теватлари қаровсиз, эгасиз, бошвоқсиз қангиди юрибди? Мильён-

милъён! Борди-ю, шуларнинг ҳаммасининг терисини шилиб олиб кейин ошлатилса, жунидан пайпоқ тўқилса қандай бўлади? Шундай бўладики, Россиянинг ярми хром этик кийиб юради, ит жунидан тўқилган пайпоқ кийиб юрса умрбод боддан халос бўлади. Мен бу нарсанинг эм бўлишини марҳума бувимдан эшишган эдим, мен сенга айтсам, дунёда бундан кўра яхши эм бўладиган нарса йўқ. Гапириб ўтиришнинг нима ҳожати бор, ўзим ҳам бодга гирифторм эдим, ит жунидан тўқилган пайпоқларгина жонимга ора киради. Шулар бўлмаса мен аллақачон эмаклаб қолардим.

— Бобо, бугун станицага жўнаш хаёлинг борми? — қизиқди Давидов.

— Албатта бор, лекин сен гапимни бўлмай, бу ёғини эшиш. Итларнинг терисини ишга яратиш ҳақидаги зўр фикр миямга шундай келди — мен икки кечакундуз ухламай, менинг фикримдан давлатга, хусусан, ўзимга қанча пул фойда келишини ўйлаб кўрдим. Менинг бу фикримдан давлатга, хусусан эса, ўзимга қанча пул фойда келиши мумкин? Агар қўлим қалтирамаганида, ўзим марказга ёзиб юборардим, қарабсанки, омадим келиб, ақлли тадбирим учун ҳукуматдан менга бирон нарса тегиб қоларди. Кейин ҳамма гапни Макарга айтмоқчи бўлдим. Мен зиқна эмасман. Олдига бориб бор гапни айтдим-да, шундай дедим: «Макарушка! Мен — қари одамман, менга ҳар қандай сармояю мукофотларнинг ҳожати йўқ, сени ўла ўлгунимча бахтиёр қилиб қўймоқчиман: сен менинг фикримни марказий ҳукуматга ёзиб юбор, урушда қатнашганинг учун олганингга ўҳшаган орден оласан. Хўш, бунинг устига-устак сенга пул ҳам бериб қолишиша — икковимиз ўртасидан расамади билан бўлиб оламиз. Сен хоҳласанг, ўзингга орден сўрашинг ҳам мумкин, менга — тугадиган ғунажинми ёинки ақалли гўсалагами етадиган пул тегиб қолса ҳам рози бўлардим».

Бошқа одам бўлганда оёғимга йиқилиб миннатдорчилик билдиравди Хўш, Макарушка ҳам миннатдорчиликни боплади... Вой, стулидан сапчиб туриб кетдику! Бир сўқиб ўтакамни ёрди! «Сен қариган саринг аҳмоқ бўлиб кетяпсан! Қалла деб ошқовоқни кўтариб

юрибсан!» деб шанғиллайди. Ўзи бўлса ҳар бир сўздан кейин — унақа, бунақа, фалон-писмадон деб туриди,— кўз очирмайди! У менинг ақлимдан нуқсон топияпти! Ким гапирса ҳамки, у тилини тишласа бўларди! Ундаи ақлавондан ўргилиб кетай, ўзи ҳам емайди, бирорга ҳам едирмайди. Мен унинг ҳалқуми қуришини кутиб, ўзимча: «Майли, ирғишлайверсин, бари бир стулга илгари ўтирган жойи билан бориб ўтиради» деб ўйлаяпман.

Макарушка сўкина-сўкина тинкаси қуриди шекили, ўтирида, «Хумордан чиқдингми?» деб сўради. Гарчанд биз у билан иноқ дўст бўлсак ҳам, шундан кейин менинг ғазабим қўзиб кетди. «Борди-ю,— дедим мен унга,— ҳаллослаб қолган бўлсанг дамингни олиб бошидан бошла, мен сабр қилишим мумкин, ошиқадиган ишим йўқ. Аммо нега жининг қўзиб сўкинняпсан, Макарушка? Мен сенга яхшилик қиляпман-ку. Сенинг бу фикринг учун Россия бўйлаб жамики газеталарда ёзив чиқишилади!» Шундан кейин у бамисоли мен чоловорининг ичига доғ сув қўйиб юборгандек эшикни тарақлатиб ёғланча уйдан отилиб чиқиб кетди!

Кечқурун мен ўқитувчи Шинининг олдига масла-ҳатлашгани бордим. У ҳар қалай, ўқимишли одам. Унга бор гапни айтдим, Макардан шикоят қилдим. Аммо лекин бу ўқимишли одамларнинг ҳаммаси ҳам, менингча довдирроқ, анчагина довдирроқ одамлар! Менга нима дейди дегин? Тиржайиб: «Ҳамма буюк одамлар ҳам ўз фикрлари учун қувғин, таъқибга дучор бўлишган, бу азиятга сен ҳам чида, бобо» дейди. Ўз кўнглида менга таскин берди! У ўқитувчи эмас, лўттибоз, маккор! Чидашдан менга нима фойда? Сигир нақдгина қўлимга кириб қолган эди-я, ҳатто думини ушлаш ҳам насиб қилмади. Ҳаммаси Макарнинг кожбаҳслигидан! Қуриб кетмагур ошна ҳам шунақа бўладими? Бунинг касофатидан уйда ҳам дилсиёхлик... Кампиримга, ақлли тадбирим учун худойи таоло бизга сигир ато қилиб қолса ҳам ажаб эмас, деб мақтаниб қўйган эдим-да. Ҳа, ато қилиш шунчалик бўлар-да! Кампирим бўлса мени эгов бўлиб эговляяпти: «Айтган сигиринг қани? Яна ёлғон гапирдингми?» Ундан ҳам турли-туман азиятлар чекишимга

тўғри қеляпти. Ҳар қандай буюк одамлар азият чеккан экан, менинг азият чекишим худонинг даргоҳида ҳам фарз, ҳам қарз.

Шу тариқа менинг яхшигина фикрим беҳудага оқибатсиз қолиб кетди. На чора? Йўқни йўндириб бўлмайди...

Давидов эшик кесакисига сунянганча сассиз кулиб турарди. Шчукарь эса сал ҳовридан тушиб, ошиқмасдан оёқ кийимини кия бошлади, энди Давидовга эътибор ҳам бермай завқ-шавқ билан ҳикоясини давом эттирди:

— Ит жунидан тўқилган пайпоқ — бодга жуда яхши даво! Мен ўшанақа пайпоқни қиши билан кийиб юрдим, бирон марта ҳам ечмадим, оёқларим баҳоргача илвираб кетган бўлса ҳам, кампирим итнинг балбўй ҳиди анқиб кетганлиги сабабли мени уйдан бир неча марталаб ҳайдаб чиқарган бўлса ҳамки, мен боддан халос бўлдим. Сал кам бир ойча макиённинг атрофида айланган жўжахўроздек ўйноқлаб юрдим. Бундан умуман қандай фойда чиқди? Ҳеч қандай фойда чиққани йўқ! Чунки яна аҳмоқлик қилиб баҳорда оёғимдан нам ўтказиб қўйдим-да, балога дучор бўлдим-қўйдим! Аммо бу — вақтинчалик нарса; мен бу дарддан унча қўрқмайман. Яна биронта сержун ювош теватни ушлашим билан жунини олсан, тағин бодни кўрмагандек мусаффо бўлиб тузалиб кетаман! Ҳозир менинг қандай одимлаб юраётганимни кўряпсанми? Худди арпа еб бўккан ахтага ўхшайман, шифобахш пайпоқни кийиб юрай — яна ёш йигитдай ўйинга тушиб кетадиган бўлиб қоламан. Шуниси борки, кампирим итнинг жунини йигириб ундан менга пайпоқ тўқиб беришга кўнмайди. Итнинг ҳидидан боши айланиб, чарх тепасида томоғига ўқчиқ келади. Аввал ўқчиб-ўқчиб, кейин томоғига бир нарса тиқилади-да, ниҳоят, шундай кўнгли айниб кетадики, туриш-турмуши билан ичак-чавоги ташқарига чиқиб, астар-пахтаси ағдарилиб кетади. Шунинг учун, билганини қилсан, мен уни бундай ишга мажбур қилмайман. Жунни ўзим ювиб, ўзим офтобда қуритиб, ўзим йигириб пайпоқ тўқиганман. Мұҳтоҗлик одамни не расво кўйларга солмайди, ошна...

Буниси ҳам ҳеч гап эмас, буниси ҳам баҳарнов, шуниси расвоки, менинг кампириим — бориб турган қора баттол юҳо! Бурноғи йили ёзда оёғим қақшаб оғриди. Нима қилиш керак? Лоп этиб эсимга ит жунидан тўқиладиган пайпоқ тушиб қолди. Шундай қилиб, бир куни эрталаб қўшнимизнинг қанжиғини қоқ нон билан алдаб даҳлизга олиб кирдим-да, чечан сартарошлардек жунини тап-тақир қилиб олдим. Фақат қулоқларида—кўрк учун, думининг учида—пашшасини қўриши учун бир тутамдан жун қолдирдим. Айтсан ишонмайсан, ундан нақ ярим пудча жун қирқиб олдим!

Давидов юзини кафтлари билан яшириб кулгидан нафаси қисилганча инграб қўйди:

— Кўп эмасми?

Аммо Шчукарь бобо бундан ишқалроқ саволларни эшитганда ҳам гангиб қолмас эди. Лоқайдлик билан елкасини қисди-да, муросага кела қолди:

— Ҳа, эҳтимол сал камроқ бўлса ҳам бордир. Ўнён икки қадоқ келиб қолар, тарозида тортиб кўрибманми. Лекин ўша ит шу қадар сержун эдики, хўш, бамисоли шлёнск зотидаги қўйга ўхшарди! Унинг жунидан ўла-ўлгунимча пайпоқ тўқиб кияман, деб ўйлаган эдим, қаёқда, бир жуфт тўқиб бўлар-бўлмасимданоқ қолганига кампириимнинг қўли етиб қолиб, бир толасини ҳам қўймай қўрада куйдириб юборди. Менинг кампириим кампир эмас, ваҳший йўлбарс! Ёвузликда у мана бу лаънати такадан сира ҳам қолишмайди, у билан Трофим — жуда хил тушган, худоҳақи, гапимга ишонавер! Хулласи калом, у бисотимдаги ҳамма жунни куйдириб юбориб, мени хонавайрон қилди-қўйди! Бўлмаса, ўша итга жунини олаётганимда жим турсин деб каттакон бир халтадаги қоқ нонни едирган эдим, шундай бўлган эди...

Аммо лекин итнинг ҳам омади келмади: жунини слганимдан кейин қўлимдан юлқиниб чиқиб кетди, устидаги ортиқча юқ бўлган жунидан халос қилганим учун мендан мамнундек кўринган эди, ҳатто яйраб кетгандан шокилали думини ҳам силкитиб қўйган эди, кейин — зинфиллаганича анҳорга югорди, сувдаги аксига кўзи тушиши билан ори келиб увиллаб юборди...

Одамлар кейинчалик менга айтишларича, у анҳорда изғиб юрибди: афтидан, орига чидаёлмай ўзини сувда ғарқ қилмоқчи бўлганга ўхшайди. Аммо бизнинг анҳордаги сув чумчуқнинг тўпифидан ҳам келмайди, ўзини қудуққа ташлаш фаҳмига келмабди, ақли калтак қилибди. Таъна қилиб бўлармиди? Ҳар қалай, тилсиз маҳлуқ, ёинки, чунончи дарранда: ақли кўтаҳ, одамнинг ақлига ўхшаган эмас...

У уч кечаю кундуз қўшнимизнинг омбори тагида увиллаб ётди, увиллайвериб юрак-бағримни эзib юборди, аммо омборнинг тагидан чиқмади, демак, иснодга қолиб ўлди, шу тариқа эл кўзига кўринишга ори чидамади. Шундай қилиб, хутордан йўқолиб кўздан ғойиб бўлди, кузгача кўринмади, яна жуни чиқиши билан эгасиникига кириб келди. Шундай орли қанжиқ эканки, батзи хөтиналардан ҳам ориятлироқ экан, худо шоҳид, гапимга ишонавер!

Шундан кейин мен қатъий бир қарорга келиб қўйдим: борди-ю, яна биронта итнинг жунини оладиган бўлсан, қанжигига тегмайман, устки либосидан маҳрум қилиб иснодга қўймайман, биронта теватни танлаб оламан: бу хумпарларнинг унча ори йўқ, қайси бирини устара билан қиртишласанг ҳамки қулоқ қоқмай туради.

— Сафсалаларинг қачон тамом бўлади? — Шчукарнинг гапини бўлди Давидов. — Сен жўнашинг керак-ку. Тезроқ бўл!

— Ҳозир-да! Ҳозир пойафзалимни кияман-у, тайёр бўламан. Худо ҳақи, гапимни бўлмай тур, бўлмаса фикрим чалғиб кетиб, нимани гапираётганим эсимдан чиқиб қолади. Шундай қилиб, айтаманки: Макарушка мени тентак деб ўйлайдиу, аммо қаттиқ янгишади! У менга ақл ўргатишга ёшлиқ қиласди, масалага чуқур шўнғиб кирмайди, бўксаси кўриниб туради, мен бамисоли қари чумчуқ бўлсан, мени тўфон билан лақиллага олмайсан, ҳа, лақиллатолмайсан! Макарнинг ўзи мендан ақл ўрганса чакки бўлмайди. Ҳа, шундай.

Шчукарь бобонинг өдатдаги сўзамоллиги қўзиб кетди. Размётновнинг таъбири билан айтганда, Шчукарь «юриб кетди», энди уни тўхтатиш маҳолгина

эмас. мутлақо мумкин эмас эди. Ҳаётда ҳеч омади келмаган чолга ҳамма вақт очиқ кўнгиллик, меҳри-бонлик билан, ачиниброқ қарайдиган Давидов лекин бу гал, ҳар қалай, унинг қиссасини бўлишга журъат қилди:

— Шошма, бобо, тўхта! Сен зудлик билан станицага бориб, ер ўлчовчи Шпорtnойни олиб келишинг керак. Уни танийсанми?

— Мен станицада сенинг Шпорtnойингнигина эмас, у ердаги ҳамма итларни ҳам беш қўлимдек танийман.

— Итлар важига сен жуда миришкорсан, факт! Аммо менга Шпорtnой керак. Тушундингми?

— Олиб келаман, дедим-ку, келинчакни никоҳга етказиб келгандек етказиб келаман, вассалом. Лекин сен гапимни бўлма. Нега одамнинг гапини бўлаверадиган бунча расво одатинг бор-а? Сен, Давидов, Макарушкадан ҳам расво бўлиб кетяпсан, худо ҳақи! Нагульнов-ку Тимошкани отиб ташлади, у қаҳрамон казак, у гапимни бўлса бўлаверсинг, мен уни бари бир ҳурмат қиласман. Сен нима қаҳрамонона иш қилиб қўйгансан? Мен сени ниманг учун ҳурмат қилишим керак? Ҳурмат қилишимга узил-кесил биронта ҳам сабаб йўқ! Бутун умримни расвойи жаҳон қилган мана бу иблис такани ливольверт билан отиб ташлагин, мен сени умрбод дуюйи жонингни қиласай, сени Макардан ҳам кўра яхшилаб ҳурматингни бажо келтирай. Макар — қаҳрамон! У ҳамма илмларни ўқиб бўлиб, ҳозир англис тилини ҳижжалаб ўрганяпти; менга ўхшаб ҳамма нарсага ҳам фаҳми етади, ҳатто хўроздарнинг қичқиришларини пайқашда ҳам ҳукамо. У Лушкани ҳам ҳайдаб юборди, сен бўлсанг уни бағрингга олдинг, Тимошка ёвузни ҳам бир ўқ билан ухлатиб қўя қолди...

— Чорифингни тезроқ кийсанг-чи! Мунча имиллайсан? — сабрсизланиб хитоб қилди Давидов.

Шчукаръ бобо ҳашак устида инқиллаб-синқиллаб ивирсиганча минфиirlади:

— Чорифимнинг боғичини боғлаяпман, кўрмаяпсанми? Қоронғида боғлаш амри маҳол экан!

— Ёруққа чиқмайсанми?

— Шу ернинг ўзида ҳам бир амаллаб боғлаб ола-

ман. Ҳа-а-а, менинг Макарушкам шунаقا. Ўзи ўқиб-урганиб қолмасдан менга ҳам таълим бериш пайдан...

— Нималардан таълим беряпти? — жилмайиб сўради Давидов.

— Ҳар хил илмлардан,— чалғитиб жавоб берди Шчукарь бобо, унинг тафсилотларга ўтгиси келмасди, шунинг учун ҳам истар-истамас такрорлади: — Ҳар хил илмлардан, деяпман-ку. Тушундингми? Мен ҳозир ажнабий сўзларга киришдим. Бунига нима дейсан?

— Ҳеч тушунмадим. Қанақа ажнабий сўзларга?

— Шунаقا бефаросат экансан, сўраб нима қиласдинг,— дэя ғижиниб қўйди Шчукарь бобо ва шу қадар қийноқ-қистоқ билан берилган саволлардан норози бўлганини очиқ билдириб, хафа бўлиб бурнини тортди.

— Ажнабий сўзлар сенга ўликка дори асқатган-дек асқатса керак. Сен чаққонроқ отлан,— ҳамон жилмайганча илтимос қилди Давидов.

Шчукарь худди ғаши келган мушукдек ғижинди:

— Чаққонроқ бўл эмиш! Гапини қаранглар! Чакқонлик бурга тутаётганингда ёки кечаси ўйнашингнинг уйидан қочиб, эри сени тириқтириб изингдан етай-етай деб қолгanda керак бўлади... Қуриб кетгур қамчини сира тополмаяпман! Ҳозиргина қўлимда ушлаб турган эдим, ерга кирдими, осмонга учдими, йўқ бўлди-қолди, таканинг касофатидан қўлимда қамчи бўлмаса бир қадам ҳам жилолмайман... Хайрият, топдим! Қартузим қаёқда экан? Сен кўрмадингми, ўртоқ Давидов, картузимни? Бош томонимда турган эди-я... Эсим ҳам кирарли-чиқарли бўлиб қолибди ўзи... Ҳа, хайрият, картузни ҳам топдим, энди зипунимни ҳам топиб олсам, тайёрман-да. Ҳаҳ, иблис, Трофим! Уни ўша пичанга икки буклаб тиққанга ўхшайди, энди кечгача қидиришимга тўғри келади. Эсимга тушди! Зипуним уйда қолган эди... Шундай жазирамада зипунни нима қиласман? Уни бу ерга олиб келиб нима қиласдим?

Давидов эшик томонга қараб, Островновнинг оҳис-та нималардир, деб линейкага қўшилган айғирларни ўнглаганча меҳр билан силаб-сийпаётганини кўрди.

— Яков Лукич отларни аллақачон қўшиб бўлибди-ю, сен бўлсанг ҳали ҳам отланиб бўлганинг йўқ! Қачонгача ивирсийсан, ипириски чол?— жаҳл билан хитоб қилди Давидов.

Шчукарь бобо овози борича болохонадор қилиб сўқинди.

— Қуриб кетсин, шундай ҳам офат кун бўладими! Бир ҳисобда станицага бориш ҳам керак эмас эди. Булар яхшиликнинг аломати эмас! Ахир ўзинг ўйлаб кўр, картузимни қидириб топган эдим, энди тамаки халтам ғойиб бўлди. Бу яхшиликнинг аломатими? Йўқ, яхшиликнинг аломати эмас. Йўлда бирон фалокат юз берадиганга ўхшаб турибди.. Вой тавба, тамаки халтамни йўқотсам-қўйсам-а! Уни Трофим ямлаб ютмагандир-ку ахир! Ҳа, хайрият, тамаки халтамни топиб олдим, энди жўнайверсам ҳам бўлади... Сафаримни эртага қолдира қолсакмикан-а? Белги берает-ган аломатлар жуда расво... Инжилда ҳам,— Матфейнинг қайси боблиги хотиримда йўқ,— жин урсин, қайси боби бўлса ҳам бари бир: «Агар сен, мусофири, сафарга отланаётиб ёмон аломатлардан воқиф бўлиб қолсанг, остона ҳатлаб эшикка чиқмай, қорангни ўчириб ўтири» деб бежиз айтилган эмас. Ана энди ўзинг масъулият билан айт, ўртоқ Давидов: мен бугун борайми ё бормайми?

— Ҳозироқ жўна, бобо!— деб жиддий буюрди Давидов.

Шчукарь хўрсинганча, аммо сўз қайтармай хашак тепасидан орқаси билан сирғилиб тушди-да, оёғини чолларга хос сургаб босганча қамчинини судраб, қоронғи бурчакда биқиниб олган такага хавотир билан аланглай-аланглай эшикка қараб йўналди.

XVII БОБ

Шчукарь бобони амал-тақал билан жўнатгач, Давидов мактабга бориб, мактаб биносини якшанбагача байрамдагидек тусга киритиш учун яна нималар қилиш мумкинлигини ўша ерда аниқламоқчи бўлди. Бундан ташқари у мудир билан гаплашиб, у билан

бирга мактаб ремонти учун қанча ва қандай қурилиш материаллари керак бўлишини, бинони ўқув йилининг бошланишига бемалол ва пухтароқ ремонт қилиш учун бу ишга қачон киришиш кераклигини мўлжаллаб кўрмоқчи эди.

Гремячий Логга келганидан бери энг қизғин иш пайти энди яқинлашиб келаётганини Давидов сўнгги кунлардагина қаттиқ сезди: пичан ўроғини тугалламаган ҳам эдиларки, фалла ўрим-йиғими етиб келиб қолди, кузги жавдар кўз ўнгига қорая бошлади; у билан айни бир вақтда арпа етила бошлади; колхознинг якка хўжаликларнинг лахтак-лахтак ерларига нисбатан өдатдагидан ташқари катта кунгабоқар ва жўхори пайкалларини бегона ўтлар босиб кетиб, улар жимгина ўтоқ кутиб ётарди, буғдој ўроғи ҳам яқинлашиб қолган эди.

Фалла ўрим-йиғими бошлангунча кўпгина ишларни амалга ошириш: хуторга мумкин қадар кўпроқ хашак ташиб қўйиш, хирмонларни фалла янчишга тахт қилиб қўйиш, илгари кулакларга тегишли бўлган омборларни бир жойга кўчиришни тугаллаш, колхоздаги биттаю битта буғ молотилкани созлаб қўйиш керак эди. Бундан ташқари ҳам сон-саноқсиз катта ва кичик ташвишлар Давидовнинг зиммасига тушган, ҳар бир иш ўзига муентазам ва узлуксиз диққат-эътибор берилишни қатъият билан талаб қиласар эди.

Давидов ғичир-ғичир эски зинапояни босганча мактаб остонасига кўтарилди. Эшик олдида ўн ёшлар чамасидаги тиқмачоқдек оёқ яланг қиз четланиб, унга ўйл берди.

— Сен ўқувчимисан, жоним? — меҳр билан сўради Давидов.

— Ҳа,— секин жавоб берди қизалоқ ва дадиллик билан Давидовнинг оёғидан бошигача кузатиб чиқди.

— Мудирларингиз қаерда туради?

— У ҳозир йўқ, хотини билан иккови ҳозир анҳорнинг нарёфида, полизда карам сугоришаپти.

— Чатоқ бўлди-ку... Мактабда ҳеч ким борми ўзи?

— Муаллимамиз Людмила Сергеевна бор.

— У нима қиляпти?

Қизалок жилмайди.

— Қолоқ болалар билан шуғулланяпти. Ҳар куни тушдан кейин улар билан шуғулланади.

— Уларни шатакка олаётган экан-да?

Қизалоқ индамай бош силкиди.

— Жойида!— деди мамнуният билан Давидов ва ним қоронғи йўлакка кирди.

Узун йўлакнинг ичкариоғидан болаларнинг чувир-чувири эшитилиб турарди. Давидов бўш синфларни эгаларча кўздан кечириб ошиқмай ўтиб бораркан, охирги хонанинг қия очиқ эшигидан олдинги қатордаги тиркаб қўйилган парталарда бемалол ўтирган ўн чоқли ёш болаларни ва уларнинг олдидағи — ёшгина муаллимани кўрди. Жингалак, қўнғир соchlари калта қирқилган, пастак бўйли, озғингина, хипчагина ўқитувчи муаллимадан кўра ўсмир қизга ўхшаб кетарди.

Давидов аллақачонлардан бери мактаб остонасига қадам босмаган, ҳозир офтобда айнаган кепкасини чап қўлида фижимлаганча синф эшиги олдида тураркан, ажойиб бир туйғуни бошидан кечирарди. Мактабга бўлган азалий эҳтироми туфайли, бирдан узоқ болалик йилларини эслаб кетганидан шу дақиқада унинг қалбида қандайдир иштиёкли ҳаяжон бош кўтарди...

У эшикни ботинмай очди-да, муаллимага секин мурожаат қилди:

— Кирсам рухсатми?

— Киринг,— унга жавобан қиз боланинг ингичка овози янгради.

Муаллима Давидовга ўгирилди, қошлари таажжуб билан чимирилди, аммо уни танигач, ийманиб гапириди:

— Киринг, марҳамат.

Давидов қовушмай таъзим қилди.

— Салом. Халақит берганим учун кечиринг, мен бир дақиқага кирдим... Бу охирги синфни ҳам кўздан кечирсам, мен мактаб ремонти масаласида келдим. Кутуб туришим мумкин.

Болалар ўринларидан туриб саломга пойма-пой жавоб беришди, Давидов қизга қарапкан дарҳол ўйлади: «Мен — илгариги ҳамёни катта бадқовоқ мактаб мутасаддийларига ўхшадим... Муаллима ҳам қўрқиб

кетиб, қизариб-бўзаряпти. Шу вақтда келиб нима қиларканман!»

Қиз Давидовнинг олдига келди.

— Бу ёққа ўтиңг, марҳамат, ўртоқ Давидов! Бир неча минутдан кейин дарсими тамомлайман. Ўтириңг, марҳамат. Ё Иван Николаевични чақириб кела қолайми?

— У ким бўлди?

— Мактаб мудиримиз—Иван Николаевич Шпинь. Сиз ҳали у кишини танимайсизми?

— Танийман. Ташибланманг, мен кутиб тураман. Машғулотингиз тугагунча шу ерда ўтира турсам мумкинми?

— Ҳа, албатта! Ўтириңг, ўргоқ Давидов.

Қиз Давидовга қарап, у билан гаплашар, аммо ҳамон хижолатдан ўзига келолмас, зўр бериб қизарар, ҳатто гарданларигача пушти тусга кирган, қулоқлари бўлса қип-қизариб кетган эди.

Давидовнинг мана шу нарсага тоқати йўқ эди! Хусусан шунинг учун тоқати йўқ эдики, биронта қизариб кетаётган хотинга қараб қолса, нима учундир ўзи ҳам қизара бошлар, шу сабабдан ҳамиша баттарроқ хижолат бўлиб ўнгайсизланар эди.

У чоғроққина стол олдидаги кўрсатилган стулга бориб ўтирди, қиз эса дераза томонга бориб, ўқувчиларга сўзларни ҳижжалаб айтганча ёздира бошлади:

— О-нам биз-га... Ёздингизми, болалар? Биз-га ов-қат пи-шир-ди. «Пиширди» сўзидан кейин нуқта қўйинглар. Такрорлайман.

Жумлани икки марта ёзгач, болалар Давидовга мароқ билан тикилишиди. У мўйловини силаётгандек ясама сиполик билан юқори лабини силади-да, болаларга самимият билан имо қилиб қўйди. Улар илжайишиди, тотув муносабатлар йўлга туша бошлагандек эди-ю, муаллима яна қандайдир жумлани одатдаги-дек бўғинма-бўғин ҳижжалаб айтишга тушиши билан болалар яна дафтарларига энгashiшиди.

Синфда қуёш ва чанг, камдан-кам шамоллатиладиган бинога хос зах ҳид анқирди. Деразаларнинг таггинасига ёпишиб келган сиренлар билан акациялар

салқин бермасди. Шабада япроқларни ўйнатар, чайқатар, чақа полда шуълалар ўйнар эди.

Қошларини диққат билан чимирганча Давидов ҳисобга киришди. «Икки кубометрча қарағай тахта керак — полнинг баъзи жойларидағи тахталарини янгиламаса бўлмайди. Дераза ромлари дуруст, қўшоқлари қай аҳволда экан, бормикан, суриштириб билиш керак. Бир яшик ойна сотиб олиш керак. Эҳтиётдан олиб қўйилган бир тахта ҳам ойна бўлмаса керак, болалар ойналарни синдиримасин десанг — бунинг ҳеч иложи йўқ, факт! Қўргошиндан қилинадиган оқ бўёқ топсак яхши бўларди, шифтлар, дарчалар, ромлар билан эшикларни бўяш учун бу матоҳдан қанча кетар экан? Дурадгорлардан аниқлаб олиш керак. Зинапояни янгилаш керак. Ўз тахталаримиз билан эпласак ҳам бўлади: иккита толни тилдирсак — бинойи-дек бўлади. Ремонт бизга анча пулга тушади... Ўтинхонанинг томига янги похол босиш керак. Бу ердаги иш ошиб-тошиб ётибди, факт! Омборларни тугатишимиз билан дурадгорлар бригадасини бутунлай шу ёққа жўнатаман. Мактабнинг томини ҳам бўятиш керак эди... Пул қаёқда? Улиб-тирилиб бўлса ҳам мактаб учун пул топмай қўймайман! Факт! Улиб-тирилишимнинг ҳам ҳожати йўқ: яроқсизга чиқарилган ҳўқизлардан бир қўшини сотсак — мўмайгина пул бўлади. Бу ҳўқизлар важидарайижроком билан юлқишишга тўғри келади, бўлмаса ҳеч иш чиқмайди... Хуфия сотиб юбора қолсан аҳволим чатоқ бўлармиди... Майли бир таваккал қиласман. Нестеренко қўллаб юбормасмикан?»

Давидов қўйин дафтарчасини олиб, ёзди: «Мактаб. Тахта, мих, ойна — бир яшик. Том учун парижча яшил бўёқ. Оқ бўёқ. Алиф...»

Қошини чимирганча охирги сўзни ёзиб ҳам бўлган эдики, шу вақт найчадан отилган чайналган ҳўйл қофоз соққача пешанасига юмшоққина келиб тегиб, ёпишиб қолди. Давидов туйқусдан сесканиб кетди, шу ондаёқ болалардан кимдир муштини оғзига тутганча пиқиллаб кулиб юборди. Парталар устидан кулги саси шивирлаб ўтди.

— Нима гап ўзи? — жиiddий сўради муаллима.

Унга вазмин сукунат жавоб бўлди.

Қофозни пешанасидан олиб жилмайганча Давидов болаларни наридан-бери кўздан кечириб чиқди: оқиш, қўнғир, қора сочли бошлар партага энгашиб олган, аммо қуёшда қорайган қўлларнинг биронтаси ҳам ёзаётгани йўқ эди...

— Бўлдиларингми, болалар? Энди навбатдаги жумлани ёзинглар...

Давидов кулиб турган кўзларини қўйига эгилган бошлардан узмай сабр билан кутди. Мана, ўғил болалардан бири ўғринчасига аста-секин бошини кўтарди. Давидов кўз ўнгида қадрдон танишини кўрди: баҳор кези бир куни далада учратгани Федотка Ушаковнинг ўзи. Қисилган кўзлари билан тикилиб турар, лаблари қизгиш, оғзи қулоғига етгудек бўлиб яйраб жилмаймоқда эди. Давидов унинг муғамбirona башарасига қараб туаркан, ўзи ҳам барака кулиб юбораёзди, аммо ўзини босиб, шоша-пиша қўйин дафтаридан бир варақ тоза қофоз йиртиб олди-да, уни оғзига солиб, муаллимага ўқтин-ўқтин қараб ва Федоткага хушчақ-чақлик билан имо қилганча чайнай бошлади. Федотка унга астойдил тикилиб турар, аммо қулаётганини сездирмаслик учун оғзини қўли билан тўсар эди.

Давидов Федотканинг сабрсизлигидан ҳузур қилганча, чайналган қофозни ҳафсала билан ошиқмай юмалоқлади-да, чап қўли бош бармоғининг тирноғига қўйиб, худди нишонга олаётгандек чап кўзини қисди. Федотка лунжларини шишириб хавотир билан бўйни ичига олди,— ҳар қалай соққача кичкина эмас, вазмингина эди... Давидов пайт пойлаб туриб соққачани Фетодкага қараб енгилгина чертиб юборган эди, у дарҳол бошини пастга олмоқчи бўлиб пешанасини партага тарақлатиб уриб олди. У қаддини ростлаб, муаллимага тикилди, қўрқиб кўзи ола-кула бўлганча, қизариб кетган пешанасини қўли билан аста-секин силай бошлади, Давидов эса сассиз эшилиб кулганча, ўгирилиб олди-да, одатига кўра юзини кафтлари билан яширди.

Дарҳақиқат, унинг бу хатти-ҳаракати кечириб бўлмайдиган бачканалиқ, қаерда ўтирганлигини унутмаслиги керак эди. У ўзини босиб, гуноҳкорона табассум

билинг муаллимага қия қараган эди, унинг ҳам деразага ўғирилиб кулгисини яширишга тиришаётганини кўриб қолди. Унинг хилчагина елкалари учмоқда, фижимланган дастрўмолини ушлаган қўли эса кулги зўридан тирқираб чиқиб кетган ёшни артиш учун кўзларига қараб интилмоқда эди.

«Ана сенга бадқовоқ мутасаддий...— деб ўйлади Давидов.— Бутун дарсни расво қилдим. Бу ердан жуфтакни ростлаш керак».

Юзини жиддий қиёфага киритиб у Федоткага қарди. Симобдек жонсарак бола партада сабрсизлик билан ижирганиб ўтирганича, бармоғи билан оғзини кўрсатмоқда эди, кейин оғзини очди: бир вақтлардаги кемшик ўрнида — ҳали бор бўйича ўсиб чиқмаган, зиҳлари кўркамгина арра-арра бўлиб турган иккита сербар, кўкиш оппоқ тиш кўриниб туради. Давидов уларни кўраркан, беихтиёр жилмайиб қўйди.

У болаларнинг юзларига, парталарга энгашган ранго-ранг сочли бошларга тикиларкан, руҳан ҳузур қилмоқда эди, аллақачонлардир ўзи ҳам Федотканинг партасидаги қўшнисига ўхшаб хат ёзаётганида ёки расм солаётганида бошини пастга эзганча тилини чиқариб, унинг ҳар бир ҳаракати билан мاشаққатли ишида ўзига ёрдам берганини беихтиёр хотирасидан ўтказди. Баҳор кези Федотка билан биринчи марта танишган вақтидагидек яна хўрсиниб ўйлади. «Сизлар машаққат чекмай яшайсизлар, палапонлар, ҳозир ҳам машаққат чекмай яшаяпсизлар, ахир мен беҳуда жанг қилганмидим? Менинг болалик вақтимдагига ўхшаб шўрларингнинг шўрвасини ичишларинг учун эмасдир, ахир?»

Уни ширин хаёл оғушидан яна ўша Федотка чиқарди: партада жонсараклик билан типиричилаганча у Давидовнинг диққатини ўзига оғдириди, имо-ишоралар қилганча, тиши қай аҳволда эканлигини кўрсатишни талаб қилиб туриб олди. Давидов пайт пойлаб туриб, муаллима ўғирилганда таассуф билан қўлларини ёзганча, тишларини кўрсатди. Давидовнинг оғзидаги таниш кемшикни кўраркан, Федотка кафтларини оғзига тутганча пиқиллаб кулиб юборди, кейин эса ҳузур билан яйраб-яйраб жилмайди. Унинг бутун fo-

либона қиёфаси аён-ошкор шундай деб турарди: «Сени доғда қолдириб кетдим-ку, амаки! Менинг тишим чиқди-ю, сеники — чиқмабди!»

Аммо бир дақиқадан кейин шундай бир ҳодиса рўй бердики, буни Давидов кейин-кейингача ҳам юраги шувилламасдан эслаёлмас эди.

Шўхлиги ошиб кетган Федотка Давидовнинг диққатини яна ўзига тортиш учун, партани оҳистагина тақиллатди, Давидов унга фаромушлик билан қарагач эса — Федотка кибр билан ўзини орқага ташлаб, ўнг қўлинин шимининг чўнтағига тиқди-да, ундан «лимонча» қўл гранатасини олиб яна дарров солиб қўйди. Буларнинг ҳаммаси шу қадар тез юз бердики, Давидов дастлаб гангиди кўзларини пириллатди, шундан кейингина оқара бошлади...

«Қаёқдан олди экан?! Капсюль қўйилган бўлса-чи? Ўриндиққа уриб олса борми, унда... Эҳ, жин урсин, нима қилсан экан?» — кўзларини юмиб даҳшат билан йўлади, у пешанасида, энгагида, бўйнида муздек резатер пайдо бўлганини ҳам сезмади.

Дарҳол бирон чора кўриш керак эди. Аммо қандай чора кўриш керак? Сапчиди туриб гранатани тортиб олсинми? Борди-ю, бола қўрқиб кетиб қўлидан юлқиниб чиқиб, қолаверса, фалокат босиб ўзини ҳам, бошиқаларни ҳам ўлдириб қўйишидан бехабар ҳолда гранатани улоқтириб юборса-чи... Йўқ, бундай қилиш ярамайди. Давидов бу йўлни мутлақо рад этди. Ҳамон кўзини очмай машаққат билан йўл қидирар, фикрини ошиқтирас, тасаввурни эса унинг ихтиёридан ташқари портлашнинг сарғиш аллангасини, қисқагина аянчли қичқириқни, болаларнинг дабдала бўлиб кетган таналарини кўз ўнгидага гавдалантироқда эди...

Тер томчилари пешанасидан аста-секин оқиб тушиб, қаншарининг ёнларидан думалаганча келиб кўз косаларини ачитаётганини эндиғина сезди. У дастрўмолини олмоқчи бўлиб чўнтағига қадрдан бир дўстти аллақачонлар совға қилган қаламтарошни топиб қолди. Давидовнинг миясига бир фикр келди: ўнг қўли билан қаламтарошни олиб, чап қўлининг енги билан пешанасидаги қуюқ терни артди-да, қаламтарошни умрида биринчи бор кўраётгандек намойишкорона

диққат билан ўйнаганча синчилаб кўздан кечира бошлади Ўзи эса Федоткага қиаб қўярди.

Қаламтарош эскигина, пичоқлари ейилиб кетган, аммо ёнбошидаги садаф тахтачалари қуёшда хираги на жилоланмоқда, иккита пичноқчаси, отвёртка ва пармадан ташқари яхшигина жажжи қайчиси ҳам бор эди. Давидов аҳён-аҳёнда Федоткага қиаб қўйганча бу ғаниматларнинг ҳаммасини бирма-бир очиб кўрмоқда эди. Федотка қаламтарошдан маҳлиё кўзларини узмасди. Бу қаламтарошгина эмас, каттакон хазина эди! У бунақа чиройли нарсани кўрмаган эди. Давидов қўйин дафтарчасидан бир варақ тоза қофоз йиртиб олиб шу ондаёқ қайчини чаққонлик билан ишлатганча от калласини ясаркан — Федотканинг завқшавқи ошиб кетди!

Ҳадемай дарс тугади. Давидов Федотканинг олдига бориб шивирлаб сўради:

— Қаламтарошни кўрдингми?

Федотка туфугуни ютганча, индамай бош силкиди.

Давидов энгашганча шивирлади:

— Айирбошлашамизми?

— Нимани нимага? — ундан ҳам секинроқ шивирлади Федотка.

— Қаламтарошни чўнтағингдаги темирга.

Федотка рози бўлиб шу қадар жон-жаҳди билан бош силкидики, Давидов унинг энгагини ушлаб туришга мажбур бўлди. Бу қаламтарошни Федотканинг қўлига тутқазиб, гранатани эҳтиёт билан кафтига олди. Унинг капсиюли йўқ эди. Давидов ҳаяжондан нафаси тиқилганча қаддини ростлади.

— Сизларнинг сир гапларинг борга ўхшайди,— деб жилмайди ёнларидан ўтиб кетаётган муаллима.

— Бу билан икковимиз эски қадрдонмиз, анчадан бери кўришмаган эдик. Бизни кечиринг, Людмила Сергеевна,— деди эҳтиром билан Давидов.

— Сиз менинг дарсимга келиб ўтирганингиздан хурсандман,— деб қўйди қиз қизариб.

Унинг хижил бўлаётганини сезмай Давидов илтимос қилди:

— Ўртоқ Шпинга айтиб қўйсангиз: шу бугун кечкурун правлениега менинг олдимга борсин. Бориши-

дан олдин мактабни қандай ремонт қилишимиз керак-лигини хомчӯт қилиб чиқсин. Сметани ҳам ўйлаб кўрсин. Хўпми?

— Яхши, унга ҳамма гапингизни айтаман. Сиз бизга бошқа келмайсизми?

— Бўш вақт топиб албатга бир кириб чиқаман, факт!— деб ишонтириди Давидов ва бундан олдинги суҳбатларига мутлақо алоқасиз ҳолда дафъатан сўради:— Сиз кимницида турасиз?

— Агафья Гавриловна деган кампирницида. У кишини танийсизми?

— Танийман. Сизнинг оиласиз каттами?

— Ойим билан иккита укам Новочеркасскда туришади. Сиз бу нарсаларни нега сўрайapsиз?

— Сизнинг тўғрингизда бирор нарса билишим керак-ку ахир. Мен сизнинг қизларга хос сирларигизни суриштираётганим йўқ-ку?— ҳазил билан жавоб бериб қутулди Давидов.

Зинапоя олдида бир тўда болалар Федоткани қуршаб олганларича қаламтарошни томёша қилмоқда эдилар. Давидов хурсанд Федоткани четга чақириб, сўради:

— Ўйинчоғингни қаердан топиб олган эдинг, Федот Демидович? Қайси жойдан?

— Кўрсатайми, амакижон?

— Албатта!

— Юр. Ҳозир бора қолайлик, бўлмаса кейин менинг вақтим бўлмайди,— деб жиддийлик билан таклиф қилди Федотка.

У Давидовнинг кўрсаткич бармоини қўли билан маҳкам ушлаб, шунчаки бир кишини эмас, кимсан раисни етаклаб кетаётганидан ниҳоятда ғурурланганча аҳён-аҳёнда ўртоқларига қараб-қараб қўйиб, кўчадан алпон-талпон кета бошлади.

Улар унча ошиқмай шу тариқа кетиб боришар, аҳён-аҳёндагина қисқа-қисқа гаплашиб қўйишар эди.

— Сен айниб қолмайсанми?— деб сўради Федотка олдинга югуриб ўтаркан, Давидовнинг кўзларига ташвиш билан тикилиб.

— Э, нима деяпсан! Аҳдимизни бузмаймиз,— уни тинчитди Давидов.

Улар эркакларга хос сипогарчилик билан сукут сақлаб беш минутча юриб боришиди, кейин Федотканинг сабри чидамади — Давидовнинг бармоғини қўлидан қўйиб юбормай, яна олдинга югуриб ўтди-да, пастдан юқорига қараганча хайриҳоҳлик билан сўради:

— Қаламтарошингга ачинаётганинг йўқми? Айирбошлаганингга ўкинаётганинг йўқми?

— Мутлақо! — қатъий жавоб берди Давидов.

Яна индамай кета бошлишди. Аммо, афтидан, қандайдир андиша Федотканинг кичкинагина юрагига тинчлик бермас эди, шекилли, афтидан, Федотка бу мовазани Давидов учун ниҳоятда нафи кам деб ҳисобларди, шекилли, шунинг учун ҳам узоқ сукутдан кейин гапирди:

— Хоҳлайсанми, мен устига сопқонимни ҳам қўшиб берайми? Хоҳлайсанми?

Давидов Федоткага эриш кўринган очиққўллик билан бепарвогина рад этди:

— Йўқ, нега энди! Сопқонинг ўзингда тураверсин... Ахир бошма-бош айирбош қилдик-ку? Факт!

— «Бошма-бош» деганинг нима бўлади?

— Сендан — у, мендан — бу деганим, тушундингми?

Йўқ, Федотка кўп нарсага тушунолмай гаранг эди. Айирбошлаш важида кап-кatta кишининг бундай енгилтаклик қилиши Федоткани ниҳоятда таажжублантирди, у ҳатто бад олиб қолди... Офтобда ярқираб турган серҳашам қаламтарош билан ҳеч нимага ярамайдиган думалоқ бир темир,— йўқ, бунда бир гап борга ўхшайди! Бир оздан кейин пишиқ-пухта Федотка йўл-йўлакай яна бир таклиф киритди:

— Хўп, сопқонимни олгинг келмаётган бўлса ўйнайдиган бақайларимни бера қолайми? Устига устакда, а? Бақайларимнинг қанақалигини биласанми? Яп-янгигина, шунаقا!

— Менга бақайларинг ҳам керак эмас,— хўрсиниб кулганча рад этди Давидов.— Агар бундан йигирма йил бурунроқ бўлганда — мен бақай берсанг йўқ демасдим, инигинам. Мен уни сендан жон-жон деб олардим, ҳозир ташвишланмасанг ҳам бўлади, Федот Де-

мидович! Нега бунча ташвишланипсан? Қаламтарош — умрбод ўзингники, факт!

Яна сукунат. Яна бир неча минутдан кейин савол тушади:

— Амакижон, мен сенга берган думалоқ темир ниманинг темири? Веялканикими?

— Сен уни қаердан топиб олдинг?

— Ҳозир кетаётган бостиurmамиздаги веялканинг тагидан. У ерда шалоги чиқиб эскиб кетган бир веялка қулаб ётибди, ўшанинг тагида ётган экан. Биз бекинмачоқ ўйнаётган эдик, мен бекинмоқчи бўлган эдим, қарасам шу думалоқ темир ётибди. Дарров олдим.

— Ҳа, бу веялканинг бир қисми. Унинг ёнида узунчоқ темир кўрмадингми?

— Йўқ, у ерда бошқа ҳеч нарса йўқ эди.

«Ҳа, хайриятки йўқ экан, бўлмаса сен менга шундай бир иш ортирган бўлардингки, нариги дунёда ҳам тагига етиб бўлмасди», — деб ўйлади Давидов.

— Бу веялканинг қисми сенга жуда ҳам керакми? — қизиқди Федотка.

— Жуда ҳам керак.

— Хўжалик учун керак бўладими? Бошқа веялка учун керак бўладими?

— Ҳа, факт!

Қисқа сукутдан сўнг Федотка йўгон овоз билан гапирди:

— Агар бу қисм хўжаликда керак бўладиган бўлса, ўқинма, мен билан айрбошлаб тўғри иш қилибсан, ўзингга қаламтарош керак бўлса, янгисини сотиб оларсан.

Ўз ёшига нисбатан анча сермулоҳаза Федотка шундай хуносага келиб, хотиржамлик билан жилмайди. Афтидан, унинг кўнгли тинчиб, жойига тушган эди.

Улар йўлда қилган суҳбат шундан иборат эди, аммо бу суҳбат уларнинг қиммат буюмларни айрбошлашдаги битимларининг хотимасидек бўлди...

Энди Давидов Федотка уни қаёққа бошлаб кетаётганини аниқ биларди, чап томондаги тор кўчадан бир вақтлар Тимофей Тиртиқнинг отасига қарашли бўлган иморатлар кўриниши билан қамиш ёпилган бостиurmани кўрсатиб сўради:

— Ўша ердан топдингми?

— Билишингга қойилман, амаки!— завқ билан хитоб қилди Федотка ва Давидовнинг бармогини қўйиб юборди.— Энди ўзинг ҳам менсиз топиб борасан, мен кетдим, вақтим жуда зиқ!

Давидов унинг кичкина қўлларини катта кишининг қўлларини сиққандек сиқиб хайрлашаркан, деди:

— Мени керакли жойга бошлаб келганинг учун сенга катта раҳмат, Федот Демидович. Сен мендан кириб хабар олиб тур, бўлмаса мен сени соғиниб қоламан. Ахир мен якка-ёлғизман-а...

— Хўп, бир кириб чиқарман,— раъя қилиб ваъда берди Федотка.

Бир оёғида айланганча, афтидан, ошналарини чақириб икки бармогини оғзига тиққанча зўр билан ҳуштак чалди-да, шундай шаталоқ отиб чопиб кетдик, орқасидан чанг кўтарилиб, қорайған товоnlари-гина лип-лип кўриниб қолди.

Давидов Дамасаковларнинг қўрасига кирмай колхоз правлениесига қараб кетди. Одатда правление мажлислари ўтадиган ним қоронғи хонада Яков Лукич билан омборчи шашка ўйнамоқда эдилар. Давидов столга ўтириб қўйин дафтарчасидан йиртиб олинган бир варақ қофозга ёзди: «Хўжалик мудири Я. Л. Островновга. Менинг меҳнат кунларим ҳисобидан муаллима Л. С. Егоровага 32 кг. жайдари буғдой уни, 8 кг. сўк, 5 кг. чўчқа ёғи беринг». Давидов имзо қўйгач, муштини тик энгагига тираб ўй сурганча жим турди-да, сўнgra Островновдан сўради:

— Егорова Людмила деган муаллима қизимиз қандай туради?

— Нону квас билан тамаддиқ қилиб кун кечиради,— шашкани суреб, қисқа жавоб берди Островнов.

— Мен ҳозир мактабда бўлдим, ремонт масаласи билан қизиқдим, муаллимани ҳам кўрдим... Озгин, куздаги хазонга ўхшаб у ёғидан бу ёғи кўриниб туриди, демак — тўйиб овқат емас экан! Шу бугуноқ унинг кампирига мана бунда ёзилган нарсаларни жўнатинглар, факт! Эртага текшираман. Эшидингми?!

Фармойишни стол устида қолдириб, Давидов тўп-па-тўғри Шалийга қараб кетди.



У чиқиб кетиши билан Яков Лукич тахтадаги доналарни аралаштириб юбориб, елкаси оша бармоғи билан эшик томонни кўрсатди:

— Теватни кўрдингми? Аввал Лушка Нагульнова билан эди, кейин Варька Харламовани домига илинтириди, энди бўлса дарров муаллимага ўтибди. Қанжиқларининг ҳаммасини колхоз ҳисобига боқади... Хўжалигимизни мутаб совуради, ҳаммаси ўйнашларига исроф бўлади!

— У Харламовага ҳеч нарса ёзиб бермаган эди, муаллимага бўлса—ўзининг ҳисобидан ёзиб берибди,— деб эътиroz билдириди омборчи.

Аммо Яков Лукич такаббуrona илжайди:

— Варькага у пул-мул берса керак, муаллима оладиган нарсаларнинг ҳақини колхоз тўлайди. Унинг хуфия буйруғи билан мен Лушкага озмунча озиқ-овқат ташидимми? Ҳа, шуни билиб қўй!

Тимофеј Тиртиқ ўлгунига қадар Яков Лукич у билан Лушкани колхоз омборидаги озиқ-овқат билан роса таъминлади, омборчига бўлса шундай дегувчи эди:

— Давидов менга қаттиқ тайинлаб, Лушкага таъби хоҳлаганча озиқ-овқат бериб туришимизни буюрди. Яна: «Сен ёки омборчи чурқ этиб оғиз очадиган бўлсанглар — ўзларингни Сибирда кўраверинглар!»— деб пўписа ҳам қилди. Шунинг учун, ўргилай, унингни чиқарма, тарозида тортмасдан ёғ, асал, ундан беравер. Каттаконларни тергаш сен билан бизнинг ишимиз эмас.

Омборчи ҳам Островнов талаб қилган нарсаларнинг ҳаммасини берар, яна худди унинг маслаҳатига амал қилиб озиқ-овқатлар кам чиқиб қолмаслиги учун бригадирларга нарса берәётганда чақонлик билан тарозидан уриб қолар эди.

Нима учун Яков Лукич ҳозир ҳам қулай пайтдан фойдаланиб, Давидовни яна бир марта қоралаб қолмаслиги керак?

Бекорчиликдан зериккан Островнов билан омборчи яна анча вақтгача Давидов, Нагульнов ва Раз-

мётновни «роса чайнашди». Бу орада Давидов билан Шалий аллақачон ишга киришишган эди: Фрол Тиртиқнинг бостирмаси ёруғроқ бўлиши учун Давидов томга чиқиб, икки тоқи устидаги похолни паншаха билан тушириб, сўради:

— Хўш, қалай, мўйсафид, энди кўриняптими?

— Томни бузиб юбординг! Ҳозир бу ер қўрадаги-дек ёп-ёруғ бўлиб кетди,— бостирма ичкарисидан жавоб берди Шалий.

Давидов кўндаланг тўсиндан бир неча қадам юриб бориб, чиринди босган юмшоқ ерга енгилгина сакраб тушди.

— Қаердан бошлаймиз, Сидорович?

— Яхши раққослар ўйинни ҳамма вақт печкадан бошлишади, сен билан биз қидиришни девор тагидан бошлайлик,— деди йўғон овоз билан кекса темирчи.

Темирчиликда наридан-бери ясалган бурғуларни — уни наиза йўғон темир калтакларни қўлларига олганча улар девор тагидан ёнма-ён юриб, бурғуларни ерга қаттиқ санча-санча аста-секин нариги девор тагида турган веялка томон кета бошладилар. Веялкадан бир неча қадам берида Давидовнинг бурғуси сопигача юмшоқ ерга ботиб кетиб, металлга тегиб бўғиқ тарақлади.

— Мана, хазинангни ҳам топдик,— кулиб қўйди Шалий белкуракни қўлига оларкан.

Аммо Давидов белкуракни ўзига томон тортди.

— Аввал мен бошлай-чи, Сидорович, мен ёшроқман.

У бир метр чуқурликка кавлаб тушгач, яхлит бир тугунча чиқди. Ёғланган брезентга «Максим» станокли пулемёти ҳафсала билан ўраб қўйилган экан. Уни чуқурдан икковлари биргалашиб чиқариб, брезентни индамай очиб кўришди-да, яна шундай сукут билан кўз уриштириб, индамай чека бошлиши.

Тамакини икки марта тортгандан кейин Шалий гапириди:

— Тиртиқлар Совет ҳокимиятини астойдил синаб кўришмоқчи экан-да...

— «Максим»ни пишиқ-пухта сақлаб қўйишганини қара: зангламабди ҳам, чирк ҳам босмабди, ҳозир-

нинг ўзидаёқ лента жойласанг ҳам бўлаверадиган! Қани, ўрани яна бир титкилаб кўрай-чи, балки яна у-бу нарса топиб қолармиз...

Ярим соатдан кейин Давидов ўра оғзига пулемёт ленталари жойланган тўртта рух қути, милтиқ, милтиқ патронлари солинган, ўқларининг бир қисми ишлатилган яшик, бир парча чирик клеёнкага ўралган капсюлли саккизта қўл гранатаси териб қўйди. Фишт деворнинг тагига кириб кетган ўрада хонаки филоф ҳам ётарди. Унинг бўйига қараганда, унда бир вақт милтиқ сақланганга ўхшайди.

Қўёш ботгунча Давидов билан Шалий темирчиликда пулемётни бўлак-бўлак қилиб, пухталаб тозалашди. Қош қорайгач, мулойим оқшом сукунатида пулемёт Гремячий Лог устида жанговарона ва шиддатли тариллади. Бир марта узун, икки марта калта, яна бир марта узун тариллаб тинди, яна — хоторга, сўлган ўт-ўланларнинг талх иси, қизиган қора тупроқ ҳиди анқиётган, кундузги жазирамадан сўнг ҳордик чиқараётган даштга жимлик чўқди.

Давидов ўрнидан туриб, оҳиста гапирди:

— Яхши машина экан! Ажабтовургина машина экан!

Унга жавобан Шалий фахрланиб йўғон овоз билан гапирди:

— Ҳозироқ Островновникига борамиз, бурғуларни олиб унинг қўраси билан четан атрофини титкилаб чиқамиз! Уйини ҳам ялписига тинтамиз, ундан шунча андиша қилиб юрганимиз ҳам бўлар.

— Эсингни едингми, чол! — совуққина жавоб берди Давидов.—Ким бизга ўзбошимчалик билан тинтув ўтказиб, бутун хоторни бесаранжом қилишимизга рухсат беради? Иўқ, сен эсингни еб қўйибсан, факт!

— Тиртиқникидан пулемёт топдикми, Островнов хирмонидаги бирон жойга уч дюймли тўп кўмиб қўйган! Эсини еган мен эмас, сен ақлли аҳмоқ экансан, мен сенга очиғини айтсам, гап шу! Шошмай тур, бир вақти келарки, Лукич тўпини қазиб олиб тўппа-тўғри сенинг квартирангни мўлжалга олиб ўққа тутиб берсин, ана унда фактни кўрасан!

Давидов қаҳ-қаҳлаб кулиб чолни қучоқламоқчи

бўлган эди, аммо у терс бурилиб, ғазаб билан туфурди-да, хайрлашмасдан тўнгиллаб сўкинганча хуторга қараб кетди.

XVIII БОБ

Сўнгги вақтларда, одатдагидек, Шчукарь бобонинг ҳеч омади келмай қўйди, бугунги кун эса бутунлай катта-кичик дилсиёҳлик ва ҳаттоки баҳтсизликлардан иборат бўлиб чиқдикни, сутканинг охирига бориб ҳиссасига тушган кўпдан-кўп кўргулайлардан ғоятда тинкаси қуриган Шчукарь илгаригига қараганда яна ҳам баттарроқ ирим- chirимга ишонадиган бўлиб қолди... Йўқ, модомики, эрталабданоқ белги берган аломатлар аён-ошкор хунук экан, ҳар ҳолда у пала-партишлиқ билан Давидовнинг гапига лақ этиб кўниб, станицага боришга рози бўлмаслиги керак эди...

Колхоз правлениеси қўрасидан чиққач, Шчукарь бобо икки кварталча жой юрар-юрмас, отларни йўл ўртасида тўхтатди-да, линейкадан тушмай, мунғайиб ўтирганча чуқур ўй суриб қолди... Дарҳақиқат, мулоҳаза қилса арзигудек эди: «Тонготарга яқин туш кўрсам, мени ола бўри тириқтириб юрганмиш. Нима учун ола энди? Нима учун энди, албатта, мени тириқтириши керак эди? Тириқтирса ёруғ дунёда мендан бошқа одам қуриб қолганми? Хўш, бошқа ёшроқ, чопқирроқ одамни тириқтирсин эди, мен бир четда туриб томоша қилиб туардим, ваҳоланки, мен тушимда ҳам бирорларнинг жадига қолишим керак! Менга бу эрмакларнинг мутлақо ҳожати йўқ. Уйғонсам, юрагим қинидан чиқиб кетай деб ўйноқлаяпти, шу ҳам уйқу-ю, ҳузур-ҳаловат бўлдими, қурибгиналар кетсин! Қолаверса бу бўри нега паққос олаю мутлақо кўк эмас? Бу яхшиликнинг аломатими? Шуниси борки, яхшиликнинг аломати эмас. Расво аломат, демак, сафар бурнимдан чиқиб, бир балога йўлиқмасам гўрга эди. Ўнгимда нима бўлган эди? Гоҳ картузими ни тополмайман, гоҳ тамаки халтамни, гоҳ зипуними... Бу ҳам дуруст аломатлардан эмас... Давидов-

нинг сўзига кирмаслигим, жойимдан ҳам жилмаслигим керак эди!»— ғамгинлик билан ўй сурарди Шчукарь бобо, ўзи эса бўм-бўш кўчани, четанларнинг панасида сояда ётган турли-туман бузоқларни, кўчанинг тупроғида уймалашаётган чумчуқларни фаромушлик билан кўздан кечирарди.

У мутлақо изига қайтишга қарор қилган ҳам эдики, аммо яқингинада Давидов билан ораларида бўлиб ўтган тўқнашувни эслаб фикридан қайтди. Ўшанда ҳам худди шу бугунгига ўхшаб у ёмон аломатлардан таъби гириқ бўлганча расво бир туш кўрганини баҳона қилиб биринчи бригадага боришдан мутлақо бош тортган, Давидовнинг одатдаги очиққина, ҳатто мулойимгина кўзлари дафъатан совуқ тусга кириб тундлашиб ўқрайиб кетган эди. Шчукарнинг кайфи учиб кетиб, кўзларини пириллатганча ялиниб-ёлворган эди: «Сёмушка, ўргилиб кетай! Кўзларингдаги менга қадалаётган игналарни суғуриб ташла! Ҳозир сенинг кўзларинг худди занжирбанд теватнинг кўзларидек сержаҳл бўлиб ўқрайиб кетди. Ўзинг билансан-ку, занжирда ётиб яхши одамларга ириллаб акиллайдиган бу лаънати газандаларни ёмон кўраман. Орамизга совуқчилик тушириб нима қиласми? Майли, жин урсин сени, сен шунаقا кожбаҳс, қайсар экансан, борсак бора қолайлик. Аммо борди-ю, йўлда бирон нарсага йўлиққудек бўлсан — мендан эмас!»

Бобонинг гапларини эшитаркан Давидов кулиб юборган, кўзлари ҳам дарҳол қадимги ҳолига қайтиб хуш查қчақ бўлиб қолган эди. У Шчукарнинг қуришқоқ озғин елкасига вазмин кафти билан уриб қўйиб, шундай деган эди: «Гап бундай бўпти, факт! Қани кетдик, чол, сенинг омон-эсонлигинг учун кампирингга ўзим жавоб бераман, мендан бўлса хавотир олмай қўя қол».

Шуларнинг ҳаммасини эсларкан Шчукарь бобо жилмайиб қўйди, энди иккilanmasdan отларни тизгин билан ҳайдади. «Станицага бораман! Аломатларга қирғин келсин, бирон кор-ҳол рўй бергудек бўлса — Давидов жавоб бераверсин, йўлда менинг бошимга тушиши мумкин бўлган ҳар қаңдай расво кор-ҳол учун жавоб бериш ниятим йўқ! Давидов ҳам менга

яхши қарайдиган йигит, унинг ҳам ғазабини қўзитиб юришнинг ҳожати йўқ».

Хутор устида ҳамон эрталабки овқатга ёқилган тезакнинг ачимсиқ тутуни эсиб юрар, енгил шабада гуллаётган олабўтанинг чучук ҳидини йўл бўйлаб таратиб юрар, Шчукарь бобо ёнларидан ўтаётган мол қўраларидан болаликдан таниш бўлган сигир тезаги ва янги соғилган сут ҳиди келмоқда эди. Хира кўзларини сузганча пахмоқ бўлиб қолган соқолини одатдагича силаб-силаб қўйиб, чол чор атрофга — соддагина хутор ҳаётининг қалбига қадрдан бўлиб қолган манзараларига қараб қўярди; бир марта эринчоқлигини енгиди астойдил юлқилашаётган чумчуқларни линейка ғилдираклари остидан учириб юбориш учун ҳатто қамчини ҳам силтаб қўйди, аммо Антип Грачнинг ҳовлиси олдиндан ўтаркан, димогига янги ёпилган нон ҳиди билан одатда Гремячийдаги хотинлар нон ёпишда зувала тагига тўшайдиган карамнинг қитиқловчи атри урилди-ю, шундагина кеча тушдан бери овқатланмаганини сезди. Тишсиз оғзи бирдан сув очиб кетди, кўнгли озиб, тинка-мадорини қуритиб юборди.

Отларни шартта тор кўчага буриб Шчукарь бобо станицага жўнашидан олдин бирон нарса еб олиш учун уларни қўраси томон қараб ҳайдади. Узоқданоқ уйининг мўрисидан тутун чиқмаётганини кўрди-да, мамнунгина жилмайиб ўйлади: «Кампирим пишириб-куйдириб бўлиб, ҳозир дам оляпти. Бағримда бамисоли аллақайси бир буюк княгиняга ўхшаб яшаяпти. На ғам-ғуссаю, на шунга ўхшаган ҳасрат-надоматни билади...»

Шчукарнинг таъби тирриқликдан ва ҳасратли диққатбозликтан даррёвгина хушчақчақ мамнунликка ўтиши учун кўп нарса даркор эмасди. Унинг гўдакларга ўхшаган соддадил феъли шунаقا эди ўзи. Тизгинларни эринчоқлик билан тортқилаб-тортқилаб қўйганча ўй сурарди: «У нима сабабдан осмондаги малакдек яшайди? Ўз-ўзидан маълумки — мен сабабли! Мен қишида бузогимни сўйиб чакки қилмаган эканман, худо шоҳид — чакки қилмаган эканман! Бузоқ бўлмаганлиги учун кампирим жуда очилиб яшнаяпти-да! Пишириб-куйдириб бўлдими — дарров ён-

бошлаб уйқуни уради. Бузоқ ўсиб сигир бўлса борми, каллайи саҳарлаб туриб лаънатини соғиши, подага олиб чиқиб қўшиши керак бўларди, сигир бўлса кун-узун кун сўналардан жон сақлайман деб шаталоқ отиб чопганча уйга шўппайиб кириб келарди. Уни яна жўнатишинг керак бўларди, қишида ейиши учун ем-хашак тайёрлашинг, қўрасини тозалашинг, турадиган бостирмасининг томини қамиш ёки похол билан ёпишинг керак бўларди... Овора-сарсонгарчилик! Ҳамма қўй-қўзиларни ҳам жойи ростон қилиб, яна ҳам тўғри иш қилдим! Уларни ҳам подага ҳайдаб, сурувдан адашиб кетмаса эди, бўри бўғизлаб кетмаса эди, деб лаънатиларнинг ташвишида юракларинг ачишарди. Бундай расволарнинг ташвишида юрагим эзилишининг ҳеч ҳожати йўқ, узундан-узоқ умрим мобайнида шу қадар эзилиб адo бўлганки, дилим эски пайтавадек илма-тешик бўлиб кетган бўлса ҳам ажаб эмас! Боз устига чўчқа бола ҳам йўқ, бу ҳам тўғри иш! Чунончи, мечкай чўчқани бошимга ураманми? Бирламчи, ёғни меъёрдан ошиқроқ еб юборсам, жигилдоним қайнайди, иккиласмчи, бисотимда бор ун икки ҳовучча ҳам келмаса, ҳозир уни нима билан боқардим? Ҳозирнинг ўзидаёқ очликдан ҳаром қотиб, чийиллайвериб юрак-бағримни эзиб юборарди... Бундан ташқари, чўчқа — мижгов бир маҳлуқ; гоҳ ўлатдан қирилади, гоҳ шунга ўхшаган ҳар бало сарамасларга йўлиқади. Бундай мурдорни боққудек бўлсанг, бугун бўлмаса ҳам эртага ўлиб қолади, деб турасан. Яна бутун қўра сасиб-бижгиб кетади, димоғларинг торс ёрилади, чўчқа бўлмаса — чор атроф мусаффо, ўт-ўланларнинг, полиз-сабзавотларнинг, шунга ўхшаган нашаларнинг ҳиди анқиган. Соғ ҳавони ўлгундек яхши кўраман! Ўша мечкайми, ё қолаверса, чўчқами, қурибгиналар кетсин, уларнинг дастидан азоб-уқубатга қолишга тоқатим бор эканми! Ҳовлида иккитагина озода макиён билан хушбичимгина хўроздонлаб юрса, чол-кампирга ўла-ўлгунимизча шу ҳайвонларнинг ўзи ҳам кифоя, бойишса, ёшлилар бойий қолишсин, бизга давлатнинг ортиқча ҳожати йўқ. Макарушка ҳам мени қувватлаб: «Сен бобо, чинакам пролетарьянт бўлиб олдинг, майда хусусий мулкдан воз

кечиб яхши иш қилдинг» дейди. Хўш, мен унинг бу гапига астойдил хўрсиниб жавоб бердим: «Пролетаръят бўлиб юриш эҳтимол яхшидир-у, аммо мен умрбод квас билан ёвғон карам шўрва ичиб кун қўришга рози эмасман. Пролетаръятни худо ярлақасин, борди-ю, меҳнат кунларига гўштми ёки чунончи, карам шўрвага солиш учун ёғ бериб қолишмаса қишига-ча оёғимни ростлаб қолишим ҳам ажаб эмас. Унда пролетар деган унвонимнинг нима нафи тегади? Кузга бориб меҳнат кунимнинг чўғини қарайман, бўлмаса мен дарров яна майда хусусий мулкчилигимга ўтиб оламан».

Шчукарь бобо ўйчанлик билан кўзини сузиб, энди барала галириб юборди:

— Турмушимизнинг кам-кўсти кўплигидан қаттиқ гуноҳларга ботяпмиз. Ҳамма ишлар янгича бир йўриқда. Яхши бир ўйинчининг муқомларидек нуқул аллақандай тушуниб бўлмайдиган оҳангжамалар билан кетиб боряпти...

У отларни четанга боғлаб зўрға турган эшикни очди-да, баргизуб босган сўқмоқ бўйлаб хонадон бошлиғига хос виқор билан аста-секин юрганча зина-пояга қараб кетди.

Ошхона ним қоронғи, меҳмонхонанинг эшиги ёпиқ эди. Шчукарь бобо ёғ босиб кетган чалпакдек япасқи фуражкаси билан Трофимнинг касофатидан бир лаҳза ҳам қўлидан ташламайдиган қамчинини скамейкага қўйди-да, аланглаб, ҳар эҳтимолга қарши чақирди:

— Кампир! Омонисан ишқилиб?

Меҳмонхонадан заифгина овоз эшитилди.

— Номига омонман... Қеча кечқурундан бери бош кўтармай ётибман. Ҳамма ёғим сирқираф оғрияпти, тинка-мадорим йўқ. шундай совқотяпманки, пўстин ёпинсам ҳам исимаяпман... Безгакка чалинганга ўхшайман... Сен нимага келдинг, чол?

Шчукарь меҳмонхонанинг эшигини очиб, оstonада туриб қолди.

— Ҳозир станицага кетяпман. Сафар олдидан та-маддиқ қилиб олгани кирдим.

— Нима иш билан кетяпсан?

Шчукарь гуурланиб соқолини силади-да, гүё хуш келмагандек жавоб берди:

— Жиддий бир командировка чиқиб қолди, ер ўлчовчини олиб кетгани кетяпман. Ўртоқ Давидов: «Уни менга ўзинг олиб келмасанг, бобо, сендан бошқа ҳеч ким олиб келолмайди» дейди. Бутун районга биттаю битта ер ўлчовчи, ўша Шпортий деган одам менга таниш бўлади, мени ҳурмат қилганидан албатта келади,— деб тушунтириди Шчукарь. Шу ондаёқ дарҳол жиддий оҳангда муддаога кўчди:— Егулик бирон нарса олиб кел-чи, вақт жуда зик.

Кампир баттарроқ ингради.

— Вой, шўргиналарим қурсин! Энди сенга нима едиридим? Мен бугун овқат қилмаган эдим, қозон осмаган эдим. Полизга кириб бодринг узиб чиқа қол, ертгўлада қатиқ бор, кеча қўшнимиз олиб чиқкан эди.

Шчукарь бобо вафодорининг гапини аён-ошкор нафрот билан әшитиб, ниҳоят тувақиб кетди:

— Янги бодринг еб устидан қатиқ ичгин деяпсанми? Паққос эсингни еб қолибсан, қари астролябия! Бу нима қилганинг — мени бор обрўйимдан ажралсин деяпсанми? Ўзинг биласан-ку, ичимнинг ғоятда мазаси йўқлигини, бунақа овқатдан йўлда ичим паққос бузилиб роса суради, унда мен станицада нима қилишим керак? Иштонимни қўлимда кўтариб юришим керакми? Ҳолбуки, айғирлардан бир қадам ҳам нари жилишим мумкинмас, унда ҳолим нима кечади? Кўчанинг қоқ ўртасида қолган обрўйимдан ҳам айрилайми? Саломат бўласиз! Бодрингларингни ўзинг еб, тафт бостисига қатиқ ҳам ич, менинг бундай таваккалга тоқатим йўқ! Менинг вазифам ҳазилакам вазифа эмас, кимсан ўртоқ Давидовнинг ўзини олиб юраман, сенинг бодрингларингни еб фалокат босишини ўзимга эп кўрмайман. Тушундингми, қари аprobация?

Кампир ётган кўхнагина ёғоч каравот сирли ғижирлаб қўйди. Шчукарь бобо шу ондаёқ сергакланди. У дашном бериб бўлмаган ҳам эдики, кампири дафъатан ҳайрон қоларлик даражада ўзгарди-қўйди: у чаққонлик билан каравотдан сакраб тушди-да, қаҳр-ғазаби ошганча шиддат билаъ қўлларини биқи-

нига тираб олди. Фижим пешанабоини қўнқайтириб қўйиб гап бошлаганида яқингинадаги заиф овози қўрслалиб металлдек янграй бошлади:

— Кўнглинг нимани хоҳлаган эди, қари тўнгак, сени сергўшт карам шўрва билан боқишим керакми? Ёки қўнглинг чалпак билан қаймоқ тусаяптими? Мен буларнинг ҳаммасини қаёқдан оламан, омборинг шипшийдам бўлса, сичқонлардан бошқа ҳеч нарса бўлмаса, улар ҳам очидан ўлай деб ётган бўлса! Мени қачонгача ҳар бало ярамас сўзлар билан ҳақорат қиласан? Нега энди мен сенга астролябия билан пробация бўларканман? Макарка Нагульнов сени ҳар хил беҳаёқ китобларни ўқишига ўргатиб қўйган бўлса сен аҳмоқ терингга сифмай кетяпсанми? Мен — вафодор хотинман, бутун умримни сенга вафо қилиб ўтказдим, шўртумшуқ, қариган чоғимда мени атаб чақиргани от тополмай қолдингми?!

Иш Шчукарь кутмаган хунук бир қиёфага кириб бормоқда эди. Шунинг учун ҳам у ошхона ичкарисига бир оз чекинмоқчи бўлиб чақонлик билан тисариларкан, муроса билан гапирди:

— Хўп, қўй, қўйсанг-чи, кампир! Булар мутлақо ҳақорат сўзлар эмас, китобда бор эркалайдиган сўз. Жонгинам деса ҳам, астролябия деса ҳам, бари бир... Содда қилиб «ўргилай» десанг китобдаги «апробация» дегани бўлади. Худо ҳақи, гапимга ишон, Макарушка, ўқи, деб тутқизган қалин китобда шундай деб ёзилган, ўз кўзим билан кўриб ўқиганман, сенинг кўнглингга бўлса нима бало гаплар келяпти. Саводсизлигингни батамом тугатмаганлигингнинг оқибати бу! Мен ўқиётганимга ўхшаб ўқишинг керак, унда сенинг ичингдан ҳам ҳар хил сўзлар чиқадиган бўлади, мендан қолишмайдиган бўласан, факт!

Шчукарнинг овозидаги писандада таъсири шу қадар кучли эдики, кампир ҳовридан тушди, аммо эрига ҳамон диққат билан тикилганча хўрсиниб қўйди:

— Ўқий десам мавруди ўтган, ҳожати ҳам йўқ. Сен қари кузан ўлгур ҳам ўз тилингда гаплашаверсанг бўларди, бўлмаса халойиқ сени қип-қизил аҳмоқ, деб куляпти.

— Одамни одам қиласиган кулги,— деди қўрслик билан Шчукарь бобо, аммо ортиқ баҳслашмади.

Чоғроққина товоқдаги қатиққа бир бурда суви қочган нонни ҳафсала билан узоқ тўғраб, аста-секин астойдил чайнаганча деразага қараб ўй сурди: «Станицага ошиқиб мени нима жин урди? Одам бирор йўлишнинг пайига тушиб, унинг имонини келтириб ўгириб, фотиҳасини ўқиш керак бўлганда — ошиқиши керак. Шпортной бўлса — поп эмас, ер ўлчовчи, Давидов ҳам мутлақо ўлишнинг пайдан бўлиб тургани йўқ, ўпкамни қўлтиқлаб нима қилдим? Нариги дунёга бориб олишга ҳаммамиз ҳам улгурамиз, ҳали ҳеч ким ажалнинг иштиёқида навбатда тургани йўқ... Шунинг учун ҳозир хутордан чиқиб бораман-у, биронта сойга қараб буриламан-да, ҳеч қайси бир иблисга кўринмай, тўйгунимча ётиб ухлайман, бу орада отлар ҳам ўт чимдиг турнишади. Кечқурун Дубцовнинг бригадасига кириб бораман, Куприяновна мени албатта овқат билан сийлайди, хўш, кечаси салқингинада станицага етиб бораман. Борди-ю, худо кўрсатмасин, Давидов буни билиб қоладиган бўлса — мен унга бор гапни очиқласига айтиб қўя қоламан: «Лаънати таканглар Трофимни йўқотинглар — шунда мен ҳам йўлда ётиб ухламайдиган бўламан. У кечаси билан атрофимдаги хашакда чавандозлик қилиб чиқади, шундан кейин одамнинг уйқуси уйқу бўлиб қаёққа борди? Диққатбозликдан бошқа нарса эмас!»

Дубцовга меҳмон бўлиш иштиёқидан ҳузур қилиб чеҳраси очилиб кетган Шчукарь жилмайиб қўйди, аммо кампири шунда ҳам таъбини тирриқ қилди:

— Худди фалаж одамга ўхшаб мунча аранг кавшанмасанг? Сени бирор ишга юборгандан кейин гўнг титкилаган қўнғиздай имиллайвермай тезроқ жўнасанг-чи. Китобдан ўрганган аҳмоқона сўзларингни ҳам эсингдан чиқариб юбор! Буларни менга айта кўрма, бўлмаса яғринингда косов ўйнатаман, шуни билиб қўй, қари аҳмоқ!

— Ҳар қандай қалтакнинг икки учи бор,— мужмалгина мингиллади Шчукарь бобо.

Аммо маликасининг юзидағи ғазабли ажинларни

кўриши билан қатиқни апир-шапир ичди-да, хайрлашди:

— Сен ёта қол, ўргилай, ўрнингдан беҳуда турма, омон-эсон дардингни тортиб ётавер, мен кетдим.

— Худо ёр бўлсин!— унча рўйхуш бермайроқ оқ йўл тилади кампири ва ўгирилиб олди.

*
* *

Хутор билан Червленая балканинг этагига етгунича бўлган олти километр йўлни Шчукарь бобо отларни секин ҳайдаб босиб ўтди, у ширингина мудраб борар, аҳён-аҳёнда мункиб кетар, тушки жазирама иссиқ ниҳоятда элитганидан бир марта линейкадан мункиб тушиб қетишига ҳам сал қолди. «Бунақада башарамнинг абжалини чиқариб олишим ҳам ҳеч гапмас»,— хавотир билан ўйлади Шчукарь сой томонга бурилаётib.

Червленаянинг ўзанида ҳали ўроқ тегмаган пичан муаттар талх ҳид таратганча белдан уриб туради. Сойнинг юқорисидан, аллақаёқдандир лойли ўзандан чашма жилға шилдираб оқмоқда эди. Унинг суви шу қадар шаффоф ва муздек эдикӣ, ҳатто отлар ҳам уни аҳён-аҳёнда оз-оздан қултумлаб-қултумлаб эҳтиёт билан тишлари орасидан симирадилар. Жилға атрофи муздеккина салқин, баланд кўтарилган қуёш уни тўла-тўқис қиздиришдан ожиз эди. «Қандай роҳат!»— деб шивирлаб қўйди Шчукарь отларни чиқараркан. У отларни тушовлаб ўтлагани қўйиб юборди-да, ўзи эса эскигина зилунчасини итбурун бутасининг соясига солиб чалқанчасига ётди, жазирамадан тусини йўқотган оқиш-мовий осмонга худди шу осмонга ўҳшаган туссиз-мовий кекса кўзларини тикканча, кундалик тирикчилик хаёлларига берилди:

«Бундай ҳузур-ҳаловат қўйнидан мени кечгача бигиз билан чуқилаб ҳам чиқариб ололмайсан. Тўйиб ухлаб, кўхна суюк-сўнгакларимни офтобда тоблаб олиб, кейин Дубцовнинг олдига меҳмондорчиликка, бўтқаҳўрликка бораман. Уйдан нонушта қилолмаган эдим, дейман, мени албатта тўйдиришади, бу нарса муқаррар! Нима учун энди бригададагилар, албатта

ёвғон бўтқа ейиши керак ёки аллақаёқдаги расво ўмочнинг тамаида қозонда қошиқ изғитиши керак? Бу Дубцов ўрим вақтида рўза тутиб юрадиган йигитлардан эмас. Бу чўтири шунаقا айёрки, бир кун ҳам гўштсиз туролмайди. Бирорнинг сурувидан қўй ўғирлаб келиб бўлса ҳамки, ўроқчиларини боқади.. Тушликка камида тўрт қадоқча келадиган бир бўлаккина қўй гўштини тушириб олса чакки бўлмасди! Айниқса, қовурилган, ёғлиққина бўлса, ёинки, жилла қурса, жizzалик қаймоқ бўлса, аммо тўйиб есанг... Қаймоқли иримчик чучвара ҳам табаррук овқат, ҳар қандай имон тилашдан ҳам аъло, айниқса ўргилиб кетайларни тарелкангга кўпроқ солиб беришса, яна бир марта кўпроқ, уйиброқ солиб бериб кейин тарелкани эҳтиёт билан силкитиб қўйишса-да, қаймоқ тагигача силқиб тушиб, ҳар бир чучвара бошдан-оёқ қаймоққа чўмилса. Агар шу чучвараларни сенга тарелкага эмас, қошиқ яйрагундек чуқурроқ бир идишга солиб беришса, унда яна ҳам сўлимроқ бўлади!»

Шчукаръ бобо ҳеч қачон шикампарварлиги билан ном чиқарган эмас, қорни оч эди, холос, Ўзининг узоқ ҳузур-ҳаловатсиз умри давомида камдан-кам қорни тўйиб овқат еган, назарида лаззатли туюлган турли-туман таомларни тушидагина еб тўяр эди. Тушида гоҳ қайнатилган қўй қорники ея ётган бўлар, гоҳ ҳавол-ҳавол каттакон чалпакни ўраб-ўраб қаймоққа булаганча оғзига тиқаётган, гоҳ фознинг калла-пocha, ичак-чавоғи солинган лаззатли уграни яккаш апиршапир оғзи куйганча ичаётган бўлар эди.. Ҳар бир оч одамга ўхшаб узун кечалар давомида унинг тушига нималар кирмас эди, аммо у бундай тушлардан кейин, албатта хафа бўлиб уйғонар, баъзан ҳатто аччиғланиб уйғонар ва ўзича гапирап эди: «Бу васвасанинг беҳудадаң беҳуда тушимга кирганини қара! Турмуш эмас, майнавозчиликнинг ўзи: тушингда, терингга сифмай шундай уграни туширасанки, еган билан тўймайсан, ўнгингда бўлса — кампиринг тумшувингнинг тагига бўқтирилган нонни олиб келиб қўяди, лаънатексин бу бўқтирилган нон деган иблисга!»

Бундай гушлардан кейин Шчукарь бобо нонуштагача құрғоқ лабларини аста-секин ялаб юрар, фақирона нонушта вактида эса ҳасратли хўрсинганча, қўлида кемтик қошиқ, бўшашиб фаромушлик билан товоқдан картошка доналарини қидирад эди.

Бута остида ётаркан Шчукарь бригадада тушликка нима овқат тортилишини анчагача ўйлаб ётди, кейин эса бехосдан Яков Лукичнинг онасининг маъракасида ейилган овқатни хотирлаб ниҳоятда нафсини қўзитиб олдики, яна қорни қаттиқ очганини ҳис қилди, мудроғидан асар ҳам қолмади, ғижинганча туфуриб, соқолини аста артди-да, қапишиб кетган қорнини пайпаслаганча, кейин барага гапира бошлади:

— Бир бурда нон билан бир кружка қатиқ — ахир бу чинакам маҳсулдор эркакка овқатлик қиласмиди? Овқат эмас, пучаккина ел! Бир соат бурун қорним худди лўлининг чилдирмасидек таранг эди, ҳозир-чи? Ҳозир бўлса, умуртқамга қапишиб қолди. Худойи таологинам-эй! Умрим бино бўлибди, бир бурда ризқ-насиба нонимни, қорнимни нима билан қаппайтиришни ўйлайман. Умр бўлса панжангнинг орасидан ўтган сувдек ўтиб кетяпти, тугаб бораётганини ҳам билмай қоласан. Шу Червлена сойидан яқингина да ўтмаганмидим! Ўшанда ҳамма итбурунлар қийгос гуллаб бутун сойни оппоқ момиқ чулғаган эди! Шабада эсгудек бўлса, хушбўй оппоқ гул сой бўйлаб учиб. қор бўрон вақтидаги қордек гир-гир айланарди. Пастдаги бутун ўйлоппоқ эди, хотин-халажнинг ҳар қандай упа-элигидан ҳам хушбўй эди, ҳозир бўлса ўща баҳорги гуллар қорайиб гойиб бўлибди, мутлақо, паққос йўқ бўлибди! Менинг савил умрим ҳам қариган чоғимда унниқиб кетди, ҳадемай шўрлик Шчукарь ҳам тайпоқ туёқлари тарвақалайганча дунёдан ўтади, бу хумпарга ҳеч бир чора йўқ...

Шчукарь бобонинг фалсафий-лирик мулоҳазалари шу билан тамом бўлди. Ўзига ўзи ачиниб кетиб, Шчукарь озгина йиғлаб ҳам олди, бурнини қоқиб, қизариб кетган кўзларини енги билан артди-да, мудрай бошлади. Уни ғамгин ўй босса ҳамиша уйқуси келарди.

Уйқуга кетаркан ҳатто шу аҳволда ҳам ўз феълига ихтилоф қилмай яйраб жилмайди, ҳузур билан кўз-

ларини сузди, уйқу босиб ўйлади: «Дубцовнинг бригадасида тушлик овқатга албатта янги сўйилган қўй гўшти тортилади, кўнглим айтиб турибди! Хўш, бир ўтиришда тўрт қадоқни туширолмасман-у, албатта, мен бир оз ҳовлиқиб ошириброқ юбордим, аммо уч қадоқми ёки чунончи уч ярим қадоқми — бошимни кўтармасдан шипириб ташлайман! Уша қўй гўшти столда бўлса бас. У ёғига Шчукаръ янглишиб қолмайди, мўлжалдан адашмай тўппа-тўғри оғзига ташлаб туради, хотиржам бўлинг!»

Соат учларга бориб жазирама авжига чиқди. Шарқдан кўтарилган қуруқ, иссиқ шабада Червленая балкага қизиб кетган ҳаво олиб келмоқда эди, ҳадемай у ерда яқингинадаги салқиндан асар ҳам қолмади. Бунинг устига фарбга оғаётган қуёш гўё Шчукарни таъқиб қилаётгандек эди, у букланган зипунчасига юзини қўйганча мук тушиб ётар, қуёш шуъласи уни яна пайпаслаб, кейин эса жулдур кўйлагидан ўтиб озғин яғринини ачитиб санчилла бошлагач, у уйқусираганча секингина сояга сурилар, аммо бир неча дақиқадан кейин шилқум қуёш чолнинг яғринини яна аёвсиз куйдира бошлар, Шчукаръ қорни билан сурилганча яна четга қочишга мажбур бўлар эди. Уч соат бадалида кўз очмай сурила-сурила кичикроқ бута атрофининг ярмичасини айланиб чиқди. Ниҳоят, жазирамадан тинкаси қуриб кўпчиган, тердан шалаббо бўлган Шчукаръ уйғониб ўтирди-да, кафтини соябон қилиб қуёшга қараганча ғижиниб ўйлади: «Худонинг кўзини қара, ўзинг кечиргил, парвардигор, ундан бутанинг тагига яшириниб ҳам қутуломайсан! Салкам ярим кун мени бута атрофида худди қуёнга ўхшаб диконглашга мажбур қилди. Шу ҳам уйқу бўлдими? Бу уйқу эмас, балойи офат! Линейканинг тагига ёта қолсам бўларкан-у, аммо худонинг кўзи мени у ерда ҳам қидириб топарди, бийдай тап-тақир дала-да ундан қочиб қутулиб бўпсан!»

Томоқ қириб инқиллаб-синқиллаганча, у ниҳоятда тўзиган чориқларини ошиқмасдангини ечиб, шими-нинг почаларини шимарди-да, заҳарханда қилиб жилмайди, бошини ғамгин чайқаб, қоқ суяқ оёқларини анчагача кўздан кечириб турди. Кейин бўриқиб кет-

ғай юзининг тафтини босиш учун ювингани жилға томон қараб кетди.

Шу дақиқадан бошлаб унинг ҳәётидаги кўнгилсиз саргузаштлар или бир чеккаданчувай бошлади...

Жилға ўргасидаги очиқ жойга бориш учун майдади қиёқ орасидан оёқларини баланд кўтариб икки қадам ҳам юрмаган эдики, бирдан чап оёғи билан муздек ва сирғанчиқ, ғимирлаётган бир нарсани босиб олганини, шу ондаёқ тўпифидан юқорироқни бир нарса чаққанини ҳис қилди. Шчукарь бобо чап оёғини чаққонлик билан сувдан тортиб олиб, худди ботқоқ ўргасидаги турнадек ўнг оёғида тураверди. Аммо у чап томонидаги қиёқ шитирлаб ундан тезгина иланг биланг из ўтганини кўраркан, ранги қиёқнинг тусицек кўм-кўк кўкариб кетди, кўzlари бўлса аста-секин қинидан чиқа бошлади...

Чол қаёқдан чопқир бўлиб кетди экан! Гёё алла-қачон ўтиб кетган ёшлиги қайтиб келгандек эди: икки сакрашдаёқ қирғоққа чиқиб олди, бир дўнгликка ўтириб олгач, оёғидаги иккита кичкинагина қизил нуқтачани синчиклаб кўздан кечириб, ола-кула кўzlари билан ўқтин-ўқтин бадбаҳт жилғага қараб қўярди.

Аста-секин дастглабки қўрқуви босилиб мулоҳаза қилишга қурби етадиган бўлгач, у оҳиста шивирлади:

— Ана, худога шукур, бошланди ҳам... Бу лаънати аломатлар шундан белги берган экан! Мен бу овсар Давидовга, бугун хатарли, станицага бориш керакмас, десам қани кўнса, икки оёғини бир этикка тиқиб, борасан, деб туриб олди, мана сафаримнинг оқибати. У яккаш: «Мен — ишчилар синфиман» дейди. Ишчилар синфи нега мунча шиддатли бўлар экан? Агар у бирон ишга жазм қилса — хотиржам бўлинг, сенинг тинкангни қуритса қуритадики, муддаосига эришмай қўймайди! Мана муддаосига ҳам етди, итвачча, энди мен нима қилишим керак?

Дағъатан Шчукарнинг миясига бир фикр келиб қолди: «Ҳозироқ ярадаги қонни сўриб ташлаш керак! Мени заҳарли қора илон чаққангага ўхшайди, қиёқнинг орасидан ғизиллаб қочди-ку! Беозор илон ёинки,

чунончи ўқ илон сиполик билан ўрмалайди. Бу аблаҳ бўлса худди чақмоқдек отилиб биланглаганча жўнаб қолди. Мендан роса қўрқиб кетди! Аммо бир савол туғилади—ким-кимдан кўпроқ қўрқди: мен унданми ё у менданми?»

Бу мураккаб саволни ечишга вақт йўқ, вақт жуда зиқ эди, бобо ҳам ҳаялламай дарҳол ўтириди-да, икки букилганча уввало тиришса ҳамки, оғзини сира ҳам ярага олиб боролмади. Шундан кейин у товони ва оёғининг учини икки қўллаб ушлаб шу қадар жонжаҳди билан ўзига қараб тортиб юбордики, тўпифида нимадир қарсиллаб кетди, қаттиқ оғриқдан чол чалқанчасига йиқилиб тушди. У беш минутча қимирламай ётди. Шчукарь ўзига келгач, чап оёғининг бармоқларини аста-секин қимирлатиб кўриб, ниҳоятда гарангсиганча ўйлай бошлади: «Илон чаққандан бошланган эди, энди бу ёғи тобора авжига чиқяпти... Одамнинг ўз ихтиёри билан ўзи оёғини чиқариб қўйиши мумкинлигини умримда биринчи марта кўришим. Бу машмашани кимга айтсанг ҳамки, ишонмайди. «Шчукарь яна ёлғон гапирялти!» дейди. Ана сенга аломатлар. Шунақанги кўйларга соляпти. Ҳаҳ, лаънат теккур Давидов! Мен уни одам деб яхшиликча айтдим-а. Энди нима қилишим керак? Отларни қандай қилиб қўшаман?»

Бироқ ортиқ ҳаяллаш мумкин эмас эди. Шчукарь аста-секин ўрнидан туриб, чап оёғини эҳтиёт билан босиб кўрди. У жуда севиниб кетди, оғриқ унча зўр эмас эди, гарчанд машаққат билан бўлса ҳам юра олиши мумкин эди. Кичкина бир думалоқ кесакни кафтида эзғилаб, уни туфугига қоргач, ҳафсала билан ярасига чаплаб, шикастланган оёғини эҳтиёткорона босганча отлар томон оқсоқланиб кетаётган ҳам эди, дабдурустдан ўзидан тўрт метрча нарироқда, жилғанинг нариги бетида, шундай бир нарсани кўриб қолдики, кўзлари ўйнаб, лаблари қаҳр-ғазабдан титраб кетди: нариги томонда, офтоб рўядада кулча бўлиб ётган бир ўқ илон ҳузур билан мудрамоқда эди. Унинг ўқ илон эканлигига ҳеч қандай шубҳа йўқ: унинг бошида қизғиши-сариқ «кўзгу» йилтираб турар эди...

Шчукарнинг роса жини қўзиб кетди. Унинг нутқи ҳеч бунчалик кўтаринки ҳаяжонли ва нафратли бўлмаган эди. Касал оёғини олдинга чиқариб, қўлини тантанали равишда чўзганча у титроқ овоз билан гапира бошлади:

— Ўрмаловчи ғаддор! Совуққон абраҳ! Қўзойнакли вабо! Мени, яъни маҳсулдор эркакнинг ўтакасини ёриб юборган сенмидинг ҳали, ярамас газанда?! Мен лақма бўлсан, сен эмас, ҳалол қора илон дебман! Агар бу масалани текширадиган бўлсан, сен ўзинг аслида кимсан? Ўрмалаб юрган ярамассан холос, вассалом! Сени яна бир оёқ билан тепкилаб титифингни ўйнатиб юбориш керак, фақат шундай қилишга тўғри келади. Агар сен баттолнинг касофатидан оёғимни чиқариб олмаганимда сени албатта шундай қилган бўлардим, шуни билиб қўй.

Шчукарь һафасини ростлаб, туфугини ютди. Ўқ илон мармардек хушбичим калласини кўтарганча умрида илк бор ўзига қаратиб айтилаётган нутқни гўё тинглаб тургандек эди. Шчукарь дамини олиб, давом эттириди:

— Беҳаё кўзларингни бақрайтирганча мижжа ҳам қоқмайсан-а, иблис? Осонгина қутулиб кетаман деб ўйляяпсанми ҳали? Йўқ, ўргилай, ҳозир сен мендан бугунги меҳнат кунингни, тегадиган улушларингнинг ҳаммасини оласан! Сендақангি адаптердан ўргилдим-ку! Мен сенинг шундай боллаб таъзириングни берайки, сендан фақат анфиладагина қолсин, факт!

Шчукарь бобо қаҳр-ғазабли кўзларини ерга қадаган эди, Червленая балканинг юқорисидаги алла-қаёқлардан баҳор сувлари юмалатиб келган майда тошлар орасида каттакон бир силлиқ сой тошини кўриб қолди. Оёғи шикастланганини ҳам унутиб, олдинга шахдам қадам ташлади. Тўпири қаттиқ оғриқдан сирқираб кетиб, бобо ёнбошига қулаб тушди. У оғизга олиб бўлмайдиган сўзлар билан сўкинар, аммо тошни ерга ташламас эди.

У инграб, инқиллай-синқиллай ўрнидан тургунча — ўқ илон ғойиб бўлган эди. Унинг қораси ҳам кўринмасди. Ер ёрилиб ерга кириб кетгандек эди! Шчу-

карь тошни тушириб юбориб гарангсиганча қўллари-ни ёзди.

— Ё тавба, бу қандай корибад бўлди! Бу бетав-фиқ қаёққа ғойиб бўлди экан? Яна сувга шўнгиб кетганга ўхшайди. Бир омад кетгандан кейин кетаверар экан. Ўйлайманки, иш бу билан тугамаса керак... Мен қари лақма у билан айтишиб ўтирмай, индамасдан қўлимга тош олиб дастлабданоқ бошига, қоқ бошига туширишим керак эди. Бўлмаса бу газандани ўлдиролмайсан, иккинчи марта ураман десам мўлжалимдан адашишим ҳам мумкин эди, факт. Энди нимани ураман, у иблис шўнгиб кетди-ку? Шуниси чатоқ!

Шчукарь бобо яғринини қашиб жилға бўйида яна бир оз турди-да, кейин ҳафсаласи пир бўлганча қўл силтаб оқсоқлана-оқсоқлана отларни аравага қўшгани қараб кетди. У жилғадан хийлагина узоқлашиб кетмагунча ҳар эҳтимолга қарши бир неча марта орқасига қараб-қараб қўйди...

...Шабада эсаётган дашт қудратли ва баҳайбат кўкрагини тўлатиб, ўрилган пичаннинг маст қилувчи, ҳамиша ҳазинроқ атрини ҳидлаб бир маромда нафас олмоқда, йўл четидаги сийрак дубзорлардан салқин ҳаво, чиринди дуб ҳазонининг ўлик, аммо тетиклантирувчи ҳиди келмоқда. Аммо шунгнинг бултурги ҳазонидан эса нечукдир ёшлиқ, баҳор, эҳтимолки, сал-пал бинафша ҳиди анқимоқда эди. Турли-туман ҳидларнинг бундай омухтасидан тўпори одам нечундир ҳамма вақт, айниқса, ўзи ёлғиз қолган пайтларида хийлагина юраги эзилиб, кўнгли бузилиб кетади... Аммо Шчукарь бобо бунақалардан эмас эди. Касал оёғини букланган зипунига жойлаштириб қўйиб, ўнг оёғини эса бепарвогина линейкадан осилтирганча, тиҳсиз оғзи қулоғига етгундек яйраб жилмаймоқда, йиллар ўтиши билан тусини йўқотган кўзларини мамнуният билан сузмоқда, пўст ташлаган жажжигина қизил бурни эса жонажон даштининг қадрдон хушбўй ҳидларини ютоқиб искағанча бесаранжом керкимоқда эди.

Нима учун ҳаётдан завқланиб севинмаслиги керак эди? Оёғининг оғриги аста-секин босила бошлади,

шарқдаги йироқ бир жойдан шамол олиб келган булат қүёшни узоқ бир муддатга тўсиб қўйди, увалар, дўнгликлар, тепаликлар ва сойликлар бўйлаб қуюқ кўкиш соя суза бошлаб, нафас олиши енгиллашди, қолаверса, уни олдинда мўл-кўл кечки овқат кутмоқда эди. Йўқ, нима десангиз деяверинг, ҳозир Шчукарь бобонинг аҳволи унча чакки эмас эди!

Тепаликнинг белида, узоқдан иккинчи бригаданинг дала будкаси ва қўшхонаси кўриниши билан Шчукарь ҳафсаласизгина йўртиб кетаётган отларни тўхтатди-да, линейкадан тушди. Тўпифидаги вазмин зирқироқ ҳали босилмаган, аммо у ҳар қалай икки оёғини босиб озод туриши мумкин эди, шунинг учун чол аҳд қилди: «Мен уларга сув ташувчи эмас, кимсан колхоз правлениесининг кучери келаётганини бир кўрсатиб қўяй. Ўртоқ Давидовни, Макарушкани, яна бошқа каттакон бошлиқларни олиб юрибманми, аравани ҳам шундай ҳайдаб борайки, одамлар узоқдан кўриб, ҳаваслари келсин!»

Тунги манзил яқинлашиб қолганини сезган отларни тинчитиб, тўнғиллаб, зорланиб инграганча чол линейкада оёқларини кериб тик туриб олди-да, тизгинни таранг тортиб, мардонавор ҳайқирди. Айғирлар сапчиб елиб кетишиди. Қияликдан тушган сари улар тобора тезроқ елишарди, ҳадемай қаршидан эсган шамол Шчукарнинг камарсиз кўйлагининг орқасини пухаклек шишириб, кўпчитиб юборди, ўзи эса ҳамон отлардан илдамлашларини илтимос қилар, оёғининг оғрифидан ижирғанганде қамчисини хушчақчақ силтар, чийиллаб чинқирар эди: «Ўргилиб кетайлар, шахтларингдан қайтма!»

Уни аввал қўшхона яқинида юрган Агафон Дубцов кўриб қолди:

— Аллақайси бир жин урган отларни тавриячасига тикка туриб ҳайдаб келяпти. Қара-чи, Прянишников, бизга ташриф буюрган ким экан?

Тўла-тўқис босиб бўлинмаган пичан ғарами устидан Прянишников хушчақчақлик билан қичқирди:

— Агитбригада келяпти: Шчукарь бобо.

— Жойида,— деди мамнуният билан жилмайиб Дубцов.— Бўлмаса зерикиб, диққат бўлиб кетдик.

Чол биз билан бирга овқатланади, шарт шуки, оғай-
нилар, кечаси уни жўнатмай олиб қоламиз.

Ўзи эса будка тагидан қопини олиб, уни наридан-
бери титкилади-да, оғзи очилган чоракталик ароқни
чўнтағига тиқди.

XIX БОБ

Шчукарь бобо оз-моз ёғ солинган суюқ сўк бўт-
қадан икки товоғини туширгач, ҳузур қилиб яйраб
кетди, уни енгилгина мудроқ босди. Сахий ошпазга
миннатдорчилик билан қараб гапирди:

— Меҳмондорчиликларингиз ва ароқларингиз
учун ҳаммаларингизга раҳмат, сенга, Куприяновна,
қуюқ таъзим. Агар билмоқчи бўлсанг, сен мутлақо
хотин эмас, бир сандиқ тилласан, фákт. Бўтқа пи-
ширишдаги бунақа пазандалигинг билан рӯдалолар-
га эмас, Михаил Иванович Калининнинг ўзларига
хизмат қилишга муносисбсан. Калламни гаровга қўя-
ман, астойдил ғайрат кўрсатганинг учун бир йил ўтар-
ўтмас кўкрагингда биронта медаль қадалиб турган
бўлармиди, эҳтимолки, у енгингга тақиб юришинг
учун биронта шеврон ҳадя қилиб қолса ҳам ажаб
эмас эди, худо ҳақи, гапимга ишон, факт. Мен тур-
мушда энг муҳим нарса нималигини чуқур била-
ман...

— Нима муҳим?— дарҳол сўради ёнида ўтирган
Дубцов.— Сенинг фикрингча, энг муҳим нарса нима?

— Овқат! Гапнинг хуласасини айтяпман, фақат
овқат, ундан бошқа муҳимроқ нарса йўқ.

— Янглишяпсан, бобо,— деди ғамгингина Дубцов,
қулоқ солиб ўтирган бошқа одамларга лўлича кўзла-
рини шифрайтириб ва сира ҳам пинагини бузмай.—
Сен қаттиқ янглишяпсан, шу сабабдан янглишяп-
санки, қариган чофингда миянг худди ҳозир хўрилла-
тиб ичган бўтқангга ўхшаб суюлиб кетибди. Миянг
суюлиб кетибди, шунинг учун янглишяпсан...

Шчукарь бобо илтифот қилгандек жилмайиб
қўйди:

— Кимнинг мияси — сенинг миянгми ё менинг ми-

ямми пухтароқлиги ҳозирча маълум эмас. Сенинг фикрингча, турмушдаги энг муҳим нарса нима?

— Ишқ-муҳаббат,— деди Дубцов, гапиргандан кўра ҳам нафасини бўшатгандек ва кўзларини маҳлиёлик билан ола-кула қилиб шундай суздики, унинг қорамағиз чўтири юзига қарапкан, ҳаммадан олдин Куприяновнанинг кулгиси қистаб кетди.

У ёмғир ёғишини сезган отдек қаттиқ пишқириб, кулгидан бутун гавдаси силкина-силкина, кофтачалинг енги билан қизариб кетган юзини тўсди.

— Ҳе! Ишқ-муҳаббат эмиш!— Шчукарь энсаси қотиб илжайди.— Яхши овқат бўлмаса сенинг ишқ-муҳаббатингдан нима иш чиқарди? Ҳеч вақо, ҳеч бало чиқмайди! Бир ҳафтагина овқат беришмасин, сендан Куприяновнагина эмас, ҳатто ўз хотининг ҳам кечиб юборади.

— Қайдам, энди,— тарҳашлик қиласиди Дубцов.

— Бунинг гапириб ўтирадиган жойи ҳам йўқ. Мен буни олдинданоқ яхши биламан,— унинг оғзига урди Шчукарь бобо ва писанда билан шаҳодат бармоғини кўтарди.— Мана мен ҳозир сизларга бир машмашани айтиб бераман, ҳамма нарса ойдинлашиб, ҳеч қандай баҳсга ҳожат қолмайди.

Шчукарь бобо ўз гапига бундан ҳам диққат бериброқ қулоқ соладиган одамларни камдан-кам учратган эди. Гулхан атрофида ўттизга яқин одам ўтирап, ҳаммалари ҳам Шчукарнинг биронта сўзини хато қилмай эшишишга тиришар эдилар. Ҳар қалай, унга шундай туюлмоқда эди. Шўрлик чол нима ҳам қилсин энди! Мажлисларда ҳеч қачон сўз беришмас, Давидов бўлса сафар вақтларида ҳеч индамас, яккаш нималарнидир ўйлар, Шчукарнинг кампирি эса ёшлигиданоқ камгап эди. Бояқиши чол ким билан ҳасратлашарди ахир? Шунинг учун ҳам у ҳозир жон қулоғи билан тинглайдиган одамлар топилиб қолгач, овқатдан сўнг кайфи чоғ бўлганлигидан тўйганча гапириб олмоқчи бўлди. У яхшилаб чордона қуриб, қўли билан соқолини сийпаб бафуржা ҳикоясини бошлиш учун эндигина оғиз жуфтлаган эдики, Дубцов унинг сўзини бўғзида қолдириб, ясама жиддийлик билан гапирди:

— Сен ёлғон аралаштирумасдан гапир, бобо! Бизнинг бригадамизда бир одат бор: ёлғончиларни тизгин билан саваймиз.

Шчукарь бобо оғир хўрсишиб, кафти билан чап сёғини силаб қўйди.

— Сен мени қўрқитма, Агафоша. Мен бугун бусиз ҳам ўтакам ёрилгудек бўлиб қўрқиб кетдим... Ҳўш, бу иш шундай бўлган эди. Баҳор кези бир куни Давидов мени чақириб олиб шундай деди: «Сен омборчидан икки қоп сули, ўзингга ҳам озиқ-овқат ол-да, айғирларни ҳайдаб тўппа-тўғри Сухой Логнинг этагига жўна. У ерда бияларимиз ёйилиб юрибди, сен ҳам худди ўша ерга куёв тўралар билан етиб борасан. Йилқини гаранг Василий Бабкин боқяпти. Йилқини икки уюрга бўласизлар, биттасига Василий қарайди, иккинчисига сен қарайсан. Аммо маҳсулдорлар учун сен жавобгарсан, уларни сули билан боқасан». Мен гапнинг рости, маҳсулдор нима эканлигини билмасдим, бунақа сўзни эшитмаган эдим. Ана сенга кўндаланг туғилган масала. Айғирни биламан, бияни биламан, ахта деганинг ҳам нималигини биламан, албатта. Мен «Маҳсулдор дегани нима бўлади?» деб сўрадим: У: «Кимки насл тарқатса ўша маҳсулдор бўлади» дегандек жавоб қилди. Яна сўрадим: «Буқани ҳам маҳсулдор деб атаса бўладими?» У башарасини тиришириб: «Албатта» деди. Мен яна сўрадим: «Сен билан биз ҳам маҳсулдормизми?» У кулиб юбориб: «Бу борада ҳар қайсимиз ўз кафилимизни ўзимиз олишимиз керак» деди. Хуллас калом, шундай эканки, сен хоҳ чумчуқмисан, хоҳ биронта ҳайвонмисан, хоҳ одаммисан, башарти сен эркак жинсидан бўлсанг ҳеч хуруши йўқ, бориб турган чинакам маҳсулдорсан. «Жуда маъқул», деб ўйлайман ичимда. Яна бир савол туғилади, «Галла маҳсулоти ишлаб чиқарадиган одам нима, маҳсулдорми ёки бошқами?» деб сўрадим ундан. У хўрсишиб қўйиб: «Сен қолоқ одамсан, бобожон» деди. Мен унинг бу гапига шундай деб жавоб бердим: «Мендан кўра ўзинг қолоқсан, Сёмушка, чунки мен сендан қирқ йил олдин туғилганман, сен бу важига кечикиб қолгансан». Шу билан масалани бартараф қилдик.

Куприяновна ҳарсиллаганча шивирлаб сўради:

— Бўлмаса сен ҳам маҳсулдор экансан-да, бобо?

— Хўш, мени ким деб ўйлаган эдинг?— деди ғурур билан Шчукар.

— Вой ўлай!— дея инграб юборди Куприяновна ва бошиқа ҳеч нарса дёёлмади, юзини пешгири билан яшириб олди, сукунатда унинг бўғиқ ҳирқироғигина эшитиларди.

— Сен унга эътибор берма, бобо, ўз ўйлингдан қолма,— деди меҳр билан Кондрат Майданников ва гулхандан ўгирилиб олди.

— Умрим бино бўптики, хотин-халаж зотига мен ҳеч қандай диққат-эътибор бермайман, эътибор қилганимда борми — ўлақолсам ҳам бунчалик узоқ умр кўрмасдим,— ишонч билан жавоб берди Шчукарь.

Яна давом эттириди:

— Хўп, дуруст, мен йилқи тепасига етиб бордим, чор атрофимга қарасам томоша қилиб тўймайман! Чор атроф шунақанги ажиотажки, бу ердан умрбод кетмасам дейман! Даشت бўйлаб тонг гуллари очилиб ётиди, ўт-ўлан барқ уриб ўсган, биялар ўтлаб, қўёш қиздириб турибди,— хуллас, тўла-тўкис ажиотажнинг ўзи!

— Ҳозир айтган сўзинг нима дегани бўлади?— қизиқиб сўради Бесхлебнов.

— Ажиотажми? Хўш, чор атрофингнинг кўркамлиги. «Жи» дегани: ёруғ дунёда яйраб-яшна, қайғу-ҳасратни ташла, дегани. Бу китоб сўзи,— қатъий ишонч билан жавоб берди Шчукарь.

— Сен бу сўзларни қаёқдан ўрганиб олдинг?— суриштиришини қўймасди қизиқувчан Бесхлебнов.

— Макарушка Нагульновдан. Биз у билан қадрдан ошнамиз, хўш, у кечалари инглиз тилини ўрганиди, мен унинг қошида бўламан. У менга худди Куприяновнага ўхшаган ўйғон китоб берди, оти — луғат. Бола-бақра савод чиқарадиган алифбе эмас, кексалар учун луғат. Китобни бериб: «Ўқиб ўрган, бобо, қариган чоғингда асқатиб қолар» деди. Шу тариқа мен кам-камдан ўқиб ўрганиб турибман. Сен менинг гапимни бўлаверма, Акимушка, бўлмаса мен бирпаста фикримдан адашиб кетаман. Бу луғат тўғрисида мен сизларга кейин гапириб бераман. Шундай қилиб,

мен ўзимнинг маҳсулдорларим билан бирга тайин қилинган жойга етиб бордим. Аммо менинг маҳсулдорларимдан ҳам, ажиотаждан ҳам биронта наф чиқмади... Мен сизларга гапнинг хуросасини айтсан, яхшилар: Васька-гарангни яқиндан танимаган одам ўн йил ортиғроқ умр кўради.

У шундай бир тўнгакки, агар таққосласак Демид Индамас бизнинг Гремячий Логда энг сергап одам. Унинг индамаслиги дастидан даштда тортган азоб-уқубатларимнинг сон-саноги йўқ! Биялар билан гаплашшим керакми? Васька бўлса кечаю кундуз фиқ этмайди, фақат овқатнигина курсиллатиб ейди, бошқа вақтда бўлса ё фиқ этмай ухлайди, ё шолча ёпинганича чириган кундадек дўмпайиб олиб яна индамай ётади. Аҳён-аҳён киприкларини пириллатиб қўйиб яна индамайди. У менинг олдимда шундай бир мушкул масалани кўндаланг қилиб қўйди. Хуллас, мен у ерда худди уч кечаю кундуз мозорда ўликларга меҳмон бўлгандек яшадим, ўзим билан ўзим гаплашадиган бўлиб қолдим. Э-э-э, бу иш ярамайди, деб ўйладим. Бунақада мендек улфати одамнинг жинни бўлиб қолиши ҳам ҳеч гапмас.

Макарушка Нагульновим йиллик байрамларда, яъни Биринчи май билан Еттинчи ноябрда жаҳон революцияси ҳақида узундан-узоқ нутқ сўзлаб оғзидан кўпик сочганча, тушуниб бўлмайдиган турли-туман сўзларни айтишини жинимдан баттар ёмон кўрсам ҳамки, ўшанда ҳатто унинг сўзларини ҳам боғдаги булбулнинг навоси ёки хўрозларнинг саҳардаги қичқириқларини эшитгандек кечаю кундуз сурункасига эшитган бўлардим. Сизлар бу хўрозларнинг қичқириқлари тўғрисида қандай фикрдасизлар, гражданлар? Бу, биродарлар, черковда «азиз авлиёларнинг арвоҳи ёр бўлсин» деган муножот ёки яна аллақандай таъсирили хунасайи даргоҳлардан сира ҳам қолишмайди.

— Сен бизга хўрозларнинг қандай қичқиришлари тўғрисида эмас, озиқ-овқатсиз ишқ-муҳаббат ҳақида гапириб бер,— сабрсизлик билан ҳикоячининг сўзини бўлди бригада ҳисобчиси.

— Сизлар ҳовлиқманглар, гражданлар, ҳар хил балою баттар ишқ-муҳаббатларнинг ҳам навбати ке-

лади, бу қийин масала эмас. Шундай қилиб, ўша Васька-гаранг ҳақида. У дим-дим ўйнаганда ҳам баҳарнов экан, устига-устак шунақанги мечкай эканки, унга ҳеч қандай даво тополмай қолдим. Бўтқами ё чу чук хамирдан узмами пиширамиз, нима бўлади денглар? Мен қозончага бир марта қошиқ солсам, у беш марта қошиқ солади. Баҳайбат қошигини худди паровознинг лўқидонидек ишлатади: у ёқа-бу ёқа, бу ёқа-у ёқа, қозончадан оғзига олиб боради, оғзидан қозончага олиб боради, қарасам — бўтқа қозончанинг тагидагина қолган бўлади. Очлигимча ўрнимдан тураман, у бўлса қорнини ҳўқиз пуффагидек ногора қилиб осмонга қараб узала тушганча бутун даштга эшигилгудек ҳиқичноқ тутиб ётади. Иблис икки соатча ҳиқичноқ тутиб ётади-да, кейин хуррак тортишга ўтади. Лаънатининг боласи шунақанги хуррак отадики, чайламизнинг яқинида юрган биялар ҳам ҳуркиб кетиб, тўғри келган томонга қараб қочишади. Кечасигача ухлайди, худди қишида ухлаган суғурдек қотиб ухлайди.

Мен у ерда шундай бир расво турмушга гирифтор бўлган эдим. Ўйи йўқ теватдек очимдан тиришганман, диққатбозликдан ҳасратлашай десам ҳеч ким йўқ... Эртасига Васьканинг ёнига ўтириб, қўлимни карнай қилдим-да, қулоғига бор овозим билан шангиллаб бақирдим: «Сен нимадан гаранг бўлиб қолгансан, урушдами ёки болалигингда ширинчага чалинибми?» У бўлса мендан ҳам баттар шангиллайди: «Урушда! Ўқ тўққизинчи йилда қизиллар бронепоезддаги тўрг дюймли замбаракдан ўқ узишган эди, ёнимга келиб тушди. Тагимдаги от ўлди, ўшандан бери мен контузияниб қулоғим том битиб қолди». Мен ундан яна сўрадим: «Нима сабабдан, бамисоли эс-ҳуши йўқдек овқатни ютоқиб ейсан, Василий? Бунинг ҳам контузияданми?» У менга: «Булут келибдими — жуда яхши. Ҳозир ёмғир жуда ҳам зарур!» деб жавоб беради. Бунақанги галварс билан нимани гаплашардинг...

— Сен ишқ-муҳаббат ҳақида қачон гапирасан? — сабрсизлик билан сўради Дубцов.

Шчукарь ижирғанди:

— Бу лаънат теккан ишқ-муҳаббатга мунча ёпишиб олдинглар! Мен бу ишқ-муҳаббатдан умрим бино бўлибдики, ўзимни олиб қочиб юраман, агар марҳум отам мажбур қилмаганида — мен мутлақо уйланмасдим ҳам, мана энди бўлса унинг жабрини тортиб, бу тўғрида гап сотишим керак. Топган масалаларингни қаранглар... Агар билмоқчи бўлсангизлар, ўшанда озиқ-овқатсиз ишқ-муҳаббатнинг оқибати шундай бўлган эди...

Мен тайинланган жойга етиб бордим, йилқини иккι уюрга бўлдик, куёв тўралар бўлса бияларга қарашмайди, бошларини кўтармасдан яккаш ўтлашади... Қани энди қайлиқларига заррача илтифот қилишса! Ана холос, дейман! Мени маҳсулдорларим роса иснодга қўйишди, дейман. Мен уларга тўлатиб-тўлатиб сули ҳам бераман, улар бўлса, жин урсин, бияларга бари бир қайрилиб қарашмайди.

Бир куни қарашмайди, эртасига ҳам қарашмайди. Мен шўрлик бияларнинг яқинида юришга ҳам ийманаман, ёnlаридан ўтиб қолсам уялганимдан юзимни ўгираман, кўзларига қараёлмайман, вассалом! Умримда қизармас эдим, бу ерда қизарадиган ҳам бўлиб қолдим: ҳовузга суғоргани олиб бориш учун уюрга яқинлашишим билан дарров худди қиз болага ўхшаб қизаришга тушаман...

Бафармони худо, маҳсулдорларимнинг дастидан қанчадан-қанча уятга қолдим — сон-саноғи йўқ! Масала мутлақо мушкул чиқиб қолди. Учинчи куни кўзимнинг ўнгига шундай бир манзара содир бўлди: ёшгина бир бия менинг Гулгина деган манглайи қашқа, чап томондаги орқа оёғининг почаси оқ саман маҳсулдорим билан ўйнашяпти. У саманнинг атрофида гир-гир айланиб ўргиляпти, гоҳ ундан ўгирилади, гоҳ бундай, уни тишлари билан тишлаб тортиб қўяди, унга турли-туман ишвалар қиласи, саман бўлса, унинг яғринига бошини қўйиб кўзини сузади-да, аянчли хўрсинади... Ана сизга Гулгина, бундан ҳам расво бўладими? Мен бўлсам, ғазабимдан титраб-қақшаб ўйлайман: бияларимиз менинг тўғримда нима ўйга боришаётган экан? Ҳойна-ҳой: «Қари иблис аллақаёқдаги рўдаполарни олиб келибди» дейишаётгандир, эҳти-

молки, ундан баттарроқ ҳам гапларни айтишаётгандир...

Шўрлик биянинг тоқати тоқ бўлиб кетиб, Гулгинамга орқасини ўғирди-да, бор кучини йигиб туриб ёнбошига қараб икки оёқлаб тепган эди, саманинг ичи фўрқиллаб кетди. Бу орада мен ҳам олдига югуриб бориб бир ёқдан аччиқ йиғлаб, бир ёқдан яғринини қамчин билан ачитиб шанғиллайман: «Башартики номинг маҳсулдор экан, ўзингни ҳам, қариган чоғимда мени ҳам иснодга қўйма!»

У бўлса, жабрдийдагинам, ўн саржинча жойга қочиб бориб тўхтади-да, шундай алам билан кишнадики, юрак-бағрим эзилиб кетиб, унга ачинганимдан йиғлаб юбордим. Қамчини ташлаб олдига бордим-да, тумшугини силадим, у бўлса бошини елкамга қўйиб яккаш хўрсинади...

Мен унинг ёлидан ушлаб чайлага қараб етакладим. Унга шундай дедим: «Үйга кетайлик, Гулгинам, бу ерда беҳуда санқиб юришимизнинг ҳадеб иснодга қолаверишимизнинг ҳеч ҳожати йўқ...» Шу билан уларни аравага қўшдим-да, хуторга қараб йўл олдим. Васька-гаранг бўлса, ҳиринглайди: «Бир йилдан кейин қайтиб кел, бобо, даштда яшаймиз, сен билан бўтқахўрлик қиласиз. Унгача айғирларинг ҳам, башарти ҳаром қотишмаса, ўзларига келиб қолишар».

Мен хуторга келиб, бор гапни Давидовга айтдим, у бошини чангллаганча менга бақириб берди: «Сен уларни ёмон парвариш қилгансан!» Аммо мен унинг оғзига урдим: «Мен ёмон парвариш қилганим йўқ, сизлар ҳадеб-ҳадеб яхшилаб ҳайдагансизлар. Гоҳ сен жаноблари, гоҳ Макарушка, гоҳ Андрей Размётнов. Айғирларнинг бўйнидан хомут тушмади. Яков Лукичингдан тиз чўкиб ёлворсанг ҳам сули ундириб бўлмайди. Ахир ким айғирларни аравага қўшиб юради? Модомики, улар маҳсулдорми, улар фақат ем-хашик еб, ишламай ётишлари керак... бўлмаса, акс ҳолда масала мутлақо мушкул бўлиб қолади.» Хайриятки, станицадан иккита маҳсулдор юбориб қолишиди, бу эсларингизда бўлса керак, биялар масаласи ҳам ўз-ўзидан ҳал бўлди. Расамаддаги ем-хашиксиз ишқ-муҳаббат шунаقا бўлади. Тушундингларми, тентак одамлар?

Бунинг куладиган жойи йўқ, жиддий бир гап бошлиниб қолган экан, бунинг ҳеч бир куладиган жойи йўқ.

Гапига қулоқ солиб турганларни тантана билан кўздан кечириб, Шчукарь бобо давом этди:

— Гўнг титган қўнғиздек доим ер титкилаб ётасизлар-у, турмушнинг маъносини қаёқдан билар эдиларинг? Мен бўлсам, ақалли, ҳафтасига бир марта, ё кўпроқ станицага тушиб чиқаман. Мана, чунончи сен, Куприяновна, радионинг қандай гапиришини бирон марта бўлса ҳам эшитганмисан?

— Станицага ўн йилдан бери бормаган бўлсам қаёқдан ҳам эшитардим.

— Ҳа, шунақа де! Мен ҳар гал тўйгунимча эшитаман. Лекин мен сизларга айтсан, жуда ҳам расво нарса! — Шчукарь бошини чайқаб оҳиста кулиб қўйди. — Худди райкомнинг рўпарасидаги симёғочда қора карнай осилиб турибди, бафармони худо, шунақангি бўкирадики!.. Ҳар бир мўйинг тик бўлиб, ҳатто жазира маисиқда ҳам этинг жунжикиб жимирашиб кетади! Мен ўша карнайнинг тагида жанивор отларимни аравадан чиқараман-да, аввал колхозлар ҳақидаги, ишчилар синфи ҳақидаги, бошқа ва ҳоказолар ҳақидаги хабарларни ҳузур билан эшитиб турман, кейин бoshingни сули солинган от тўрвага тиққудек бўласан. Москвадан аллаким айғирга ўхшаб: «Қадаҳларга тўлдир, соқий, ичайлик, худо ҳақи» деб ҳайқириб қолади, — шундан кейин, хоҳ ишонинглар, хоҳ ишонманглар, яхшилар, шу қадар ичким қистаб кетадики, нафсимни ҳеч тиёлмай қоламан! Мен қурмағур, станицага равона бўладиган бўлсам, аста-секин кампиirimнинг тухумларидан ўнтачами ёки эвини қилганимчами ўмарман-да, станицага етиб ошхонага пуллайман. Карнайдан чиққан ҳар хил қўшиқларга қулоқ солиб ароқни уриб оламан, шундан кейин ўртоқ Давидовимни бир кеча-кундуз ҳам кутишим мумкин. Борди-ю, ўйдан тухум уриб чиқишининг эвини қилолмасам, чунки кампиirim сафарга чиқишм олдидан мендан хабардор бўлиб турадиган бўлиб қолган, унда райкомга бораман-да, ўртоқ Давидовимдан оҳиста: «Сёмушка, ўргилай, чорактага пул нињом қил, бўлмаса сени кута-кута

бекорчиликдан зерикиб кетаман» дейман. У меҳрибоним ҳам ҳеч менинг илтимосимни ерда қолдирмайди. Мен яна дарров ошхонага бориб, яна озгина уриб оламан-да, ҳузур қилиб офтобда уйқуни ураман, ё бўлмаса битта-яримтадан маҳсулдорларимга қараб туришини илтимос қилиб, ўзим бўлсанм баъзи мушкул ишларимни осон қилиш учун станица бўйлаб равона бўламан.

— Сенинг станицада қандай ишларинг бўлиши мумкин? — деб сўради Аким Бесхлебнов.

Шчукарь бобо хўрсинди:

— Рўзғор эгасининг озмунча иши бўладими? Гоҳ бир шиша керосин, гоҳ икки-уч қути гугурт харид қиласан. Ёнки, чунончи мана сизлар менинг китобий сўзларимни, луғатни сўраяпсизлар, у шундай босилган: битта китобий сўз йирик-йирик ҳарфлар билан босилган, мен уларни кўзойнаксиз ҳам ўқийверишим мумкин, унинг рўпарасига эса, майда ҳарфлар билан тушунтириши, яъни ўша сўзнинг маъноси ёзилган. Хўш, кўп сўзларни мен тушунтиришини ўқимасам ҳам тушунавераман. Масалан, «Монополия» дегани нима? Очиқ-оидин равшанки — қовоқхона, «Адаптер» дегани: тутуриқсиз одам, умуман абллаҳ, дегани, вассалом. «Акварель» — бу яхши қиз дегани, мен шундай деб ўйлайман, «бордюр» бўлса мутлақо бунинг акси, бу гар хотин деган гап, «антресоли» — савдоси сенинг эс-ҳушиңгни оғдириб қўйган ишқ-муҳаббатнинг ўзгинаси ана шу, Агафон, ва ҳоказо. Лекин менга бари бир кўзойнак керак бўлиб қолди; Давидов билан станицага тушиб бордик, мен кўзойнак оладиган бўлдим. Бу қутлуғ иш учун кампирим менга пул берди.

Бир касалхонага кирдим, у ер мутлақо касалхона эмас, туғруқхона экан; бир хонада хотинлар дод-фарёд билан инграб ётишибди: биттасида майда болалар худди мушук боладек миёвлаб ётишибди. Бу ердан кўзойнак ололмайман, янгилишиб кириб қолибман, деб ўйлайман. Бошқа касалхонага бораман, у ернинг остонасида икки киши шашка суринишиб ўтишибди. Мен улар билан саломлашиб: «Бу ердан кўзойнак сотиб олса бўладими?» деб сўрайман. Йкковлари ҳам бара-варига ҳиринглаб, биттаси: «Бу ерда сенга шундай кўзойнак тақиб қўйишадики, бобожон, кўзинг қинидан

чиқиб кетади, бу ер таносил касаллари шифохонаси, бу ердан тезроқ жуфтакни ростлаб қол, бўлмаса нақ мажбуран зўрлаб даволай бошлашади» дейди.

Мен, албатта, ўтакам ёрилиб бу касалхонадан орқамга қарамай қочиб қоламан. У лаънати аҳмоқлар бўлса йўлакдан чиқиб орқамдан биттаси овози борича ҳуштак чалади, иккинчиси бўлса, кўчани бошига кўтариб: «Тезроқ чоп, бузуқ чол, бўлмаса ҳозир изингдан етиб олишади!» деб бўкиради. Вой, худди чопқир отдек учиб кетаман! Худо ғафлатдалигига шайтон не қилгиликларни қилмайди, ҳазил-ҳазил билан етиб олишса борми, ана ундан кейин докторларни ишонтириб кўр-чи, деб ўйлайман.

Аптекага чопиб боргунимча юрагим ўйнаб кетди. Аммо аптекада ҳам кўзойнак йўқ экан. Миллерово ёки Ростовга бор, бобожон, сенга кўзойнакни кўз докторигина ёзиб бериши мумкин, дейишиди. Йўқ, у ёқка бориб нима қиламан, деб ўйладим ичимда... Ҳозир ҳам луғатни тусмол билан ўқиб юрибман, кўзойнак масаласи ҳам мутлақо мушкул масала бўлиб чиқди...

Станицада менинг бошимдан ўтган турли-туман ҳодисаларнинг сон-саноғи йўқ!

— Сен, бобожон, ҳаммасини тартиби билан бир чеккадан гапириб бер, бўлмаса худди чумчуқقا ўхшаб шоҳдан шоҳга сакраяпсанки, гапингни боши билан охири қаердалигини билиб бўлмайди,— дея илтимос қилди Дубцов.

— Мен тартиби билан бир чеккадан гапириб берялман, энг муҳими сен менинг гапимни бўлма. Яна бир марта гапимни бўлгудек бўлсанг мен мутлақо фикримдан чалғиб қолиб, шунақангি алжишга тушиб кетаманки, ҳаммаларинг бир бўлиб ҳам ҳикоямнинг нималигига тушунолмай қоласизлар. Шундай қилиб, бир куни станицада кетаётсам рўпарамдан улоқдек ёшгина, кўҳликкина, шаҳарча кийинган, сумкача кўтарган бир қиз келяпти. Эчки туёғини тўқилатгандек баланд пошналарини «чақ-чуқ, чақ-чуқ» қилиб келяпти. Мен қариганимдан бери янгиликларга шундай ўч бўлиб қолдимки, ваҳиманг келади! Мен, оғайнилар, велосипедни ҳам миниб кўрдим. Шу машинада бир йигитча келаётган экан, мен унга: «Неварагинам, ара-

вачангни бирпас минай» дедим. Убажонидил рози бўлди. Аравачасига чиқиб олишимга ёрдам берди, мени суяб турибди, мен бўлсам, кучим борича оёғимни типирчилатиб ҳайдаяпман. Кейин ундан: «Худо ҳақи, мени ушлама, мен ўзим юраман» деб илтимос қилдим. У мени қўйиб юборган ҳам эдики, руль қўлимдан чиқиб кетиб, тўппа-тўғри акацияга бориб урилдим. Керакли-кераксиз ҳамма жойларимга қадалган акация тиканларининг сон-саноги йўқ! Уларни бир ҳафтагача чўқилаб суфурин юрдим, қолаверса, аллақайси бир тўнкага илиниб чоловоримни ҳам йиртиб олдим.

— Сен, бобо, чоловоринг тўғрисида эмас, қиз тўғрисида гапир,— деб жиддийлик билан унинг гапини бўлди Дубцов.— Ахир, ўзинг ўйлаб кўр, сенинг чоловорингни бошимизга урамизми?

— Ана, тагин гапимни бўляпсан,— ҳасрат билан жавоб берди Шчукарь бобо. Аммо, ҳар қалай, ҳикоясини давом эттиришга қарор берди:— Шундай қилиб, ҳалиги ёқимтой улоқча қўлини худди солдатга ўхшаб силтаганча кетиб боряпти, мен хумпар бўлсам; у билан қандай қилиб бирпасгина қўлтиқлашиб борсам экан, деб ўйлаяпман. Мен умрим бино бўлиб қўлтиқлашиб юрган эмасман, станицада ёшларнинг қай тахлитда юришларини жуда кўп кўрганман: гоҳ йигит қизни қўлтиқлади, гоҳ қиз йигитни қўлтиқлади. Қани менга айтиб беринглар-чи, гражданлар, мен бу ҳузур-ҳаловатни қаерда кўришим мумкин эди? Хуторимизда бунаقا қилиб юриш расм эмас, кулги қилишади, бўлмаса қаерга боришим керак?

Шундан кейин кўндаланг бўлган масала: шу жонон билан қандай қилиб қўлтиқлашсам экан? Дарров ҳийла ишлатдим: икки букилиб олганимча кўчани бoshимга кўтариб инграшга тушдим. У югуриб келиб: «Сизга нима қилди, бобожон!» деб сўради. Мен унга «Тобим қочиб қолди, жоним, касалхонага етиб ололмаяпман, яғринимга санчиқ кирди...» дедим. У: «Сизни ўзим олиб бориб қўяман, менга суяна қолинг» дейди. Мен уни дадиллик билан бемалол қўлтиқлаб оламан, шу тариқа у билан бирга йўлга равона бўламиз. Жуда маза. Район магазинига яқинлашишимиз билан мен аста-секин қаддимни ростлай бошлайман,

у ҳушига келар-келмас мен йўл-йўлакай юзидан чўп этиб ўпиб оламан-да, зинғиллаганимча магазинга кириб кетаман, ҳолбуки, у ерда қиласиган ишим ҳам йўқ эди. Қизнинг кўзлари чақнаб, орқамдан: «Сиз ёлғончи, безори экансиз, бобо!» деб қичқирганча қолади. Мен бўлсам тўхтаб унга: «Жонгинам, муҳтоҷлиқда бундан расво ишларни ҳам қиласан! Шуни билиб қўйки, мен умрим бино бўлиб биронта ҳам жонон билан қўлтиқлашиб юрган эмасман, ваҳоланки, ўлар куним яқинлашиб қолган» дейман. Узим магазинга кириб кетяпману, фалокат босиб милиционер чақириб қолмаса, деб ўйлайман. Аммо қиз кетади. Мен бўлсам магазинга зинғиллаб кирганча нафасимни ростлаёлмай турман. Сотувчи мендан: «Ўт тушган жойдан келганинг йўқми, бобо?» деб сўрайди. Менинг нафасим сиқилиб унга: «Ундан ҳам баттар. Менга бир қути гугурт бер-чи» дейман.

Шчукарь бобо ўзининг пайдар-пай қиссасини яна анчагача чўзиши мумкин эди-ю, аммо иш кунидан сўнг чарчаган одамлар бирин-кетин тарқала бошладилар. Чолнинг уларга, яна бир неча ҳикоямни эшитинглар, деб ёлворгандари беҳуда кетди — ҳадемай ўчиб қолган гулхан атрофида биронта ҳам одам қолмади.

Ниҳоятда ўкиниб хафа бўлган Шчукарь охур томонга бориб унинг ичига тушди-да, эти жунжикиб фужанак бўлиб, устига зипунчасини ёпинди. Ярим кечада ерга шабнам тушди. Шчукарь совуқдан қалтираб уйгонди. «Будкадаги казаклар олдига кираман, бу ерда худди буюқда қолган кучукдек дийдираб кетаман» деган қарорга келди у.

Кўргиликларининг калаваси аста-секин, аммо пайвастчуваб бормоқда эди... Кўкламги шудгор вақтида казаклар будкада, хотин-халаж эса ташқарида ётганини эслаб, уйқусираганидан икки ой мобайнинда баъзи нарсалар ўзгарган бўлиши мумкинлигини хаёлига ҳам келтирмай, Шчукарь аста эмаклаб будкага кирди-да, чориқларини ечиб, бир четга ётди. Илиқ хонада исиниб шу заҳотиёқ ухлаб қолди, бир оздан кейин нафаси бўғилиб уйғониб кетди. Кўкрагини пайнаслаб бирорвинг яланғоч болдири эканини кўргач, қаттиқ

ўқинч билан ўйлади: «Беҳаёнинг бемаъни ётишини қара! Оёнини худди от минаётгандек кўтариб ташлайди».

Аммо у тирик юкни устидан олиб ташламоқчи бўлиб, унинг мутлақо эркак кишининг оёғи бўлмай, Куприяновнанинг яланғоч қўли эканлигини кўраркан, юзининг ёнгинасида унинг құдратли нафасини эшиштар экан, жон-пони чиқиб кетди. Будкада фақат хотин-халажгина ётарди...

Ҳанг-манг бўлган Шчукарь ҳаяжонидан қора терга ботганча бир неча дақиқа қимирламай ётди-да, кейин чориқларини қўлига олиб бир иш қилиб қўйган ўғри мушукдек будкадан аста-секин сирғилиб чиқиб оқсоқлаганча линейкага қараб кетди. У айғирларини ҳеч қачон бу қадар чаққонлик билан аравага қўшмаган эди! Айғирларни қамчин билан аёвсиз ҳайдаганча, уларни қаттиқ елдириб кетди, тонг олди осмони уфқида машъум қорайиб турган будкага ўқтин-ўқтин қараб қўяр эди.

«Яҳши ҳамки, вақтида уйғониб қолдим. Сал ҳаяллаб қолиб хотин-халаж Куприяновнанинг ёнида ётганимни, у лаънатининг қизи мени сўлоқмондек қўли билан қучоқлаб ётганини кўриб қолса нима бўларди?.. Ўз паноҳингда асра, илоҳий маъбуда! Ўла-ўлгунимча, ҳатто ўлиб кетганимдан кейин ҳам мендан кулишарди!»

Ез тонги суръат билан отиб келарди. Будка Шчукарнинг кўзидан ғойиб бўлди. Аммо тепа белидан ошиб ўтгандан сўнг уни янги бир дилсиёҳлик кутиб олди: тасодифан оёғига қааркан, ўнг оёғида чарм тасмали, нақшиндор гулчинли, яп-янгигина заифона чориқни кўриб қолди. Ҳажмига қараганда чориқ Куприяновнанини бўлиши керак эди...

Ваҳимадан юраги шув этиб, Шчукарь худойи таолога илтижо қилди: «Шафқатпаноҳ парвардигор, мени бунча қаҳрингга олмасанг?! Демак, чориқларни қоронғида пойма-пой кийиб олибман. Қампиirimнинг олдинга қандай қилиб бордим? Бир оёғимда — заифона пойафзал, мушкул масала бўлди-ку!»

Аммо масала мушкуллигича қолмади: Шчукарь

станицага яланг оёқ ҳам, пойма-пой пойафзалда ҳам боришим мумкин эмас, деган холис фикрга келиб, хутор йўлида кетаётган жойида отлар бошини шартта бурди. «Бу ер ўлчовчини жин урсин, ишлари ўшасиз ҳам бита қолар. Ҳамма ерда Совет ҳокимияти, ҳамма ерда колхоз, башарти бир колхоз иккинчисининг бир парчагина пичанзорини тортиб олган бўлса, нима бўпти?» дея ғамгинтина ўйларди у Гремячий Лог томон қараб бораркан.

Хуторга икки километрча қолганда тик жарлик йўлга яқинлашиб келган жойда у яна бошқа бир қарорга келиб, зўр жасорат кўрсатди — оёғидан чориқларни ечиб, атрофига аланглаб қаради-да:

— Сенларнинг касофатингдан ўлиб кетайми, қораларинг ўчсин! — дея пичирлаганча чориқларни жарга улоқтириди.

Ўзини фош қилиб қўйиши мумкин бўлган бундай далиллардан осонгина қутулганидан қувониб кетиб Шчукарь, Куприяновнанинг эрталаб чорифи сирли равишда фойиб бўлганини кўриб ҳанг-манг бўлишини тасаввур қиласкан, ҳатто заҳарханда билан илжайиб қўйди.

Аммо у жуда ҳам эрта қувониб кетди: уйида уни охирги энг даҳшатли ва аёвсиз фалокат кутмоқда эди...

Қўрасига яқинлашмасданоқ нимадандир ҳаяжонланиб уймалашиб турган хотинларни кўриб қолди. «Кампирим қазо қилмадимикан?» — дея ўйлади Шчукарь ташвишланиб. Аммо нима учундир жойидан жилмаётган хотинларни индамай нари-бери суриб ошхонага кириб у ёқ-бу ёққа кўз югуртиаркан, оёқлари қалтираб кетиб чўқинганча аранг шивирлади: «Бу нима бўлди ўзи?»

Унинг хун бўлган кампирин латта-путтага йўргакланган чақалоқни овутмоқда, чақалоқ бўлса чинқириб йиғламоқда эди.

— Нима машмаша ўзи? — энди овозини чиқариб-роқ шивирлади ҳанг-манг бўлган Шчукарь.

Қизарип кетган кўзларини чақнатганча кампирин қаҳр билан қичқирди:

— Нима бўларди, болангни ташлаб кетишибди!

Саводхон бўлмай қуриб кетгур! Ана столдаги хатни олиб ўқи!

Шчукарнинг борган сари кўзи тиниб кетмоқда эди, аммо бир варақ дағал қоғозга ёзилган ажи-бужу хатни амал-тақал билан ўқиди:

«Сиз бу чақалоқнинг отаси бўлганингиз учун, бобожон, уни боқиб тарбия қилинг».

Хаяжондан ва қичқираверганидан овози мутлақо бўғилиб қолган Шчукарь кечга бориб боланинг дунёга келишига мутлақо даҳли йўқ эканлигини кампирига аранг уқтираёзган эди-ю, аммо худди шу пайтда ошхона бўсағасида Любишкиннинг саккиз яшар ўғли пайдо бўлди: у бурнини тортиб гапирди:

— Бобо, мен бугун қўй боқиб юрган эдим, чориқларингизни жарга тушириб юборганингизни кўриб қолдим. Топиб олиб келдим. Манг,— деб у Шчукарга бадбаҳт чориқларни узатди...

Шчукарь билан иноқ дўст бўлган этикдўз Локатевнинг бир вақтдаги таъбири билан айтганда, шундан кейин нима бўлганлиги «қоронфи». Шунисигина маълумки, Шчукарь бобо бир ҳафтача кўзи шишиб, лунжини боғлаб юрди. Ундан, юзингизни нега боғлаб юрибсиз, деб илжайиб сўрасалар, у юзини ўгирганча; биргина бутун қолган тишим шу қадар оғрияптики, ҳатто оғиз очирмаяпти, дерди...

ХХ БОБ

Андрей Размётнов пичан ўроғининг, ғалла ўримийғим кампаниясига тайёргарликнинг бориши тўғрисида район ижрокомига бериладиган маълумотга қўл қўйиб уни чопар билан жўнатиш учун эрталаб барваҳт қишлоқ советига келди. У бригадалар бўйича тўпланган маълумотларни кўриб бўлмаган ҳам эдики, кимдир эшикни қаттиқ тақиллатди.

— Киравер!— деди ҳужжатлардан бошини кўтармай Размётнов.

Хонага икки нотаниш одам кириб келди, хона ҳам худди тўлиб қолгандек бўлди. Улардан бири, резинка пальто кийган, соқоли қиртишлаб олинган, одамнинг

диққатини унча тортмайдиган лўппи юзли яғриндор, фўлабир одам жилмайганча стол олдига келди-да, тошдек қаттиқ қўлини Размётновга узатди:

— Шахти шаҳри ишчилар таъминоти бўлимининг ходимиман, Поликарп Петрович Бойко, бу киши — менинг ёрдамчим, фамилияси Хижняк. Бош бармоғи билан елкаси орқали эшик олдида турган ҳамроҳини парвозсизгина кўрсатди.

У зоҳиран подачи ёки молфурушга ўҳшаб кетар эди: тўзиб кетган капюшонли брезент плашчи, қўнжи кенг кўн этиги, япасқи кул ранг кепкаси ва қўлидаги қўш чарм шокилали қамчиси — унинг касбидан сўзсизгина гувоҳлик бериб турарди. Аммо шуниси галати эдики, Хижнякнинг юзи ташқи қиёфасига монанд эмасди: синчков ақлли кўзлари, хушбичим лабларининг четларидағи кинояли ажинлар, бирон нарсанни тинглаётгандек чап қошини учирив туриши, туриштurmushiдағи зиёлиномолик — буларнинг ҳаммаси мушоҳадали кўзларга бу одамнинг қорамол тайёрлашдан ҳам, қишлоқ хўжалик эҳтиёжларидан ҳам йироқ киши эканлигини айтиб турарди. Бу нарсанни Размётнов ҳам кўнглидан ўтказиб қўйди. Дарҳақиқат, у Хижнякнинг юзига назар ташлаб олиши биланоқ, унинг ниҳоятда яғриндор елкаларига тикилиб, беихтиёр жилмайганча ўйлади: «Тайёрловчини қаранглар-а: бир-биридан фўлабир, қароқчининг ўзи... Булар мол тайёрлаш билан шуғулланиш эмас, бирон ерда кўприкнинг тагига кириб олиб туни бўйи совет савдогарларининг ёқаларини ёғоч игна билан йўрмаб чиқишлиари керак...» Ўзини аранг жиддий тутиб, сўради:

— Менга нима иш билан келдинглар?

— Колхозчилардан хусусий молларини сотиб оламиз. Йирик шохли, майда шохли молларни, чўчқаларни ҳам оламиз, парранда билан ҳозирча ишимиз йўқ. Эҳтимол, қишига бориб олармиз — унда бошқа гап, ҳозирча паррандани олмаймиз. Баҳоларимиз кооператив баҳоси, молларнинг семизлигига қараб устама қўянимиз. Ўзингиз биласиз, ўртоқ раис, шахтёrlарнинг меҳнати оғир меҳнат, биз шахтёришчиларимизни жуда яхшилаб боқишимиз керак.

— Ҳужжатларингизни кўрсатинглар.— Размётнов кафти билан аста-секин столни уриб қўйди.

Иккала тайёрловчи ҳам столга командировка гувоҳномаларини қўйишиди. Ҳаммаси — штамплар, имзолар, печатлар жойида, аммо Размётнов ўзига кўрсатилган ҳужжатларни узоқ синчилаб кўздан кечирди, Бойко ўгирилиб ёрдамчисига имо қилганини, икковлари бирдан жилмайиб шу заҳотиёқ табассумлари ўчганини кўрмай қолди.

— Қалбаки деб ўйлаяпсизми?— энди ошкора жилмайиб сўради Бойко, таклифни кутмай дераза олдиди турган стулга бемалол ўтиараркан.

— Йўқ, ҳужжатларингизни қалбаки деб ўйлаётганим йўқ... Нима учун бошқа колхозга бормай бизнинг колхозимизгагина келдинглар?— Размётнов ҳазилга эътибор қилмади, у жиддий гаплашмоқда эди.

— Нима учун бизгагина келдинглар, дейсизми? Сизларгагина келганимиз йўқ, сизларнинг колхозингиздангина қайтиб кетмоқчи эмасмиз. Биз олтида қўшни колхозда бўлдик, элликка яқин мол, шу жумладан, ишга яроқсиз уч қўш қари ҳўкиз, сутдан чиққан таначалар, қўй-қўзи, ўттизга яқин чўчқа харид қилдик...

— Ўттиз еттига,— дея бошлиғининг гапини тўғрилади эшик олдиди турган барваста Хижняк.

— Мутлақо тўғри, арzon нарх билан ўттиз еттига чўчқа сотиб олдик. Сизлардан чиқиб бошқа хуторларга жўнаймиз.

— Пулинини нақд тўлайсизларми?— қизиқди Размётнов.

— Ўша заҳотиёқ! Рост, ёнимизда катта пул олиб юрмаймиз: биласизми, ўртоқ Размётнов, замон нотинч, бир фалокат юз бермасин... Шу сабабдан аккредитив олиб юрибмиз.

Размётнов ўзини столнинг суюнчиғига ташлаганча қаҳ-қаҳлаб кулиб юборди:

— Пулимизни тортиб олиб қўйишиди, деб қўрқяпсизларми? Ўзларинг ҳар қандай одамнинг чўнтагини қоқишириб, уст-бошини шилиб олишга қодир қўринасизлар-ку!

Бойко сиполик билан жилмаяркан, унинг пушти ёноқларидағи худди хотинлар юзидагидек кулгичлар

ўйнаб туарди, Хижняк мутлақо пинагини бузмай, фаромушлик билан деразага тикиларди. У деразага ўгириларкан, Размётнов шундагина унинг чап юзидағи энгагидан қулогининг тагигача чўзилиб кетган узун ва йўғон чандиқни кўриб қолди.

— Юзингдаги белгини урушдан орттирганмисан?— деб сўради Размётнов.

Хижняк унга дарҳол ўгирилиб зўрма-зўраки илжайди:

— Қаёқда — урушда эмас, кейин орттирганман...

— Ўзим ҳам айтувдим-а, қиличнинг изига ўхшамайди деб.— Хотининг юмдалаб олганми?

— Йўқ, хотиним жуда ювош. Мастбозликда бўлган, бир ошнам пичоқ солиб юборган.

— Ўзинг хушбичимгина йигит экансан, мен хотининг тимдалагандир, деб ўйлабман, хотин важидан, хушторинг важидан орттирганга ўхшаб қолдинг?— соддагина саволларини беришда давом этди Размётнов, кулиб мўйловини силағанча...

— Анча фаросатли экансан, раис...— Хижняк заҳарханда билан жилмайди.

— Менинг вазифам фаросатли бўлишимни талаб қиласди... Чандиғинг ҳам пичоқдан эмас, қиличдан, бу менга жуда таниш, мен сенга айтсам, сенинг тайёрловчиман, деган даъвонг менинг, архирейман, деганинга ўхшар экан... Афт-ангоринг ҳам бошқача, фуқаронинг афти-ангорига ўхшамайди. Қўлларинг ҳам бошқача: қўлларинг умринг бино бўлиб буқанинг шохини ушламаганга ўхшайди, оқ билак... Баҳайбат-роғу, аммо оппоқ... Сен қўлларингни ақалли офтобга тутиб қорайтириб, гўнгга булғаб олсанг бўларди, ана ўшанда мен сенинг тайёрловчилигингга ишонармидим. Бўлмаса, сен яккаш қамчи ўйнатасан — бу жуда жўн иш, сен қамчи билан менинг кўзимни бўёлмайсан!

— Анча фаросатли экансан, раис,— дея такрорлади Хижняк. Аммо энди жилмаймади.— Лекин фаросатинг бир ёқлама экан: чандиғим ҳақиқатан қиличнинг изи, буни иқор қилгим келмаган эди. Бир вақтлар оқларда хизмат қилган эдим. Бу тириқни ўшанда орттирганман, бунақа нарсаларни эслаб ўтиришга кимнинг хуши бор дейсан? Қўлим важига кел-

сак, ахир мен мол ҳайдайдиган эмас, харид қиладиган одамман-ку, менинг ишим — буқаларнинг думини бураш эмас, шарақлатиб червон санаш. Турқимни кўриб таажжубланяпсанми, ўртоқ Размётнов? Мен яқиндан беригина тайёрловчи бўлиб ишлай бошладим. Ўнгача агроном эдим. Ичкиликка берилганлигим вожидан ишдан олиб ташлашди, шунинг учун ихтисосимни ўзгартиришга мажбур бўлдим... Энди тушундингми, ўртоқ раис? Сен мени очигига кўчишга мажбур қилдинг, сенга тавба-тазарру қилдим...

— Сенинг тавба-тазарруингни бошимга ураманими? Сени ГПУдагилар тавба-тазарру қилдириб, имонингни ўгиришсин, бунинг менга дахли йўқ,— деди Размётнов. Пинагини бузмай, чақирди:— Мария! Бу ёққа кир!

Кўшни хонадан ийманибгина бир қиз — қишлоқ советининг навбатчиси кириб келди.

— Нагульнини айтиб кел. Зудлик билан советга етиб борар экансиз, зарур бир иш бор экан, деб айт,— буюрди Размётнов ва аввал Хижнякка, кейин Бойко-га диққат билан тикилди.

Хижняк гарангсиганча хафа бўлиб яғриндор елкасини қисди, скамейкага ўтириб орқасини ўгириб олди, кулгисини тийиш учун елимшакдек титраётган Бойко, ниҳоят майнин овоз билан қичқириб юборди:

— Ҳушёрлик мана бундоқ бўпти! Шунисини яхши кўраман-да! Қўлга тушдингми, ўртоқ Хижняк? Паққос қўлга тушдингми?

У семиз сонларини шапатилар, икки букчайганча шу қадар самимият билан астойдил кулардики, Размётнов таажжубланиб, унга тикилиб қолди.

— Мунча қотиб куляпсан, бўрдоқи? Икковлалинг ҳам станицада кўз ёши қилиб юрманглар тагин! Хафа бўласизларми-бўлмайсизларми, буни ўзларинг биласизлар, мен сизларнинг ким эканликларингизни аниқлаш учун, албатта районга жўнатаман. Менинг кўзимга шубҳалироқ кўриняпсизлар, тайёрловчи ўртоқлар.

Кўзларидан тирқираб чиққан ёшни артиб, дўрдоқ лаблари ҳамон кулгидан буришганча, Бойко сўради:

— Ҳужжатларимиз-чи? Буларни текшириб кўриб, ўзинг, қалбаки эмас, дединг-ку?!

— Ҳужжатларингиз ўз йўли билан, турқларингиз ўз йўли билан,— тунд жавоб берди Размётнов ва ошиқмасдан тамаки ўрай бошлади.

Ҳадемай Макар Нагульнов етиб келди. У саломлашмай тайёрловчиларни боши билан имо қилиб кўрсатди-да, Размётновдан сўради:

— Булар ким?

— Ўзларидан сўра.

Нагульнов тайёрловчилар билан гаплашди, уларнинг гувоҳномаларини кўрди, Размётновга қараб сўради:

— Хўш, нима гап ўзи? Сен мени нимага чақирган эдинг? Бу одамлар мол тайёrlагани келишган экан, тайёrlайверишин-да.

Размётнов тутоқиб кетди-ю, аммо анча босиқлик билан гапирди:

— Йўқ, мен ким эканликларини аниқламагуним-ча улар мол харид қилишмайди. Менга **бу** нусхала-ринг ёқмайроқ турибди, гап шу. Мен буларни ҳозирнинг ўзидаёқ станицага жўнатаман, текшириб кўришсин, кейин мол харид қилишса қиласкерисин.

Шундан сўнг Бойко оҳистагина гапирди:

— Ўртоқ Размётнов, хат ташувчингга айт, бу ердан чиқиб турсин. Гап бор.

— Сен билан бизнинг орамизда қандай сир бўлиши мумкин?

— Айтган ишни қил,— ҳамон оҳиста, лекин энди буйруқ оҳангига гапирди Бойко.

Размётнов унга итоат қилди. Улар бугун бинода ўзлари ёлғиз қолишгач, Бойко пиджагининг ички чўнтағидан қизил дафтарча олиб Размётновга узатаркан, жилмайди:

— Ўқи, кўзи ўтқир иблис! Маскарадимиз муваффақиятли чиқмадими — сиримизни очамиз. Гап шундай, ўртоқлар: биз икковимиз ҳам ОГПУ ўлка бошқармасининг ходимларимиз, сизларнинг хоторларингизга хавфли сиёсий душман, фитначи ашаддий контрреволюционер бир одамни қидиргани келдик. Ўзимизга бировларнинг диққатини тортмаслик учун тайёрловчи бўлиб олдик. Шу тариқа ишлашимиз осонроқ бўлади: биз қўрама-қўра юрамиз, одамлар

билин гаплашамиз, умид қиласизки, бир кунмас-бир кун, бари бир, ўша контранинг изини топмай қўй-маймиз.

— Нега бўлмаса, ўртоқ Глухов, сиз менга кимликларингизни дарров айта қолмадингиз? Ҳеч қандай англашилмовчилик ҳам бўлмасди!— хитоб қилди Размётнов.

— Конспирация шартлари шуни талаб қиласди, азизим Размётнов! Сенга айтсак, Давидовга айтсак, Нагульновга айтсак бир ҳафтадан кейин бизнинг кимлигимиз бутун Гремячий Логга аён бўлади. Сизлар, худо ҳақи, хафа бўлманглар, гап сизларга ишонмаганигимизда эмас, аммо, афсуски, баъзан шундай ҳам бўлиб туради, ҳар қалай, биз учун муҳим аҳамиятга эга бўлган бу операцияда таваккалчилик қилолмаймиз, ҳақимиз йўқ,— илтифот билан тушунтирди Бойко-Глухов, қизил дафтарчаси билан Нагульнов танишиб бўлгач, уни чўнтағига соларкан.

— Кимни қидираётгандарингизни билсак бўладими?— сўради Нагульнов.

Бойко-Глухов индамай каттагина ҳамёнини титклилади-да, одатда паспортга ёпишириладиган суратнинг ҳажмидек фотосуратни эҳтиёт билан биққигина кафтига қўйди.

Размётнов ва Нагульнов столга энганишиди. Кичкинагина чор қирра қофоздан уларга текис елкали, буқа бўйин, ўрта ёшдаги киши мулойимгина жилмайиб турарди. Аммо намойишкорона мулойим табасуми бўри тахлит пешанасига, чуқур тушган тунд кўзларига ва чор қирра вазмин энгагига нисбатан шу қадар эриш кўринардики, Нагульнов заҳарханда қилибгина қўя қолди. Размётнов эса бошини чайқаганча:

— Ҳа-а, хушчақчақ амакилардан эмас экан...— деб қўйди.

— Биз худди шу «амаки»ни қидириб юрибмиз,— деди ўйчанлик билан Бойко-Глухов, фотосуратни четлари қирилган бир варақ қофозга жуда эҳтиёт билан ўраб, ҳамёнига соларкан.— Унинг фамилияси Половцев, оти — Александр Анисимович. Ўзи оқ армиянинг собиқ ясовули, жазочи, Подтелков ва Кривошликов

отрядини қатл қилишда иштирок этган. Сўнгги вақтларда бироннинг фамилияси билан ўқитувчилик қилган, кейин ўз станицасида яшаган. Ҳозир — яшириниб юради. Совет ҳокимиятига қарши тайёрланадиган қўзғолоннинг актив иштирокчиларидан бири. Қўлимиздаги маълумотларга қараганда, сизларнинг районларингизнинг бирон ерида яшириниб юрган бўлиши керак. Бу унсур тўғрисида айтиш мумкин бўлган бор гап шу. Бу суҳбатимизни Давидовга айтишларингиз мумкин, бошқа ҳеч кимга оғиз оча кўрманглар! Мен сизларга ишонаман, ўртоқлар. Энди, кўришгунча хайр. Биз билан учрашишларингиз керак эмас, беҳуда учрашишни айтипман, албатта, борди-ю бизни қизиқтирадиган нарса топилиб қолса — мени қишлоқ советига кундуз куни, фақат кундуз куни чақиринглар. Токи қишлоқ аҳолиси мендан сира ҳам бад олиб қолмасин. Охирги гап, эҳтиёт бўлинглар! Умуман кечалари юрманглар. Половцев террорга ўтмайди, ўзини сездириб қўйишни истамайди-ю, аммо эҳтиёткорликнинг зиёни йўқ. Умуман, сизлар кечалари юрманглар, башарти юрадиган бўлсанглар ҳам ёлғиз чиқманглар. Қуролларингизни ёнларингиздан қўйманглар, афтидан, уни ёнларингиздан қўймасаларингиз ҳам керак. Ҳар қалай, сен ўртоқ Размётнов Хижняк билан гаплашаётганингда шимингнинг чўнтағидаги наганнинг барабанини икки марта айлантириб қўйганингни эшитиб қолдим — шунақами?

Размётнов кўзларини сузиб, саволни эшитмагандек орқасини ўгириб олди. Нагульнов унинг жонига ора кирди.

— Менга ўқ узганларидан кейин биз мудофаага шайландик.

Бойко-Глухов мулойимгина кулиб деди:

— Мудофаагагина эмас, ҳужумга ҳам тайёрланганга ўхшайсизлар. Дарвоҷе, сен ўлдирган Тиртиқлақабли Тимофеј Дамасков бир вақтлар Половцевнинг ташкилоти билан алоқада бўлган, бу ташкилот аъзолари сизларнинг хоторингизда ҳам бор, ўртоқ Нагульнов,— деди бамисоли эслатиб ўтаётгандек ҳамма нарсадан воқиф «тайёрловччи».— Аммо кейин, номаълум сабабларга кўра, ташкилотдан узоқлашган. У

сенга Половцевнинг буйруғи билан эмас, шахсий хусуматдан ўқ узган бўлса керак...

Нагульннов таъкидлаб, бош силкиди. Бойко-Глухов ҳам худди лекция ўқиётгандек хотиржамлик билан вазмингина давом этди:

— Тимофеј Дамасковнинг қандайдир сабабларга кўра Половцев гуруҳидан ажралиб чиқиб, якка-ёлғиз бандит бўлиб олганидан шу бир факт ҳам далолат берадики, у гражданлар уруши вақтидан бери Дамасковларнинг оғилида сақланиб, кейинчалик Давидов топиб олган станокли пулемётни Половцевнинг маслақдошларига топширмаган. Аммо гап бунда эмас. Бизнинг вазифамиз ҳақида бир неча сўз айтмоқчиман: биз Половцевнинг ёлғиз ўзини, албатта тирик қўлга туширишимиз керак. Уни тириклай қўлга туширсаккина иш беради. Унинг гуруҳидаги оддий аъзоларни кейин заарсизлантирамиз. Яна шу нарсанни илова қилишим керакки, Половцев — каттакон бир ҳалқанинг бир бўғини холос, аммо муҳим бўғинларидан бири. Шунинг учун ҳам уни топиб қамоққа олиш операцияси район бўлими ходимларига эмас, бизга топширилган.

Мендан кўнгилларингиз қолмаслиги учун, ўртоқлар, айтиб қўя қолай: бизнинг районларингиз терриориясида эканлигимизни ОГПУнинг районингиздаги бўлим бошлигигина билади. Ҳатто Нестеренко ҳам билмайди. У — райком секретари, қолаверса, аллақа-ёқдаги оддийгина мол тайёрловчилар билан унинг нима иши бор? Ўз районидаги партиявий ишларга раҳбарлик қилаверсин, биз ҳам ўз ишимиз билан машғул бўламиз... Шуни айтиш керакки, сизларга келгунимизгача бўлган колхозларда биз ўзимизни ким деб танитган бўлсак, бемалол шундай кишилар деб ўйлашган эди, фақат сенгина, Размётнов, Хижнякнинг у билан бирга менинг ҳам чинакам тайёрловчилар эканлигимиздан шубҳаланиб қолдинг. Бунинг учун сенинг фаҳмингга таҳсин ўқиш керак. Зотан, бари бир, бир-икки кундан кейин мен кимлигимизни сизларга очиқ айтишга мажбур эдим, сабаби: касбимга хос сезгирлигим айтиб турибдики, Половцев хоторларингизнинг аллақаерида изғиб юрган бўлиши керак...

Унинг Германия билан бўлган урушдаги ва гражданлар урушидаги хизматдошларини топишга ҳаракат қиласиз. Жаноб Половцевнинг қандай қисмларда хизмат қилганилиги бизга маълум, у ҳамтовоқларидан биронтасининг пинжига биқинган бўлса ҳам ажаб эмас. Қисқа қилиб айтганда, бор гап шу. Жўнаб кетишимиз олдидан биз яна учрашамиз, ҳозирча хайр!

Остонага қараб юаркан, Бойко-Глухов Нагульновга қаради:

— Рафиқангнинг тақдиди билан қизиқмайсанми?

Макарнинг ёноқларида пушти доғлар пайдо бўлиб, кўзлари тиниб кетди. Йўтала-йўтала оҳистагина сўради.

— Унинг қаердалигини биласизми?

— Биламан.

— Хўш?

— Шахти шаҳрида.

— У ерда нима қиляпти? Унинг у ерда ҳеч кими йўқ-ку — на қариндошлари, на танишлари бор.

— Рафиқанг ишлайпти.

— Нима вазифада? — ноҳуш кулиб қўйди Макар.

— Шахтада откатчица бўлиб ишлайпти. Бизнинг ташкилотимизнинг ходимлари унинг иш топиб олишига ёрдам беришди. Аммо ишга ўрнашишига ким ёрдам берганидан ўзи бехабар, албатта. Шунисини айтиш керакки, у жуда яхши ишлайпти, ҳатто, менга қолса, аъло даражада ишлайпти! Жуда сипо юрибди, янги танишлар орттирмаюпти, олдига эски танишларидан ҳам ҳеч ким келаётгани йўқ.

— Унинг олдига ким келиши мумкин эди? — оҳиста сўради Нагульнов.

Зоҳиран у мутлақо хотиржам кўринар, фақат ўнг қовоғигина учиб турар эди.

— Хўш, кимлар бўларди... Тимофеининг танишлари келиши мумкин. Ё сен буни мутлақо мустасно қиласанми? Бироқ менинг назаримда, бу жувон ҳаётига бошқатдан разм солиб, эсини йиғиб олганга ўхшайди, сен ҳам ундан ташвишланма, ўртоқ Нагульнов.

— Менинг ундан ташвишлананаётганимни нимадан олиб гапирияпсан? — яна ҳам секинроқ сўради Нагуль-

нов ва узун қўлларини стол четига тираганча олдига энгаришиброқ ўрнидан турди.

Унинг ранги қум-қув ўчиб кетди, лунжларида қаттиқ тугунчалар ўйнади. Сўзларни бирма-бир ҳижжалаб одатдагидан секинроқ гапира бошлади:

— Сен ўртоқ сўзамол, иш қилгани келганмисан? Ундей бўлса бориб ишингни қил, менга таскин берингнинг ҳожати йўқ, мен сенинг тасаллиларингга муҳтоҷ эмасман, биз сенинг хавотир олишларингга ҳам муҳтоҷ эмасмиз, кундуз куни юрамизми, кечаси юрамизми — бу бизнинг ишимиз. Аҳмоқона панд-насиҳатларсиз ҳам, бегона энагаларсиз ҳам кунимиз ўтиб қолар! Тушундингми? Хўп, туёғингни шиқиллатиб қол. Шу қадар гапга тушиб кетдингки, астар-лахтантагача ағдариб беряпсан, бу киши тағин чекист эмишлар, тушунолмай қолдим: сен чиндан ҳам ўлка ОГПУсининг масъул ходимимисан, ё чиндан ҳам қорамол харид қиласидиган воситачи, бизнинг таъбири миз билан айтганда — далломисан...

Камсухан Хижняк ўзининг бир оз хижил бўлган бошлиғига заҳарханда билан қараб турарди, Нагульнов эса столдан йироқлашиб, гимнастёркасининг камарини тузатди-да, қоматини риндлик билан тик тутганча, ҳаттоқи ўзининг ҳарбий тартиб-интизомини кўз-кўз қилгандек эшикка чиқиб кетди.

У чиқиб кетгач, хонада бир дақиқача ноқулай сукунат ҳукм сурди.

— Бир ҳисобда унга хотини тўғрисида гапирмасам ҳам бўларкан,— деди Бойко-Глухов жимжилогининг тирноғи билан қаншарини қашиб.— У хотини кетиб қолганидан ҳали ҳам ич-этини еб юрганга ўхшайди.

— Ҳа, ундей қилиш керак эмас эди,— дея унинг фикрига қўшилди Размётнов.— Бизнинг Макар — гажир йигит, покиза кўнглини иркит қўл билан афдар-тўнтар қилишларини жинидан баттар ёмон кўради...

— Ҳа, майли, ўтиб кетар,— деди муроса билан Хижняк, эшик қабзасига қўл узатаркан.

Ноқулайликни бир амаллаб бартараф қилиш учун Размётнов сўради:

— Уртоқ Глухов, менга тушунтириб берсанг: мол сотиб олиш масалаларингиз нима бўлади? Ҳақиқатан ҳам мол сотиб оласизларми ёки қўрама-қўра юриб нархини суриштирасизларми?

Бундай содда саволдан Бойко-Глуховнинг чеҳраси очилиб кетди, яна лўппи ёноқларидағи кулгичлари ўйнади:

— Пишиқ-пухта хўжайин эканлигинг дарров кўринди-қолди! Молни ҳақиқатан ҳам сотиб оламиз, пулни ҳам тўла-тўқис тўлаймиз. Бизнинг харидларимиздан ташвишланмай қўя қол: молларни гала-гала қилиб Шахтига жўнатамиз, гўштини шахтёrlар маза қилиб ейишади. Ейишадиу бизга раҳмат ҳам айтишмайди, чунки улар учун қайси бир юқори муассаса сўқим тайёрлаганлигидан ўzlари бехабар. Ишлар шунаقا, ошна!

Меҳмонларни кузатгач, Размётнов тирсакларини бирбиридан узоқ қўйиб, муштларини ёноқларига тираганча столда анчагина ўтириди. «Бизнинг ҳамқишлоқлардан бу офицерга ким қўшилган бўлиши мумкин?» деган фикр унга тинчлик бермасди. У Гремячий Логдаги эркакларнинг ҳаммасини бирма-бир хаёлидан ўтказди. Аммо уларнинг биронтасидан ҳам шубҳалана олмади...

Размётнов бир оз ёзилиш учун столдан турди. Эшикдан деразага қараб уч марта юрди, кўзга кўринмайдиган тўсиққа дуч келиб қолгандек бирдан хона ўртасида тўхтаб қолди, ташвиш билан ўйлади: «Бу хомсемиз Макарнинг ярасини янгилаб қўйди. Лушка тўғрисида гапиришнинг нима кераги бор эди! Бордию Макар диққат бўлиб уни кўриб келгани Шахтига жўнаб қолса-чи? Шу кунларда ўзи тажангроқ юрибди, сирини бермайди, аммо кечалари ёлғиз ўзи ими-жимида ичib чиқаётганга ўхшайди...»

Размётнов бир неча кун, Макар нима қилар экан, деган ташвишда диққат билан яшади. Қачонки, шанба куни кечқурун Нагульнов Давидовнинг олдида, Доңда дастлаб ташкил этилган МТСнинг қандай ишлаётганини кўриб келиш учунрайком рухсати билан Мартиновская станицасига бориб келмоқчи бўлганини айтганида, Размётнов ҳанг-манг бўлиб қолди: «Соб бўпти Макар! Лушканинг олдига бормоқчи! Эркаклик иззаг-нафси қаёқда қолди экан?..

Баҳордаёқ, четанларнинг шимол томонидаги охирги қор шаффоғ сув бўлиб чўка бошлагунча иккита ёввойи кўк каптар Размётновнинг қўрасини ёқтириб қолган эди. Улар уй тепасида узоқ айланган сари тобора пастлашди. Кейин ер бағирлаб келиб енгилгина парвоз қилишди-да, уй томига қўнишиди. Сергаклик билан бошларини ҳар томонга буриб янги жойни кўздан кечирганча унга кўнишиб узоқ ўтиришди; кейин нари ҳазар қилгандек олифталик билан қирмизи панжаларини катта-катта қўйганча, мўри атрофига тўкилган кир бўр устидан юриб ўтди, бўйнини ичига олиб, бошини орқароққа ташлади-да, кўпчиб турган тўшидаги ранго-ранг хира патларини йилтирата-йилтирата журъатсизгина фув-фувлай бошлади. Модаси эса пастга сирғилиб тушиб, йўл-йўлакай парвозда қанотини икки марта қаттиқ тапиллатди-да, ярим доира ҳосил қилиб учиб, Размётнов меҳмонхонаси деразасининг девордан кўчган нақшига қўнди. Унинг қанотини икки бор тапиллатиши ёрига, орқамдан юр, деган таклифдан бошқа нима бўлиши мумкин эди?

Тушда Размётнов уйига овқатлангани келди ва ён эшикдан уй бўсағаси яқинида юрган каптарларни кўрди. Модаси ҳашаматдор оёқлари билан йўрғалаб, йўлакай нималарнидир чўқиб, эриган қор сувидан ҳосил бўлган ҳалқобча атрофида югурмоқда, наригиси эса сакраб-сакраб уни таъқиб қилмоқда. Кейин ўзи ҳам бирпасгина тўхтаб гир-гир айланар, тумшуғи ва осилиб тушган бўтакаси ерга теккудек бўлиб таъзим қилас, шиддат билан фув-фувлар, яна таъқиб қилишга ўтар, думини елпуғичдек ёзиб, қишига хос бефайз, нами кўтарилимаган совуқ ерга чўзилиб, ётиб турар эди. У модасини кўлмакдан йироқлатиш учун яккаш чап томондан юради.

Размётнов эҳтиёт билан юриб улардан икки қадамча беридан ўтди, аммо каптарлар учишни хаёлларига ҳам келтиришмади, салгина четланишди, холос. Уй бўсағаси яқинида турган Размётнов болаларга хос завқ-шавқ билан: «Булар меҳмон эмас, мезбон бўлиб

учиб келишган!» деган қарорга келди. Аччиқ табассум билан ё шивирлади, ё ўйлади: «Қараганимда бахтими бошлаб бу ерни макон қилгани келишган, ҳа, худди шундай...»

У омбордан бир ҳовуч буғдой олиб чиқиб деразанинг рўпарасига сочиб қўйди.

Размётнов эрталабдан бери тажанг ва тунд: экин экишга тайёргарлик, уруф тозалаш ишлари учча юришмас, шу куни Давидовни станицага чақиришган, Нагульнов экишга тайёрланган ерларни шахсан кўздан кечириш учун отда далагъ кетган, Размётнов тушгачаёқ иккита бригадир ва омборчи билан ўлгудек сўкишиб олишга ултурган эди. Аммо уйида товоқда совиётган карам шўрвани унутиб, капитарларни кузата бошлаган эди — баҳор еллари қовжиратган юзи хийла ёришиб кетди-ю, юраги бўлса баттар сиқилди...

Жажжигина кўркам мода капитарнинг буғдойни ютоқиб чўқишини, хушбичим нар капитар биронта ҳам дон чўқимай унинг атрофида инод билан гир-гир айланисини ғамгин жилмайиб томоша қилиб турарди.

Бундан йигирма йил муқаддам навқирон ва худди шу капитардек хушбичим йигит Андрей ўз севгилиси атрофида шундай гиргиттон бўлиб айлангувчи эди. Кейин — уйланди, ҳақиқий ҳарбий хизматга кетди, урушда бўлди... Умри нечоғлиқ даҳшатли ва алам қиладиган шошқалоқлик билан ўтиб кетибди. Хотини ва ўғлини эсларкан, Размётнов ҳасрат билан ўйлади: «Мен сизларни кўзларингиз очиқлигида камдан-кам кўрдим, азизларим, ҳозир ҳам камдан-кам хабар олам...»

Серқуёш бу апрель куни нар капитарнинг дон билан иши йўқ эди. Андрей Размётновнинг ҳам овқат билан иши йўқ эди. У энди тинган, ёшдан хиралашган кўзлари билан деразага боқаркан, дераза ташқарисида капитарларни, мулойим мовий баҳор осмонини кўрмас, унинг хаёл кўзи ўнгига умрида илк бор жонидан ҳам қаттиқ севган яккаю ёлғизининг ғамгин дийдори намоён эди; уни севиб тўёлмаган, ўн икки йил муқаддам, эҳтимолки, мана шундай барқ урган баҳор айёмида машъум ажал ундан жудо қилган эди...

Размётнов товоққа бошини эгиб нон кавшамоқда:

ёноқларидан аста юмалаб тушиб, бусиз ҳам номакобга топширилган қарам шўрвани шўр қиласётган кўз ёшларини онаси кўриб қолишини истамас эди. У қошиқни икки марта қўлига олди, қошиқ унинг ғала-ти бир тарзда мажолсизланиб қалт-қалт титраётган қўлидан икки мартағача ҳам сирғилиб тушиб кетди...

Ҳаётимизда шундай пайтлар ҳам бўладики, одамларнинггина эмас, қушларининг бир лаҳзаликкина фарогати ҳам баъзи дилхаста одамларнинг ҳасадини қўзғаб, итеҳзоли кулдирибгина қўя қолмай, битмас-туганмас алам, изтироб билан тўлган уқубатли хотираларини ёдига солади... Размётнов шахт билан столдан турди-да, онасига орқасини ўғирганча пахталигини кийиб, поноғини ғижимлади:

— Раҳмат, ойижон, ҳозир овқат егим келмайроқ турибди.

— Қарам шўрва ичгинг келмаётган бўлса, бўтқа билан қатиқ олиб келиб бера қолай?

— Йўқ, егим келмаяпти. керак эмас.

— Бирон қайғу-алам ўтдими дейман?— деб эҳтиёт билан сўради онаси.

— Қайғу-алам нима қиласди, қайғу деган нарса йўқ. Бўлган бўлса ҳам ўтди-кетди.

— Кичкиналигиндан писмиқроқсан, Андрюйка... Онам деб сирингни айтмайсан, ҳеч ҳасрат қилмайсан... Юрагингнинг бир чеккаси тошдими дейман..

— Ўзинг туққансан, ойижон, ўзингдан кўр. Мени қандай қилиб туққан бўлсанг шундайман, борига барака, дейишдан бошқа чоранг йўқ.

— Ҳўп, худога ҳавола қилдим,— деди кампир ҳафа бўлиб оқиши лабларини қимтиганча.

Ён эшикдан чиқаркан, Размётнов қишлоқ советига олиб борадиган ўнг томонга эмас, даштга олиб борадиган чап томонга қараб бурилди. Бамайлихотир катта-катта қадам ташлаб ўнқир-чўнқир йўллардан юриб, қадим-қадимдан ўликлар осойишта сиқилишиб ётган иккинчи Гремячий Логга қараб кетди. Қабристон атрофидағи иҳота бузилиб кетган эди. Бу машаққатли йилларда ўликлар тирикларнинг назаридан қолган эди.. Вақт ўтиши билан қорайиб кетган эски бутлар қийшайиб қолган, уларнинг баъзилари юзтубан, баъ-

зилари чалқанча ётар эди. Биронта ҳам қабр безатилмаган. Шарқдан эсаётган шабада дўнглардаги бултурги бурганни ғамгингина тебратар, оқариб қовжираб қолган ёвсан толаларини нозик жувон бармоқлари билан ўйнагандек ўйнар эди, чиринди, бўрсиган ўт-ўлан билан эриган қора тупроқнинг омухта ҳиди қабрлар устидан аримасди.

Ҳар бир қабристонда йилининг ҳар бир фаслида тирик одамни ҳамиша қайғу чулғаб олади, аммо ўткир аламли, ўзгача бир қайғу у ерда фақат эрта баҳор билан кеч куздагина пайваст ҳукм суради.

Бузоқлар солган сўқмоқдан юриб Размётнов қабристоннинг шимолий посирасидаги илгари ўз-ўзини ўлдирганлар кўмиладиган хилхонага бориб, четлари ўпирилиб тушган таниш қабр олдида тўхтадида, оқ тушгани, қуи эгилган бошидан попогини олди. Одамларнинг эътиборидан соқит бу бир парча ер устидаги ўйчан сукунатни тўргайларгина бузмоқда эди.

Ёрқин қуёш ярқиратган, уйғониб келаётган ҳаёт билан лиммо-лим бу баҳор куни Андрей бу ерга нима учун келди? Қалтабақай кучли бармоқларини чирмаштириб, тишларини тишларига қўйганча, гўё элас-элас ҳовурда ўзининг унтуилмас ёшлигини, узоқ давом этмаган баҳтиёргигини кўрмоқчи бўлгандек, кўзларини сузиб, уфқнинг ғира-шира ҳудудига тикилиш учунми? Эҳтимол шундай ҳамдир. Ахир ўлган, аммо дилга азиз ўтмиш ҳамиша ё қабристонда, ё бедор тунларнинг сассиз зулматларидагина дуруст кўринади-ку...

Шу кундан эътиборан Размётнов уйига келиб жойлашган бир жуфт каптарни ўзи парвариш қила бошлиди. Кунига икки марта дераза остида бир ҳовучдан буғдой сепиб, каптарлар тўйиб олгунларича хира товуқларни ҳайдаб қўриқчиллик қилиб турарди. Тонг маҳаллари туриб омборхона остонасида ўтириб олиб чекар, янги истиқоматчиларнинг дераза тепасига похол, майда чивиқлар, туллаган ҳўқизларнинг четанга илашиб қолган жунини олиб дераза тепасига ташиётганини индамай кузатар эди. Ҳадемай омонатгина солинган ин битди, Размётнов енгил тортиб ҳўрсиниб қўйди: «Урнашиб қолишли! Энди учиб кетишмайди».

Икки ҳафтадан кейин мода капитар донлагани тушмади. «Тухум босди. Хўжалигимизнинг барори кела-диган бўлди»— деб жилмайди Размётнов.

Каптарлар пайдо бўлиши билан унинг ташвишлари ҳам хийла кўпайди: уларга вақтида дон сочиб, остона олдидаги ҳалқоб тез орада қуриб қолганлиги учун товоқдаги сувни янгилаб туриши керак, бундан ташқари, муҳим бир зарурат — ўзини ҳимоя қиломайдиган ожиз капитарларни муҳофаза қилиш зарурати уни посбонлик хизматини ўташга мажбур қилмоқда эди.

Бир куни даладан қайтиб келаётib уйига яқин қолганда Размётнов онасининг эркаси — қари мушукнинг похолга узала тушиб, уй томидан сирғилиб кетаётганини, кейин эса қия очиқ дераза дарчасига енгилгина сакраб, думини ликиллатганча ҳамлага тайёрланаётганини кўриб қолди. Мода капитар мушукка орқаси ўгириқлик ҳолда уясида ҳаракатсизгина ётар, афтидан, хавф-хатардан бехабар эди. Ажал ундан қирқ сантиметрчагина нарида турарди.

Размётнов чўнтағидан наганини суғуриб олди-да, нафас олмай, сузилган кўзларини мушукдан узмай, оёқ учидаги югуруди. Мушук олдинги оёқларини титраб ўйнатганча орқароққа тисариларкан ўқ овози янгради, дарча силкинди, капитар учиб кетди, ўқ қиялаб келиб теккан мушук эса саланғлаганича боши билан ўй тагига шалоплаб тушди.

Ўқ овозини эшитиб уйдан Андрейнинг онаси югуриб чиқди.

— Темир белкурагимиз қаёқда, ойижон! — дея ҳеч гап бўлмагандек сўради Размётнов, тезлик билан.

У ўлган мушукнинг думидан кўтарганча ижирғаниб турарди.

Кампир чапак отиб, йиғлаб-сиқтаганча дод-вой кўтариб қичқира бошлиди:

— Паънати қотил! Тирик жон зотига қаҳринг қаттиқ! Макарка икковларингга одам ўлдириш ҳам, мушук ўлдириш ҳам бари бир! Чечан бўлиб кетгансанлар, қуриб кетгур жангариilar. Жон олмай туролмайсанлар, тамаки хумор қилгандай қўмсаб ўласанлар!

— Ҳой-ҳой, ўпкангни бос! — шиддат билан унинг гапини бўлди ўғли. — Энди мушуклар билан абадул абад хайрлаш! Макар икковимизга ёпишма. Икковимизни ҳар хил лақаблар билан атаб чақиришса жуда ғашимиз келадиган бўлиб қолганмиз. Биз қаҳримиз келганидан эмас, шафқат қилганимиздан, одамларга кун бермаётган икки оёқлими, тўрт оёқлими ҳар қандай разилларни бехато уряпмиз. Тушундингизми, ойижон? Хўп, уйга киринг. Ичкарига кириб ғижина қолинг, қўрада туриб ғижиниб мени қарғашинигизни қишлоқ совети раиси сифатида қатъий ман қиласман.

Онаси ўғли билан бир ҳафтача гаплашмади, онасинг индамаганлиги эса унга жуда қулай келди: бир ҳафта ичидан у қўни-қўшниларнинг эркак-урғочи ҳамма мушукларини отиб ташлаб, каптарларининг узоқ вақт ҳавф-хатарсиз яшашини таъминлаб қўйди. Бир куни Давидов қишлоқ советига киаркан сўраб қолди:

— Чор атрофда нега ўқ отиб юрибсан? Ҳар куни тўппонча отганингни эшиштаман. Халойиқни нега безовта қиласан? Қуролингни созлайдиган бўлсанг — даштга чиқиб, ўша ерда варанглатавер, бундай қилишинг яхши эмас, Андрей, факт!

Мушукларни бир чеккадан қиряпман,—тундлик билан жавоб берди Размётнов. — Биласанми, лаънатилар кўз очирмай қўйишди!

Давидов қуёшда жизғинак бўлган қошларини ҳайрат билан чимириди:

— Қанақа мушукларни?

— Ҳар қанақасини. Чипорларини ҳам, қораларини ҳам, тарғилларини ҳам. Кўзим тушгани борки, омон қўймайман.

Давидовнинг юқори лаби учди — бу ичидан гупириб келаётган тўхтовсиз қаҳқаҳани тийиш учун боркучи билан тиришаётганинг илк белгиси эди. Бундан хабардор Размётнов қовоғини уйди, чўчиб эҳтиёт билан қўлларини олдинга чўзди.

— Сен кулмай тура тур, матросгинам! Аввал нима гаплигини суриштир.

— Нима гап? — базўр ижирғаниб, кулгининг зўридан қўзидан ёш тирқираб кетай деб сўради, Давидов. — Заготживсирыё йўли бўйича план тўлмаган-

дир-да? Мўйнабоп ҳайвонларнинг терисини топшириш суст кетаётган бўлса, сен... бу ишга ўзинг ҳам кириша қолдингми? Уҳ, Андрей! Вой, соб бўлдим.. Тоқатим қолмади... Тезроқ иқрор қилсанг қилганинг, бўлмаса мен шу ернинг ўзидаёқ, столингнинг устидаёқ силлам қуриб қотиб қоламан...

Давидов бошини кафтларига ташлади, яғринида суяқдор кураклари учиб ўйнади. Шундан сўнг Размётнов ари чақиб олгандек ўрнидан сапчиб турди-да, қичқирди:

— Тентак! Шаҳарлик лақма! Каптарларим тухум босиб ётишибди, ҳадемай бола очишади, сен бўлсанг— «Заготживсиръё мўйна планини тўлдиришга киришибсан» дейсан... Жун, туёқ, мугизга ўхшаган даҳмазаларни бошимга ураманми? Менинг уйимга каптарлар келиб ўрнашди, мен уларни яхшилаб асраяпман. Мана энди кулсанг хумордан чиққунча кулавер.

Яни мазахларни кутган Размётнов ўз сўзларининг Давидовга бунчалик таъсир қилишини кутмаган эди. Давидов бўлса жиққа ёш кўзларини наридан-бери артиб, қизиқиб сўради:

— Қанақа каптар? Қаёқдан олдинг?

— Қанақа каптар, қанақа мушук, қаёқдан олдинг... Гапингга тушунолмай гарангман, Сёма, сен бугун бунча аҳмоқона саволлар беряпсан?— дея тулақди Размётнов.— Хўш, икки оёқли, икки қанотли, оддий каптарлар, ҳар қайсисининг — биттадан боши бор, ҳар қайсисининг орқасида биттадан думи бор, икковининг ҳам либоси патдан, ҳеч қандай пойафзаллари йўқ, қашшоқликларидан қишининг куни ҳам оёқ яланг юришади. Энди тушундингми?

— Мен буни эмас, уларнинг зотдор ёки зотдор эмасликларини сўраяпман. Болалигимда мен ҳам каптарбоз эдим, факт. Шунинг учун ҳам каптарларнинг қайси зотдан эканлигига қизиқиб турибман: ўйинчими ё қўкракдорми, балки пайпоқдор ёки кокилдордир? Уларни қаёқдан олдинг?

Энди мўйловларини силаганча Размётнов жилмаяр эди:

— Улар бировнинг хирмонидан учиб келишган, демак, уларнинг зотлари ҳам «хирмони» деб аталади,

бетаклиф учиб келганлари учун, чунончи, «адашган» ёки «келгинди» десак ҳам бўлади, чунки менинг донларимни ейди, ўзлари ҳеч егулик овқат қидиришмайди... Хуллас, уларни сенинг кўнглингга ёқсан ҳар қандай зотга мансуб дейиш мумкин.

— Уларнинг туси қанақа?— жиддий суриштира бошлади Давидов энди.

— Расмона, капитар рангида.

— Яъни?

— Ҳали қўл тегмаган, пишган олхўрига ўхшайди, кўкиш, гарди бор.

— Э-э-э, кўк капитар экан,— деди чўзиб, ҳафсаласи пир бўлган Давидов. Қўлларини шу заҳотиёқ завқ билан бир-бирига ишқади.— Аммо, оғайничалиш, кўк капитар ҳам чакки бўлмайди! Бир кўриш керак. Жуда қизиқ, факт!

— Ўйга бор, қўрасан, меҳмон бўласан!

Шу сухбатдан бир неча кун кейин Размётновни кўчада бир гала болалар тўхтатишиди. Улардан энг дадили анчагина берироқдан туриб чийилдоқ овоз билан сўради:

— Андрей амаки, мушук тери тайёрлаётган сизми?

— Нима-нима?!— Размётнов пўписа билан болаларга қараб югурди.

Улар худди чумчуқлардек ҳар томонга тўзиб кетишиди, аммо бир дақиқадан сўнг яна ғуж бўлиб олишиди.

— Мушук тўғрисидаги гапларни сизларга ким айтди?— ғазабини аранг тийиб, қатъият билан суриштиради Размётнов.

Аммо болалар бошларини қуи солганча индашмас, аҳён-аҳёнда бир-бирларига қараб қўйишганча кўчадаги совуқ тупроқни яланг оёқлари билан бара-варига чизмоқда эдилар.

Ниҳоят, дастлаб савол берган боланинг ўзи журъат қилди. Бўйини чуваккина елкалари ичига тортганча чийиллади:

— Ойим айтдики, сиз мушукларни отиб ўлдираётганмисиз.

— Ҳа, ўлдиряпман, аммо тери тайёрлаётганим йўқ! Буларнинг бир-биридан фарқи бор, оғайничалиш.

— Ойим: «Раисимиз уларни шундай отяптики, худди тери тайёрламоқчига ўхшайди. Бизнинг мушумизни ҳам ўлдира қолсин, бўлмаса у капитарларни қийратяпти» дейди.

— Бу мутлақо бошқа гап, ўғлим!— дея хитоб қилди Размётнов хийлагина жонланиб.— Шундай қилиб, мушукларинг капитарларни қийратаётган экан-да. Кимнинг боласисан, йигитча? Отинг нима?

— Менинг дадам Ерофей Василич Чебаков, ўзимнинг отим Тимошка.

— Хўп, мени уйингга бошлаб бор, Тимофейчик. Ҳозир биз мушугингнинг таъзирини берамиз. Ахир, онангнинг ҳам нияти шу экан-ку.

Чебаковнинг капитарларини омон сақлаб қолиш учун бошлаган олижаноб ташаббуси Размётновга муваффақият ҳам келтирмади, шуҳратига шуҳрат ҳам қўшмади. Қайтага бунинг акси бўлди.. Чувир-чувир қилаётган бир гала боланинг кузатишида Ерофей Чебаковнинг қўрасига ошиқмасдан келаётган Размётнов у ерда ўзини каттакон бир дилсиёҳлик кутаётганидан мутлақо бехабар эди. Атрофида ўрмалашаётган ҳамроҳларидан биронтасининг яланг оёғини босиб олишдан қўрқсанча яккаш этигини эҳтиёт билан сургаб босиб муюшдан кўриниши биланоқ Чебаковлар уйининг зинапоясига Ерофейнинг кампир онаси чиқди.

Кўриниши улуғвор, бўйдор, бўлали кампир текин томоқ еб семирган баҳайбат малла мушукни кўксидаги босганча шиддат билан қовоғини солиб зинапояда турарди.

— Саломатмисан, кампир!— кекса уй эгасининг ёшини ҳурмат қилиб унга лутф билом салом берди Размётнов ва бармоқларини кул ранг попогига тегизиб қўйди.

— Худога шукур. Нима иш билан келдинг, хутор атамани?— йўғон овоз билан жавоб қилди кампир унга.

— Мушук важидан келдим. Болалар айтишяпти, у капитарларни қийратаётганмиш. Уни бу ёққа бер-чи, мен ҳозироқ трибуналга тортай. Ёвузга «ҳукм қатъий ва шикоятга молик эмас» деб ҳукм чиқарамиз.

— Қандай ҳақ-хуқуқларга амал қилиб бундай қилмоқчисан? Совет ҳокимияти, ҳамма мушуклар қириб ташлансин, деган қонун чиқарганми?

Размётнов жилмайды:

— Қонун билан нима ишиңг бор? Мушук босқинчилик қиляптыми, бандитлик қиляптыми, турли-туман қүшларни қийратяптыми — у олий жазога тортилади, бўлган-турган гап шу! Бандитларга нисбатан қўлланиладиган бизда битта қонун бор: «Революцион ҳуқуқий онгга амал қилиш», вассалом! Хўп, гапни чўзib ўтиришнинг ҳожати йўқ, қани кампир, мушугингни бер-чи, мен у билан озгина гаплашиб қўяй...

— Омборхонамиздаги сичқонларни ким тутади? Бу ишни бажариб туриш учун ўзинг ёлланасанми?

— Менинг ўз вазифам бор, беҳудадан-беҳуда худога тоат-ибодат қилиб иконанинг олдида икки букилавергандан кўра бекорчиликка эрмак қилиб сичқонлар билан ўзинг шуғуллана қол.

— Менга амр беришга ёшлик қиласан! — дағдаға билан гапирди кампир.— Бизнинг казакларимиз нега энди шундай расво одамни раис қилиб сایлашди экан? Эски замонда менга хутор атаманларидан биронтаси ҳам бас келолмаганлигини биласанми ўзинг?! Сени қўрамдан шундай тириқтириб чиқарайки, кўчага чиққандагина ҳушиңгга келгин!

Кампирнинг йўғон овозини эшишиб омбор тагидан ола кучук югуриб чиқди-да, қулоқни батанг қилиб вовуллай бошлади. Размётнов зинапоя олдида турганча бамайлихотир тамаки ўрамоқда. Ўралаётган тамакининг ҳажмига қараганда у эгаллаб турган позициясини ҳали-бери ташлаб кетмоқчи эмас эди. Узунлиги салкам бир қарич, йўғонлиги шаҳодат бармоғидек келадиган папирос бафуржа ҳангамага мўлжалланмоқда эди. Аммо иш бошқачароқ тусга кириб кетди...

Размётнов мулоҳаза билан хотиржам гапира бошлади:

— Гапинг тўғри, буви! Казаклар аҳмоқлик қилиб мени раисликка сайлаб қўйишиди. «Қазак — ақли маҳзак» деганлари бежиз эмас. Қолаверса, мен ҳам бу ташвишга рози бўлиб ақли кўтаҳлик қилибман...

Аммо сен кўйиб-пишаверма: ҳадемай мен раислик ва-
зифасидан воз кечаман.

— Аллақачонлар шундай қилишинг керак эди!
Аллақачон фурсати етган!

— Мен ҳам, фурсат етган деяпман-ку, ҳозирча мушуғинг билан видолашиб раиснинг қўлига топшир.

— Сен бусиз ҳам хутордаги ҳамма мушукларни отиб ташладинг; ҳадемай хуторда сичқонлар шундай қўпайиб кетадики, энг аввал кечаси ўзингнинг тирноқ-ларингни кемириб кетишади.

— Сира ҳам-да,— қатъян эътиroz билдириди.
Размётнов.— Менинг тирноқларим шу қадар қаттиқ-
ки, ҳатто сенинг теватинг чайнайман деса, тишини син-
дириб олади. Лекин, бари бир, мушукни беравер, сен
билан тортишиб ўтиргани вақтим йўқ. Уни чўқинтири-
да, яхшиликча менинг қўлимга тутқаз.

Кампир ўнг қўлининг сертугун, қўнғир бармоқла-
ридан басавлатгина зорманда ҳосил қилиб, чап қўли
билан эса мушукни шу қадар ҳузур билан кўксига
босдики, мушук хунук овоз билан бифиллаганча пиш-
қириб таталай бошлади. Размётновнинг орқасида
қатор турган болалар бадҳоҳлик билан ҳиринглашди.
Ўларнинг ихлослари Размётнов томонида эканлиги
аниқ кўриниб туради. Аммо кампир безовта бўлган
мушукни тинчтиб:

— Бу ердан ҳозироқ йўқол, иблис, лаънати ғайри
дин! Яхшиликча кет, бўлмаса мендан кўрадиганингни
кўрасан!— деб қичқиргач, улар худди команда берил-
гандек жимжит бўлиб қолишли.

Размётнов дағал газета қоғоз четини тилининг учи
билан ҳеч шошмай ҳўллаб папиросини ёпиштирас,
ўзи эса жангари кампирга ер остидан муғамбirona
тиклиб, қолаверса, беиболик билан илжаяр эди. Очи-
фини айтиш керак, хуторда онасидан бошқа ҳамма
кампирлар билан айтишиб жиқиллашиш унга нима
учундир жуда хуш ёқар, ҳатто ҳузур бағишилар эди.
Ёши катта бўлиб қолганига қарамай ёш казакларга
хос шўхлик, қўполроқ бўлса ҳамки, аломат бир тарз-
да сақланиб қолган хушчақчақлик уни тарқ этмаган
эди. У бу гал ҳам ўзининг ёмон одатига хилоф қил-
мади — тамакисини тутатиб устма-уст икки марта

тортгач, мулойимлик билан, ҳатто қувониб кетгандек гапира бошлади:

— Овозинг бирам чиройлики, Игнатьевна кампир! Ула-ўлгунимча эшиитсан ҳам тўймайман-а! Емасам, ичмасам ҳам розиманки, сени эртадан кечгача шанғиллатиб қўйсам... Сўз йўқ, овозинг жуда ҳам ўткир! Йўғон, гулдур-гулдур, худди станицадаги қари дъякон билан колхозимизнинг Гулгина деган айфирининг овозига ўхшайди. Шу бугундан бошлаб мен сени: «Игнатьевна кампир» деб эмас, «Гулгина кампир» деб чақирадиган бўламан. Келишиб ола қолайлик: одамларни мажлисга хабарлаш керак бўлиб қолса, сен майдондан туриб кекирдагингни йиртгудек бақирасан, биз сенга бунинг учун колхоздан икки меҳнат кунидан...

Размётнов гапини тамомлаёлмади: ғазаби қўзиб кетган кампир мушукни гарданидан ғижимлаганча эркакчасига қулоchlаб улоқтириди. Размётнов чўчиб кетиб, ўзини четга олди, мушук эса тўрт панжасини лапанглатиб, яшил кўзлари ола-кула, жон ҳолатда миёвлаганча унинг ёнидан учиб ўтди-да, ерга тушди, каттаксон думини тулкининг думидек ҳурпайтиридида, қўшии полизга қараб уриб қолди. Унинг орқасидан қулоқларини шалпиллатиб дағдаға билан вангиллаб кучук югурди, кучук орқасидан эса қий-чув кўтарганча болалар югуришди... Мушук шамол кўтаргандек бир сакрашда четан девордан ошиб кетди, шундай баҳайбат тўсиқдан ошишга ожиз кучук айланиб ўтиш учун ҳаллослаганча ўзига жуда таниш бўлган раҳнага қараб югурди; аммо болалар кўхна четанга бараварига сакраб чиқиб қарсиллатганча ағанатиб юборишиди.

Мушук бодринг пушталари, помидор ва карам кўчатлари орасидан малла чақмоқдек липиллаб кетиб бормоқда, завқи ошиб кетган Размётнов эса ним ўтириб турганча кафти билан сонларини шапатилаб бақиради:

— Ушла! Қочиб кетмасин! Тут, мон уни яхши биламан!..

Размётнов зинапоя томонга тасодифан қараган эди, Игнатьевна кампирнинг сапчиб ўйноқлаётган вазмин

кўксини қўллари билан босганча қотиб-қотиб кулаётганини кўриб ҳайрон бўлиб қолди. Қампир дуррасининг учи билан кўзларини анчагача артиб турди-да, кулгисини ҳамон тиёлмай, бўғиқ овоз билан гапирди:

— Андрюшка Размётнов! Экинини пайҳон қилдирганинг учун, сенми, қишлоқ советингми — бари бир, менга товон тўлайсизлар! Бошлаб келган шумтакаларинг қанча экинни пайҳон қилганликларини кечгача ҳисоблаб чиқай, кейин ҳақини чўзасан!

Андрей зинапоя олдига бориб илтижо қилувчи кўзлари билан кампирга ер остидан қаради:

— Бувижон, ўзимнинг раислик маошимданми ёки кузда ўзимизнинг полизданми — ҳақингни тўла-тўқис тўлайман! Бунинг эвазига сен мушугинг қийратган капитарлар ўрнига капитар бер, ўзимникилар яқинда бир жуфт очиб чиқади, сен ҳам бир жуфт туҳфа қилсанг хўжалигим бут бўлади-қолади.

— Худо ҳақи ҳаммасини олиб кета қол. Товуқларимни оч қолдириб, уларнинг ризқини ейишяпти — улардан келган фойда шу.

Размётнов полиз томонга ўгирилиб қичқирди:

— Болалар, яраш!

Ўн минутдан сўнг эса у тор кўчалардан эмас, Гремячийдаги фийбатчи хотинларнинг диққатини тортмаслик учун пастдан, анҳор ёқасидан юрганча уйига қайтиб келарди. Шимолдан сарин, анчагина салқин шамол эсмоқда эди. Размётнов бўтакалари вазмин бир жуфт иссиқ капитарни попогига солди-да, попогини пахталигининг барига билан яширди, ўзи эса атроф-теваракка олазарак бўлиб, аланглар, хижолат билан жилмаяр, шамол, шимолдан эсаётган салқин шамол унинг оқ тушган соchlарини ўйнар эди.

XXII БОБ

Гремячий партячейкасининг мажлисига икки кун қолганда Нагульновнинг квартирасига олтига колхозчи аёл келди. Эрта тонг бўлганлиги учун хотинлар хонага ёпирилиб киргани тортинишди. Улар сиполик билан зинапоя босқичларига, девор тагларига ўтириб олишди, шундан сўнг Кондрат Майданниковнинг хо-

тини бошидаги қуюқ синъкага солинган озода дурра-
часини тузатиб, сўради:

— Унинг олдига мен кирақолайми, эгачилар?

— Ўзингки талабгор бўлдингми, кирақол,— дея
ҳамма учун жавоб берди пастдаги босқичда ўтирган
Агафон Дубцовнинг хотини.

Макар ўз хонасида гултувакка бир амаллаб тақиб
қўйилган бир парчагина ойна қаршисида икки буқча-
йиб ноқулай ўтирганча соқолини олмоқда эди. Эски,
ўтмас устара худди электр чақинларига ўхшаб чарс-
чурс қилганча Макарнинг қора тўриқ ёноқларидағи
қаттиқ қора тукларни қиртишламоқда, Макарнинг ўзи
эса оғриқдан ижирғанаар, томоқларини қирап, аҳён-
аҳёnda кўзидан тирқираб чиққан ёшни ич кўйлагининг
енги билан арта-арта баъзан бўғиққина ҳайқириб қў-
яр эди. У бир неча марта терисини кесиб олган, ёноқ-
лари билан бўйнидаги суюқ совун кўпиги оқ эмас, ола
чалпоқ пушти бўлиб қолган эди. Макарнинг хира ой-
нада акс этган юзи пайдар-пай турли ҳисларни
гоҳ тақдирга лоқайд тан бериш, гоҳ уқубатли оғриқ-
қа бардош қилиш, гоҳ ўтакетган ғазаб ҳисларини
ифодалар, баъзан эса жон аччиғида қандай бўлма-
син устара билан ўзини маҳв этмоқчи бўлган сунқасд-
чининг юзини эслатар эди.

Майданниковнинг хотини хонага киаркан ёҳиста
салом берди. Макар оғриқдан буришган, қонталаш-
тунд юзини унга дарҳол бурган эди, шўрлик аёл қўр-
қиб кетиб, оstonага томон тисарилди:

— Вой, шайтон чалгур! Нега бунча ҳамма ёғинг
бўялиб кетди? Ақалли чиқиб ювиниб кира қолсанг-чи,
бўлмаса худди бўғизланган тўнғиздек қонинг тизил-
лаб оқяпти!

— Ўтаканг ёрилмасин, овсар тентак, ўтири,— му-
лойим жилмайганча у билан саломлашди Макар.—
Устара ўтмас, шунинг учун теримни кесиб олдим. Бу-
ни аллақачонлароқ улоқтириб ташлашим керак эди-ю,
кўзим қиймайди, лаънати қийнаса ҳам кўнишиб қол-
ганман. У мен билан икки урушда ҳамроҳ бўлган, ўн
беш йилдан бери менга оро бериб келади. Мен ундан
қандай қилиб кечишим мумкин? Ўтиранг-чи, мен ҳо-
зир бўламан.

— Устара ўтмас дейсанми? — нима дейишини билмай қайта сўради Майданникова, скамейкага ботинмай ўтиаркан, Макарга қарамасликка тиришиб.

— Асти сўрама! Жоннинг азоби...— Макар гапираман деб қалқиб кетай деди, икки марта йўталиб гапини наридан-бери тугатди:— Кўзингни шартта танғиб, соқолингни ёдакасига қирсанг ҳам арзигудек! Айтмоқчи, каллаи саҳарлаб нима қилиб юрибсан? Ўйингда бир бало бўлдими? Кондрат фалажга дучор бўлгани йўқми ишқилиб?

— Йўқ, у соғ-саломат. Мен ёлғиз ўзим эмас, сенга олтита аёл арз билан келдик.

— Қандай арз билан?

— Индинга эрларимизни сен партиянгга қабул қиласан, биз ўша кунга мактабни саришта қилиб қўймоқчимиз.

— Ўзларингизнинг эсларингизга келдими ёки эрларингиз айтдими?

— Ҳа, нима, бизнинг ақлимиз калтами? Сен бизни унчалик ерга урма, ўртоқ Нагульнов.

— Хўп, дуруст, ўзларингизнинг эсларингизга келган бўлса — яхши бўпти!

— Ичкари-ташқарисини суваб, оқламоқчимиз.

— Жуда ҳам яхши иш! Тўла-тўқис маъқуллайман, лекин шуни билиб қўйингларки, бу иш учун сизларга меҳнат куни ёзиб бермаймиз. Бу — жамоат иши.

— Ўз ихтиёrimiz билан қилмоқчимиз-у, меҳнат кунига бало борми? Лекин сен бригадирга айтиб қўйсанг, бизни бошқа ишга ҳайдамаса. Биз олти кишимиз, қофозга ёзиб қўй.

— Бригадирга айтаман-у, аммо ёзиб ўтиришнинг ҳожати йўқ, сизларсиз ҳам бюрократизм билан ҳар қандай қофозбозлик ошиб-тошиб ётибди.

Майданникова ўрнидан турди, бир оз жим тургач, Макарга қия қаради-да, оҳиста жилмайди:

— Менинг эрим тентаклика сендан қолишмайди, ошиб тушади... Одамларнинг галига қараганда, у ҳозир далада худонинг берган куни соқолини қирар-

миш, уйга келса — қўйлакларини кийиб кўради... Кўйлаги бори-йўғи учта-ю, роса бошимни қотиряпти, гоҳ бирини, гоҳ иккинчисини кийиб кўради, якшанба куни қайси бирини кийиб бораман, деб тажанг... Мен унга кулиб: «Сен эрга тегаётган қизга ўхшайсан» дейман. Унинг қаттиқ жаҳли чиқади. Жаҳли чиқади-ю, сир бермайди. Лекин баъзан уни мазақ қила бошлиласам дарров кўзларини сузиб олади, мен ҳам биламанки, ҳозир оғзидан чакки сўкиш чиқади, унинг таъбини тирриқ қилгим келмай чиқиб кета қоламан...

Макар илжайиб, кўзлари мулойимлашди.

— Эринг учун бу иш қиз боланинг эрга тегишидан кўра муҳимроқ, жоним. Тўй деган нарса — арзимас бир гап! Никоҳ ўтди, уйга қараб кетди, деганларидек, иш шу билан тамом, вассалом, партия бўлсанчи, бу шундай нарсаки, қизалоқ... хуллас, шундай нарсаки... Лекин сен бари бир ҳеч нимани тушунмайсан! Сен партиявий мулоҳазалар билан тушунчалар борасида худди карам шўрвада сузиб юрган суваракдек юзада юрасан, сен билан беҳуда гап сотиб, ҳавончада сув янчиб нима қилдим? Хуллас, партия — бу жуда улуғ иш, бу менинг охириги сўзим. Тушундингми?

— Тушундим, Макарушка, лекин сен айтиб қўйсанг, бизга ўн аравача тупроқ олиб келиб беришсин.

— Айтаман.

— Деворларни оқлашга бўр ҳам.

— Айтаман.

— Лой қоришга бир жуфт от билан болалардан ҳам юборинглар.

— Бўлмаса сенга Ростовдан ўн чоғлиқ сувоқчи ҳам олдириб келиб бера қолайлик? — дея истеҳзо билан сўради Макар устарани йироқ тутиб, Майданиковага худди, бўридек бутун гавдаси билан ўгириларкан.

— Сувоқни ўзимиз қиласиз, от берасан, бўлмаса якшанбагача тутатолмаймиз...

Макар хўрсинди:

— Сиз хотинлар, яхши одамларнинг бўйнига ми-ниб олишни яхши кўрасизлар... Хўп, майли, от ҳам

берамиз, ҳамма нарсани муҳайё қиласиз, лекин, худо ҳақи, тезроқ кет! Мен сенинг касофатингдан яна икки жойимни кесиб олдим! Сен билан яна икки минутча гаплашадиган бўлсам — танамда соғ жой қоладиганга ўхшамайди. Тушундингми?

Макарнинг мардона овозида шу қадар илтижо бор эдики, Майданникова дарров ўгирилиб: «Хўп, хайр!» деди-да, чиқиб кетди. Бир лаҳзадан кейин эшикни яна очди:

— Мени кечир, Макар...

— Яна нима дейсан? — энди Макарнинг овозида ошкора ғижиниш оҳангидан янгради.

— Сенга раҳмат айтиш эсимдан чиқибди.

Эшик тақиллаб ёпилди. Макар сапчиб тушиб устарани яна терисига ботириб олди.

— Сенга, яъни сизларга раҳмат, жин урган тентак. Менга раҳмат айтишнинг ҳожати йўқ! — дея қичқирди унинг орқасидан ва анчагача сассизгина кулиб турди.

Шу арзимас нарса ҳам ҳамиша шиддатли Макарнинг чеҳрасини шундай очиб юбордики, ҳар гал Кондратнинг хотини келганини, унинг bemavrid айтган «раҳмат»ини эсларкан, кечгача ўз-ўзидан жилмайиб юради.

* * *

Кунлар жуда ҳам очиқ, офтоб чиққан ва шамол эсмас эди. Якшанба куни кечга яқин ҳафсала билан оқланган мактаб сиртдан чақмоқдек бўлиб турар, ичкарисида эса ғишт парчаси билан қиртишланиб ювилган поллари шу қадар покиза эдики, мактабга кириб қолган ҳар бир киши беихтиёр оёқ учида юргиси келар эди.

Очиқ партия мажлиси кечқурун соат олтига таинланган, аммо тўртданоқ мактабга юз элликдан ортиқ одам йиғилиб, деразалар билан эшиклар ланг очиб қўйилган бўлишига қарамай, дарҳол ҳамма синфларда ҳам аччиқ ва ўтқир қўл бола тамаки ҳиди, эркакларнинг спиртдек ўтқир тер ҳидлари, ясанибтусаниб ғуж бўлиб турган хотин-халаж ва қизлардан арzon элик, совун ҳиди анқимоқда эди.

Гремячий Логда партияга янги аъзолар, бунинг устига яна ўз ҳамқишлоқларидан аъзолар қабул қилиш юзасидан илк бор очиқ мажлис ўтказилмоқда, шунинг учун ҳам соат олтиларда, болалар билан ётган касаллар мустасно, бутун Гремячий Лог мактабга ва унинг олдига тўпланган эди. Даштда, даладаги қўшхоналарда ҳеч ким қолмаган, ҳамма хуторга тушиб келган, ҳатто хутор подачиси Агей бобо ҳам подани подачи болага ташлаб, соқолини ҳафсала билан тараб, жуда эски, тик қўнжли қадимий этик кийиб келган эди. Гаврони билан ёнбошидаги каноп халтасини ташлаб, ҳафсала билан ясанганидан қиёфаси шундай бошқача бўлиб кетган эдики, кўпгина кекса казаклар уни биринчи кўришда таниёлмай, келгинди бир нотаниш билан саломлашгандек саломлашардилар.

Худди соат олтида Макар Нагульнов қизил сатин алвон ёпилган стол орқасида туриб, парталарда қатор-қатор бўлиб зич ўтирган ва оралиқларда тиқилиб турган колхозчиларни кўздан кечирди. Бўғиқ ғалавовур, энг охирги қатордаги аллақайси чинқироқ хотиннинг кулгиси эшитилиб турарди. Шундан сўнг, Макар қўлини баланд кўтарди:

— Қани, бақироқлар билан айниқса хотин-халаж бир оз жим бўлинглар! Мумкин қадар тинчликни сақлашларингизни илтимос қилиб, ВКП(б) Гремячий ячейкасининг очиқ партия мажлисини очиқ деб ҳисоблайман. Сўз ўртоқ Нагульновга, яъни менга. Кун тартибимизда битта масала: партияга янги аъзоларимизни қабул қилиш масаласи. Бизга бир неча дона ариза гушди, шу жумладан — ҳамқишлоғимиз Кондрат Майданниковдан, сизлар уни беш қўлингиздек яхши биласизлар. Аммо қоидага кўра партия устави уни муҳокама қилишимизни талаб қиласди. Ҳаммадан, партиялilarдан ҳам, партиясиз бошқа ўртоқлар билан гражданлардан ҳам Кондратни хоҳ «ёқлаб», хоҳ «қарши», кўнглидаги бор гапини айтишини илтимос қиласман. Қарши фикр айтиш эътиroz дейилади. «Ўртоқ Майданниковга қарши эътиroz билдираман» дейилади. Ана шундан кейин Майданниковнинг нима учун партияга муносиб эмаслигини

исботлайдиган фактларни ўртага ташлайсан. Бизга қоралайдиган фактлар керак, биз фақат шунақаларнигина инобатга оламиз, нуқул, гап чайнаб, факт келтирмай бирорни фийбат қилиш—расво иш. Биз бунаقا эзма-чурукликни эътиборга олмаймиз. Дастрраб мен Кондрат Майданниковнинг кичкина аризасини ўқиб бераман, кейин у ўз таржимаи ҳолини, яъни ўзининг ўтмишдаги, ҳозирдаги ва келажакдаги турмуши тўғрисида гапириб беради, ана ундан кейин Майданников ўртоғимиз вожидан ҳар қайсиларингиз баҳоли қудрат гапираверинглар. Масала равшанми? Равшан. Демак, бошлаймиз, яъни аризани ўқийман.

Нагульнов аризани ўқиб берди, бир варақ қофозни столда текислаб, унга сербар вазмин кафтини босди. Ўқувчилар дафтаридан йиртиб олинган бу бир варақ қофоз Кондратни кўп туналар уйқудан қолиб, машақат билан ўй суришга мажбур қилган эди... Ҳозир ҳам Кондрат аҳён-аҳёнда гоҳ стол орқасида ўтирган коммунистларга, гоҳ партада ўтирган қўшниларига ўзига хос бўлмаган журъатсизлик билан қараб-қараб қўяркан, шу қадар ҳаяжонланардики, пешанасида йирик-йирик тер доналари пайдо бўлиб, юзига худди ёмғир келиб қуйилгандек эди.

У қийналиб сўз қидира-қидира, анчагача индаёлмай қолиб, қовоғини солиб ва айни вақтда аянчили тарзда базўр илжайиб бир неча сўз билан ўз ҳаётини гапириб берди. Любишкиннинг сабри чидамай қаттиқ гапириб юборди:

— Турмушингдан нега бунча ор қиласан? Нега бунча тизгинлаб қўйилган отдек ер чизасан? Сенинг турмушинг чакки эмас, дадил шигиллатавер, Кондрат!

— Мен бор гапимни айтдим,—дея оҳиста жавоб берди Майданников қунишиб ўтиаркан.

У ўзини бамисоли яланғочлигича ҳаммом сингари иссиқ хонадан аёзга чиқиб қолгандек ҳис қилмоқда эди.

Бир оз давом этган жимлиқдан сўнг Давидов ўрнидан турди. У ўз меҳнати билан бошқа колхозчиларга ибрат бўлаётган Майданников ҳақида қисқа, аммо қизғин гапирди, уни бошқаларга ўрнак қилиб кўрсатди, сўзининг охирида ишонч билан деди:

— Партиямиз сафида бўлишга мутлақо муносиб, факт!

Яна бир неча киши сўзга чиқиб Майданников ҳақида самимият ва хайриҳоҳлик билан гапирди. Уларнинг сўзларини маъқулловчи хитоблар билан бўлиб туришди.

— Тўғри!

— Тадбирли деҳқон!

— Колхоз манфаатини кўзлайди.

— У жамоатнинг бир тийинини ҳам йўқотмайди, борди-ю, бир тийинини йўқотса — икки тийин қилиб бутлаб қўяди.

— Уни ёмон деб бўлмайди, бунга ҳеч ким ишонмайди ҳам!

Ҳаяжонидан оқариб кетган Кондрат ўзи ҳақида анчагина хуш ёқадиган сўзлар эшитди, назарида, ий-филгандарнинг ҳаммаси унинг ҳақида яқдил бир фикрда эди. Аммо шу орада Шчукарь бобо ўрнидан осойишта эмас, салчиб турди-да, галира бошлади:

— Қимматли гражданлар ва кампирлар! Кондратни мутлақо инкор қиласман! Мен бошқаларга ўҳшаган эмасман, менга дўстлик ўз йўли билану ҳар ким аравасини ўзи тортиши керак. Мен шунаقا одамман! Бу ерда Кондратни шундай таърифлаб-тавсифлаб юборишиди, одам эмас, авлиёйи олам қилиб юборишиди! Қани айтинглар-чи, гражданлар: у ҳам бизга ўҳшаган ёзиқли бўлса, ундан қандай қилиб авлиё чиқиши мумкин?

— Сен одатдагидек гапни яна чалкаштиряпсан, бобо! Биз уни жаннатга эмас, партияга қабул қиляпмиз-ку,— ҳозирча чолнинг гапини яхшиликча тузатди Нагульнов.

Аммо Шчукарь бобо бир луқма биланоқ элга келиб, тилини тия қоладиганлардан эмас эди. У бир кўзини жаҳл билан чақнатганча Нагульновга шарт ўгирилди—иккинчи кўзи кўпдан бери ювилмаган қизил дастрўмол билан танғиб қўйилган эди.

— Хаҳ, яхши одамларга зуғум қилиб, сиқиқقا олишга хўп чечансан-да, Макарушка! Сен фақат жувозхонада пресс ўрнида ишлаб кунгабоқар ёғини сиқиб чиқарсанг дуруст экан... Хўш, нега менинг оғ-

зимга уриб, гапиргани қўймайсан? Сенинг тўғрингда гапираётганим йўқ-ку, сени инкор қилаётганим йўқ-ку? Ҳа, жим ўтири, чунки, партия, танқид билан ўз-ўзини танқидни зўр бериб авж олдириш керак, деб қўрсатма беряпти. Ўз-ўзини танқид дегани нима дегани? Бизнинг тилимизда — бу ўз билгича танқид қилиш дегани бўлади. Бу нимани билдиради ўзи? Шуни билдирадики, сен одамни хоҳлаган жойидан ушлаб, албатта, эт-этидан ўтиб кетгунча қаттиқ чимчилашинг керак! Итваччани шунаقا чимчилаки, бошдан-оёқ қора терга тушиб кетсин! «Ўз-ўзини танқид» деган сўз шуни билдиради, мен шундай деб тушунаман.

— Тўхта, бобо! — дея қатъият билан унинг сўзини бўлди Нагульнов.— Сен сўзларни кўнглингга келганча бузаверма! Ўз-ўзини танқид — ўзини ўзи танқид қилиш, дегани бўлади, шунаقا дегани бўлади. Колхоз мажлисида сўзга чиқсанг хоҳлаган жойингни хоҳлаганингча чимчилайвер, ҳозирча тилингни тийиб, жим ўтири.

— Йўқ, ўзинг тилингни тий, менинг танқидимни қайтадан оғзимга тиқма! — қизишиб чинқирди Шчукарь бобо.— Жуда ақлинг кўпайиб кетибди, Макарушка! Нима жин уриб энди мен ўзимни беҳудадан беҳудага ерга урарканман? Нима учун ўзимга ўзим туҳмат қиларканман? Совет ҳокимияти даврида аҳмоқлар қолмаган!.. Эскилари қолмагану янгидан туғилганларининг сон-саноғи йўқ! Совет ҳокимияти даврида уларни экиб-тикиб ўтиришмайди, ўзларидан ўзлари худди ғўдра жавадардек патира-путур кўпайиб кетишяпти, шунаقا кўпайиб кетишяпти, сира эви йўқ. Мана, чунончи, ўзингни олиб кўрайлик. Макарушка...

— Сен менга тақилма, бу ерда менинг тўғримда гап кетаётгани йўқ,— деди жиддийлик билан Нагульнов.— Сен асосий муддаонгни, Кондрат Майданников ҳақида гапир, башарти, айтадиган гапинг бўлмаса тилингни тийиб, ажабтовур одамларга ўхшаб жимгина ўтири.

— Сен ажабтовуру мен ажабтовур эмас эканманла? — ғамгинлик билан сўради Шчукарь бобо.

Шу орада орқадаги қаторда ўтирган аллаким йўғон овоз билан гапирди:

— Сен, ажабтовур бобо, ўзинг ҳақингда гапириб берсанг бўларди, қариган чоғингда кимдан бола ортиридинг-у, нима учун бир кўзинг соғ қолиб, иккинчи кўзинг мўматалоқ бўлиб кетган? Бўлмаса четанга чиқиб олган хўроздек бирорларга жангарилик қиласан-у, ўз тўғрингда фиқ этмайсан, муғамбир шайтон!

Мактаб бўйлаб гулдираган кулки кўтарилди, Давидов ўрнидан туриши билан тиниб қолди. Давидовнинг юзи тунд. Гапира бошлаганида овозида ғазаб янгради:

— Бу ер, ўртоқлар, кўнгил очар томошахона эмас, партия мажлиси, факт! Қимнинг хушчақчақлик қиласи келаётган бўлса, сайилгоҳга борақолсин. Сиз муддаога кўчасизми, бобожон, ё бу ёғига ҳам сафсатабозликнинг пайидан бўлмоқчимисиз?

Давидов Шчукарга илк бор ана шундай қаттиқ дашном берувчи эҳтиром билан мурожаат қилиши эди. Шу сабабдан бўлса керак, Шчукарь бобонинг мутлақо жини қўзиб кетди, парта орқасида тик турганча, юлқилашишга тайёр жўжа хўроздек бир сапчиб қўйди, ғазабидан ҳатто соқоли ҳам титраб кетди:

— Сафсатабозлик қилаётган ким ўзи? Меним ёки орқамда ўтириб олиб менга аҳмоқона саволлар берадётган эси пастми? Бу қандай очиқ мажлис бўлдики, одам сўзини очиқ айта олмаса? Мени ким деб ўйлајпизлар? Сайлаш ҳуқуқидан маҳрум бўлган одамманми? Мен Кондрат ҳақида гапиряпман, уни инкор қиласман Бундайлар партиямиз учун керак эмас, бор гапим шу!

— Нима учун, бобо? — қотиб-қотиб кулганча сўради Размётнов.

— Чунки, у партияда бўлишга номуносиб. Нега куласан энди, олакўз? Ердан тугма топиб олдинг-у, рўзгоримга яратаман, деб терингга сифмай кетяпсанми? Агар Кондратнинг нима учун партияга номуносиб эканлигини тушунмаётган бўлсанг, мен сенга қатъиян шундай тушунтириб қўйманки, шундан кейин сен сулига анқайган ахтадек тиржаймай қола-

сан... Бироларга ройкорчилик қилишга чечансизлар, ўзларинг-чи? Сен қишлоқ советининг раисисан, каттакон одамсан, сендан катта ҳам, кичик ҳам ибрат олиши керак, хўш сен ўзингни қандай тутяпсан? Мажлисда аҳмоқона тиржайиб лунжингни шиширасан, куркага ўхшаб кўкарасан! Ўзинг қанақа раиссан, кулгига бало борми, ахир Кондратнинг тақдири тарозининг палласида лопиллаб турибди-ку! Қани, миянгни бир ишлат-чи; бизлардан қайси биримиз жиддийроқ эканмиз, сенми ёки менми? Афуски, йигитча, Макарушка гапираётганимда унинг луғатидан ёдлаб олган турли-туман ажнабий сўзларни қистиришимни тақиқлаб қўйган, бўлмаса сени ўша сўзлар билан шунақанги кўмиб ташлардимки, нима тўғрисида нима деяётганимни ўла-ўлгунингча ҳам тушунолмай гаранг бўлардинг! Кондратнинг партияга олинишига шунинг учун қаршиманки, у майда хусусий мулкчи, агар уни пресс тагига қўйиб сиқсаларингиз ҳам ундан бошқа иш чиқмайди! Ундан, турп, яъни китобий қилиб айтганимизда, кунжара чиқса чиқар-у, коммунист чиқмайди — ўла қолса ҳам чиқмайди!

— Нима учун мендан коммунист чиқмайди, отахон? — деб сўради Кондрат аламидан титраган овоз билан.

Шчукарь бобо истеҳзо билан кўзларини сузди:

— Гўё ўзинг билмайсан-а?

— Билмайман, менга ҳам, бошқа гражданларга ҳам яхшилаб тушунириб бер,— мен нима сабабдан номуносибман? Ўзинг тўқиб чиқарган гапларни аралаштирумай, очиқ-оидин ҳақиқатни айтиб бер.

— Мен бирон марга ёлғон гапирганмидим? Ёинки, чунончи, ҳар хил уйдирмалар тўқиб чиқарганмидим? — Шчукарь бутун мактабга эшилтирганча хўрсиниб, ҳасрат билан бошини чайқаб қўйди.— Умрим бино бўлибдики, сурункасига яхши одамларнинг юзига фақат очиқ ҳақиқатни айтиб келяпман, шу сабабдан, Кондратушка, бу дунёдаги баъзи одамларга хуш келмайдиган алимент бўлиб қолганман. Раҳматли отанг: «Шчукарки ёлғон гапираётган бўлса, унда ким рост гапиради?» дегувчи эди. Раҳматлик мени шуна-

қа кўкларга кўтартувчи эди! Афсуски, ўлиб кетган, бўлмаса ҳозир сўзларини таъкидларди жонинг жаннатда бўлгур!

Шчукаръ чўқинди, ёш ҳам тўкмоқчи эди, аммо нима учундир ниятидан қайтди.

— Сен менинг ҳақимдаги гапни очиқ-оидин айтиб бер, бунга отамнинг дахли йўқ. Мени хусусан нимада айблайсан?— дея қатъият билан талаб қилди Майданников.

Айрим хитобларга қараганда бусбутун Шчукарга қаратилган вазмингина норозилик садолари унинг пинагини ҳам бузолмади. Безовта қилинган каттакон болари оиласининг ғўнфир-ғўнфирига bemalol қулоқ солиб турадиган асаларичиларга ўхшаб Шчукаръ бунда ҳам ўзини тийиб, мутлақо хотиржам тутди: қўлларини мулоиймгина, осойишталик билан чўзиб гапирди:

— Ҳозирнинг ўзида ҳаммасини тушунтириб бераман. Сизларнинг ҳам, гражданлар ва қимматли кампирлар, ғала-ғовурларингиз ўzlарингизга ҳавола, мени бари бир фикрларимнинг маромидан чалғитолмайсизлар. Шу топда орқада менинг шаънимга илоннинг вишиллашига ўхшаш: «мушук бекор қолса...» дегандек ғайрий ва ҳоказо расво гаплар пицирлаб айтилди орқамдан. Аммо бу илонча вишиллашнинг кимга мансублигини яхши биламан. Жаҳаннамдан чиққан ашаддий илонга ўхшаб менга вишиллаётган Агафон Дубцов, қимматли гражданлар ва кампирлар! Унинг тўғрисида оғиз очмаслигим учун менинг ҳушимни оғдириб, фикримдан чалғитмоқчи. Мендан бундай марҳаматни кутмай қўяқолсин, хомтама бўлмасин! Агафон ҳам сут ичиш учун ергўлага киришнинг пайдан бўлган ўқ илондек партияга кириб олиш пайида, аммо мен бугун уни Кондратни инкор қилганимдан ҳам баттар инкор қиласман, мен унинг тўғрисида ҳам шундай гапларни биламанки, эшитсаларингиз ҳаммаларингиз ҳам ҳанг-манг бўлиб қоласизлар, баъзи бирорвларнинг эси оғиб қолса ҳам ажаб эмас.

Нагульнев бўш стаканни қалам билан чертиб, жаҳл билан гапирди:

— Ҳой, чол, сен ўзингнинг чалкаш фикрингдан

чалғиб кетдинг, гапингни тамомла! Боядан бери мажлисда бигта ўзинг гапирасан, инсоф ҳам керак-да!

— Яна оғзимга урятсанми, Макарушка? — йифламсирагандек зорланди Шчукарь бобо.— Ячейка секретариман деб мени бўғаверасанми? Ҳей, овора бўласан! Партиянинг уставида, чолларнинг гапириши тақиқлансин, деган модда йўқ, мен буни аниқ биламан! Мени инсофсиз дейишга қандай тилинг борди? Лушканг сени ташлаб барини тутқизмай номаълум юртларга кетиб қолмасдан бурун, инсофни ўшанга ўргатсанг бўларди, менга ҳатто кампирим ҳам, уятсизсан, деган эмас. Сен ёмон дилимни оғритдинг, Макарушка!

Шчукарь ҳар қалай, атаб қўйган кўз ёшини бари бир тўқди, кўзини кўйлагининг енги билан артиб, гапини аввалги шиддати билан давом эттириди:

— Мен ким кўрингандан андиша қилиб тилимни тишлиб кетаверадиган одам эмасман, мен ёпиқ партия мажлисида ҳам сенга ёпишмагдан қўймайман, таъзиiringни бермасдан қўймайман. Макарушка, шундай таъзиiringни бераманки, қўлимдан соғ қутилиб чиқолмайсан, мени ким деб ўтирибсан ҳали! Мен жўйсам ёвқур бўлиб кетаман, буни ҳар ким билмаганда ҳам сен билишинг, пайқашинг керак эди, ахир биз сен билан қадрдон дўстмиз-ку, буни бутун хутор билади. Дўст бўлганда ҳам қадрдон дўстмиз, шунинг учун менинг ўзимдан ҳам, танқидим билан ўз-ўзини танқидимдан ҳам мутлақо эҳтиёт бўл! Мен ҳеч кимга муруват қилмайман, буни партияга иснод келтирмоқчи бўлганларнинг ҳаммаси бўркида билиб қўйсан!

Нагульнов чап қошини чимириб, Давидовга ўгирildi-да, шивирлади:

— Уни чиқариб юборайлик-а? Мажлисни барбод қиласди! Уни бугун бирон ёққа жўнатиш эсингга келмаганини қара-я! Ён қайиш чолнинг думи тагига тушиб қолдими, энди шаталоқ отганча олиб қочаверади...

Давидов эса чап қўлидаги газета билан юзини тўсиб, ўнг қўли билан кўз ёшини артди. У кулгининг зўридан гапиролмас, фақат бошини чайқар эди. Қаттиқ ўкиниб ич-этини еяётган Нагульнов елкасини қисиб, яна Шчукарь бобога нафратли кўзларини тикди.

У эса худди ҳеч нарса бўлмагандек нафаси тиқилган-ча ҳовлиқиб, гапини давом эттиарди:

— Бизнинг мажлисими очиқ мажлисми, сен ҳам, Кондратушка, очиқ айтишинг керак: сен колхозга кириб ўзингнинг бир қўш хўқизингни колхозга топшириш учун ҳайдаб келаётганингда уларни кўзинг қиймай йиғлаганмисан, ё йиғламаганмисан?

— Бу саволнинг масалага дахли йўқ!— деб қичқирди Демка Ушаков.

— Бекорчи савол! Сен бу ерда нега беҳуда тухум пўчоқ титкилаяпсан?— уни қувватлади Устин Рикалин.

— Йўқ, тухум пўчоққа ўхшаган беҳуда савол эмас, мен астойдил сўраяпман! Сен валламатлар ҳам овозингни ўчир!— дея уларнинг овозини босиб тушишга тиришиб кучанидан қизарганча бақирди Шчукарь бобо.

Жимлик чўккач, осойишта ва мулойимгина гапира бошлади:

— Эсингда бўлмаса, Кондратушка, менинг эсимда бор, эрталаб ҳўқизларингни жамоат қўрасига ҳайдаб келаётганингда кўзларинг соққадек бўлиб, худди товшоннингми, ёнки чунончи уйқусираб турган қари теватнингми қўзидек қип-қизариб кетган эди. Сен тавба-тазарру вақтида худди попга жавоб бергандек жавоб бер: шундай бўлганми?

Майданников ўрнидан турди. Хижолат билан кўйлагининг этагини тортиб тузатди, хира босган кўзлари билан Шчукарь бобога қараб қўйди-да, аммо вазмин қатъият билан жавоб берди:

— Шундай бўлган эди. Яширмайман, йиғлаб олган эдим. Кўзим қиймаган эди. Менга бу ҳўқизлар отамдан мерос қолган эмас, уларни меҳнат-машақ-қат билан топганман. Мен бу ҳўқизларни осонлик билан ортирган эмасман! Бу ўтиб кетган гап, отахон. Менинг бир вақтлардаги кўз ёшимнинг партияга нима зарари тегар экан?

— Нима зарари тегар экан?!— тувақди Шчукарь.— Сен ҳўқизларингни қаёққа олиб кетаётган эдинг? Сен жоним, социализмга кетаётган эдинг, уларни шу ёққа олиб кетаётган эдинг! Бизда социализмдан кейин нима бўлади? Тўла-тўқис коммунизм

бўлади, шундай бўлади, сенга гапнинг лўндасини айтсам! Мен Макарушка Нагульновнинг уйидан одам бўлиб чиқдим десам ҳам бўлади, бу ерда кимки ўтирган бўлса, ҳамманглар ҳам яхши биласизларки, биз у билан қалин дўстмиз, мен ундан ҳовучимга сиққанча ҳар хил билимларни олиб симирияпман: кечалари билан сурати йўқ, жиддий, турли-туман йўғон китобларни ўқиб чиқаман, гоҳ луғат ўқиб, китобий сўзларни ёдлаш пайдан бўламан, аммо бу важига келганда қуриб кетгур қарилигим панд беряпти! Хотирам худди чўнтаклари йиртиқ чолвордек бўлиб қолибди, ҳеч нарса турмайди, шув этиб тушиб кетади, вассалом! Борди-ю, қўлимга биронта юлқагина китобча тушиб қолгудек бўлса, ҳеч чиқиб кетолмайди. Ипидан иғнасигача эсимда сақлаб қоламан! Турли-туман ва ҳоказо мутолааларга киришсам мен шунаقا бўлиб кетаман! Мен турли-туман китобчаларни ўқиб чиққанман. Бизда социализмдан кейин коммунизм кириб келишини аниқ биламан, бу важига хоҳлаган киши билан уч товуқ ўтгунча баҳслашишга ҳам тайёрман, сўзим қатъий! Мана шу ерга келганда мен андиша қилиб қоламан, Кондратушка... Социализмга-ку кўз ёшингни селдек оқизиб кириб келган эдинг, коммунизмга қандай кириб борар экансан? Худди тиззангдан ёш кечганча кириб бўрадиганга ўҳшаб турибсан, бу ёфи худога ҳавола! Худди шундай қиласан, мен айтдим-қўйдим! Қани айтинглар-чи, гражданлар ва қимматли кампирлар, бунаقا йиғлоқиларни партиядагилар бошларига уришадими?

Бобо хушчақчақлик билан ҳиринглаб, кафти билан тиҳсиз оғзини тўсади.

— Мен ҳар хил бадқовоқ одамларни жуда ёмон кўраман, партияда бўлса-ку мутлақо! Хўш, бундай минғаймасларнинг партияга нима кераги бор? Яхши одамларнинг диққатини ошириб, ўзларининг турқлари билан партиянинг уставини бузиб, хира қилиб туришлари учунми? Ундай бўлса менга айтинглар-чи: унда нима учун Демид Индамасни партияга олмайсизлар? Сизларнинг сафларингиздагиларни ўлгудек диққат қилиб юбориш керак бўлса, ўша диққат қилиб юборарди! Мен умрим бино бўлиб, ундан баттар тунд

одамни кўрган эмасман! Менингча, партияга менга ўхшаш хушчақчақ, руҳни кўтарадиган одамларни қабул қилиш керак, бўлмаса унга яккаш тунд, алла-қандай тил билмасларни териб олишади, улардан нима фойда? Мана, чунончи, Макарушкани олиб кўрайлик. У ўн саккизинчى йилда худди хода ютгандек ғўдайиб олганидан бери, ҳозиргача ҳам ботқоқда юрган турнадек сиполик билан керилиб, тунд бўлиб юрибди. Ундан на ҳазил-мазагу, на бир оғиз хушчақчақ сўз эшитасан, одам эмас, чоловор кийгизиб қўйилган дикқатбозликнинг ўзи!

— Бобо, сен менга тақилма, менинг шахсимга тегма, бўлмаса мен чора кўришим мумкин,— жиддият билан огоҳлантириди Нагульнов.

Аммо чол нутқбозлигини тийиб ололмай, ҳузур билан жилмайганча гапини қизғин давом эттиради:

— Мен сенга мутлақо тегаётганим йўқ, мана шунчагина ҳам тегаётганим йўқ! Қуриб кетмагур Кондратимиз қаламни миниб олгандек физиллатгани-физиллатган: худди ундан бошқа ёзадиган одам топилмайдигандек яккаш ёзгани-ёзган, ҳисоблагани-ҳисоблаган. Москвадаги ақлли одамлар ҳамма гапни аллақачоноқ қайта-қайталаб ёзиб кўчириб қўйишгандир, бекордан-бекорга бошни қотираверишнинг ҳожати ҳам йўқ! Унинг иши буқаларнинг думини бураш, у лақма бўлса Москвадаги ўтакетган саводхон одамлар пайдан бўлган ишнинг пайдан бўляпти... Менингча, бу ишларни ҳам азбаройи онгининг пастлигидан қилаётган бўлса керак, гражданлар ва қимматли кампирларим. Ҳозирча бизнинг Кондратнинг сиёсий онги ўсиб етмаган, ўсиб етишмаган экансан, бунга муяссар бўлмаган экансан, уйингда тинчгина ўтириб, ҳовлиқмасдан, аста-секин ўсиб етиш, ҳозирча партияга ҳам суқилма. Бу Кондрат аламдан ёрилиб кетса ҳам майлики, мен унга қатъиян қаршиман; уни мутлақо инкор қиласман!

Шу пайт бирдан Давидов қўшни синфдан Варя Харламованинг қалтираётган баланд овозини эшишиб қолди. Бу қизни анчадан бери кўрмаган, унинг қўкракдан чиқадиган ёқимтой овозини анчадан бери эшитмаган эди...

— Менга ҳам сўз берасизми?

— Бу ёққа чиқ, сени ҳамма кўрсин,— деб таклиф қилди Нагульнов.

Фуж бўлиб турган халойиқ орасидан дадиллик билан ёриб ўтиб Варюха-куюнчак стол олдига борди-да, офтобда қорайган қўлларининг учи билан гарданидаги сочини тузатди.

Давидов унга ҳайрат билан оҳиста қараб тура, жилмаяр ва ўз кўзларига ишонмас эди. Бир неча ой ичиди Варюха таниб бўлмас даражада ўзгариб кетган: йўқ, бу турган ўша қовушмаган қизалоқ эмас, турмакланган йўғон соч толимлари мовий дурра билан танғилган, бошини мағрур тутган ҳушқомат қиз, у президиум столига ярим бурилганча жимлик чўкишини кутар, навқирон кўркам кўзларини сузган одамлар боши оша қаёққадир тикмоқда эди. «Баҳордан бери жуда ҳам очилиб кетибди-ку!»— деб ўйлади Давидов.

Варюханинг бесаранжом кўзлари чарақлар, упани ҳам, эликни ҳам билмайдиган пушти юзи тердан йилтилламоқда эди. Аммо шу пайт ўзига тикилган кўпгина кўзларининг салобати босиб дадиллиги йўқолди: йирик қўллари титраганча уқали дастрўмолни фижимлади, юзи қип-қизариб кетди, Шчукарга қараб гап бошлар экан, мулоим овози ҳаяжондан қалтираб кетди:

— Ёлғон гапиряпсиз, буважон! Сиз ўртоқ Кондрат Христофорич Майданников тўғрисида ёмон гапиряпсиз, сизнинг, у партияга муносиб эмас, деган гапнингизга бу ердагиларнинг ҳеч қайсиси ишонмайди! Мен у билан бирга баҳордан бирга ер ҳайдадим, у ҳаммадан яхши, ҳаммадан кўп ер ҳайдади! У бутун кучини колхоз ишига беради, сиз бўлсангиз унга қарши чиқяпсиз... Ўзингиз қари одамсизу худди нораста гўдакларга ўхшаб гапиряпсиз!

— Боплаб адабини бер, Варька! Бўлмаса худди гўсаланинг бўйнига осиб қўйилган қўнғироқдек шангиллайвериб, бошқа одамларнинг яхши гапларини ҳам эшитолмайдиган бўлдик,— деди бамайлихотиргина йўғон овоз билан Павел Любишкин.

— Варька тўғри айтяпти. Колхозда Кондратнинг меҳнат куни ҳамманинг меҳнат кунидан кўп. У — меҳ-

натсевар казак!— дея гап қистирди кекса Бесхлебнов.

Кимдир йўлақдан майин хирқири овоз билан қичқирди:

— Агар Кондратга ўҳшаганлар партияга олинмайдиган бўлса, унда Шчукарь бобони ёзинглар! У бўлса колхоз дарров ривожга миниб кетади...

Аммо Шчукарь бобо аллақачонлардан бери таралмай паҳмоқ бўлиб кетган соқоли орасидан илжайганича, партя олдида қоқиб қўйгандек қимиirlамай турар, ҳатто гапираётгандарга ҳам қайрилиб қарамас эди. Жимлик чўккач, яна хотиржам гапирди:

— Варъка бу ерда мутлақо бўлмаслиги керак ҳам эди, чунки у балофатга етган эмас. У биронта омборхонанинг тагида қўғирчиқ ўйнаб ўтириши керак эди. Бу олаҳакка бўлса мендек донишманд чолларга ақл ўргатаман деб бу ерга етиб келибди. Турмуш эмас, майнавозликка ўҳшайди! Тухумлар товуқларга ақл ўргатадиган бўлиб қолишиди... Бошқаларга ҳам ўлайми: биттаси меҳнат кунлари ҳақида гап очиб, Кондратнинг меҳнат кунлари бир аравадан ортиб қолади, дейди... Қани менга айтинглар-чи: бунга меҳнат кунларининг нима дахли бор? У ҳам очкўзликдан, майда хусусий мулкчилар ҳамиша очкўз бўлишади, агар билмоқчи бўлсанглар, бу нарса тўғрисида Макарушка менга жуда кўп уқтирган. Яна бир аҳмоқ чиқиб қолди — Шчукарни партияга олсангизлар колхоз дарров ривожга миниб кетади дейди... Кулишнинг ҳам мутлақо ҳожати йўқ. Эси пастроқларгина бўлар-бўлмасга кулиб, ҳиринглашишлари мумкин. Мен саводхонманми? Мутлақо! Хоҳлаган нарсангни ўқиб бераман, bemalol қўл қўйман. Партия уставини маъқуллайманми? Жуда ҳам маъқуллайман! Программага қўшиламанми? Қўшиламан, унга қарши ҳеч қандай эътирозим йўқ. Социализмдан коммунизмгача қадамлаб эмас, ҳатто от чоптириб бора оламан, албатта, қарилигимга риоя қилиб, ҳаллослаб қолмаслик учун ҳовлиқмасданроқ от чоптираман. Мен аллақачон партияда равнақ топиб, шу вақтда портфель қўлтиқлаб юришим ҳам мумкин эди-ю, аммо қимматли кампирлар, худойи таолонинг даргоҳида иқрор қилгандек иқрор қилишим керакки, ҳозирча мен ҳам партиямиз-

га муносиб эмасман... Нима учун, айтинглар-чи? Шунинг учунки, қуриб кетгур дин мени мутаб питяғмол қилиб юборди! Қазоро осмонда момақалдироқ қаттиқроқ гулдираб қолса борми, мен дарров: «Худоё, мен ёзиқлини паноҳингда асрал!» деб шивирлайманда, шу заҳотиёқ чўқиниб, Исо алайҳисаломга ҳам, Биби Марямга ҳам, тўқнаш келиб қолган жамики азиз-авлиёларнинг ҳаммасига бир чеккадан сифинишга тушаман, момақалдироқнинг ваҳимасидан ҳатто чўнқайиб ўтириб қоламан.

Ўз ҳикоясидан таъсирланиб кетган Шчукарь бобо бу гал ҳам чўқинмоқчи бўлиб, ҳатто қўлини пешанасига олиб борди-да, вақтида ҳушига келиб, пешанасини қашиди-да, ийманганча ҳиҳилади:

— Ҳайтовур шунаقا бўлади... Кўз қўрқоқ бўлади, ичингда: «Жин урсин, Илья пайғамбарнинг ниятини ким билади дейсан! Эрмак учун чақмоғини қоқ мянингга санчиб қолса борми, узала тушиб жон таслим қиласвер Шчукарь». Менга бунинг сира ҳам ҳожати йўқ! Мен ҳали коммунизмгача, тотли турмушгача етиб бормоқчиман. Шунинг учун ҳам баъзан қисталанг келиб қолган пайтларда ибодат қиласман, беҳуда худонинг қаҳрини қўзғатиб қўймаслик учун попга бир танга келмайдиган майда пул ҳам қистириб қўяман. Шундай қилсам иш пухтароқ бўлади, деб ўйлайсан, аммо иш ўнгидан келадими, жин урсин, буни ҳеч ким билмайди... Сен аҳмоқ, поп менга омонлик тилаб, ибодат қиляпти, деб хаёл сурасан, аслини суриштирганда, ўлик одамга ғар хотин, ёинки, китобча таъбир билан айтганда, бордюр — ҳаммаси бир гап — қанчалик даркор бўлса, сен попга шунчалик даркорсан. Лаънати поп сенинг пулингни олиб, худога ибодат қилиш эмас, ароқ ичишнинг пайидан бўлади... Шу тариқа мен сизларга очигини тушунтиряпман; мен ўзимнинг иблисона диним билан партияга суқилиб нима қилдим? У меҳрибонимни ҳам, ўзимни ҳам, программани ҳам бузиб хира қилиш учунми? Йўқ, мени бундай гуноҳдан холи қўйинглар! Менга бунинг паққос ҳожати йўқ, қатъиян айтаман!

— Бобо, сен яна четга чиқиб кетдинг! — деб қичқирли Размётнов. — Йўлга бурил, четда санғима!

Унга жавобан Шчукарь огоҳлантираётгандек қўлини кўтарди:

— Мен гапимни ҳозир тамомлайман, Андрюшенька. Сен аҳмоқона хитобларинг билан мени чалғитма, бўлмаса мен бирон ердан бориб чиқолмайман. Сен жимгина ўтириб ақлли гапларни қулоғинингга қўйиб ол, булар сенга келажакда иш беради. Мен ҳеч вақт беҳуда гапирмайман, мен ундаи қилмайман, сен билан Макарушка икковларингиз клиросдаги дъяконга луқма ташлагандек менга навбатма навбат луқма ташляяпсизлар, ўз-ўзидан маълумки, мен чор-ночор фикрларимнинг маромидан чалғиб кетяпман. Хуллас, сизларга айтсан: мен коммунизмга бари бир ҳатто партиясиз бўлсан ҳам етиб оламан — кўз ёшлари шашқатормана бу Кондратга ўхшаб эмас, хушчақчақлик билан, ўйин тушганча етиб оламан, чунки мен — майда хусусий мулкчи эмас, чинакам пролетарман, мен сизларга гапнинг лўндасини айтяпман! Пролетариат бўлса, бир жойда ўқиган эдим, кишан-занжирларнигина йўқотади, холос. Менинг, албатта, бир вақтлар теватимни боғлаб қўядиган эски занжиримдан бошқа занжирим йўқ, у бадавлатлик вақтимдан қолган, аммо кампирим бор, бу, биродаргиналарим, ҳар қандай кишан занжиру сургундагиларнинг кундаларидан ҳам баттар... Аммо мен кампиримни ҳам йўқотмоқчи эмасман, ҳузуримда яшайверсин, майли, борди-ю, у менга тўсқинлик қилиб, менинг коммунизмга қараб кетаётган тўппа-тўғри йўлимга тўғаниқ бўладиган бўлса, мен унинг ёнгинасидан шундай физиллаб ўтиб кетиб қоламанки, ҳанг-манг бўлишга ҳам улгуролмай қолади. Бу важига хотиржам бўлаверинглар! Мен жўшсам ниҳоятда ёвқур бўлиб кетаман, бунаقا пайтларда йўлимга ҳеч ким тўсиқ бўла кўрмасин! Ё босиб-янчиб ўтиб кетаман, ё ёнгинасидан шундай физиллаб ўтиб кетаманки, ҳеч ким ҳанг-манг бўлолмай ҳам қолади!

— Бобо, тугат, сени сўзлашдан маҳрум қиламан! — деди Нагульнов, қатъий, кафти билан столни уриб.

— Ҳозир тамомлайман, Макарушка! Қаттиқ тақиллатма, кафтинг лат еб қолади. Хуллас, айтаманки, башарти барчаларингиз Кондратни ёқлаётган экан-

сизлар, мен ҳам қаршилик билдирамайман, худо ўзи сизларга ёр бўлсин, уни партиямизга қабул қилақо-линглар. У боодоб, меҳнатсевар йигит, мен буни ҳамиша айтиб келганман. Агар тўғри мулоҳаза юритсак, илидан иғнасигача суриштирсак, Кондрат албатта партиямизда бўлиши керак. Мен буни сизларга қатъий айтаман. Хуллас, Кондратушка партияли бўлишга мутлақо муносиб. Шу билан гапим тамом!

— Гапингни фотиҳасини ўқишдан бошлаб, умр ти-лаш билан тамомладингми? — деб сўради Размётнов.

Аммо умумий қаҳқаҳа орасида унинг сўзларини деярли ҳеч ким эшифтади.

Ўз нутқидан мамнун Шчукарь бобо ҳорғинлик билан скамъяга ўтириди-да, тер босган ёрғоқ бошини енги билан артиб, ёнида ўтирган Антип Грачдан сўради:

— Роса... боплаб... танқид қилдимми?

— Сен артистликка кир, бобо,— жавоб ўрнига шивирлаб маслаҳат берди Антип.

Шчукарь қўшнисига ишонқирамай қия қаради, унинг қатрондек қоп-қора соқоли орасига яширинган табассумини пайқамай, сўради:

— Мен нима важдан ўша ишга киришим керак?

— Пулни курак билан, расмана курак билан эмас, қалоқ курак билан сидириб оласан! У ерда қиладиган ишинг — қамчини силтаб қўйишдан ҳам жўн! Қизиқ-қизиқ ҳангамалар билан одамларнинг кўнглини хушлайсан, ёлғонни дўндириб, кўпроқ мўъжиза кўрсатсанг бўлгани, қиладиган ишинг бор-йўқ шу бўлади, ҳам озода, ҳам сердаромад...

Шчукарь бобо хийлагина жонланиб, скамъяда ўти-ролмай қолди, илжайди:

— Ўргилиб кетай Антипушкагинам! Шуни билиб қўйки, Шчукарь ҳамма ерда ҳам йўлини топиб кетади! Сўзни беҳуда кетказмайди, тўппа-тўғри нишонга уради, мўлжалдан янглишадиган хилидан эмас! Нима деб ўйлайсан? Қарилик узил-кесил тинкамга тегиб, ҳолим танг бўлганда артистликка киришим ҳам мумкин. Мен бунача ҳар хил бозингарликларга ёшлигимданоқ ўта эпчилик эдим, ҳозир бўлса-ку, мутлақо эпчиликман! Менга бу нарса пучақчалик ҳам эмас.

Чол тишсиз оғзи билан тамшаниб, хаёлида нима-нидир мулоҳаза қилиб, бир оз жим турди-да, сўнгра сўради:

— Одам ҳодис, эшиганинг йўқми, ҳар қалай! Ўша артистлик қилганларга қанча пул тўлашар экан? Ишбайми ёки бошқача йўл биланми? Хуллас, жон бошига қанчадан мояна тегаркан? Курак билан чақани ҳам сидириб олиш мумкин, зиқна одам учун чақа ҳам пул ўрнига ўтса ҳамки, аммо менга чақанинг мутлақо ҳожати йўқ.

— Қилиғинг билан муқомингга қараб тўлашади: эл олдида ўзингни қай тахлитда кўрсатишингга қараб тўлашади,— хуфия шивирлади Антип.— Қанча кўп қилиқ қилиб ликонгласанг шунча кўп мояна тегади. Улар еб ичишу шаҳарма-шаҳар кезиб юришдан бошқани билмайди, оғайнини. Уларнинг тирикчилиги жуда ҳам осон, қушдан ҳам енгил кун кўришади дейиш мумкин.

— Юр, Антипушка, қўрага чиқиб чекайлик,— дея таклиф қилди дарров мажлисдан ҳафсаласи пир бўлган Шчукарь.

Улар зич бўлиб турган халойиқ орасидан аранг ўтиб, синфдан чиқишиди. Четан тагидаги офтоб қиздирган ерга ўтириб, тамаки чекишиди.

— Дарвоқе, Антипушка, сен ўша артистларни ҳеч кўрганмисан?

— Жуда кўп кўрганман. Гродно шаҳрида ҳақиқий ҳарбий хизматни ўтаганимда уларни кўра-кўра тўйғанман.

— Хўш, улар қалай?

— Расмана.

— Этликкинами?

— Худди бўрдоқи тўнғизга ўхшашади!

Шчукарь хўрсиниб қўйди:

— Демак, озиқ-овқатлари қишин-ёзин узилмас экан-да?

— Маняргаб!

— Уларни топиб олиш учун қаерга бориш кепрак?

— Ростовга боришингга тўғри келади, уларнинг зоти ундан берироқда бўлмайди.

— Унча узоқ ҳам эмас экан... Бунақа осон пул то-пишнинг йўлини менга нега илгарироқ айтмаган эдинг? Мен, эҳтимол, аллақачонлароқ ишга ўрнашиб олармидим? Ўзинг биласан-ку, менинг осон ишга, ҳатто артистликка ҳам уқувим жуда зўр, чурра деган дардим туфайли ғаллакорликда оғир меҳнат қилолмайман. Сен мени ғанимат луқмадан маҳрум қилибсан-а! Сен одам эмас, ўтмас чопқисан!— деди қаттиқ ўқиниб Шчукарь.

— Гап уриниб келмаган эди-да,— деб ўзини оқларди Антип.

— Сен менинг аллақачон ақлимни киргизиб қўйишинг керак эди, қарабсанки, мен аллақачонлардан бери артистликнинг гаштини суриб ётган бўлардим. Ҳар гал кампиримни кўргани келганимда, яхши маслаҳат берганинг учун столингга тақ этиб ярим литрдан ароқ олиб келиб қўяр эдим! Мен ҳам тўқ, сен ҳам маст, ишлар қойил, олам гулистон бўлар эди... Эҳ, Антип, Антип!.. Сен билан биз шундай сердаромад бир ишни қўлдан бой бериб қўйибмиз! Шу бугуноқ кампирим билан маслаҳатлашишим керак экан, ажаб эмаски, пул топгани жўнаб қолсам. Давидов менга рухсат беради, пул орттирсам рўзғоримга яраб қолар: сигир состиб оламан, ўнтачагина қўй-қўзи, мечкай чўчқа оламан, шу билан ишларим бир оз барор олиб кетади...— Бирваракайига барада хаёл суриб кетди. Шчукарь, Антоннинг сассиз хайриҳоҳлигидан рағбатланиб, сўзини давом эттириди:— Очиини айтсам, айғирлар ҳам зериктириб юборди, менга қишида арава ҳайдаш ҳам тўғри келмайди. Совуқда дийдираидиган пўқак бўлиб қолибман, хуллас, саломатлигимнинг мазаси қолмабди. Чанада бир соат ўтиранг совуқнинг зўридан ичакларинг бир-бирига қапишиб кетади. Агар ичак-чавоғим совуқдан яхлаб бир-бирига қапишиб қоладиган бўлса, ичак туғилиш дардига йўлиқсам ёки марҳум Харитонга ўхшаб думғазамнинг томири шамоллаб қолса ҳам ажаб эмас! Менинг ҳали қиласидиган ишларим жуда кўп, ўлиб-тирилиб бўлса ҳамки, коммунизмга албатта етиб олмоқчиман!

Ёш боладек лақма чолни эрмак қилиш Антоннинг меъдасига тегиб, у ҳазилга барҳам бермоқчи бўлди:

— Сен, бобо, артистликка ёзилишдан бурун аввал яхшилаб ўйлаб кўр.

— Нимасини ўйлардим,— деди кибр-ҳаво билан Шчукарь бобо.— У ерда текин пул тегиб тураркан, мен қишигача етиб бораман. Яхши одамларнинг кўнглини хушлаб, уларга турли-туман ҳангамалар гапириб бериш ҳам иш эканми!

— Баъзан пулнинг бетига қарагинг ҳам келмай қолади...

— Нега энди?— сергакланди Шчукарь.

— Артистларни дўппослаб туришади...

— Дўппослаб туришади? Уларни ким дўппослайди?

— Билетга пул тўлайдиган халқ дўппослайди.

— Нима учун дўппослашади?

— Хўш, артистнинг биронта сўзи ёқмай қолса, халқнинг дидига тўғри келмай қолса ёки сафсатаси қизиқроқ туолмаса, тутиб олиб дўппослашади.

— Хўш... ҳалиги, ... қаттиқ дўппослашадими ёки пўписа қилиш учун ҳазил билан қўл учида дўппослашадими?

— Ҳазилга бало бор эканми! Баъзан шунақанги дўппослашадики, шўрликни томошадан тўпла-тўғри касалхонага, баъзан эса мозорга олиб кетишади. Эски вақтда кўзимнинг ўнгига циркдаги бир артистнинг қулогини тишлиб узиб олиб, орқа оёғининг товонини олдинга қилиб бураб қўйишган. Шўринг қурғур ўша тахлитда уйнга қараб кетган эди.

— Тўхта, шошма! Орқа оёғи деганинг нимаси? Нима бало, унинг оёғи тўрттамиди?

— У ерда ҳар хил одамлар бўлади... Эрмакка кўрсатиш учун ҳар хил одамларни сақлашади. Аммо мен янглишиб кетдим, аслида шундай демоқчи эдим: хуллас, олдинги чап оёғини шундай бураб юборишдики, орқасига ўгирилганча олдинга қараб кетди, одам қаёққа қараб кетаётганини ҳам билолмасди. Шўрликкина чуонам бақирардики, бақиргани бутун шаҳарга эшитиларди! Худди паровозга ўхшаб бўкирарди, бoshимдаги соchlарим тикка бўлиб кетган эди!

Шчукарь Антипнинг жиддий, ажаб эмаски, ўша хунук воқеаларни эслаганидан ҳатто тундлашиб қол-

ган жиддий юзига диққат билан узоқ тикилгач, ниҳоят, бу гапларнинг чинлигига ишонди-да, ғазабланиб сўради:

— Тухуминга қирон келгур полиция қаёқда эди?!

Шундай ҳодисани кўриб қараб туравердими?

— Дўппослашда полициянинг ўзи ҳам қатнашди. Бир полициячининг чап қўлидаги ҳуштакни зўр бериб чалганча, ўнг қўли билан артистнинг гарданига тушираётганини ўз кўзим билан кўрганман.

— Подшо замонида шундай бўлиши мумкин эди, Антипушка, Совет ҳокимияти даврида бўлса милициянинг дўппослаши мумкин эмас.

— Расмана гражданларга милиция тегмайди-ю, албатта, аммо артистларни бари бир уради. Бу нарса унга рухсат қилинганди. Азрўйи азалдан таомил шу, бошқа ҳеч қандай чораси йўқ.

Шчукарь бобо гумонсираб кўзларини сузди:

— Сен ёлғон гапиряпсан, иблис Грач. Сенинг гапнингга сира ҳам ишонгим келмай қўйди... Хўш, ҳозир артистларни сазойи қилишаётганини сен қаёқдан биласан? Шаҳарга тушмаганингга ҳам ўттиз йил бўлди, хутордан ташқарида қорангни кўрсатмайсану буларнинг ҳаммасини қаёқдан билишинг мумкин?

— Новочеркасскда туғишган жияним бор, ўша жияним хатларида шаҳар турмушидан ёзиб туради,— деб ишонтириди Антип.

— Жияним туради, дегин...— яна иккиланди Шчукарь бобо ва оғир хўрсиниб юзи тундлашди.— Ишкалроқ экан, Антипушка... Артист бўлиш қалтис иш экан... Дарҳақиқат, у ерда халқ ўлим-йитимдан ҳам тоймас экан, бунинг менга мутлақо ҳожати йўқ. Бунақанг тақасалтанг турмушини онасига берсин!

— Мен сени шунинг учун ҳар эҳтимолга қарши огоҳлантириб қўйяпман. Сен аввал кампиринг билан маслаҳатлашиб, кирадиган бўлсанг ўшандан кейин кир.

— Кампирнинг бу ишга дахли йўқ,— совуққина жавоб берди Шчукарь бобо.— Бирон кори ҳол бўлса унинг этини ачитишмайди-ку. У билан маслаҳатлашиб нима қиласдим?

— Унда ўзинг бир қарорга кел.— Антип ўрнидан туриб, тамакисини оёғи билан эзғилади.

— Ошиқадиган жойим йўқ, қишигача ҳам ҳали анча бор, ростини айтсам, айғирларни ҳам ташлаб кетишга кўзим қиймаяпти, кампирим ҳам ёлғиз ўзи зерикиб қолади... Йўқ, Антипушка, майли, артистларнинг менсиз ҳам кунлари ўтиб турадиганга ўхшайди. Лекин ўша осонликча топиладиган пулларига ҳам минг лаънат. Лекин бир ҳисобда, ётифи билан ўйланса, осонликча топиладиган деб ҳам бўлмас экан. Агар сени кунига тўғри келган нарса билан калтаклашса, милиция жонингга ора кириш ўрнига ўзи сени мушти билан сийлаб турса — қуллук қилдик! Бу чучвараларинг ўзларингга сийлов! Болалигимдан тортиб менга кимлар озор бермаган! Фозлар ҳам, буқалар ҳам, теватлар ҳам бошимга ие-не кўргиликлар солмаган. Ҳатто шунга ҳам бориб етдики, әшигимга ҳароми болани ҳам ташлаб кетиши. Хўш, қани айт-чи, бу хушёқадиган нарсами? Мени қариган чоғимда артистликда ўлдириб қўйишини ёки танамдаги бирон мучамни тескарисига бураб қўйишини — қуллур-э! Тоқатим йўқ, вассалом! Юр, Антипушка, яхиси, мажлисга кирайлик, у ерда кўнглимиз хуш бўлиши муқаррар. Артистлар ўзларининг ташвишларини ўзлари тортаверишсин. Афтидан уларнинг ҳаммаси ёш-яланг, жин урганлар соғ-саломат бўлишса керак. Уларни беҳудадан беҳудага дўппослашса, улар бундан эт қўйишиша керак. Мен чол одамман. У ерда озиқ-овқат сероб бўлгани билан, мени икки мартагине калтаклаб қўйишиша борми, худога омонатини топшираман-қўяман. Бунақа бўлса ғанимат луқмасини бошимга ураманми? Шўрлик артистларни дўппослайдиган ўша аҳмоқлар ҳиқилдоғимдан бу ёқса ситиб олишар. Артистлик қилмайман. Сен ҳам мени авраб бу ишга қизиқтирма, қора иблис. Мени паққос васвасага солма! Мана сен аллақайси бир эси йўқ аҳмоқ артистнинг қулоғини тишлиб узиб олганини, унинг оёғини орқасига бураб қўйишиганини, уни калтаклашганини бамайлихотир гапирдингу, худди менинг ўзимни уриб, қулоқларимни тишлиб, минг кўйга солиб сургаганларидек қулоғимга оғриқ кириб, оёғим ҳам лўқиллаб, ҳамма суяклирим сирқираяпти... Бунақа ваҳшиёна ҳангамаларни асабим сира-сира кўтармайди, худди контузияланган

одамга ўхшаб чидаёлмайман. Шунинг учун худо ҳақи, ҳозирча мажлисга ёлғиз ўзинг кира тур, мен бу ерда бир озгина дам олиб ўзимни босаман-да, асабларимни жойига келтираман, кейин кириб бориб Дубцовни ҳам инкор қиласман. Ҳозир чиқиб гапиролмайман. Антипушка, яғринимга майда титроқ кириб, тиззаларим ҳам қалтираброқ келяпти. Вабо теккур бир титроққа йўлиқдимми, оёғимни қаттиқ босиб туролмайман...

Шчукарь янгидан тамаки ўрай бошлади. Дарҳа қиқат, унинг қўллари қалтирас, новга ўхшатиб букилган бир парча газета қофоздан йирик-йирик қўлбола тамаки ушоқлари тўкилмоқда, юзи ижирғаниб буришмоқда эди. Антип чолга ясама ачиниш билан тикилди:

— Сенинг кўнглинг бунчайлик бўш эканлигини билмабман, бобо, бўлмаса сенга артистларнинг уқубатли турмушини гапириб бермаган бўлардим... Йўқ, бобогинам, артистликка ярамас экансан! Текин пул топишнинг баҳридан ўтиб, печкангда бемалол чўзилиб ётавер. Кампириングни ҳам узоқ ташлаб кетишинг ярамайди, қариган чоғида раҳминг келсин...

— Уни деб, артистликка боришдан воз кечганимни айтсан терисига сиғмай севиниб кетади! У мени бир дунё миннатдорчиликларга кўмиб ташлайдиган бўлди!

Шчукарь бобо шундай ёқимли янгиликни кампирига айтганда ўзига ҳам, унга ҳам бағишлидиган ҳузурнинг кайфини олдиндан сурганча яйраб жилмайиб бошини чайқар эди. Аммо унинг бошига фалокат яқинлашиб келмоқда эди. Чол шу нарсадан бехабар эдик, вафодор дўсти Макар Нагульнов ярим соат муқаддам, Шчукарнинг кампирни дарҳол мактабга келиб қандай баҳона билан бўлмасин чолни уйга олиб кетишини тайинлаб, унга бир йигитни жўнатган эди.

— Кампирингнинг ўзи келиб қолганини қара!— деди энди ошкора илжайиб Антип Грач ва мамнуният билан томоқ қириб қўйди.

Шчукарь бобо бошини кўтарди, гўё бирор унинг яйраб турган юзидағи табассумини ялаб олгандек бўлди! Каттаконлардек сипо, тунд, кескин кампирни унинг устига тўппа-тўғри бостириб келмоқда эди.

— Туси қурсин...— саросима билан шивирлади

Шчукаръ бобо.— Лаънати қаёқдан келиб қолди ўзи? Бошини кўтаролмай касал бўлиб ётган эди, мана энди ўз оёғи билан кириб келяпти. Жин чалган, бемаҳалда нега изғиб юрибди экан?

— Уйга юр, чол,— эътиrozга ўрин қолдирмайдиган оҳангда буюорди кампир ўзининг вафодорига.

Ерда ўтирган Шчукаръ бобо ер остидан унга худди авраб қўйилгандек, худди бўғма илонга қараётган қуёндек қараб турарди.

— Мажлис ҳали тамом бўлгани йўқ, жоним, мен чиқиб гапиришим керак, хоторимизнинг катталари чиқиб гапиришимни қаттиқ илтимос қилишди,— деди у ниҳоят секингина, шу заҳотиёқ ҳиқ этиб қўйди.

— Сенсиз ҳам куплари ўтиб қолар. Юр! Уйда иш бор.

Кампир эридан хийлагина новча, унга қараганда икки баробар вазмироқ эди. У чолининг қўлидан қатъият билан тортиб уни бир тортишдаёқ турғизиб қўйди. Шчукаръ бобо ҳушига келиб ғазаб билан ер тениди:

— Бормайман, вассалом! Мени ҳуқуқимдан маҳрум қилишга ҳеч қандай ҳаққинг йўқ! Ҳозир эски замон эмас!

Кампир бир оғиз ҳам гапирмай шартта бурилдида, катта-катта қадам ташлаганча уйига қараб кета бошлиди. У сургаб кетаётган Шчукаръ бобо аҳён-аҳёнда оёқ тираб йўргалаб борар эди. Унинг бутун қиёфаси тақдирга тан берганини сўзсиз билдириб турарди.

Антип Грач унинг орқасидан қараганча сассизгина куларди. Аммо зинапоя босқичларидан кўтарилаётганида ўйлади: «Худо кўрсатмасин, чол ўлиб қолса борми, хотор ҳувиллаб қолади-я!».

XXIII БОБ

Шчукаръ бобо мактабдан чиқиб кетиши билан мажлис бутунлай бошқа бир тусга кирди: Дубцовнинг номзодини муҳокама қилган колхозчиларнинг нутқлари қўққисдан гур-гур кўтариладиган кулгилар билан

бўлиниб турмади, ҳаммани ҳайратда қолдириб Ипполит Шалий сўзга чиққанда — мажлисда илк марта худди момақалдироқ бошланиши олдидан бўладиган жимликка ўхаш жимжитлик чўки.

Қария Шалий сўз сўраганида партияга кириш ҳақида ариза берган ҳамма номзодлар аллақачон ҳар томонлама муҳокама қилинган, учвлари ҳам очиқ овозга қўйилиб олти ойлик синов муддати билан партия аъзолигига кандидатликка қабул қилинган эдилар. У деразага тақаб қўйилган партадан туриб, кенг елкаси билан дераза рахига сунди-да, сўради:

— Хўжалик мудиримиз Яков Лукичга бир савол берсан мумкинми?

— Иккита савол берсанг ҳам майли,— дарҳол рухсат берақолди хушчақчақлик билан диққат қилган Макар Нагульнев.

Яков Лукич Шалийга истар-истамас ўгирилди. Унинг юзини муштоқона жиддий ифода эгаллаган эди.

— Мана, одамлар партияга киришяпти, унинг атрофида эмас, ўзида яшашмоқчи, аччиқни ҳам, чучукни ҳам унинг ўзи билан бирга татишмоқчи,— бўғиқ, йўғон овоз билан гапира бошлади, чақчайган қора кўзларини Яков Лукичдан олмай.— Нима учун сен партияга ариза бермаяпсан, Лукич? Сендан астойдил сўрамоқчиман: сен нима учун бир чеккада қўл қовуштириб турибсан? Ё партиямиз жонини ҳалак қилиб бизни яхши турмушга олиб кетаётганининг сенга мутлақо дахли йўқми? Сен нима қиляпсан ўзи? Сен ўзингни қизғин ишлардан олиб қочиб соя-салқинда ўтира туришнинг пайданмисан, сенга ғанимат луқма топиб бериб, чайнаб оғзингга солиб қўйишинми, шунақами? Бу ишинг қандай бўлди ўзи? Бу ишинг аломат, халойиқ учун жуда ҳам ибратли бўлди... Бутун хугор учун ибратли бўлди, агар билмоқчи бўлсанг!

— Мен насибамни ўзим топиб еяпман, сендан ҳали сўраганимча йўқ,— дарҳол жавоб берди Островнов.

Аммо Шалий бу арзимаган далилни рад этаётгандек қўлини амирона силтади.

— Тамаддиқ учун нои-насиба топишнинг йўли кўп: бўйнингга тўрва осиб тиланчилик қилсанг ҳам очингдан ўлмайсан. Мен бу тўғрида гапираётганим йўқ, сен

ҳам, Лукич, айри санчилган илондек билангламай қўяқол, сен менинг нима тўғрисида гапираётганимни биласан. Илгари, якка хўжалик вақтингда сен ишга ўч эдинг, ҳар қандай ишга ҳам бўридек тиш-тирнонинг билан ёпишардинг, бир тийинни ҳам қўлингга киритишни фанимат билардинг, ҳозир бўлса хўжа кўрсинга, қўл учиди ишлайди, қингир турмуш кечираётганингда, элу ҳалқ олдида ҳисоб беришингнинг ҳали фурсати келгани йўқ, мавруди келса — ҳисоб ҳам берасан! Аммо ҳозир айт: сен нима учун партияга ариза бермайсан?

— Мен партияга аъзо бўлиб турадиган даражада саводхон эмасман,— деда секин жавоб берди Островнов, шу қадар секин жавоб бердик, унинг нима деганини ёнида ўтирганлардан бошқа мактабдагиларнинг ҳеч қайсиси эшифтади.

Орқадан кимдир қичқириб талаб қилди:

— Қаттиқроқ гапир! Нима деб минғиллаётганингни эшифтамаяпмиз! Нима деганингни такрорла!

Яков Лукич ўзига қаратилган илтимосни гўё эшифтмагандек узоқ индамай турди. Бу орада чўккан муштоқона сукунатда қоронги ва мудроқ анҳордаги қурбақаларнинг ҳар хил овози билан, аммо баробарига вақиллашлари, йироқда, эҳтимолки хутор орқасида жойлашган эски ел тегирмондаги бойқушнинг нолиши билан ташқаридаги яшил акациялар орасида чирқиллаётган тунги свиристелчаларнинг овози эшитиларди.

Бундан ортиқ индамай туриш ноқулай бўлгани учун сал баландроқ овоз билан такрорлади:

— Мен партияга кириш учун унча саводхон эмасман.

— Хўжалик мудири бўлиш учун саводхонсану партияга кириш учун саводхон эмасмисан?— яна сўради Шалий.

— Униси хўжалик иши, буниси сиёсат. Борди-ю, сен бу тафовутнинг фарқига бормасанг, мен фарқига бораман,— деди энди лўнда қилиб янгроқ овуз билан, бехос гапдан ўзини ўнглаб олган Яков Лукич.

Аммо Шалий бўш келмасди, заҳарханда билан гапирди:

— Бизнинг коммунистларимиз бўлса хўжалик иши билан ҳам, сиёсат билан ҳам шуғулланишяпти, билансими, шуниси тонг қоларлики, ишлари бинойидек кетяпти! Бу икки нарсанинг бир-бирига ҳеч халақит берадиган жойи йўққа ўхшайди. Сен гапни чалфитяпсан. Лукич. Кўнглингдагини айтмаяпсан... Ҳақиқатга чап бермоқисанки, чалфитяпсан!

— Мен чалфитаётганим йўқ, чалфитишимнинг ҳожати ҳам йўқ,— фудуллаб жавоб берди Островнов.

— Йўқ, чалфитяпсан! Аллақандай хуфия ўйларинг борки, партияга ариза бергинг келмаяпти... Борди-ю, мен хато кетаётган бўлсам, сен менинг гапимни тузат, тузат!

Мажлис тўрт соатдан ортиқ давом этмоқда эди. Мактаб, кечки салқинга қарамай, тоқат қилиб бўлмайдиган дараражада дим эди. Йўлак ва синфларда бир неча чироқ хира ёниб тураг, лекин улар баттар иситиб бораётгандек эди. Аммо тердан шалаббо бўлган одамлар жим ўтирганларича, кекса темирчи билан Островнов орасида бехосдан бошланиб кетган даҳанаки жангни, бу ҳамма гапларнинг замирида очиқ айтилмаган, мураккаб қоронғи бир нарса борлигини сезганларича диққат бериб индамай кузатмоқда эдилар.

— Менинг қандай хуфия ўйларим бўлиши мумкин? Сен шунаقا дунёдаги ҳамма нарсаларни астар-пахтасигача кўриб тураркансан, ўзинг айтиб қўяқол,— дея таклиф қилди Островнов, йўқотаётган осойиштагини қўлига киритиб ба энди мудофаадан ҳужумга ўтиб.

— Ўзинг тўғрингда ўзинг гапириб қўяқол, Лукич. Нима учун-у нима сабабдан сенинг ўрнингга мен гапиришим керак?

— Менинг сен билан гаплашадиган гапим йўқ!

— Сен мен билан эмас, халқ билан... халқ билан гаплаш!

— Сендан бошқа ҳеч ким мендан ҳеч нарса сўраётгани йўқ.

— Сенга менинг сўраётганимнинг ўзи ҳам кифоя. Хуллас, гапирмоқчимасмисан? Хўп, майли, сабр қилализ, бугун бўлмаса, бари бир эртага гапирасан!

— Нега мунча менга ёпишиб олдинг, Ипполит? Хўш, нима учун ўзинг партияга кирмайсан? Сен аввал ўзингни гапир, мени тавбамга таянтиришингнинг ҳеч ҳожати йўқ, сен поп эмассан!

— Мени партияга кирмайди деб ким айтди? — турқини ўзгартирмай, сўзларини ҳижжалаб таъкидлаганча сўради Шалий.

— Партияда йўқмисан — демак, кирмас экансан.

Шунда Шалий томоғини қириб, дераза раҳидан елкасини узди, ҳамқишлоқлари унга дарров йўл беришди, у ошиқмай, президиум столи томон лапанглаб қадам ташлаганча, йўл-йўлакай гапириб кела бошлади.

— Илгари кирмаган эдим — буниеси тўғри, ҳозир кираман. Модомики, сен кирмаётган экансан, Яков Лукич, демак, мен киришим керак. Борди-ю, сен бугун ариза берганингда-чи, унда мен бермасдим. Сен билан икковимиз бир партияга сиғмаймиз! Сен билан биз бошқа-бошқа партияларнинг одамларимиз...

Остронов аллақандай маъносиз илжайганча индамади, Шалий эса столга бориб, Давидовнинг хурсанд, миннатдор чеҳрасини кўрди-да, сарғайиб кетган бир варақ қоғознинг саккиздан бир бўллагига амал-тақал билан битилган аризани узата туриб, деди:

— Аммо кафолатчиларим йўқ. Бу ишнинг бир иложини қилиш керак эди... Сизларнинг қайси бирларинги менинга кафиyl бўласизлар, йигитлар? Қани, ёзинглар-чи!

Давидов эса аллақачон шоша-пиша шифиллатганча тавсиянома ёзмоқда эди. Кейин ундан ручкани Нагульнов олди.

Ипполит Шалий ҳам яқдиллик билан партия аъзолигига кандидатликка қабул қилинди. Овозга қўйиб бўлингандан кейин уни Гремячий ячейкасининг коммунистлари ўринларидан туриб олқишлий бошладилар, уларнинг кетидан мажлисда ҳозир бўлганларнинг ҳаммалари ҳам ўринларидан туриб меҳнатдан серқадоқ бўлиб кетган кафтлари қовушмай ўқтин-ўқтин қаттиқ чапак чалдилар.

Шалий ҳаяжондан кўзлари пирпираганча турарди. У ҳамқишлоқларининг азалдан таниш юзларини нам

бөсган кўзлари билан гўё янгидан назардан кечираёт-
гандек эди. Размётнов унинг қулоғига: «Сен, Йипролит
амаки, халққа таъсирироқ бир нарса десанг бўлар-
ди...» деб пичирлаганда эса чол ўжарлик билан бош
чайқади:

— Беҳуда гап-сўзнинг нима ҳожати бор! Бисотим-
да унақа сўз йўқ ҳам... Қандай чапак чалишаётганини
кўрдингми? Демак, менинг гап-сўзимсиз ҳам уларга
ҳамма нарса равшан экан.

Аммо бу дақиқалар мобайнида партияга қабул қи-
линганлардан биронтасининг ташқи қиёфасида эмас,
партияйка секретари Нагульнининг ўз қиёфасида
тонг қоларли ўзгариш содир бўлди. Давидов уни ҳеч
қачон бундай ҳолда кўрмаган: Макар, оғзи қулоғида,
барала жилмаймоқда эди. Столдан бор бўйича туриб
ҳовлиқиброқ гимнастёркасини тузатар, оғирлигини
бир оёғидан иккинчисига кўчирап, энг муҳими — май-
да, зич тишларини кўрсатганча жилмаяр эди. Ҳамиша
қисилиб-қимтиниб турадиган лабларининг четлари
титраганча бехос сабиёна маъсум табассумдан эшилиб
кетди, бу табассум Макарнинг зоҳидона шиддатли
чеҳрасида шундай қизиқ кўринидики, энг аввал Устин
Рикалин ўзини тутолмади. У камоли ҳайрат билан хи-
тоб қилди:

— Уни қаранглар, яхшилар! Бизнинг Макар ил-
жаяптими дейман! Бунақа ажойиботни умримда би-
ринчи кўришим!..

Нагульнин ҳам табассумини яширмай жавоб
қилди:

— Биттаси кўрди! Пайқади-я! Қулсан нима қип-
ти? Қулсан азбаройи кўнглим хуш бўлганидан куляп-
ман. Сотиб олибманми! Ё бирор менга, кулмагин, деб
тақиқлайдими? Қимматли гражданлар, ҳамқишлоқ-
лар, очиқ партия мажлисини ёпиқ деб эълон қиласман.
Мажлиснинг кун тартиби тугади.

Ўзини янада ўнглаброқ, тик елкаларини ҳам рост-
лаб, у стол орқасидан чиқди-да, янгроқ бўлиб қолган
овоз билан деди:

— Ячейка секретари сифатида илтимос қиласман —
улуғ Коммунистик партиямизга қабул қилинган қим-
матли ўртоқлар олдимга келишсин. Сизларни буюк

шараф билан табрикламоқчиман!— Энди лабларини қымтиб, одатдаги Макарга айланди-да, паст, аммо командирларга хос амирона овоз билан деди:— Олдимга келинг!

Энг олдин Кондрат Майдаников келди. Орқада ўтирганлар унинг тердан шалаббо бўлган кўйлаги курагидан белигача ёпишиб қолганини кўриб туришарди. «Шўрликкинам, кўриб, бир десятина жойни ўриб чиққанми, дейсан!» деди тамшаниб кампирлардан бири ҳайриҳоҳлик билан. Кимдир: «Кондратни роса терлатишди!» дея аста кулиб кўйди.

Нагульнов бошини эгганча, Кондратнинг тик узатилган қўлини ҳаяжондан терчиган узун қўллари орасига олди-да, уни қаттиқ қисиб титрагаироқ овоз билан тантанавор гапирди:

— Ўртоқ! Биродар! Табриклайман! Ишонамизки, биз ҳамма коммунистлар ишонамизки, сен намунали большевик бўласан. Сенинг шундай бўлмаслигинг мумкин ҳам эмас!

Энг кейин айиқнамо лапанглаб Ипполит Шалий келди, халойиқнинг диққат-эътиборидан хижил бўлган ҳолда сиполик билан жилмайиб ишдан ялпайган каттакон қора қўлини узоқдан чўзаркан, Нагульнов унга томон бир қадам ташлаб, кекса темирчининг букиқ, яғриндор елкасидан қаттиқ қучоқлади:

— Вой, Ипполит амаки, хўп ажойиб иш бўлди-да! Чин кўнглимдан табриклайман! Бошқа коммунист йигитларимиз ҳам қутлашади. Яша, омон бўл, Совет ҳокимияти билан колхозимизнинг баҳтига яна юз ўйл болғангни тақиллат. Узоқ яша, чол, мен сенга айтсам! Сенинг умрзоқлигинг одамларга фақат ҳузур бағишлайди, гапимга ишонавер!

Партияга янги қабул қилинган тўрт киши тиқилинчда сурина-туртина қолган ҳамма коммунистлар билан қўл олишиб чиқди, халойиқ гангур-гунгур сўзлашганча эшик олдида уймалашиб турган ҳам эдики, Давидов қичқирди:

— Гражданлар, бир минутгина. Бир-икки оғиз сўзлашга рухсат этасизлар.

— Майли, раис, лекин қисқароқ бўлсин, иссиқдан мутлақо димиқиб кетамиз. Бу ер ҳаммомдан ҳам бат-

тар исиб, дим бўлиб кетди! -- кулиб огоҳлантириди ҳалойиқ орасидан бирор.

Колхозчилар илгариги жойларини эгаллаб яна ўтира бошладилар. Мактабда бир неча дақиқа босик ғала-ғовур ҳукм сурди-ю, кейин жимжит бўлиб қолди.

— Гражданлар, эр ва айниқса аёл колхозчилар! Бугун колхозимизнинг аъзолари биттамиз ҳам қолмай, ҳар қачонгидан ҳам аҳиллик билан йигилдик... — деб гап бошлаган эди Давидов, шу орада унинг гапини бўлиб йўлакдан Демка Ушаков қичқирди:

— Сен, Давидов, гапни худди Шчукарь бобога ўхшаб бошлайсан! У: «Қимматли гражданлар ва кампирлар!» дегувчи эди, сен ҳам бамисоли шу алфозда даромад қилиб келяпсан.

— Шчукарь икковлари бир-бирларида таълим олишяпти: Шчукарь ҳам туриб-туриб Давидовнинг «факт» деган сўзини ишлатиб қолади, Давидов ҳам ҳадемай: «Қимматли гражданлар ва кампиржонгиналарим!» дейишга тушса ажаб эмас! — қўшимча қилди Обнизов деган чол.

Шунда мактабда шунақанги самимий бир гулдирос қаҳқаҳа янградики, чироқлардаги аланг тиллари лопиллаб кетди, улардан биттаси ҳатто ўчиб ҳам қолди. Одатига кўра кемшик оғзини сербар кафти билан яширганча Давидов ҳам куларди. Ёлғиз Нагульногина ғазаб билан қичқирди:

— Бу нима деган гап ўзи! Мажлисда сипогарчилик деган нарса йўқ! Сипогарчиликларингиз қаёқса кетди? Ё терларингиз билан бирга чиқиб кетдими?

У ўзининг бу қичқириғи билан ўтга мой қуйгандек бўлди, қаҳқаҳа янгидан авжга чиқиб ҳамма синфлар, йўлак бўйлаб таралди. Макар умидсизлик билан қўл силтаб, ҳафсаласи пир бўлганча деразага ўгирилиб олди.

Ёноқлари тагида тугунлар ўйнаётгани ва чап қошининг учайдиганига қараганда бу намойишкорона лоқайдликка осонлик билан мұяссар бўлмаётган эди!

У бир минутдан сўнг, ҳамма ёқ тиниб қолгач, ари чақиб олгандек стулдан сапчиб турди, чунки орқадаги қатордан яна Шчукарь бобонинг қалтироқ, чинқироқ овози эшитилиб қолди:

— Қани менга айтинглар-чи, қимматли граждандар ва кампирлар, мен нега бундай деб хитоб қилган эдим?

Чол жумласини тамомламаган ҳам эдики, худди тўп отгандагидек қаҳқаҳа гумбирлаб яна иккита чироқни ўчириб қўйди. Қоронғида бирор бехосдан чироқ шишиасини синдириб қўйиб, ёмон сўқинди, қандайдир бир хотин унга дашном берди:

— Ҳой, тилингни тий! Қоронғида мени ҳеч ким кўрмайди, деб терингга сиғмай, сўкиняпсанми, аҳмоқ?

Кулги аста-секин тинди, фира-шира қоронғиликда яна Шчукарь бобонинг қалтироқ, норози овози эши-тилди:

— Бир аҳмоқ қоронғида беҳудадан-беҳудага сўкинса бошқаларнинг кулганига бало борми... Турмуш турмуш эмас майнавозчиликка айланиб кетди! Мажлис юзини кўрмасликка ҳам розисан! Сизларга тушунтириб бермоқчиман, мен нима сабабдан: «Қимматли граждандар ва кампирлар!» деб хитоб қилган эдим? Шу сабабданки, кампирлар — тўғри, ҳалол бўлади. Кампир зоти борки, жамийкиси худди Давлат банкига ўхшаб фириб, алдов ишлатмасдан кун кўради. Қариб-қартайган чоғимда улардан ҳеч қандай ярамаслик кутмайман, аммо ёш жувонлар билан қизларни-чи, ҳатто мутлақо кўрарга кўзим йўқ! Қани, айтинглар-чи, нима учун? Шунинг учунки, менга болани аллақайси бир муҳтарам кампир ташлаб кетгани йўқ, бу кампирнинг иши эмас, ёруғ жаҳони оламда, энг шўх кампирнинг ҳам фарзанд бунёд қилишга чоғи келмайди! Менинг шўримга аллақайси бир ярамас жувоннинг сахийлиги тутиб кетиб, ўзбошимчалик билан мени падари бузрукворлар қаторига қўшиб қўйди. Шу сабабдан турли-туман ва ҳоказо ёш-яланг жувонларни жинимдан ҳам ёмон кўраман, шунақангি можародан кейин ўшанақалардан биронтасига қайрилиб ҳам қарагим келмайди! Беҳосдан битта-яримта кўҳлик жувонга кўзим тушиб қолса борми, худди ичкиликни меъёридан кўп ичиб қўйгандагидек кўнглим айнийди. Лаънатилар мени шу ҳолгача олиб келишди... Шунақа оstonамга бола ташлаб, бошимга можаро ортириб ўтирганларидан кейин мен ахир қандай қилиб, чуонон-

чи, «менинг қимматли жувонларим ва бокира қизгина-
ларим»деб хитоб қила оламану шунга ўхшаган ҳар хил
хушомадларни лаганбардорлик билан пешкаш қила-
ман? Ўла қолсам ҳам бундай қилолмайман!

Нагульновнинг сабри чидамай қошларини чимирида,
таажжубланиб сўради:

— Сен қаёқдан келиб қолдинг, бобо? Сени кампи-
ринг уйингга олиб кетган эди-ку, сен бу ерга нима қи-
либ қайтиб келиб қолдинг?

— Олиб кетган бўлса нима бўпти?— менсимай жа-
воб берди. — Бу билан сенинг нима ишинг бор? Бу
бизнинг ўз оиласвий ишимиз, партиявий иш эмас. Ту-
шундингми?

— Тушунганим йўқ. Олиб кетганмиди, демак, бир
иш билан олиб кетган, сен уйда бўлишинг керак
эди.

— Уйда эдим, ўмарилиб чиқдим, Макарушка! Ме-
нинг ҳеч кимдан ҳеч қандай қарзим йўқ, сендан ҳам,
кампиримдан ҳам, дажжолга рўпара бўлгурлар, мени
ўз ҳолимга қўйсанглар-чи, худо ҳақи!

— Уйингдан қандай қилиб қочиб чиқдинг ўзи, бо-
божон?— кулгисини аранг тийиб сўради Давидов.

Сўнгги вақтларда у Шчукарь бобо олдида ўзига
мансуб сипогарчиликни тутиб туролмас, унга ҳатто
жилмаймасдан қараёлмас, ҳозир ҳам олдиндан оғ-
зини кафти билан тўсиб, кўзларини қисганча жавоб
кутмоқда эди. Нагульновнинг у билан ёлғиз қолган-
да очиқдан-очиқ ғижиниб: «Сенга нима бўлди ўзи,
Семён? Бирор қитиқлаётган қиз болага ўхшаб ҳи-
ринглайверадиган бўлиб қолдинг, эркаклик турқинг-
ни ҳам мутлақо йўқотиб қўйдинг!» дегани бежиз
эмасди.

Давидовнинг саволидан далдаланган Шчукарь ол-
динга ташланиб, эшик олдида уймалашиб турган ҳам-
қишлоқларини жон ҳолатда тирсаклари билан турта-
сурга бутун кучини ишга солиб президиум столи томон
кела бошлади.

Нагульнов унга қичқирди:

— Бобо! Нега одамларни босиб-янчиб келяпсан?
Жойингда туриб гапиравер, рухсат берамиз, лекин
қисқароқ!

Шчукарь бобо ярим йўлда тўхтаб, унга жавобан қизишиб қичқирди:

— Қаердан туриб гапиришни ачангга ўргат, мен ўзимнинг жойимни биламан. Сен, Макарушка, ҳамиша минбарга чиқиб оласан, ёинки презюдиумдан туриб гап сотасан, у ердан нима балолар деб валдирайсан, нима учун энди мен одамлар билан қоп-қоронғи орқа томондан гаплашишим керак? Мен у ердан биронта ҳам юзни кўрмайман, яккаш орқа, елкаю халойиқ ўтирганда ер исказидиган ва ҳоказолар. Сенинг фикрингча, мен ким билан гаплашиб, кимга хитоб қилишим керак? Елкалар, орқалару ва ҳоказо ҳар балоларгами? Ўзинг бу ёқقا, орқага келақол, шу ердан туриб нутқ ирод қила қол, мен гапираётганимда одамларнинг кўзларига қараб тургим келади! Масала равшанми? Ҳа, лича ҳал тур, фикримдан чалғитма. Бўймаса, элдан бурун чалғитадиган бўлиб қолгансан. Мен оғизимни очар-очмас, сен худди сопқонга солиб отгандек менга ҳар хил хитобларни ёғдирасан! Йўқ, оғайнчалиш, бу ишинг менга тўғри келмайди.

Энди стол қаршисида турганча, бир кўзи билан Макарга ўқрайиб тикилиб сўради Шчукарь:

— Сен Макарушка, ҳеч қачон умрингда хотин кишининг эркак одамни қисталанг бир иш билан ишидан чалғитганини кўрганмисан? Сидқидилдан жавоб бер!

— Камдан-кам бўлса ҳам кўрганман: чунончи, ўт тушган пайтларда ёки бирон фалокат юз берганда. Сен мажлисни чўзиб юборма, чол, имкон бер, Давидов ҳам гапирсин, мажлисдан кейин меникига бориб икковимиз тонг отгунча гаплашиб ўтиришимиз мумкин.

Нагульнов, қатъиятли Нагульнов Шчукарни қандай бўймасин эпга келтириб, унинг қуруқ гапи билан йиғилганларнинг вақтларини олишига йўл қўймаслик учун очиқдан-очиқ ён босмоқда эди, кутилмаган бир нарсага эришди — Шчукарь бобо пиқиллаб йиғлаб, ёш тирқираб чиқсан кўзларини енги билан арти, астойдил йиғлаб туриб гапирди:

— Сеникида тунаиммами, айғирларнинг ёнидами, менга бари бир, аммо бугун уйимга кириб боришими ҳеч ҳам мумкин эмас, чунки, кампирам менга қарши

шунақанги бир Туркия жанги очадики, мен осто нам-
даёқ жин уриб жон таслим қилишим мумкин, шун-
дай бўлишим ҳеч гал эмас!

Шчукарь бобо димлаб пиширилган олмадек буж-
майган юзини Давидовга ўгириб, бирдан қатъийлаш-
ган овоз билан гапида давом этди:

— Мана, сен Сёмушка, шўрликкинам, чунончи,
менинг қандай қилиб уйда бўлиб, кейин қандай ўма-
рилганимни сўраяпсан. Сен бу осон иш бўлса керак
деб ўйляяпсанми? Мен гапни чўзиб ўтирамай, шум
ниятли кампиrim важини мажлис аҳлига бир секунд-
да тушунтириб беришим керак, чунки халойиқда
ўзимга нисбатан ҳайриҳоҳлик туғдиришим керак,
борди-ю, ўша ҳайриҳоҳликка эришмасам — унда
Шчукарь қора ерга узала-тушиб, худонинг даргоҳида
жонини таслим қилиб, онасини кўраверсин! Менинг
охиратим шунақа оҳанжамага айланиб кетяпти!.
Хуллас, бир соат бурун бу ерга дилдорим келиб қол-
ди, мен Антипушка Грач билан қўрада ўтирган эдим,
тамаки чекишиб, артистларнинг аҳвол-тирикчилиги-
дан ҳангамалашиб ўтирган эдик. Келди-ю, нобакор,
қўлимдан ушлаб сўқим от тиши юқорига тўнкариб
қўйилган молани сургагандек сургаб кетди. Бемалол
сургаб кетяпти, инқилламайди ҳам, кучаниб ҳаллос-
ламайди ҳам, бўлмаса кучим борича икки оёғимни
ерга тираб кетяпман.

Мен сизларга айтсам, кампиrimни қўшга қўшиб
ер ҳайдаса, аравага қўшиб юк ташиса бўлади, мени
бўлса-ку, хоҳлаган томонига тортиб кета олади — бу
унга пучакчалик ҳам иш эмас, лаънатининг кучи шу-
нақа кўп! Худди юккаш отга ўхшаб ўлгудек зўр, ёл-
фон гапирсам худо урсин! Ҳар ким билмаса ҳам мен
унинг кучини чуқур биламан, негаки ўз этим билан
тотиб кўрганман...

Шундай қилиб, у мени тортқилаганча судраб кет-
япти, иложим қанча? Зўр зўрлигини қиласи. Орқаси-
дан пилдираб кетяпману, ўзим: «Янги туғилган гў-
дакни онасининг эмчагидан ажратгандек мени нима
важдан мажлисдан суғириб олиб кетяпсан? Ахир,
менинг у ерда ишим бор-ку!» деб сўрайман. Кампи-
rim бўлса: «Юр, чолим, бир деразамиздаги дарча-

нинг ошиқ-мошиғи кўчиб кетди, яхшилаб қоқиб қўй, тағин, худо кўрсатмасин, кечаси шамол турса деразамизни чил-чил қилмасин» дейди. Бу ҳунарига нима дейсизлар? Ана сенга бирламчиси, деб қўйдим! «Дарчани эртага қоқа қолсак бир бало бўладими? Миянгни еб қолганга ўшайсан, қари қоқвош!» дедим. У бўлса: «Мен бетобман, касал ҳолимча ёлғиз ёта-ёта диққат бўлиб кетдим, менинг олдимда ўтира турсанг этдан тушиб қолмассан» деди. Ана иккиламчиси! Унинг бу галига жавобан мен: «Битта-яримта кампирни чақира қол, мен мажлисга қайтиб бориб, Агафоша Дубцовни инкор қилиб келгунимча у сен билан ўтира турад» дедим. У бўлса: «Диққатимни фақат сен билан бирга ёзгим келяпти, менга ҳеч қандай кампирнинг кераги йўқ» дейди. Ана сенга учламчиси, яъни, бир эмас учта расво жавоб!

Бунисига нима дейсизлар, бирор одамни шунаقا таҳқирласа бемалол чидаб бериш керакми ёки буна-қанги ўтакетган аҳмоқликдан дарров ҳижрат қилиш керакми? Мен худди шундай қилдим, яъни ўз ихтиёrim билан ҳижрат қилдим. Уйга кирдик, мен пайтни қўлдан бермай, лип этиб даҳлизга чиқдим, у ердан остонаяга чиқдиму наридан-бери эшикнинг зулфинига лўқидонини солиб, ўзим зинғиллаганимча бу ёққа, мактабга қараб югурдим! Уйимизнинг деразалари кичкина, энсиз, кампирим, ўзларингиз биласизлар, гўштдор, баҳайбат. У ўлса ҳам деразадан тушиб кеполмайди, бўрдоқи чўчқа четаннинг туйнугига тиқилиб қолганидек тиқилиб қолади, бу аллақачон синаб кўрилган иш, у деразага бир эмас, бир неча марта тиқилиб қолган. Мана у ҳозир уйда ўтирибди, эски замонда революциядан илгари шайтон қумғонга қамалиб олгандек қамалиб ўтирибди, уйдан бу ёққа чиқолмайди! Кимнинг тоби бўлса — бориб уни бандиликдан қутқара қолсин, мен зинҳор-базинҳор унинг кўзига кўринишим мумкин эмас, кампирим сал ҳовуридан тушгунча, менга қаҳри-ғазаби совигунча биринки кунгина битта-яримтаникида вақтинча истиқомат қилиб тураман. Мен лақма эмасман, бошимни балога қўйиб, қолаверса, менга унинг турли-туман ва ҳоказо жангларининг ҳам мутлақо ҳожати йўқ.

Жаҳл устида мени жонимдан жудо қилиб қўйса, унда нима бўлади? Шундан кейин прокурор, Шипкада хотиржамлик, леб ёзади-ю, иш тамом, вассалом! Йўқ, қуллуқ қилдик-э, бу қўймогингиз ўзингизга сийлов! Ақлли одам бу ишларнинг ҳаммасини тушунтирмасанг ҳам ўзи тушуниб олади, аҳмоқ одам-чи, тушунтирсанг ҳам тушунтирмасанг ҳам — бари бир, аҳмоқлигича ўтиб кетади.

— Гапинг тамом бўлдими, бобо? — осойишта сўради Размётнов.

— Сизлар тамомламаганга ҳам қўймайсизлар. Мен Агафонни инкор қилишга кеч қолдим, уни бари бир партиямизга қабул қилибсизлар, шундай қилганингиз яхши ҳам бўлгандир, мен ҳатто бу фикрларингизга қўшиламан ҳам. Кампирим тўғрисида бор гапни қандай бўлса шундайлигича тушунтириб бердим, кўзларингиздан кўриб турибманки, бу ерда ўтирган ҳамманглар менга ниҳоятда ҳайриҳоҳ экансизлар. Менга бошқа нарсанинг кераги ҳам йўқ! Мен сизлар билан ҳузур қилиб гаплашиб олдим, яккаш айғирлар билан гаплашаверишим ҳам бўлмайди-ку, гапим тўғрими? Сизларнинг фаҳм-фаросатларингиз калта-кўтаҳ бўлса ҳамки, ҳар қалай, айғирларимнинг фаҳми-фаросатидан дурустроқ...

— Ўтир чол, сен яна алжишга тушяпсан,— буюрди Нагульнов.

Хозир бўлганларни ҳанг-манг қолдириб Шчукарь одатдагидек ади-бади айтишиб ўтирамай, индамасдан жойига қараб кета бошлиди, аммо шу қадар мамнуният билан жилмаярдики, кўзи шу қадар тантанавор чақнардики, ҳар бир кимса унинг мағлуб бўлиб эмас, ғолиб келиб қайтаётганини аён-ошкор кўриб қаноат ҳосил қилиши керак эди. Уни самимий дўстона табассумлар билан кузатмоқда эдилар. Ҳар қалай гремячийликлар жуда самимий муносабатда эдилар.

Фақат Агафон Дубцовгина хушчақчақ кайфиятдаги бобонинг таъбини тирриқ қилмай туролмади. Шчукарь камоли виқор билан унинг ёнидан ўтиб кетаётганида, Агафон чўтири юзини бурнштирганча ваҳима билан шивирлади:

— Ўзингга ўзинг қилдинг, чол... хайрлашиб қолайлик!

Шчукарь қоқкан қозиқдек туриб қолди, анчагача индамай лабларини ўйнатди, кейин ўзини ўнглаб олиб титроқ овоз билан сўради:

— Хўш... нима сабабдан, яъни мен нима учун сен билан хайрлашишим керак?

— Шунинг учунки, бу дунёда умринг жуда оз қолди... Икки марта мижжа қоқиб, тўрт марта хўрсингунчалик умринг қолди. Кал қиз бола сочини ўриб бўлмасданоқ дунёдан ўтасан...

— Бу... қандай бўлди ахир, Агафоша?

— Қандай бўларди! Сени ўлдиришмоқчи.

— Ким?— дея олди араанг Шчукарь бобо.

— Ким бўларди: Кондрат Майдаников хотини билан. У аллақачон хотинини уйидан болта олиб келгани жўнатди.

Шчукарнинг оёғига майда титроқ кириб, бажонидил сурилиб жой берган Дубцовнинг ёнига мажолисизгина ўтира қолди-да, хуши учиб сўради:

— Нега мени жонимдан жудо қилмоқчи бўпти?

— Ўзинг пайқамаялсанми?

— Уни инкор қилганим учунми?

— Ҳа! Танқид қилсанг доимо ўлдиришади, гоҳ болта билан, гоҳ чўлтоқ милтиқ билан. Сенга қайси бири ёқади — отилиб ўлишми ё чопилиб ўлишми?

— Ёқадимиш! Гапинги қара-я! Бунаقا можаро кимга ёқиши мумкин?!—ғазабланди Шчукарь бобо.— Ундан кўра менга айт: энди нима қилишим керак? Бунақанги довдир аҳмоқдан ўзимни қандай муҳофаза қилсан бўлади?

— Жонинг омонлигига бошлиқларга маълум қилишинг керак, васссалом.

— Шундай қилишга тўғри келади,— бир оз ўйлаб кўриб рози бўлди Шчукарь бобо.— Ҳозир бориб Макарга арз қиласман. Нима, лаънати Кондрашка мен туфайли сургун бўлиб кетишдан қўрқмас эканми?

— У, Шчукарь учун мени бир йилдан ошиққа кесишмайди, жуда борса икки йилга кесишади, бир-икки

йил қамоқни бемалол ўтказиб, осон қутулиб келаман, дейди... Бунақа чоллар учун кўпга кесишмайди, бунақангি паст матахлар учун жуда ҳам қисқа муддатга кесишади, дейди.

— Хомтама бўлади, итвачча! Камида ўнтагинани олиб кетади, мен буни жуда биламан!—қаҳр билан чинқириб юборди Шчукарь бобо.

Шу ондаёқ Нагульновдан қаттиқ танбеҳ эшилди:

— Агар сен, қария, яна бир марта чала бўғизланган эчкига ўшаб чинқиравсан,— дарҳол мажлисдан чиқариб юбораман.

— Жим ўтиравер, бобо, сени бу ердан мен ўзим кузатиб қўяман, сени нобуд қилдириб қўймайман!— пицирлаб ваъда қилди Дубцов.

Аммо Шчукарь унга жавобан чурқ ҳам этмади. У тирсакларини тиззаларига суяганича бошини қўйи солиб ўтиради. У нима ҳақдадир диққат билан ўйлар, зўр бериб, ижирғанганча пешанасини тириштирап эди, кейин бирдан сапчиб ўрнидан туриб одамларни нари-бери сура-сура пилдираганча президиум столи томон югурди. Чолни кузатиб турган Дубцов унинг Нагульновга энгашганча аввал Дубцовнинг ўзини, кейин Кондрат Майданниковни кўрсатиб, қулоғига бир нималар деб пицирлаганини кўрди.

Нагульновни кулдириш қийин, амри маҳол эди, лекин шу пайтда у ҳам ўзини тутолмай, лабининг четти билан жилмайиб қўйди-да, Дубцовга қараб таъна билан бошини чайқади, Шчукарни ёнига ўтқазиб, шивирлади: «Шу ерда ўтирилар, типирилайверма, яна бирон балога гирифтор бўлиб ўтирганин».

Бир оздан кейин хотиржам бўлган Шчукарь бобо кеккайганча Майданниковнинг кўзини учратди-да, чап қўлининг тагидан бадҳоҳлик билан унга икки бармоғи орасидан бош бармоғини чиқариб кўрсатди. Таажжубланган Кондрат қошлирини чимирди, Маркарнинг пинжига ўзини хавф-хатардан мутлақо холи сезган Шчукарь эса энди унга бирваракайга икки қўлинин шундай қилиб кўрсатмоқда эди.

— Чол сенга нега унаقا қилиб кўрсатяпти?— деб сўради Майданниковдан, ёнида ўтирган Антип Грач.

— Кўнглининг кўчасига нима балолар келганини ким билади дейсан,— фижиниб жавоб берди Кондрат.— Фаҳмлашимча, эси киравли-чиқарли бўлиб қоляптиёв. Аллақачон фурсат ҳам етган: ёши ҳам анчага бориб қолди, шўрликнинг кўрган кўргиликлари ҳам озмунча эмас. У билан ҳамиша тотув яшаб келардик, ҳозир, афтидан, менда бир кеки борга ўхшайди. Ундан сўраб олишим керак, мендан нима учун хафа экан.

Кондрат Шчукарь бобо боягина ўтирган жойга тасодифан кўзи тушиб қолиб, аста кулиб қўйди-да, Антипни тирсаги билан туртди:

— У Агафоннинг ёнида ўтирган эди-ку, энди ҳам масига тушундим! Бу лаънати Агафон унинг қулоғига менинг тўғримда бир нима деб шипшиб, бирон машмашани ўйлаб чиқарган бўлса, бобонинг жини қўзияпти, мен бўлсам унга нима ёмонлик қилиб қўйганимни етти ухлаб тушимда ҳам кўрган эмасман. У нораста гўдакка ўхшаб қолипти, ҳар бир гапга лақ этиб ишонади.

Давидов стол ёнида турганча, азалдан ҳардам хаёл қишлоқ аҳлининг эран-қаран жойларига ўтириб, ғала-ғовур босилишини сабр билан кутарди.

— Қани бўл, Давидов! Бўл, чўзаверма!— қичқирди кутишга тоқати йўқ Демка Ушаков.

Давидов Размётнов билан нима ҳақдадир шивирашиб олгач, шошилиб гапира бошлади:

— Мен сизларни узоқ тутиб турмайман, факт! Менинг айниқса колхозчи аёлларга мурожаат қилаётганимнинг сабаби шуки, ҳозир сизларнинг олдила-рингизга қўядиган масалам кўпроқ аёлларга алоқадор. Бугун партия мажлисимизда бутун колхоз қатнашяпти, шунинг учун биз коммунистлар ўзаро маслаҳатлашиб, сизларга шу нарсани таклиф қилмоқчимиз: заводларимизда аллақачонлар болалар боғчалари билан яслилари барпо этилган, у ерларда кичкина болалар эрталабдан то кечгача тажрибали энагалар билан мураббияларнинг қаровида бўлиб, овқатланишади, дам олишади, бу нарса факт, ўртоқлар! Бу орада уларнинг оналари ишлашади, болала-ридан кўнгиллари тўқ бўлади. Ихтиёрлари ўзларида,

болаларининг ташвишидан холи бўлишади. Биз ҳам колхозимиз қошида шундай болалар боғчаси ташкил қилисак бўлмайдими? Қулаклардан мусодара қилган иккита уйимиз бўш ётибди: сут, нон, гўшт, сўку яна бошқа у-булар бўлса колхозда бор, факт! Кичкинтоя гражданларимизни озиқ-овқат билан тўла таъминлаймиз, парвариш масаласида ҳам, нимага қараб турибмиз энди, жин урсин! Ҳолбуки, ғалла ўрим-йигими яқин келиб қолди, хотин-қизларимизнинг ишга чиқишлиари важини олиб кўрсак, аҳвол унча яхши эмас, тўғрисини айтсам — жуда ёмон, буни ўзларингиз ҳам биласизлар. Хўш, қимматли колхозчи аёллар, бизнинг таклифимизга қўшиласизларми? Келинглар, овозга қўяйлик, кўпчилик тарафдор бўлса, бу масала юзасидан яна бир мажлис чақириб ўтирмаслик учун, ҳозироқ тегишли қарор қабул қила қоламиз. Қимки тарафдор бўлса, қўлини кўтаришини илтимос қиламан.

— Шундай қутлуғ ишга ким қарши чиқарди? — қиҷириди кўп болали Турилиннинг хотини. У ёниверидаги хотинларга қараб қўйиб, ҳаммадан олдин билаги ингичка қўлини кўтарди.

Ўтирган, эшиклар олдида уймалашиб турган эрва аёл колхозчиларнинг бошлари устида ғуж-ғуж қўллар кўтарилиди. Ҳеч ким қарши овоз бермади. Да-видов қўлларини бир-бирига ишқаб, мамнуният билан жилмайди:

— Болалар боғчаси ташкил қилиш ҳақидаги таклиф бир овоздан қабул қилинди. Бундай якдилликларингиз жуда маъқул, ўртоқлар, гражданлар, факт, биз пистонга урдик! Эртага ишга киришамиз. Болаларни, онажонлар, қозон-товоқдан бўшашларнингиз биланоқ эрталаб соат олтидан колхоз правление-сига келиб ёздиринглар. Ўзаро маслаҳатлашиб, ўртоқ аёллар, ораларингдан ошпаз танланглар, покиза, овқат пиширишга уста бўлсин, яна энагалик вазифасига иккита-учта саранжом-саришта, озода, болаларга меҳрибон колхозчи хотинларни танланглар. Мудирани райондан сўратиб оламиз, саводхон, ҳисобкитобни ўзи олиб борадиган бўлсин. Биз бу ерда хомчўт қилиб кўриб, шундай қарорга келдикки, эна-

га колхозчи аёлларнинг ҳар бирига, ошпаз хотинга кунига бир меҳнат кунидан ҳақ тўлаймиз, мудирага бўлса давлат белгилаган миқдорда маош тўлаш тўғри келади. Зиёнга ботмасмиз, факт! Бу шундай ишки, ҳеч нарсани аяш керак эмас, хотинлар ишга чиқиши билан харажатларнинг ўрни тўлиб кетади, мен буни сизларга кейинчалиқ амалда исботлаб бераман! Икки ёшдан етти ёшгача бўлган болаларни қабул қиласми.

Саволлар йўқми?

— Кунига бир меҳнат кунидан ҳақ тўланилса кўплек қиласмикан? Бола-бақрага қараш амри маҳол иш эмас, буни далада паншаха ишлатиш билан тенглаштириб бўлмайди,— барада овоз билан гумонсиради яқинда колхозга кирган, хутордаги энг сўнгги якка хўжаликлардан бири Ефим Кривошеев.

Аммо шу пайт унинг атрофида норози хотинларнинг хитоблари шу қадар янградики, гарантсиб қолган Ефим юзини тириштириб, устига ёпирилиб келаётган хотинларга ариларни ҳайдаётгандек қўл силтади, кейин ёмон бир нарсани сезгандек партага сакраб чиқди-да, йўғон овоз билан хушчақчақ қичқирди:

— Қўйинглар, ўргилайлар! Худо ҳақи, қўйинглар! Бехосдан шундай деб қўйибман! Аҳмоқлик қилиб шундай деб юборибман! Қўйинглар, эшикка чиқиб кетай, мумкин бўлса, башарамга муштларингни чўзманглар! Ўртоқ Давидов, янги колхозчининг жонига ора кир! Қаҳрамонларча ҳалок бўлиб кетмай! Бизнинг хотинларнинг феълини ўзинг яхши биласан-ку!

Хотинлар пойма-пой қичқира бошламыди:

— Сен, фалон-писмадон, ҳеч бола боқиб кўрган-мисан?

— Ошпаз қилиб қўйиш керак бўрдоқи тўнфизни!

— Энага денглар!

— Болалар билан бир кунгина бўлсанг, кейин, икки меҳнат куни берамиз, дейишса ҳам ташлаб қочарсан, мумсуклик қилганингга ўлайликми, зиқна очкўз!

— Таъзирини бериб қўйинглар, эгачилар, валдираса сал эвидароқ валдирасин!..

Эҳтимол, ҳамма иш силлиқлигича бартараф бўлиб кетиши ҳам мумкин эди-ю, аммо Ефимнинг ҳазил-кашлик билан қичқирган хитоби жиддий вазиятни юмшатишга берилган сигнал бўлиб хизмат қилди, иш Ефим мутлақо кутмаган бир тусга кириб кетди: хотинлар қаҳқаҳа ва қий-чув билан уни партадан тортиб туширишди, кимнингдир қора мағиз қўли Ефимнинг қўнғир соқолини чанглаб тутамлаб олди, устидаги янги сатин кўйлаги эса тариллаганича чок-чокидан ва бошқа жойларидан йиртила бошлади. Нагульнов томоғи йиртилгудек бўлиб қичқирганча беҳуда уриниб хотинларни тартибга чақираради. Урниқит давом этарди, бир минутчадан кейин кулги ва хижолатдан қизариб кетган Ефимни кўплашиб йўлакка итариб чиқаришди, аммо кўйлагининг узилиб тушган икки енги синф полида ётар, тугмасиз қолган кўйлаги эса кўп жойларидан ёқасидан этагигача йиртилиб тушган эди.

Ефим атрофини қуршаган казакларнинг қаҳқаҳаси остида кулгидан нафаси тиқилганча гапиравди.

— Алвости хотинларимизнинг турган-битганлари куч бўлиб кетибди! Бу оғат-ку! Уларга биринчи марта қарши гапириб қўйиб балога қолдим-а...—У далва-далва кўйлаги билан уялиб қора мағиз қорнини яши-раркан, нолирди:— Хўш, бу серуқа либос билан хотинимга қандай қўриниш бераман? Бу куфроналик учун у мени уйдан ҳайдаб юборади-ку! Шчукарь бобо билан биргаликда битта-яримта бева хотинникида вақтинча истиқомат қилиб туришимизга тўғри кела-ди, икковимизнинг бундан бошқа чорамиз йўқ!

XXIV БОБ

Мажлисдан ярим тундан оққанда тарқалишди. Ҳамма кўчалар ва тор кўчалар бўйлаб одамлар астасекин қизғин суҳбатлашиб кетишмоқда, ҳар қўрада эшиклар ғижирлар, тун сукунатида эшик зулфинлари қаттиқ шарақлар, аҳёнда гоҳ у ер, гоҳ бу ерда кулги эшитилар эди. Кечалари бундай гавжум эл

оёғига ва ғала-ғовурга ўрганмаган хутор итлари уйғониб, бутун Гремячий Логни бошларига құтариб вовуллашга тушди.

Мактабдан энг кейин чиққанлардан бири Давидов бўлди. Бутун мактаб биносини тўлдирган рутубатли зиқ димликдан кейин кўча ҳавоси унга муздек, саринлиги билан маст қилаётгандек туюлди. Ютоқиб нафас олаётган Давидов енгил шабадада ҳатто брага ҳидини сезгандек бўлди.

Унинг олдида икки киши кетмоқда эди. Уларнинг овозларини эшитаркан, беихтиёр жилмайиб қўйди.

Шчукаръ бобо қизғин гапиради:

— ...Мен лақма бўлсам, у жин урган валдир-засарнинг, Кондрат сени танқиду ўз-ўзини танқидинг учун ўлдирмоқчи, деганига астойдил ишониб ўтирибман, жон-поним чиқиб кетди, «Кондратнинг қўлига болта тушиб қолса ҳазил гапми? Ўзи ювош йигит кўрингани билан, яна ким билсин... Қизиқ устида болта билан бир туширса борми, калламни тарвуздек шартта икки палла қиласи-қўяди!» деб ўйладим ичимда. Лаънати Агафонга нима жин уриб ишониб юрибман?! Бирпас ҳам менга бирон қилгулик қилмасдан туролмайди-ку! Умри бино бўлиптики, тили сакиллаган итдек тиним билмайди-ку. Такамиз Трофимга мени даф қилишни, чуррам тушган одам бўлишимга қарамай тўғри келган жойимга сузишни ўргатган ҳам шу ота безор лаънати. Мен буни жуда яхши биламан! Унга бу ваҳшиёна қилиқлардан таълим берәётганини ўз кўзим билан кўрганман, лекин ўшанда мутлақо, уни менга қарши гиж-гижлаб, умримни эговлашга ўргатяпти, деб ўйламаган эдим.

— Сен унга ишонма! Ҳеч бир гапига мутлақо ишонма, унга ҳамиша мумкин қадар гумон билан қара! Агафон ҳар хил оҳанжамалар чиқаришни яхши кўради, у ҳаммани калака қиласи, феъли шуна: қа ўзи — хирқироқ йўғон овоз билан уни юпатарди Нагульнов ўз навбатида.

Улар, афтидан, ҳали мактабда бошланган сұхбатни давом эттириб Нагульнов турадиган қўранинг эшигидан бирга кириб кетишиди. Давидов уларнинг орқасидан кирмокчи эди, аммо фикридан қайтди.

Яқин орадаги тор күчага бурилди, сал юргач, четанга суялиб турган Варя Харламовани кўрди. Қиз унинг истиқболига қараб юрди.

Кеч чиққан парча ой хира нур сочмоқда эди, аммо Давидов қиз дудоқларидағи ҳазин табассумни аниқ кўрди.

— Мен сизни кутиб турган эдим... Биламан, ҳамиша шу тор кўчадан уйингизга қайтасиз. Сизни кўрмаганимга ҳам анча бўлди, ўртоқ Давидов...

— Сен билан учрашмаганимизга анча бўлди, Варюха-куюнчак!— деб қўйди курсандчилик билан Давидов.— Сен бу орада кап-катта қиз бўлиб, очилиб кетибсан, факт! Қаёқларда юрибсан ўзинг?

— Гоҳ ўгоқда, гоҳ ўроқда, рўзгор ишлари ҳам бир дунё... Сиз мендан ақалли бир марта ҳам хабар олмадингиз, эҳтимолки, бирон марта эсламагандирсиз ҳам...

— Аразчигинамдан ўргилай! Қойима, доим вақтим зиқ, доим ишим кўп. Бир ҳафталаб, соқолимизга тиғ тегмайди, кунига бир марта гина тамаддиқ қиласмиз, ўрим-йифим олдидан ишларимиз шундай тиқилинч бўлиб қолди. Хўш, мени нега кутаётган эдинг? Бирон иш-пишинг борми? Ҳайронман... кайфинг йўқроқ шекилли? Ё мен янгилишяпманми?

Давидов қизнинг тиқмачоқдек лўппи қўлининг тирсагидан юқорисини енгилгина қисиб қўйди-да, қўзларига хайриҳоҳлик билан тикилди:

— Бошингга бирон ташвиш тушдими дейман? Гапирақол!

— Сиз уйга кетяпсизми?

— Бемаҳалда қаёққа борардим бўлмаса?

— Борадиган жойларингиз озмунчами, сизга ҳамма эшик очиқ. Уйга кетаётган бўлсангиз, йўлимиш бир экан. Мени эшигимизгача кузатиб қўясизми?

— Бўлмаса-чи! Довдир экансан-ку! Хўш, ахир қаҷон матрос халқи, ҳатто собиқлари ҳам бинойидек қизларни кузатиб қўйишдан бош тортган?— ҳазиломуз олифталиқ билан хитоб қилди Давидов, қизни қўлтиқлаб олиб.— Баравар оёқ ташлаб кетамиз. Бир, икки! Бир, икки. Хўш, нима ҳасрат-надоматнинг

бор? Ҳаммасини тўкиб сол! Раис бор нарсани билиши керак, факт! Мирингдан сиринггача!

Давидов бармоқлари орасидаги Варяниг қўллари қалтираётганини, қадамлари журъатсиз бўлиб қолганини сезди, шу заҳотиёқ пиқ-пиқ йиги овози эшилди.

— Авзойинг астойдил бузилиб кетди-ку, Варюха! Сенга нима бўлди? — ҳазилкашликка барҳам бериб, ташвиш билан оҳиста сўради Давидов.

Варя йигидан ҳўл бўлган юзини унинг кенг кўкрагига яширди. Давидов жизгинак бўлган қошларини гоҳ чимириб, гоҳ таажжуб билан учириб, жойида қимирламай турарди. Қизнинг бўғиқ йиғиси орасидан аранг шу сўзларни эшилди:

— Мени унашишялти... Ванька Обнизовга.. Ойим эртаю кеч, шунга тегасан, уларнинг турмушлари бинойидек, деб менга кўз очирмаялти,— қиз қалбida, афтидан бери йигилиб қолган аччиқ алам бирдан изтиробли фарёд билан отилиб чиқди:— Худойим-эй, энди нима қилдим?!

Бир лаҳзагина қўли Давидовнинг кифтига ёстаниб, шу ондаёқ сирғилиб тушди-да, мажолсизгина шалвираб қолди.

Давидов бу нарсани мутлақо кутмаган, шунақангি таҳлитдаги янгилик ўзини ниҳоятда саросимага солиб қўйишини сира ҳам ўйламаган эди. Дафъатан лол бўлиб, юраги қаттиқ ачишганча у Варяниг қўлини сиқаркан, ўзини орқага ташлаброқ, қизнинг ерга боққан йиғили юзига тикилганча нима дейишини билмай қолди. Ниҳоят, шу дақиқадагина бу қизни, ўзидан маҳрам тутиб, аммо аллақачонлардан бери кўпни кўрган одам учун янгича бир тарздаги, тушуниб бўлмайдиган пок муҳаббат билан севиб қолганини, ҳар бир чинакам муҳаббатнинг ҳам ҳазин икки дугонаси ва ҳамроҳи — айрилиқ билан жудолик ҳозир олдиги-насига келганини фаҳмлади.

У ўзини ўнглаб олиб, ҳирқироқроқ овоз билан сўради:

— Сен-чи? Ўзинг нима дейсан, қўзигинам?

— Мен унга тегмайман! Тушун, тегмайман!

Варя бошини кўтариб, Давидовга ёшли кўзлари

билин қаради. Унинг дўрдайиб қолган лаблари аянчили титраб кетди. Худди бунга жавобан садо бераётгандек Давидовнинг юраги ҳам орзиқиб тушди. Оғзи қақраб кетди. Аччиқ туфугини аранг ютиб гапирди:

— Хўп, тегмасанг тегмай қўяқол, факт! Сени бирор зўрлаб эрга беролмайди.

— Тушунсанг-чи ахир, онамнинг қўлида олтига боламиз, қолганлари ҳаммаси мендан кичик, онам нотоб, agar мен ишда ўлиб тирилганимда ҳам бир дунё бағбуғ болани боқолмайман. Бу нарсани нега тушунмайсан, ўргилиб кетай?

— Эрга тегсанг, унда нима бўлади? Эринг қарашар дейман?

— У бизга қарашиш учун устидаги охирги кийимини ҳам сотишга тайёр! Жони борича тиним билмай ишлайди. Унинг мени қандай яхши кўришини билсанми? Мени ўлгидек яхши кўради? Аммо менга унинг ёрдами ҳам, муҳаббати ҳам керакмас! Мен уни жичча ҳам яхши кўрмайман! Жинимдан баттар ёмон кўраман! Терлаган қўллари билан қўлимни ушласа, кўнгилларим айниб кетади. Ундан кўра... Эҳ, нимасини айтай! Отам тирик бўлсами, бошимни қотириб ўтирасдим, ҳозир иккинчи босқич мактабни тамом қилаётган бўлармидим...

Давидов қизнинг ой нуридан оқарган йиғили юзига ҳамон диққат билан тикилиб турарди. Дўрдайиб қолган лабларининг четларида ҳасратли чизиқлар ётар, кўзлари ерга боқсан, қовоқлари кўкиш эди. У ҳам қўлида дастрўмолини фижимлаганча индамай турарди.

— Оилаларингизга ёрдам берсак-чи? — қисқагина ўй сургандан сўнг ботинмай сўради Давидов.

Галининг охирни тамом бўлмаган ҳам эдик, Варюханинг гўё бирдан қуриб қолган кўзларида энди ёш эмас, қаҳр чақнаб кетди. Бурун катаклари керкиганча, газабли паст овоз билан эркакчасига дағал хитоб қилди:

— Ёрдаминг бошингда қолсин! Тушундингми?!

Яна қисқа жимлик чўқди. Бу кутилмаган дағдағадан гангигиб қолган Давидов сўради:

— Нега энди?

— Нега бўларди!

— Айтсанг-чи?

— Сенинг ёрдамингга муҳтожмасман!

— Мен ёрдам бераман деяётганим йўқ, кўп болали бева бўлгани учун онангга колхоз ёрдам беради. Тушундингми? Мен колхоз правлениесида гаплашман, шундай деб қарор чиқарамиз. Фаҳмладингми, Куончак?

— Менга колхознинг ёрдами керак эмас!

Давидов тажанглик билан кифтини қисди:

— Фалати одам экансан, факт! Гоҳ ёрдамга муҳтож бўлиб, рўпара келган йигитга тегиб олмоқчи, гоҳ ҳеч кимнинг ёрдамига муҳтожмас... Мен сенга тушунолмай гаранг бўлиб қолдим. Бугун икковимиздан биримизнинг миямиз айниганроқ, факт! Муддаонг нима ўзи ахир?

Давидовнинг хотиржам, осойишта овози — эҳтимолки, Варяга шундай туюлгандир — қизнинг тоқатини тоқ қилиб юборди. У ўқраб йиғлаб, қўлларини юзига босди-да, Давидовга шартта орқа ўғирганча дастлаб секин юриб, кейин эса чопа-чопа тор кўчадан кета бошлади: олдинга энгашганча ҳўл қўлларини юзидан олмай борарди.

Давидов унга кўча муюшида етиб олиб, кифтларидан ушлади-да, жаҳл билан гапирди:

— Ҳой, Куончак, тантиқлик қилма! Мен сендан астойдил сўраяпман, нима гап ўзи?

Ана шундан кейин шўрлик Варя дилидаги қизлик аламлари, изтироблари, ҳасратларига тўла эрк берди:

— Кўзи кўр аҳмоқ! Лаънати гумроҳ! Ҳеч балони кўрмайсан! Мен сени яхши кўраман, баҳордан бери яхши кўраман, сен бўлсанг... сен бўлсанг худди кўзи боғлаб қўйилган одамдек назар солмайсан. Мени ҳамма дугоналарим мазақ қилишяпти, ҳамма мазақ қилаётган бўлса ҳам ажаб эмас! Хўш, гумроҳ, кўр эмасмисан? Сен қуриб кетгурнинг ҳасратингда озмунча ёш тўқдимми... Қанча-қанча кечаларни оппоқ тонг оттирдим, сен бўлсанг қайрилиб ҳам қарамайсан! Ахир қандай қилиб сендан ёрдам, ё колхоздан эҳсон олай, сени яхши кўраман-ку?! Очимдан тиришиб ўлсам ўламанки, аммо сизлардан ҳеч нарса олмайман! Ана, сен-

га бор гапимни айтдим. Кўнглинг жойига тушидими? Муродингга етдингми? Энди менинг олдимдан қорангни ўчириб, Лушкангникига йўқол, менга керагинг йўқ, сендаи бағритош, кўзи кўр гумроҳга зор эмасман!

У Давидовнинг қўлидан чиқиш учун қаттиқ юлқинди, аммо бу ҳам уни маҳкам ушлаб турарди. Астайдил, қаттиқ, аммо индамасдан ушлаб турарди. Улар шу тариқа бир неча минут турисди, сўнг Варя дуррачасининг учи билан кўзини артиб, сўник, ҳорғин оҳангда гапирди:

— Мени қўйвор, мен кетай.

— Секироқ гапир, бирор эшишиб қолмасин,— илтимос қилди Давидов.

— Секин гапириш бундан ортиқ бўладими?

— Жуда эҳтиётсизсан...

— Бас! Ярим йил эҳтиёткорлик қилдим, энди тоқатим қолмади. Қани, мени қўйвор! Ҳадемай тонг отади, бориб сигир соғишим керак. Эшиятсанми?

Давидов бошини қўйи солганича индамасди. У ўнг қўли билан қизнинг мулоим кифтини ҳамон қучоқлаб турар, навқирон вужуднинг ҳароратини яқиндан ҳис қилмоқда, соchlарининг хушбўй атри димоғига урилмоқда эди. Аммо уни бу лаҳзада аломат бир ҳис чулғаган: на ҳаяжонланар, на қони жўшар, на эҳтироси, қалбини енгилгина ҳазинлик пардаси ўраб олгандек, нечундир нафас олиши қийин эди...

Давидов ҳушига келиб, чап қўли билан қизнинг лўппи энгагини ушлади-да, унинг бошини кўтариб жилмайди:

— Раҳмат сенга, жоним! Жонгинам Варюха-куюнчак!

— Нима учун?— эшитилар-эшитилмас пицирлади қиз.

— Мени баҳтиёр қилганинг учун, дашном берганинг кўзи кўр гумроҳ деганинг учун! Биласанми, мен баъзан ўйлаб қолардим, ўқтин-ўқтин миямдан шу фикр ўтардики, менинг баҳтим кемамдан орқада, яъни ўтмишда қолиб кетган. Аммо менга ўтмишда ато қилган баҳт ҳам йўқча эди...

— Ҳе, менини ундан ҳам кам эди!— деб қўйди Варя оҳистатина. Бир оз дадилланиброқ илтимос қил-

ди:— Мени илк ва охирги марта бир ўп, раисим, тез-роқ кета қолайлик, бўлмасам тонг отиб қолди. Бизнинг бирга турганимизни жўриб қолишса ёмон бўлади, уят бўлади.

У болалардек оёқ учида туриб, бошини орқасига ташлаганча лабларини чўзди. Аммо Давидов сиполик билан гўдакни ўпгандек, унинг пешанасидан ўпди-да, қатъий гапирди:

— Фам ема, Варюха, ҳаммаси ўнгланиб кетади! Бу ёғига энди сени кузатиб бормайман, кераги йўқ, факт, эртага кўришармиз. Менга каттакон жумбоқни ортиб қўйдинг... Аммо эрталабгача бартараф қиласман, ечмай қўймайман, бу факт! Сен эрталаб онанга айт: кеч-қурун уйдан чиқиб кетмасин, мен сизларникига қуёш ботганда бораман, гаплашамиз, сен ҳам уйда бўл. Яхши қол, қўзигинам! Шундай кетаётганим учун хафа бўлма... Ахир мени, ҳар қалай, сенинг тақдиринг ҳақида ҳам, ўзимнинг тақдирим ҳақида ҳам ўйлашим керакку? Тўғри айтяпманми?

У жавоб кутиб турмади. Индамай бурилди-да, одатдагидек вазмин ва осойишта қадам ташлаганича кета бошлади.

Улар шу тариқа — на яқину, на бегонадек хайрлашиб кетишли мумкин эди-ю, аммо Варя уни эшитилар-эшитилмас чақириб қолди. Давидов истаристамас тўхтаб, паст овоз билан сўради:

— Нима дейсан?

У тез яқинлашиб келаётган қизга анчагина ташвишланганича қараб турарди: «Ажралишаётган бу саноқли дақиқаларимиз мобайннида у яна қандай янги бир қарорга кела қолди экан? Дарди уни ҳар кўйга солиши мумкин, факт».

Варя ғизиллаганча кела солиб Давидовнинг пинжига кирди-да, нафасини унинг юзига уфуриб, дағдана билан шивирлади:

— Ўргилиб кетай жоним, бизникига келмай қўяқол, онам билан ҳам ҳеч нарса тўғрисида гаплашмай қўяқол! Хоҳлайсанми, мен сен билан худди, ҳалиги... ҳалиги, худди Лушкага ўхшаб яшайман? Бир йилча яшаймиз, кейин мени ташлаб кетсанг ҳам майли! Мен Ванькага тегаман. У мени қандай бўлсам ҳам олаве-

ради, сендан қолсам ҳам олаверади! Ўтган куни астайдил: «Қанақа бўлсанг ҳамки, менга суюкли бўласан!» деди. Ҳоҳлайсанми?

Давидов мулоҳаза ҳам қилиб ўтирумай, Варяни итариб юборди, нафрат билан деди:

— Аҳмоқ! Гўдак! Шалоқ! Нима деяётганингни ўзинг биласанми? Эсингни еб қўйибсан, факт! Ҳушингни йиғиб, уйингга жўна, ётиб ухла! Эшитдингми? Мен кечқурун келаман, аммо лекин, мэндан яширина кўрма! Мен сени қаерда бўлсанг ҳам топаман!

Борди-ю, Варя бўйини қисганича индамай кетганида — улар ажралишган бўлишарди, аммо қиз бўшашиган овоз билан оҳиста сўради:

— Нима қиласай бўлмаса, ўргилай, Семён, жоним?

Учрашганларидан бери Давидовнинг юраги яна бир марта орзиқиб кетди — энди буниси ачинишдан эмасди. У Варяни қулоқлаб, унинг эгилган бошини кафти билан бир неча бор силади-да, ўтинди:

— Сен мени кечир, қизишиб кетиб қолдим... Сен ҳам яхши иш қилдингми? Ўйлаб топган мурувватингни қара... Дарҳақиқат, уйингга бор, Варюха жоним, озгина бўлса ҳам ухлаб ол, кечқурун кўришамиз, бўптими?

— Бўпти,— итоаткорлик билан жавоб берди Варя. Чўчиғанча Давидовдан четланди:— Тонг оппоқ оқариб кетипти-ку... Вой шўрим...

Тонг сездирмасдан писиб келмоқда эди, энди Давидов ҳам гўё уйғониб кетгандек, уйлар, оғиллар томларнинг, жимжит бўлиб қолган боғлардаги тепалари туаш тимкўк дарахтларнинг кўзга аниқ ташланувчи қораларини, шарқда эса фира-шира кўриниб келаётган хира қизғиши тонг шафағини кўрди.

Варя билан суҳбатлашаётганида Давидовнинг бехосдан «менинг баҳтим кемамдан орқада қолиб кетган» деб юборгани бежиз эмасди. Унинг бесаранжом ҳаётида шу баҳт деган нарса бўлганмиди ўзи? Очиги, бўлмаган эди.

У уйда очиқ дераза олдида эрталаб алламаҳалгача ўтирди, оғзидан папирос узилмади, бошидан ўтган

ишқ-муҳаббат иштиёқларини бирма-бир эслади, оқибатда маълум бўлдики, ҳаётида энди мамнуният ёки ҳасрат билан ёки ҳатто, ақалли виждон азоби билан бўлса ҳамки, эсга олса арзигулик, бир нарса йўқ экан... Тасодифий хотинлар билан иккала томонда ҳам ҳеч қандай бурч пайдо қилмайдиган тарзда қисқа-қисқа учрашган экан, холос. Осонгина топишиб, машаққатсизгина, оҳ-воҳсиз, оби дийдасиз ажралишиб кетиб, бир ҳафтадан кейин учрашганларида эса мутлақо бегона бўлиб, орият учунгина совуққина илжайишиб, бир-икки оғиз гаплашган бўлишаркан. Қўёнмижоз ишқ-муҳаббат! Шўрлик Давидовнинг эслашга ҳам ори келарди, у ўзининг ошиқона ўтмиши бўйлаб хаёлан кезиб шундай хотираға тўқнаш келиб қоларкан, йирганиб ижирғанар, чунончи, озода матрос формасини бир парча қорамой доғи қандай безаб турса, ҳаётини шундай безаб турган шу нарсадан тезроқ йироқлашишнинг пайдан бўлар эди. Кўнгилсиз нарсани тезроқ унутиш учун саросимада дарҳол янги папирос чекар, ўйлар эди: «Ана жам қилиб кўра қол... Йигиндиси бемаънию бемаза бўлиб чиқяпти, факт! Хуллас, матроснинг ҳисоби йўқча-елча бўлиб чиқяпти. Чакки эмас, хотин зоти билан ажабтовур умр кечирибсан, биронта ҳам теватдан қолишадиган жойинг йўқ!»

Эрталаб соат саккизларга боргандага Давидов шундай қарорга келди: «Бўлди, Варюхага уйланаман. Матроснинг бўйдоқликка барҳам беришига аллақачон фурсат етган! Шундай қилсам, дуруст бўлар. Уни қишлоқ хўжалик техникиумига жойлаб қўяман, икки йилдан кейин қарабсанки, колхозимиз ўз агрономига эга бўлади, қўшни бирга тортамиз. У ёғи бир гап бўлар».

У бир қарорга келса, хаёл суреб ўтирас, ишни пайсалга солишга одатланмаган эди, ювинди-ю, Харламоваларнинг ўйига қараб кетди.

Варянинг онасини ҳовлида учратиб, унга эҳтиром билан салом берди:

— Хўш, саломатмисан, она! Аҳволларинг қалай?
— Бор бўл, раис! Тирикчилигимиз ўтиб турибди. Хизмат? Қаллай саҳарлаб нима иш важидан келдинг?

— Варвара уйдами?

— Ухлаяпти. Ахир сизлар оппоқ тонг отгунча мажлис қиласизлар-ку.

— Ичкарига кирайлик. Уни ҳам уйғот. Гап бор.

— Қани, ичкарига марҳамат қил.

Улар ошхонага киришиді, кампир Давидовга хавотир билән қараганча гапирди:

— Үтири, Варъкани ҳозир уйғотаман.

Ҳадемай меҳмонхонадан Варя чиқди. Бу тонгда, афтидан у ҳам ухламаганга ўшшарди. Кўзлари йиғидан хун бўлган, аммо чеҳраси ички самимий ҳароратдан порлаётгандек, ёшлиарга хос сарин. У Давидовга ер остидан синчков назар ташлаб, кўз уриштириб олди-да, деди:

— Саломатмисиз, ўртоқ Давидов! Бизнинг уйга ҳам эрталабдан меҳмон бўлиб келаркансиз-а.

Давидов скамейкага ўтириб, ғарип каравотда айқаш-үйқаш бўлиб ухлаб ётган болаларга кўз югуртириб олгач, гапирди:

— Меҳмондорчиликка эмас, иш билан келдим. Гап шу, она,— ўрта яшар хотинга ҳорғин кўзлари билан тикилганча, сўз қидириб, бир лаҳза индамай қолди.

Кампир нимдош кўйлагининг текис кўкрагидаги қатларини безовталаниб ўйнаганича печь олдида турарди.

— Гап шу она,— такрорлади Давидов.— Варвара мени яхши кўради, мен ҳам уни яхши кўраман. Қароримиз шундай: уни агрономликка ўқиш учун округга олиб бораман, у ерда шунаقا техникум бор, у икки йилдан кейин агроном бўлади, бу ерга — Гремячийга ишлагани қайтиб келади. Бу йил кузда ишларни битиришимиз билан тўй қиласиз. Мендан бурун унга Обнизовлардан совчилар келган экан, аммо сен қизни қийноқ-қистоқча олма, у умр йўлдошини ўзи топиб олади, факт.

Юзи жиддийлашган она қизига ўгирилди:

— Варъка?!

Қиз эса шивирлай олдигина холос:

— Ойижон!— Онасининг олдига югуриб келиб, икки букилди-да, хурсандлигидан юм-юм йиғлаганича унинг узоқ йиллик узлуксиз меҳнат машаққатларидан буришган қадоқли қўлларини ўпа бошлади,

Деразага ўгирилиб олган Давидов қизнинг пиқ-пиқ йиғлаганча шивирлаётганини эшишиб турди.

— Ойижонгинам, меҳрибонгинам! Мен унинг изидан қолмайман! Нима деса — бажо келтираман. Ишлареса, ишлайман, ўқи деса, ўқийман — ҳаммасини бажо келтираман! Аммо мени, Ванька Обнизовга тегасан-чи, тегасан, деб қийнаб-қистама!.. Унга тегсам шўрим қурийди...

Бир оз жимликдан сўнг Давидов онанинг қалтираган овозини эшиитди.

— Онанинг розилигисиз тил бириктириб қўйганга ўхшайсизлар-а? Хўп, майли, худодан кўрдим, мен Варъкага ёмонлик тиламайман, аммо сен ҳам қизимни иснодга қўйма, матрос. Бутун умидим шу қизимдан! Кўярпсанми, уйнинг каттаси шу, рўзғор бошлиғи, мен ғамдан, болаларнинг ташвишидан, камоли муҳтоҷликдан... қандай бўлиб қолганимни кўярпсанми? Эрта кунда қариб қолдим! Мен сиз матрос халқининг қанақаликларингизни уруш вақтида хўп кўрганман... Аммо сен бизнинг оиласизни хароб қилма!

Давидов шартта ўгирилиб, хотинга тик боқди:

— Сен, онажон, матросларга тақилма! Биз қандай жанг қилиб, казакларингизни қандай боплаб урганимиз тўғрисида бир кунмас бир кун ёзиб қолишар, факт. Бизнинг номусимиз билан муҳаббатимиз важига келсак, номусли бўлишни ҳам, вафодор бўлишни ҳам эплаб келганимиз, оддий фуқаро орасидаги аллақайси аплаҳлардан кўра анчагина номуслироқ, вафодорроқ бўлишни бундан кейин ҳам эплаймиз! Варъкадан қўнглинг тўқ бўлсин, мен уни сира хафа қилмайман. Бу ёғига нима қилишимиз кераклиги важига келсак, бир нарсани илтимос қилмоқчиман: агар икковимизнинг бош қўшишимизга рози бўлсанг, уни эртагаёқ Миллеровога олиб бориб, техникумга жойлаштираман, ўзим тўй бўлгунча сизларнига кўчиб келиб шу ерда истиқомат қилиб тураман. Бегона одамларнида тургандан кўра сизларнида турсам, менга ҳам енгилроқ бўлади, қолаверса, энди сизларнинг оиласари нгизни боқиб, қарашиб туришим ҳам керак-ку. Варвара бўлмаса, болалар энка-тенкангни чиқариб юборишиди-ку! Мен сизларнинг ташвишларингизни ўз

гарданимга ола қоламан. Гарданим бақувват, хотиржам бўл, оғирликни кўтараверади, факт! Ишимиз шутартибда бўлади. Хўш, келишиб олдиқми?

Давидов катта-катта қадам ташлаб бориб, унингчуваккина елкасидан қучоқлади, бўлажак қайнанаси ёшдан ҳўл лаблари билан ёноғидан ўпганини сезаркан, ғаши келиб гапирди:

— Хотин-халаж зоти ҳўп йиглоқи бўлади-да! Бунакада энг бағри тош одамни эритворасизлар. Ҳа, кампир, бир амаллаб кунимизни кўриб кетармиз-а? Сенга гапнинг ростини айтаманки, кунимизни кўриб кетамиз!

Давидов шоша-пиша чўнтагидан ғижимланганроқ бир даста пул олди, уни ийманиб столдаги нимдошигина дастурхон остига тиқди-да, хижил бўлганча жилмайиб, фудуллаб гапирди:

— Бу ишчилик вақтимдаги жамғармалардан... Менга тамакига бўлса бўлгани... Камдан-кам ичадиган одамман, сизларга пул керак бўлиб қолар. Варваранинг кетишига кийим-бош олиш керак, болакайларга ҳам у-бу олиб берарсан... Ҳўп, гап тамом, мен кетдим, бугун районга ҳам тушиб чиқишим керак. Кечқурун қайтаман, чамадончамни олиб келаман, сен ҳам, Варвара, отланиб тур. Эртага эрталаб, тонг отиши билан округга жўнаймиз. Ҳўп, яхши қолинглар, меҳрибонларим.— Давидов ўзига интилган Варя ва унинг онасини икки қўли билан қучоқлади-да, шартта бурилиб эшик томон қараб кетди.

Унинг одимлари қатъий, ишончли, ҳамон ўша-ўша матросларга хос саллониброқ юрар, аммо танишларидан биронтаси юришига разм солса унда янги бир нарса кўрган бўлар эди...

* * *

Давидов эртасига одатича райкомга тушиб чиқди ва Нестеренодан округ партия комитетига бориб келишга рухсат олди.

— Сен у ерда кўп ҳаяллаб қолма,— таъкидлади Нестеренко.

— Мен бир соат ҳам ҳаялламайман, сен округ комитети секретарига телефон қилисанг, у мени қабул

қилиб, Харламовани техникумга жойлаштиришимга ёрдам берса.

Нестеренко муғамбirona кўзини қисди:

— Сен мени лақиллатаётганинг йўқми, матрос? Билиб қўй, агар мени алдаб, бу қизга уйланмасанг унда ўзингдан кўр! Сенинг бунақа донжуанлигингни иккинчи марта кечириб ўтирумайман! Лукеръя Нагульнованинг йўли бошқа эди — ҳар қалай, эрдан чиққан хотин эди, бунда бўлса масала бутунлай бошқача!..

Давидов Нестеренкога жаҳл билан қаради-да, гапини охиригача ҳам эшиitmай унинг сўзини бўлди:

— Нима бало бўлди, секретарь, сен менинг тўғримда ёмон ўйларга боряпсан, факт! Ахир мен унинг ойиси билан гаплашиб, бу ишнинг бутун эми-удумига амал қилиб унашдим-ку! Бундан ортиқ нима қил дейсан, менга нимага ишонмайсан?

Нестеренко аста сўради:

— Сенга охирги саволим. Семён, сен у билан турган эмасмисан? Борди-ю, шундай бўлса, нима учун ўқишга кетишдан олдин у билан никоҳингни расмийлаштириб олгинг келмаяпти? Сен Ленинграддан ҳеч кимни, чунончи, олдинги хотинингни кутаётганинг йўқми? Тушунсанг-чи, жин урган тўнгак, мен сендан, хўш, бамисоли акандек ташвишланяпман, сенинг эркакларга хос одоб-ахлоқингдан умидим пучга чиқса қаттиқ ўкинган бўлардим... Мен сенинг кўнглингга бекорчи ишқибозликдан қўл солиб кўраётганим йўқ... Хафа бўлма, эшиитдингми? Хўп, охирги гапимни ҳам айтай: сен бошвоқсиз бўлиб олиш учун Харламовани ўқишга жойлаштироқчимасмисан? Уни кўзингдан нарироққа жўнатиб юбормоқчимисан?.. Эсингни йиғ, оғайни!

Давидов отни тез йўрттириб келгандан увишиб қолган оёқларини ҳорғинлик билан эгиб, худди Нестеренко ўтирган креслонинг рўпарасидаги эскироқ стулга вазмингина ўтириди-да, тол новдадан тўқилган жўнгина креслонинг қирилган ён суюнчиқларига лоқайдикилди, кейин эса акация буталари орасидаги чумчукларнинг тинимсиз чирқиллашига қулоқ солди, Нестеренконинг заҳил юзига, эски гимнастёркасининг сузилган ерлари пухталаф тикилган енгларига қараб қўйди-да, гапирди:

— Баҳор кези шудгорда сен билан танишганимда сенга дўстлик изҳор қилиб чакки қилган эканман... Шунинг учун чакки қилган эканманки, сенинг ҳеч кимга ишонгинг келмас экан... Хўп, жин урсин сени, секретар! Сен, афтидан, фақат ўзингга, шунда ҳам дам олиш кунларигина ишонадиганга ўхшайсан, қолганингга бўлса, ҳаттоқи дўстлик изҳор қилган одамларингга ҳам ҳамиша аллақандай аҳмоқона шубҳа билан қаараркансан... Шу феълинг билан район партия ташкилотига қандай қилиб раҳбарлик қиляпсан? Сен аввал ўзингга яхшилаб ишониб олгин, кейин бошқаларга шубҳа билан қарагани!

Нестеренко ижирғаниб кулиб қўйди:

— Хафа бўлма, деб илтимос қилсам ҳамки, бари бир хафа бўлибсан-да?

— Хафа бўлдим!

— Одам бўлмай кет!

Баттар толиққан Давидов ўрнидан турди:

— Мен борай, бўлмаса сен билан уришиб қоламиз...

— Мен бундай бўлишини хоҳламасдим,— жавоб берди Нестеренко...

— Мен ҳам.

— Хўп, яна беш-ўн минутча ўтиратур, келишолмаган гапларимизни бир ёқлик қилармиз.

— Дуруст,— Давидов яна стулга ўтириб, деди:— Мен қизга ёмонлик қилганим йўқ, факт! У ўқиши керак. Оиласи катта, энг каттаси ўзи, бутун рўзгор зиммасида... Тушундингми?

— Тушундим,— деди унга жавобон Нестеренко, аммо Давидовга ҳамон жиддий ва бегона назар билан қараб турарди.

— У ўқишига узил-кесил жойлашганидан кейин, ўзим бўлса кузги ишларни саранжом-саришта қилганимдан кейин уйланмоқчиман... Хуллас, дехқонларинг тўй-ҳашами ўрим-йигимдан кейин бўлади,— ноҳушлик билан кулиб қўйди Давидов. Нестеренконинг чеҳраси очилгандек бўлиб, гапини диққат бераб тинглаётганини кўргач, яқингинадагидек зўрма-зўракилик ва қандайдир ички тортинчоқлик билан эмас, астойдил давом эттириди:— Ленинградда ҳам, ундан олдин

бўлган жойларимда ҳам уйланган эмасман, бундай хавфли ишга Варюха билан биринчи марта қадам қўйяпман. Фурсат ҳам етган: ҳадемай қирқقا ҳам кириб қоламан.

— Ўтиздан кейинги ҳар бир ёшни ўн йилданга ҳисоблаяпсанми? — жилмайди Нестеренко.

— Гражданлар уруши-чи? Мен унда ўтган ҳар бир йилни ўн йилдан ҳисоб қиласдим.

— Кўп-ку...

— Сен ўзингга разм солгин, ундан кейин тўғри, дейсан.

Нестеренко ўрнидан туриб, хонани айланди-да, қунишганча қўлларини бир-бирига ишқалаб, иккиланиб жавоб берди:

— Қайдам энди... Аммо гап бу тўғрида эмас, Семён. Мен сенинг бу ўринда худди Лукерья Нагульнова билан бўлганингдагидек қоқилиб кетмаслигингга, бу ишинг пухта эканлигига кўзим етганидан кейин севиниб кетдим. Начора, хайрли ишингни қўллаб-қувватлайман, сенга баҳт-саодат тилайман!

— Кузда тўйимизга борасанми? — кўнгли юмшаброқ сўради Давидов.

— Биринчи меҳмонинг бўламан! — деди Нестеренко, унинг юзида яна аввалгидек самимий хушчақацлик порлади, хира кўзларида аввалгидек шўх учқунлар чақнади. — Биринчи деганим мұтабарлик маъносида эмас, тўйинг бўлишини эшитишим билан биринчи бўлиб кириб бораман, демоқчиман.

— Хўп, яхши қол! Окружком секретарига телефон қилиб қўй.

— Шу бугуноқ. Бор, аммо у ерда ҳаяллаб қолма.

— Гизиллаб бориб келаман!

Улар қаттиқ қўл сиқишиб хайрлашдилар.

Давидов қуёш қиздирган сертупроқ кўчага чиққач ўйлади: «Ўзига, илгариги соҳти-сумбатига ўхшамай турганлиги бежиз эмас! У қаттиқ касал-ку! Ранги ҳам заҳил, чакаги ҳам худди ўликнинг чакагидек ич-ичига кириб кетибди, кўзлари ҳам хира... Мен билан ҳам шу сабабдан шундай гаплашгандир-да?..»

Давидов отига яқинлашиб қолган ҳам эдики, Нестеренко деразадан бошини чиқариб, уни секин чақирди:

— Бир лаҳзага қайтиб кир, Семён!

Давидов райкомнинг зинапоясидан истар-истамас чиқиб борди. Нестеренко яна ҳам буқчайиб, бутун гавдаси аллақандай чўкканча Давидовга қаради-да, шундай деди:

— Мен сен билан бир оз қўполроқ гаплашгандирман, аммо сен мени кечир, оғайнни, менинг бошимга катта кулфат тушди: безгагимнинг устига, жин урсин, аллақаёқдан сиљ ҳам орттириб олибман, бу касал мени забтига олиб, роса хуруж қиляпти. Ўпкамнинг иккала томони ҳам тешилган. Эртага санаторийга кетяпман, окружком жўнатяпти. Ўрим-йиғим бошланай деб турганда райондан чиқиб кетгим келмаган эди-ю, аммо начора, ўлганимнинг кунидан кетяпман. Аммо сенинг тўйинггача қайтиб келишга ҳаракат қиласман. Сенга оби дийда ҳам қилиб олдим-а?.. Йўқ, бошимга бехосдан келиб тушган кулфатдан дўстимга ҳасрат қилмоқчи эдим, холос.

Давидов столни айланиб ўтиб Нестеренкони индамай қучоқлади-да, унинг нам ва иссиқ юзидан ўпгач, шундай деди:

— Бор, даволан, азизим! Бу дарддан ёшларгина ўлиб кетишади, сен билан икковимизни ҳеч қандай дард йиқитолмайди!

— Раҳмат,— деб қўйди Нестеренко эшитилар-эшитилмас.

Давидов катта-катта қадам ташлаганча қўчага чиқиб, отига минди-да, унга илк бор аччиқ қамчи босиб станица кўласидан қаттиқ чоптириб кетди. У гириҳ тишлари орасидан ғазаб билан тўнгилларди:

— Мудраганинг мудраган, шалпанг қулоқ иблис!..

Тушдан сўнг хуторга қайтгач, Давидов тўппа-тўғри Харламоваларнинг қўрасига қараб кетди, эшик олдида отдан тушиб ҳовлига эран-қаран кириб келди. От устида узоқ йўл босиб бути бичилганидан оёқларини алпанг-талпанг ташлаганича зинапояга яқинлашаётганини ичкаридан кўришган шекилли, ярим кун ичидагунга кўникиб қолган бўлажак қайнанаси энди уни уй

остонасида бошқачароқ, очиқ чеҳра билан қарши олди:

— Жон болам, уриниб қолдингми дейман? Жуда ҳам тез бориб келдинг-а! Станица билан бу ернинг ораси — озмунча йўлмас! — деб қўйди ясама ҳайрихоҳлик билан у Давидовнинг чатаногини керганча остоная амал-тақал билан келаётганини кўраркан, ичида эса, бўлажак куёвининг қамчини олифтагарчилик билан силкитса-да, оёқларини аранг сургаб келаётганидан бегидир кулган бўлса ҳам ажаб эмас.. Ҳамма билавермаганида ҳам, бу кекса казак хотин «рус» отлиқларининг отда қандай юришларини яхши билиши керак эди.

Ичида бу хайрихоҳликдан ғаши келиб, Давидов дағаллик билан деди:

— Сен ҳадеб айланиб-ўргилаверма, онажон! Варвара қаёқда?

— Тикувчи қидириб кетди. Эски-тускидан бўлса ҳамки, кийим тикитириш керак-ку ахир? Келиб-келиб топган қайлиғингни қара, йигитча! Эгнида эски юбкасидан бошқа ҳеч балоси йўқ-ку! Кўзинг қаёқда эди?

— Мен бугун эрталаб юбкасига эмас, қизингнинг ўзига совчи бўлиб келган эдим,— деди Давидов иссиқдан қовжираган лабларини ялаб.— Сенда чанқов босдига муздек сув борми? Юбка деган нарса топилиб кетади, юбка важига шошилмаймиз. Варвара қачон келади ўзи?

— Ким билади дейсан. Уйга кир! Хўш, қалай, Варъкани ўқишига жойлаштириш важини каттаконларинг билан келишиб олдингми?

— Бўлмаса-чи! Эртага округга жўнаймиз, қизингни узоқ йўлга тайёрла. Ҳа, нима бўлди? Оби дийда қилишга тушмоқчимисан? Кеч қолдинг!

Она дарҳақиқат йиғлаб юборди — аччиқ-аччиқ ўқраб йиғлади, аммо тез орада ўзини босиб олиб, кўзларини кирроқ пардага артди-да, пиқ-пиқ қилганча ўкинч билан гапирди:

— Уйга кирсанг-чи ахир, худо кўтаргур! Шундай каттай калон гапни қўрада туриб гаплашамизми?

Давидов уйга кириб, сўрига ўтириди-да, қамчинини унинг тагига ташлади.

— Она, сен билан нимани гаплашардик? Масала равшан, ҳал бўлган. Сен билан келишиб олсак: мен бу кунларда қаттиқ чарчадим, менга ичгани сув берсанг, кейин мен шу ернинг ўзида бир соатгина мизғиб олсам, уйғонсан кейин гаплашаверамиз. Отни бўлса, болаларимиздан биронтаси колхоз отхонасига ташлаб кела қолсин.

Кампирнинг чеҳраси очилиб, деди:

— Отдан ташвишланмай қўяқол, уни болалар олиб бориб ташлаб келишади, сен бир оз сабр қил. Мен сенга муздеккина сут олиб келаман. Ҳозир ертўладан олиб чиқаман.

Ҳоргинлик, уйқусиз кечалар Давидовни толиқтириб қўйган эди, сутни кутиб ўтиrolмади: кампир қиров боғлаган сутли хурмачани эҳтиёт билан кўтарганча кириб келганда Давидов ўтирган жойига чўзилиб, қўлини баҳузур осилтириб оғзи очилганча ухлаб қолган эди. Кампир уни уйғотди. Давидовнинг орқага ташланган бошини эҳтиёт билан кўтарди-да, тагига кўк жилдли кичкинароқ бир ёстиқ қўйди.

Хонанинг иссиқ ҳавоси ва чарчоқлик элитган Давидов икки соатча миқ этмай ухлади-да, ёш болаларнинг шивирлашидан, қиз боланинг ҳароратли меҳрибон қўли тегишидан уйғониб кетди. У қўзини очаркан, сўри олдида ўтириб унга меҳр билан жилмаяётган Варя ва унинг атрофида уймаланишаётган бешта болани — Харламовлар зотининг ҳамма насли-насабини кўрди.

Болалардан энг кичиги, афтидан, энг довюраги Давидовнинг каттакон қўлини жажжи қўллари орасига ишонч билан олиб унга юзини қўяркан, ботинқирамай сўради:

— Семён амаки, шу тўғрими, энди сен бизникода туармишсан-а?

Давидов сўридан сёқларини осилтириб, болага уйқули қўзлари билан жилмайди:

— Шундай, ука! Бўлмаса-чи? Варя ўқишига кетади, ахир сизларни ким боқади, кийим-бошингизни ким қилиб беради? Энди бу ишни қилишимга тўғри келади, факт! — деди-да, гўдакнинг пахмоқ сочли иссиқ бошини қўли билан оталарча силади.

Эртасига тонг отмасидан анча бурун Давидов пи-чанхонада ухлаб ётган Шчукарь бобони уйғотди да, унинг отларни аравага қўшишига қарашиб, Харламоваларнинг қўрасига қараб жўнади. Қия ёпилган дарчанинг тирқишидан ошхонада чироқ ёниб турганини кўрди.

Варяning онаси овқат пиширмоқда, кенг ёғоч краватда болалар кўндалангига қатор ётишар, сафарга отланган Варя эса ўз уйига қисқа бир фурсатга келган меҳмондек сўрида омонатгина ўтирап эди.

У Давидовни баҳтиёр ва миннатдор табассум билан қарши олди:

— Мен аллақачон отланиб бўлиб, сени кутиб ўтирган эдим, раисгинам.

Варяning онаси Давидов билан сўрашгач, қўшимча қилди:

— Биринчи товуқ ўтиши биланоқ отланишга тушган. Ёўралик, ёшлиқ экан-да! Тентаклигини гапириб ўтирмасам ҳам бўлади!.. Ҳозир нонушта тайёр бўлади. Қани, бу ёқقا ўтири, ўртоқ Давидов.

Учовлари наридан-бери кечаги карам шўрвани ичиб, қовурилган картошка ейишиди, устидан сут ичишиди. Столдан тураркан Давидов кампирга миннатдорчилик билдириб, деди:

— Йўлга тушайлик. Онанг билан хайрлаш, Варвара, лекин узоқ бўлмасин. Қўзларингнинг сувини оқизмай қўяқолинглар, кўришмайдиган бўлиб ажralишаётгандаринг йўқ. Округга борадиган бўлсам, сени албатта ўзим билан бирга олиб кетаман, онажон, қизингни кўриб келасан... Мен отлардан хабар олай.— У оstonада туриб, Варядан сўради:— Биронта иссиқ кийим-кечак олиб кетяпсанми?

Варя ҳижил бўлиброқ жавоб берди:

— Паҳталик кофтачам бор эди, аммо жуда эскириб кетган...

— Бўлаверади, балга кетаётганинг йўқ, факт.

Бир соатдан сўнг улар хотордан анча йироқлашиб кетишган эди. Давидов Шчукарнинг ёнида, Варя эса дрожкининг иккинчи томонида ўтиради. У аҳён-

аҳёнда Давидовнинг қўлини олиб уни бир сиқиб қўярди-да, яна ўзининг аллақандай ўйларига бериларди. Қиз ўзининг ёш умрида ҳали хутордан бирон марта ҳам узоқ муддатга чиқиб кетган эмас, бир неча марта гина станицага тушиб чиққан, ҳали темир йўлни ҳам кўрган эмас, шаҳарга қилаётган биринчи сафари юрагини завқ, ваҳима, иштиёқ билан чулғамоқда эди. Ўй ичидан, дугоналаридан кўнгил узиб кетиш унга оғир, шунинг учун ҳам ўқтин-ўқтин кўзига филт-филт ёш келар эди.

Улар паромда Дондан ўтиб, отлар жой юрганча Дон бўйидаги тепаликка кўтарилаётганда Давидов дрожкидан сакраб тушди-да, Варя ўтирган томонда кетабошлиди. У йўл ёқасидаги пастак ёвшанлардаги қуюқ шабнамни этиги билан дув-дув тўкканча борар, шабнам қуёш чиқмаганилиги учун ҳали туссиз, эрталаб қуёш ёйилиб кетганда камалакнинг ҳамма ранглари билан товланадиган пайтдагидек товланмас эди. Давидов аҳён-аҳёнда Варяга қараб қўяр, унга далда бериб жилмаяр, оҳиста гапирав эди:

— Қани, Варюха, кўз ёшингни бас қил-чи.

Ёки:

— Ахир ўзинг кап-катта қизсан-ку, катта кишилар йиғласа уят бўлади, қўй йиғлама, жоним!

Хун бўлган Варя итоаткорона равишда мовий дуррачасининг учи билан ҳўл юзларини артиб, нимадир деб сассизгина шивирлаганча, унга жавобан ийманиб жилмаяр эди. Дон усти тоғларининг эгри-бугри оқиш тармоқларини туман қуршаб ётар, туман чулғаганидан тепаликнинг ўркачи ҳам кўринмас эди.

Бу эрта тонг пайтида на дашт баргизуби, на сарик жумрушқанинг шалвираган новдачалари, на узоқдаги тепаликдан кўринган, йўлга яқин жавдар ўзларига хос кундузги атиларини таратар эди. Ҳатто ҳиди ўткир ёвshan ҳам исини йўқотган — фалла ва ўт-ўланларга тушган қалин шудринг ҳамма ҳидларни босиб кетган, шудринг шу қадар қалин эдики, гўё бу ерда яқингинада июль ойига хос бодроқ ёмғир ёғиб ўтгандек эди. Шунинг учун ҳам бу осуда тонг пайтида дашт устида иккигина оддий ҳид — шабнам билан у боса тушган кўча тупроғининг ҳиди ҳукмрон эди.

Эскигина брезент плашч кийиб белини ундан ҳам эски қизил белбоғ билан боғлаб олган Шчукарь бобо қунишиб қўнқайиб ўтириб олганча, одатига хилоф равишда узоқ-узоқ индамас, ўзлари жадал билан кетаётган отларни чуҳ-чуҳлаб қамчинини силтар, ҳуштак чалганча лабларини чапиллатиб қўяр эди.

Аммо қуёш чиққач, унга жон кириб, сўраб қолди:

— Хуторда миш-миш гап, Сёмушка, сен Варькага уйланмоқчимишсан. Шу ростми?

— Рост, бобо.

— Ҳа, бу шундай ишки, ўзингни минг оҳангга солганинг билан, ахир бир кун бориб уйланишдан қочиб қутуломайсан, яъни мен эркак зотини айтяпман,— деди оқилона тарзда чол. Кейин давом эттириди:— Мени ҳам эндигина ўн саккизга қадам қўйганимда марҳум ота-онам уйлантирган. Мен ўшандা ҳам ўлгудек қув эдим, мен уйланиш деган нарса қандай жин урган даҳмаза эканлигини ўша вақтдаёқ билар эдим... Уйланмасликка шу қадар уриндимки, ёруғ дунёда ҳеч ким бунчалик уринмаган бўлса керак! Мен ғоятда яхши билардимки, уйланиш — айшу сафо эмас. Мен ўзимни нима кўйларга солмадим, ўргилай Сёмушка! Ўзимни жинниликка ҳам солиб кўрдим, касалга ҳам, тутқалоги борга ҳам. Жинниликка солганим учун отам раҳматли қаҳри қаттиқ одам эди, икки соат қамчи билан савади, қамчининг сопи елкамга тушаверганидан синди-ю, шундан кейин тинди. Тутқалоги борга солганим учун қайиш тизгин билан савади. Ўзимни касалга солиб, ичак-чавогим ириб-чириб кетган, деб бақиришга тушганимда у фиқ этмасдан қўрага чиқиб ченанинг шотисини суғуриб олиб келди. Қари иблис омборнинг тагига бориб ченани бузиб шотисини суғуриб олиб келгани эринмади. Шотини олиб кирди-да, менга мулойимгина: «Қани тур-чи, ўғлим, мен сени бир тузатиб қўяй» деди. Э-ҳа, дедим шотини суғуриб олиб келишгаки эринмадими, бу дори-дармони билан жонимни суғуриб олишга ҳам эринмайди. Унинг қўлига шоти тушиб қолдими, омон қутуломайман, дедим... Отам сал тентакнамороқ эди, бунақалигини муштдеклигимдан билардим... Шундан кейин худди бирор тагимга дод сув қўйиб юборгандек кара-

вотдан сапчиб тушдим. Уйлана қолдим. Ҳўш, мен тентак одамга қандай бас кела олардим? Ана ўшандан бошлаб менинг турмушим айқаш-үйқаш, остинустун бўлиб кетди. Ҳозир менинг кампирим сал кам саккиз пуд келса, ўн тўққиз яшарлигидаги... — Чол ўй сурганча лабларини ямлаб кўзларини юқорига олайтирди-да, гапини кескин тугатди: — ўн беш пуддан кам эмас эди, ёлғон гапирсам худо урсин!

Давидов қотиб-қотиб кулганча, эши билар-эши билар сўради:

— Кўп эмасми?

Унинг бу гапига Шчукарь бобо анчагина ишонч билан эътиroz билдириди:

— Сенга бари бир эмасми? Бирон пуд ошиқ-камлигининг сенга нима фарқи бор? Ундан азоб-уқубат чекиб, жангларига бардош берган сен эмас, мен-ку? Хуллас, бу эр-хотинлик шу қадар жонимга теккан эдикни, ўзимни осишига ҳам рози бўлганман. Лекин хотиним хомтама бўлади! Мен жўшсам ёвқур бўлиб кетаман! Ана шунаقا танг келган пайтларда, аввал сен ўзингни ос, мен ўзимни кейин осарман, деб ўйлардим...

Шчукарь бобо хушчақчақлик билан бош чайқаб ҳиринглаб кулди, афтидан, ўзининг турли-туман хотиралари эсига тушиб кетди, шекилли, гапларини жон қулоғи билан тинглаётганларини кўриб бажонидил давом эттириди:

— Эҳ, қимматли гражданлар ва... сен ҳам, Варька! Кампирим билан икковимизнинг ишқ-муҳаббатимиз ёшлигимизданоқ қаҳрли эди! Қани менга айтингларчи: нима учун қаҳрли эди деяпман? Шунинг учунки, умримиз бўйи ишқ-муҳаббатимиз ғазабда ўтди, қаҳр билан ғазаб бўлса — иккови бир сўз, мен Макарушканинг йўғон луғатида ўқиганман.

Шундай қилиб, кечалари уйғониб қолсам, хотиним гоҳ кўз ёши тўкиб йиғлаб ўтирган, гоҳ кулаётган бўларди, мен ичимда: «Йиғлайвер, жоним, хотин кишининг кўз ёши — оби раҳмат, мен ҳам сен билан турганимга юрагим чапак отиб кетаётгани йўқ, мен йиғламаяпман-ку, ахир!» деб ўйлардим.

Шундай қилиб, эр-хотин бўлиб турмуш кечира

бошлаганимизга беш йил бўлганда шундай бир ҳоди-са юз берди: қўшним Поликарп ҳарбий хизматдан қайтиб келди. У Атаман полкида хизмат қиласади, гвардиячи эди. Аҳмоққа ўша ерда мўйлов бурашни ўргатиб қўйишган экан, уйига келганидан кейин ҳам менинг хотинимнинг олдида мўйловини бурайдиган бўлди. Бир кун кечқурун қарасам, улар четаннинг олдида туришибди, хотиним — ўз томонида-ю, у ҳам ўз томонида. Мен ҳеч нарсани кўрмаган одамдек ўзимни кўрликка солиб уйга ўтиб кетдим. Эртасига кечқурун яна туришибди. Э-ҳа, бу чакки иш-ку, де-дим. Учинчи куни жўрттага уйдан чиқиб кетдим. Қош қорайганда қайтиб келсам — яна туришибди! Маш-машани қаранг! Бирон чорасини кўрмасам бўлмайди-ган. Шуни ўйлаб топдим: уч қадоқли қадоқтошни сочиқнинг орасига жойлаб, Поликарпнинг қўрасига пусиб кирдим, эшитиб қолмаслиги учун яланг оёқ юриб бордим, у мўйловини бураш билан овора бўлиб турганида бор кучимни йифиб орқасидан боплаб ту-ширдим. У худди кундага ўхшаб четаннинг тагига узала туша қолди.

Бир неча кундан кейин Поликарп билан учрашиб қолдим. Бошини танғиб олибди. Бўшашганча менга: «Аҳмоқ! Мени ўлдириб қўйишинг мумкин эди-ку» дей-ди. Мен унга: «Икковимиздан қайси биримиз аҳмоқ эканлигимиз ҳали маълум эмас — четаннинг тагига узала тушганимизми, ёки тикка турганимизми» дедим.

Ушандан кейин ишлар дуруст бўлди-кетди! Улар четаннинг олдида қаққайиб турмайдиган бўлишди. Лекин ҳадемай хотиним кечалари тишларини фижир-латиб чиқадиган бўлиб қолди. Тишининг фижирлаши-дан уйғониб кетиб: «Тиш-пишинг оғриётгани йўқми?» деб сўрайман. У менга: «Хира бўлма, аҳмоқ!» деб жавоб беради. Мен ётган жойимда: «Икковимиздан қайси биримиз аҳмоқ эканлигимиз ҳали маълум эмас — тишларини фижирлатаётганимизми ёки бе-шиқдаги ювощ боладек мириқиб пиш-пиш ухлаётга-нимизми» деб ўйлаб ётаман.

Гапларини эшитиб бораётганлар чолни хафа қи-либ қўймаслик учун жимгина ўтиришарди. Варя қо-тиб-қотиб куларди, Давидов Шчукарга орқасини ўги-

риб олиб юзини кафтлари билан тўсганча ўқтин-ўқтин қаттиқ йўталарди. Шчукаръ эса ҳеч нарсадан бехабар ҳолда мароқ билан гапини давом эттиради:

— Қаҳрли ишқ-муҳаббат баъзан ана шунаقا бўлади! Хуллас, бу уйланиш деган нарсадан камдан-кам яхшилик чиқади, мен қари чоннинг миясига келган фикр шу. Еинки, чунончи мана шу бир ҳодисани олиб кўрайлик: эски замонда хоторимизда ёш бир муаллим бўлгувчи эди. Унинг қайлиғи бор эди, савдо-гарнинг қизи, у ҳам ўзимизнинг хотордан эди. Ўша муаллим шунақанг башанг, шунақанг кўркам бўлиб юрардики,— мен кийим-бошини айтяпман,— худди жўжа хўрозга ўхшарди, пиёда юрмасдан, кўпинча велосипед миниб юрарди. Ўша вақтда велосипед эндинга чиққан эди. Агар ўша биринчи велосипед хотордаги одамларга қанчалик антиқа кўринган бўлса, итларга қанчалик антиқа кўринганини айтмасам ҳам бўлади. Муаллим кўчада пайдо бўлиб, велосипеднинг филдираклари ялтиллаб қолса борми, лаънати итларнинг эслари тескари бўлиб кетарди. Муаллим эса ҳовлиқиб улардан тезроқ қочиб қутулишнинг пайдан бўлади, машинасининг устида бурни ерга текқудек буқчайиб олганча оёғини шунақанг ишлатадики, кўзинг қамашиб кетади. Қанчадан-қанча майдада кучуларни босиб кетди, аммо лекин ўзи ҳам улардан роса таъзирини еди!

Бир куни эрталаб даштдаги бияни олиб келиш учун майдондан ўтиб кетаётсан қаршимдан бир гала ит келяпти-да. Олдинда битта қанжиқ, орқасидан бўлса, одатдагидек, ўтизистача, ортиқ бўлса ҳам ажаб эмас, бир тўда теват эргашиб келяпти. Ўша вақтда хоторимиздагилар, лаънатилар, бу итларни шу қадар кўп урчитиб юборишган эдики, сон-саноги йўқ эди. Ҳар бир қўрада — иккитадан, уттадан теват бўларди, теват бўлганда ҳам қандақалари денглар! Уларнинг ҳар бири йиртқич йўлбарсдан баттар, ҳар қайсиси бузоқдек келарди. Одамлар сандиқлари билан ертўлаларини кўз қорачигидек сақлашарди. Нима фойда чиқди? Бари бир уруш бор буд-шудларини совуриб юборди... Шундай қилиб, ҳалиги бир гала ит олдидан чиқиб қолди. Мен эсим борида юганни улоқтириб,

энг абжир мушукдек бир секунднинг ичида телеграф симёфочига ғизиллаб чиқиб олдим-да, оёғимни чирмаштирганча туравердим. Шу орада фалокат босиб ўша муаллим машинасининг қулоғи билан ғилдиракларини ялтиллатганча келиб қолса бўладими! Итлар уни қуршаб олишди. У машинасини ташлаб, жойидан жилолмай қолди, мен унга: «Аҳмоқ, мен турган симёфочга чиқиб ол, бўлмаса улар сени пора-пора қилиб юборишади!» деб қичқирдим. У шўрлик менинг ёнимга чиқа бошлиди, аммо бир оз кечикиб қолди: симёфочга ёпишиши билан итлар бир секунддаёқ уни янги диогональ чоловорини ҳам, зар тугмали пиджагини ҳам, ҳамма ич кийимларини ҳам шилиб туширишди. Теватларнинг энг қутурганлари бўлса, баъзи бир жойларда яланғоч этга ҳам етиб бориб қолишиди.

Улар муаллимни роса калака қилишга, яна йўлларига равона бўлишди. Муаллим бўлса симёфочда ўтирибди, устида бори-йўғи зартожли фуражкаси, симёфочга чиқиб кетаётганида унинг ҳам соявонини синдириб олган.

Икковимиз ҳам жон сақлаган жойимиздан тушиб келдик — олдин у, унинг орқасидан мен: негаки мен ундан юқорироқда, ўтган симларни тутиб турадиган шишаларнинг таггинасида ўтирган эдим. Шундай қилиб, навбат билан пастга тушдик — у туриш-турмуши шир яланғоч, менинг эгнимда бўлса оддий кўйлак билан каноп чоловор, холос. У мендан: «Амаки, чоловорингни менга бирпас бериб тур, яrim соатдан кейин қайтариб бераман» деб илтимос қилди. Мен унга: «Ўргилай, ичимда иштоним бўлмаса сенга чоловоримни қандай қилиб бераман? Сен машинангда жўнаб кетасану, мен куппа-кундуз куни иштончанг симёфочнинг тагида каққайиб тураманми? Кўйлагимни вақтинча бериб тўришим мумкину, аммо афв этасан, чоловоримни беролмайман» дедим. Кўйлагимни оёғини енгиларидан чиқариб кийиб олди-да, секин жўнади шўрлик. Ғизиллаб чопса-ку маъқул бўларди — у секин юриб, шунда ҳам тушовланган отга ўхшаб кетаётган бўлса, қандай қилиб чопсин? Хуллас, қайлифи савдогарнинг қизи уни менинг кўйлагимда кўриб қолади... Шу билан ўша куниёқ уларнинг ишқ-муҳабаб-

батлари адойи тамом бўлди. Муаллим ошигич суратда бошқа мактабга ўтишга мажбур бўлди. Бир ҳафтадан кейин шу ҳодиса туфайли — бир томондан шарманда бўлиб, бир томондан итлардан қўрқиб, бир томондан қайлиги ташлаб кетиб, бутун ишқ-муҳаббатлари инига уриб кетиб — йигит ногаҳон силга дучор бўлди-ю, қазо қилди. Лекин мен бунисига унча ишонмайман: у аслида қўрқиб кетганидан, шармандаликка чидаёлмаганидан ўлган бўлса керак. Бу лаънати ишқ-муҳаббат одамни шунаقا кўйларга солади, турли-туман уйланишлар-у, тўй-ҳашамларни айтмай ҳам қўяқолай. Сен ҳам, Сёмушка, ўргилай, Варькага уйланишдан олдин юз томонлама ўйлаб кўрсанг бўларди. Уларнинг ҳаммаси ҳам бир гўр, Макарушка икковимиз уларни жинимииздан ҳам баттар ёқтирумаслигимиз бежиз эмас!

— Дуруст, бобо, мен яна ўйлаб кўраман,— чолга таскин берди Давидов, ўзи эса Шчукарнинг тамаки чекаётганидан фойдаланиб, Варяни тезгина бағрига тортди-да, қаршидан эсаётган шабадада чеккасидаги жингалак сочи ўйнаб турган жойини ўпди.

Уз ҳикоясидан, эҳтимолки, хотираларидан толиқ-қан Шчукар бобо ҳадемай мудрай бошлади, шунда Давидов унинг мажолсизланган қўлларидан тизгинни олди. Мудроқ босаётган Шчукар бобо минғиллаб қўйди:

— Раҳмат сенга, ўргилай, сен отларни ҳайдаб кета тур, мен бир соатгина мизғиб олай. Қексалик қуриб кетсин! Баданингни офтоб сал иситдими, уйқу элитаверади... Қиши кунлари бўлса, совуқ кучайган сари уйқинг ҳам хуруж қилиб келаверади, ухлаб ётган жойингда яхлаб қотиб қолишинг ҳам ҳеч гап эмас.

Чуваккина, кичкина чол Варя билан Давидовнинг орасида дрожкига худди қамчикдек узала тушиб чўзилиб ётди, ҳадемай мулойим хуррак торта бошлади.

Қўёш қиздирган дашт эса, энди турли-туман гиёҳларнинг бор атрини уфурмоқда, ўрилган пичан ҳидига йўлдаги илиқ тупроқ ҳиди қўшилиб чучук бир бўй ҳосил қилмоқда, йироқ уфқининг ҳовурга ғарқ ҳудудиғира-шира кўкариб кўринмоқда,— Варя Дон орқаси-

даги ўзига нотаниш, лекин ниҳоятда ардоқли даштни ҳарислик билан кўздан кечирмоқда эди.

Улар кечгача юз километрча йўл босиб, бир пичан ғарами олдида тунашди. Уйдан олиб чиққан оддийгина егуликлар билан овқатланиши, серюлдуз осмонга индамай тикилганча бир озгина дрожкининг олдида ўтиришди. Давидов деди:

— Эртага яна барвақт туришимиз керак. Ётиб ухлайлик, сен Варюха, дрожкида ёт, менинг пальтомни ол, ёпиниб ётарсан, бобо билан биз ғарамнинг тагида ётамиз.

— Тўғри иш қиляпсан, Сёмушка,— маъқуллади чол Давидовнинг бирга ётмоқчи бўлганидан ниҳоятда мамнун бўлиб.

Очиғини айтиш керак, чол кимсасиз бегона даштда кечаси ёлғиз ўзи ётишга қўрқарди.

Давидов қўлларини боши остига қўйиб чалқанча ётаркан, қоқ тепасидаги оч кўк осмонга тикиларди. Кўзи билан Катта Айиқ буржини қидириб топди-да, хўрсиниб қўйди, кейин эса ниманидир ўйлаб беихтиёр жилмаяётганини пайқаб қолди.

Куни билан қизиган ер ярим тунга боргандагина тафти қайтиб ҳаво чинакам салқин бўлиб қолди. Яқин орадаги сойликда ҳовуз ё дашт лимани бўлса керак. Ундан балчиқ билан қамиш ҳиди эсмоқда эди. Яқингина бир жойда бедана сайраб юборди. Бир нечагина қурбақанинг журъатсизгина вақиллаётгани эшитилди. Тун зулматида бойқушнинг уйқусираб «Ухла, ухла!» дея сайрагани қулоққа чалинди...

Давидов мудрай бошлади, аммо шу орада пичан ичиди сичқон шитирлаб қолди, Шчукарь бобо жон ҳолатда туриб, Давидовни юлқилаганча гапирди:

— Сёма, эшиятсанми? Куриб кетсин, топган жоийимизни қара! Бу ғарамнинг ичи фиж-фиж ўқ илон билан заҳарли илон бўлса керак. Лаънатиларнинг шитир-шитирини эшиятсанми? Худди мозордагига ўхшаб бойқушлар сайраяпти... Бу бехосият жойдан бошқа ерга кўча қолайлик!

— Хархаша қиласанг-чи,— уйқусираб жавоб берди Давидов.

Шчукарь яна ётди, атроф-теварагидан плашчи тагига бостириб анчагача типирчилаб минфишлиади:

— Сенга, аравада кетайлик дедим-а, қаёқда, дрожкида савлат тўқмоқчи бўлдинг. Ана энди билганингни қил. Ушандай қилганимизда аравага ўзимизнинг текин хашакни тўшаб хотиржамгина йўл босардик, ўша арава бўлса ҳозир учовимиз ҳам ётиб ухлардик, мана энди бўлса худди бошпанасиз итга ўхшаб бирорвларнинг ғарамига тиқилишимиз керак. Варъкага маза, тепада, бехавотир жойда худди бекадай ҳузур қилиб ётибди, бу ерда бўлса,— бош томонимиз ҳам шитир-шитир, ёнбошимизда ҳам шитир-шитир, оёқ томонимизда ҳам шитир-шитир, худо билсин, нима балолар шитир-шитир қиляпти? Ухлаб қолсанг, ёнингга илон ўрмалаб келиб қалтис жойингдан ғарчча узиб олса борми, кўёвлигинг чиппакка чиқиб турибди-да! Лаънати бирон жойингни чақиб олса ўлиб кетишинг ҳеч гап эмас. Шундан кейин Варъканг жомашов-жомашов ёш тўқади, унда фойдаси нима?. Мени чақишдан ҳеч қайси бир илонга наф йўқ, менинг этим қари, чандир, қолаверса мендан така ҳиди келади,— чунки Трофим пичанхонада кўпинча ёнимда ётади,— заҳарли илон бўлса, таканинг ҳидини ёқтирамайди. Уз-ўзидан маълумки, у мени эмас, сени чақади... Кел, бу ердан бошқа жойга кўча қолайлик!

Давидов ғижиниб деди:

— Сен бугун тинасанми, йўқми, бобо? Хўш, ярим кечада қаёқга борамиз?

Шчукарь бобо ғамгин жавоб берди:

— Сен мени расво жойга олиб келиб қўйдинг — билганимда, ақалли кампирим билан хайрлашиб чиқарканман, бўлмаса худди сўққабош ўтган одамдек чиқиб келаверибман. Жойингдан жилмоқчимасмисан, ўргилай?

— Йўқ. Ухла, чол.

Шчукарь бобо оғир хўрсаниб ва ҷўқиниб деди:

— Жон-жон деб ухлардим-у, Сёмушка, ўтакам ёрилай деяпти. Бир томондан юрагим қинидан чиқиб

кетай деяпти, бир томондан бир нобакор бойқуш хурож қиляпти, уни ўчса ҳам гўрга эди.

Шчукарнинг ғўнғир-ғўнғир шикоятлари остида Давидов қаттиқ ухлаб қолди.

У қуёш чиқиши олдидан уйғонди. Унинг ёнида оёғини йиғишириб ёнбоши билан ғарамга суюнгандча Варя ўтирап, пешонасидаги чигил бўлиб қолган соч толаларини ёзмоқда эди,— қиз боланинг бармоқлари шу қадар мулоийм ва оҳиста тегар эдики, Давидов уйғонгандан кейин ҳам уларни аранг сезди. Варянинг ўрнида, дрожкида Давидовнинг пальтосини устига ташлаб Шчукарь бобо донг қотиб ухламоқда эди.

Тонг шафағидек ним пушти Варя оҳистагина деди:

— Мен ҳовузга бориб ювениб келдим. Бобони уйғот, йўлга тушайлик!— У Давидовнинг сертук ёноғига лабларини енгилгина тегизиб, ўрнидан дик этиб турди.— Ювингани борасанми, Сёма? Мен ҳовузга борадиган йўлни кўрсатиб қўйман.

Ўйқудан овози бўғилиб уйғонган Давидов жавоб берди:

— Ювенишга кеч қолибман, Варюха, йўл-йўлакай бирон жойда ювениб оларман. Бу қари юмронқозиқ сени қачон уйғотди?

— У мени уйғотгани йўқ. Тонгда уйғонсам, у сенинг ёнингда тиззасини қучоқлаганча тамаки чекиб ўтириби. Ундан: «Сен нега ухламаяпсан, бобожон?» деб сўрадим. У менга: «Мен кечаси билан ухлаганим йўқ, қизим, ҳамма ёқ гиж-ғиж илон экан. Сен бориб бир даштни айланиб кел, мен бир соатгина сенинг жойингда хотиржамгина мизғиб олай» деб жавоб берди. Мен ўрнимдан туриб, ювингани ҳовузга қараб кетдим.

Уша куни тушгачаёқ улар Миллеровога етиб олишди. Давидов ярим соат ичида окружкомдаги ишни битириб, кўчага хушчақчақ, мамнун жилмай-ганча чиқиб келди.

— Секретарь ҳамма ишни окружкомга муносиб дарров ишчанлик билан ҳал қилди: сени куюнчагим, округ комсомол комитетидаги қизлар оталиққа оладиган бўлишди, ҳозир эса қишлоқ хўжалик техникиумига борамиз, сени янги жойга ўрнаштираман. Ди-

ректор ўринбосари билан келишиб қўйилди. Қабул синовлари бошлангунча ўқитувчилар сен билан шуғулланишади, кузгача ҳаммасини беш қўлингдек билib оласан, факт. Окружкомдаги қизалоқлар сендан хабар олиб туришади, улар билан телефонда гаплашиб келишиб қўйдим.— Давидов одатига кўра қўлларини бир-бирига тез-тез ишқаб, сўради:— Бизнинг хуторга кимни комсомол ташкилотининг секретари қилиб юборишётганини биласизми, Варюха? Кимни юборишяпти деб ўйлайсан? Иван Найденовни, қиши куни бизга агитколонна билан борган йигитчани юборишяпти. Жуда бамаъни йигит. Ўша борса мен жуда хурсанд бўлардим. Унда комсомол ишларимиз жуда юришиб кетади, мен сенга амалий гапни айтяпман!

Икки соат ичида қишлоқ хўжалик техникумидаги ҳамма ишлар ҳам бартараф қилинди. Хайрлашиш фурсати етди. Давидов қатъий деди:

— Хайр, азиз Варюха-куюнчагим, диққат бўлмасдан яхшилаб ўқи, у ерда биз ҳам сенсиз ишларимизни эплаб кетамиз.

У илк бор Варянинг лабидан ўпди. Йўлак бўйлаб кета бошлади. Эшик олдида орқасига қараган эди, бирдан шундай бир ўткир аянч юрагини шу қадар эзib юбордики, назарида оёғи тагидаги ғадир-будур пол худди палубага ўхшаб чайқалиб кетгандек бўлди: Варя қўлларини юзига қўйиб, пешанасини деворга тираганича туарар, мовий дуррачаси елкасига сирғалиб тушган, унинг бутун вужудидан шу қадар бир ожизлик ва катталарга хос гусса сезилмоқда эдики, Давидов томогини қириб, ҳовлига тезроқ чиқиб кетишнинг пайдан бўлди.

Хутордан чиқиб кетганига уч кун бўлган куни кечаси Гремячийга қайтиб келди.

Вақт кеч бўлишига қарамай, уни колхоз правлениесида Нагульнов билан Размётнов кутиб ўтиришарди. Нагульнов у билан хомушгина сўрашиб, тундгини гапирди:

— Сен нима учундир сўнгги кунларда уйда турмайдиган бўлиб қолдинг, Семён: аввал станцияга тушиб чиқдинг, кейин окружкомга... Миллеровога нима қилиб бориб юрибсан?

— Ҳаммасини вақти келганда айтаман. Хуторда нима янгиликлар бор?

Жавоб бериш ўрнига Размётнов ундан сўради:

— Сен йўлда кетаётганингда экинларни кўрдингми? Хўш, қалай, етилиб қолибдими?

— Арпани баъзи жойларда ўрса бўлади, жавдарни ҳам. Хўш, жавдарни, менингча, ўриб ётқизиб кетаверса ҳам бўлади, аммо нима учундир қўшниларимиз ошиқмайроқ туришибди.

Размётнов ўз-ўзига гапиргандек гапирди:

— Унда биз ҳам ошиқмаймиз. Уни кўклигича ҳаво очиқлигига ўриб ётқизиб кетиш мумкин, ётган жойида ҳам етилаверади,— борди-ю, ёмғир ёғиб қолса-чи? Унда иш расво бўлади.

Нагульнев унинг фикрига қўшилди.

— Уч кунча сабр қилиш мумкин. Аммо ундан кейин ўроққа тиш-тироқ билан ёпишиш керак, бўлмаса райком сени еб қўяди, Семён. Андрей икковимизни тафт босдисига ютади... Ҳа, менда ҳам янгилик бор; совхозда менинг ҳарбий хизматда орттирган ошнам туради, кеча ўшани кўргани бориб келдим. У мени анчадан бери меҳмондорчиликка чақириб юрган эди, ҳеч мавруди бўлмаётган эди, кеча боришга қасд қилдим, бир кунгинага бориб, ошнамдан хабар олай, шу баҳона билан тракторларнинг қандай ишлашини ҳам кўриб келай, дедим. Ҳеч кўрмаган эдим, жуда ҳам қизиққан эдим! Улар шудгор кўтаришаётган экан, кун-узун кун далада қолиб кетдим. Вой, оғайнилар, бу «фордзон» деган трактор аломат нарса экан, мен сизларга айтсам! Шифиллатиб шудгор кўтаряпти. Бирон қайилишга боргандা заранг қўриққа дуч келиб қолса, шўрликнинг чоғи келмай қолади. Тўсиққа дуч келиб қолган асов отдек осмонга сапчиб туради-да, фидиракларини яна ерга ташлаб тезроқ юмшоқ шудгорга уриб қолишга ошиқади, заранг қўриқни ҳайдашга чоғи келмайди... Аммо шундай отдан бизнинг колхозда ҳам бир жуфтгина бўлса, ҳеч зиён қилмас эди, мен доим шуни ўйлаб юрган эдим, ҳозир ҳам ўйлаб юрибман. Ҳўжаликка жуда қўл келадиган нарса экан! Шундай маҳлиё бўлиб қолдимки, ошнам билан ичи-

шолмадик ҳам. Тўппа-тўғри даланинг ўзидан шартта бурилиб уйга қараб келавердим.

— Сен Мартиновская МТСига бориб келмоқчи эдинг-ку, ахир?— сўради Размётнов.

— Нима фарқи бор — МТСга бориб келдим нима-ю, совхозга бориб келдим нима? У ерда ҳам трактор бор, бу ерда ҳам. Қолаверса, узоқ, ўримни бошлай-бошлай деб турибмиз.

Размётнов кўзларини муғамбирона сузди.

— Ростини айтсан, мен сени Мартиновскайадан қайтаётганингда йўл-йўлакай Шахтига ҳам бурилиб Лукеръядан хабар олиб келарсан, деб ўйлабман...

— Хаёлимга ҳам келгани йўқ,— деди Нагульнов қатъий.— Сен бўлсанг эҳтимол кирагмидинг, мен сенmallани яхши биламан!

Размётнов хўрсаниб қўйди:

— Агар у менинг собиқ хотиним бўлса борми, албатта кириб кўришдан ташқари, бир ҳафтача меҳмон ҳам бўлардим!— Бу ёғига ҳазил билан илова қилиб қўйди:— Мен сенга ўхшаган латта эмасман.

— Мен ҳам сени яхши биламан,— тақрорлади Нагульнов. Ўйлаб бу ҳам ўз навбатида илова қилди:— Жин урган хотинбозсан! Аммо мен сенга ўхшаган бекарор хотинбоз ҳам эмасман!

Размётнов елкасини қисди:

— Мен, ўн уч йил бўладики, сўққабошман. Таъналаринг ноўрин.

— Шунинг учун бекарорсан-да.

Қисқа давом этган жимлиқдан сўнг Размётнов мутлақо жиддий тусда оҳиста деди:

— Мен ўн икки йил давомида битта одамни яхши кўрганимча юрган бўлсам-чи, сен буни билмайсан-ку?

— Сен-а? Гапингга жуда ишониб қўя қолдим!

— Бир кишини яхши кўраман!

— Одам ҳодис, Марина Поярковани эмасми?

— Қимлиги билан ишинг бўлмасин, бироннинг қўйнига қўл солма! Қимни яхши кўрганимни, ҳозиргача ҳам яхши кўришимни вақти келиб бир куни сенга мастлик устида айтиб беришм мумкин эди-ю, аммо... Сен совуқ одамсан, Макар, сен билан ҳеч қачон астой-

дил ҳасратлашиб бўлмайди. Сен қайси ойда туғилгансан ўзи?

— Декабрда.

— Ўзим ҳам шундай деб ўйлаган эди. Онанг сени муз устида түқсанга ўхшайди — сувга боргану бехосдан муз устида туғиб қўйган: шунинг учун ҳам сен умринг бино бўптики, совуқдан совуқсан. Сенга юракдаги дардни айтиб бўлармиди?

— Бўлмаса, сен иссиқ плитанинг устида туғилган экансан-да?

Размётнов бажонидил рози бўлди:

— Худди ўзи! Шунинг учун ҳам мендан худди гармсел келган вақтдагидек иссиқ нафас уфуриб турди. Сен бўлсанг, бутунлай бошқасан.

Нагульнов ғижиниб деди:

— Меъдага тегди! Энди хотинлар тўғрисидаги гапларни бас қиласайлик, яхшиси ўрим-йиғим вақтида қайси биримиз қайси бригадага боришими кераклиги тўғрисида гаплашайлик.

— Йўқ.— эътиroz билдириди Размётнов,— бошланган гапни тамомлайлик, кимнинг қайси бригадага чиқиб бориши кераклиги тўғрисидаги гапни кейин ҳам гаплашаверамиз. Сен шу нарсани бамайлихотирроқ ўйлаб кўр, Макар: сен мени беқарор деб атадинг, мени ҳозир қандай беқарор деб бўлади. Ахир ҳадемай икковларингизни тўйимга чақирмоқчиман-ку?..

— Қанақа тўйга чақирасан?— жиддий сўради Нагульнов.

— Ўз тўйимга. Онам қариб қолди, рўзгорни эплалмаяпти, уйланишга мажбур қиляпти.

— Сен ҳам унинг гапига киряпсанми, қари аҳмоқ?— Нагульнов ўзининг ниҳоятда ғазабланганини яширолмади.

Размётнов ясама итоаткорлик билан жавоб берди:

— Иложим қанча, ўргилай?

— Вой, учига чиққан аҳмоқ!— сўнгра ўй сурисиб қашарини қашиганча Нагульнов хулоса қилди:— Икковимиз битта квартирани ижарага олиб, унча зерикиб қолмаслик учун бирга туришимизга тўғри келади, Семён. Дарвозасига: «Бу ерда нуқул бўйдоқлар туришади» деб ёзиб қўямиз.

Давидов дарҳол жавоб бера қолди:

— Бу ишимиш беҳуда кетади. Макар: менинг қайлиғим бор, Миллеровога шунинг учун бориб келдим.

Нагульнов уларнинг ҳазиллашаётган-ҳазиллашмаётганликларини билмоқчи бўлгандек гоҳ унисига, гоҳ бунисига синовчан назар билан қаради, кейин бурун катаклари керкиб, ҳатто ҳаяжондан бирмунча оқарганча аста-секин ўрнидан турди:

— Нима бало, эсларингни еб қолдингларми?! Охирги марта сўрайман: бу гапларни астойдил айтап-сизларми, ё мени қалака қиляпсизларми?— Бироқ жавоб беришларини ҳам кутмасдан оёғи тагига аччиқ, жаҳл билан туфурди-да хайрлашмай хонадан чиқиб кетди.

XXVI БОБ

Диққатликдан жинни бўлаёзид, чор-ночор бекорчиликдан кун сайин ахлоқсизлашиб, Половцев билан Ляньевский кечаю кундуз вақтларини ҳамон Яков Лукичнинг торгина меҳмонхонасида ўтказмоқда эдилар.

Сўнгги вақтларда нечукдир уларнинг олдига алоқачилар анчагина камроқ келадиган бўлиб қолишиди, уларга ўлка исён марказининг жўн, аммо пухта пакетларда келиб турадиган далда берувчи ваъдалари аллақачон ўз маъносини йўқотган эди...

Половцев узоқ давом этаётган узлатнишинликка, ҳар қалай, дуруст бардош бермоқда, ҳатто зоҳиран босиқ кўринар, аммо Ляньевский аҳён-аҳёнда ўзини тутолмай қолар эди: гоҳ рўпарасидаги деворга сўник кўзларини тикканча суткалаб фиқ этмас, гоҳ одатдан ташқари, ҳеч тилини тиймай эзма бўлиб кетар, шунда Половцев иссиқ бўлишига қарамай, буркасини бошигача тортиб бурканиб олар, гоҳо ўрнидан туриб қиличини қинидан шартта суғуриб олиб, Ляньевскийнинг сочи риндлик билан тараб қўйилган бошини шартта чопиб ташлагиси келиб кетар эди. Бир куни Ляньевский қоронғи тushiши биланоқ, уйдан сездирмай ғойиб бўлиб, тонг отарга яқингина бир қучоқ ҳўл гул кўтарганча кириб келди.

Ҳамхонасининг йўқлигидан ташвишланган Половцев туни билан мижжа қоқмади, қаттиқ ҳаяжонланди, ташқаридан келган тиқ этган товушга қулоқ солиб чиқди. Мусаффо ҳавода сайр қилганидан завқи ошиб кетган, хушчақчақ, Ляньевский даҳлиздан бир чеълак сув олиб кирди-да, гулларни унга эҳтиёт билан солиб қўйди. Мәҳмонхонанинг зиқ ҳавосида карнайгулларнинг, хушбўй тамаки гулнинг, тунги бинафшанинг, Половцевга номаълум яна аллақандай гулларнинг масти қилувчи атри бурқираб кетди,— шундан кейин кутилмаган бир нарса юз берди: Половцев, бу темирдек қатъий ясовул, эсидан чиқаётган гуллар атрини кўксини тўлата-тўлата ҳидлар экан, бирдан йиғлагаб юборди... У тонг олди зулматида терчил кафтларини юзига босганча қўланса ўрнида ётар эди. Половцев ҳўнграб юбормаслик учун шартта деворга ўғирилиб олди-да, ёстиқнинг бир учини жон аччиғида қаттиқ тишлади.

Ляньевский оёқ яланг ҳолда мәҳмонхонанинг илиқ полини аста-аста босиб юрарди. Унинг одамшинавандалиги тутиб кетиб, оперетта арияларини эшитилар-эшитилмас ҳуштак қилиб чалар, ўзини ҳеч нарсани эшиитмаётган ва кўрмаётганга солар эди...

Кундузги соат ўн бирларга борганда қисқагина, аммо қаттиқ уйқудан уйғонган Половцев Ляньевскийга рухсатсиз чиқиб кетгани учун боплаб дашном бермоқчи эди, аммо бунинг ўрнига шундай деб юборди:

— Челакдаги сувни янгилаш керак эди... сўлиб қолмасин.

Ляньевский хушчақчақлик билан жавоб берди:

— Ҳозир бажо келтирамиз.

У кўзачада муздек қудуқ суви олиб кирди-да, чеълакдаги илиқ сувни полга сепиб юборди.

— Гулларни қаердан топиб келдингиз?— сўради Половцев.

У ўзини тийиб ололмаганидан ўнғайсизланмоқда, кечаси йиғлаганидан уялмоқда, шунинг учун ҳам тик боқолмай четга қарамоқда эди.

Ляньевский елкасини қисди:

— «Топдим» десам — жуда юмшоқ бўларди, жаноб Половцев. «Ўғирладим» десам — дағалроқ, лекин тўғрироғи шу. Мактабнинг олдида сайр қилиб юрсам,

димоғимни маст қилган илоҳий бир муаттар ҳидни се-зиз қолдиму Шпинь муаллимнинг қўрачасига лип этиб тушдим-да, икковимизнинг бу расво турмушимизга бир илож қилиб хушнудлик киритиш учун икки гулхонанинг ярмини қоқлаб чиқдим. Сизни бундан бўён ҳам янги узилган гуллар билан таъминлаб туришга ваъда бераман.

— Йўқ, машаққат чекмай қўя қолинг!

— Сиз ҳали баъзи инсоний туйғуларингизни унчалик йўқотиб қўймаган экансиз,— деб қўйди шама билан оҳиста Ляньевский Половцевга тик боқиб.

Униси ҳеч нарса демади, ўзини ҳеч нарса эшитманга солди.

Улардан ҳар қайсиси ўз йўлича вақт ўтказарди: Половцев бир неча соатлаб столда ўтирганча, яғир, қалин карталарни йўғон бармоқлари билан йирганиб ушлаганча, пасъянс ўйинини ўйнар, Ляньевский эса ётган жойида қўлидаги биттаю битта китоб — Сенкевичнинг «Камо грядеш?» асарини йигирманчи марта ўқиб чиқмоқда, ҳар бир сўзининг маъносини чақмоқда эди.

Баъзан Половцев картани қўйиб полга худди қалмоқчасига чордона қуриб ўтириб оларди-да, бир парча брезентни ёйиб, ўзи ниҳоятда озода қўл пулемётини бузиб тозалар, ҳар бир қисмини артиб, иссиқдан илиб қолган милтиқ мойн билан мойлар, кенг пешанали бошини гоҳ у томонга, гоҳ бу томонга эгганча пулемётга ҳавас билан тикилиб, уни яна ошиқмай йиға бошлар эди. Кейин эса хўрсичиб, пулемётни ўша бир парча брезентга ўраб эҳтиёт билан каравот тагига жойлар эди-да, дискларни мойлаб яна ўқлаб қўяр, столга келиб ўтирганида тўшаги остидан офицерча қиличини олиб тифини бошмалдоғининг тирноғига тақаб ўткирлигини кўрар, хира ялтираб турган пўлатнинг юзига бир неча марта эҳтиёт билан қайроқ урар эди. «Устараадек!» деб қўярди мамнуният билан мин-филлаб.

Бундай пайтларда Ляньевский китобини четга қўйиб, биттаю битта қўзини сузганча истеҳзо билан илжаярди:

— Сизнинг аҳмоқона чучмаллигингиз мени тааж-

жублантиради, гоятда таажжублантиради! Нокаста түнғиз тарағини эъзозлагандек, шу темиртагингизни мунча энди эъзозлайвермасангиз? Эсингиздан чиқармангки, ҳозир ўттизинчи йил, қилич, найза, берданка ва бошқа темир-терсакларнинг даври аллақачон ўтиб кетган. Ўтган урушни ҳамма ишни от минган ёки минмаган солдатлар эмас, артиллерия ҳал қилган, азизим. Бўлажак уруш билан жанг жадалларнинг ҳам тақдирини артиллерия ҳал қиласди. Буни эски артиллелист сифатида кескин туриб таъкидлайман!

Половцев одатдагидек ер тагидан қараб гириҳ тишлари орасидан гапирди:

— Сиз исённи бошданоқ гаубица батареяларининг очадиган ўтига суюниб бошламоқчимисиз ёки қилич кўтарган солдатларга суюнибми? Аввал менинг қўйлимга ақалли уч дюймли батарея беринг, мен қиличимни жон-жон деб Островновнинг хотинига қолдидрай, ҳозирча тилингизни тийиб жим туринг, акобирзот сафсатабоз! Сизнинг гапларингиздан кўнглим айнаяпти. Сиз ўтган урушда артиллериининг роли ҳақида менга эмас, поляк ойимчаларга гап сотинг. Умуман, сиз мен билан ҳамиша беибо тарзда гаплашишга уринасиз, чакки қиласиз, буюк Польшанинг вакили. Гапингизнинг оҳанги билан сафсаларингиздан қўлланса ҳид келиб турибди. Дарвоҷе, йигирманчи йилларда: «Ҳали Польска чириғанмас-у, бироқ сассиқ ҳиди келмоқда» деб сизнинг давлатингизни айтишар эди, шекилли...

Ляньевский фожиали оҳангда хитоб қилди:

— Ё раббим, қандай маънавий фариблик! Картую қилич, қиличу карта... Ярим йил мобайнида сиз босмадан чиққан биронта калима ҳам ўқиганингиз йўқ. Қандай ёввойилашиб кетгансиз! Бўлмаса, сиз бир вақтлар ўрта мактаб муаллими бўлгансиз-ку, ахир...

— Ноиложликдан муаллим бўлган эдим, марҳаматли пан! Ўлганимнинг кунидан!

— Сизнинг Чеховингизнинг казаклар ҳақида бир ҳикояси бор эди шекилли: ўзининг хуторида бир нофон ва галварс помешчик казак яшайди, унинг иккита кап-катта ландовур ўғли бўлиб, уларнинг қиладиган иши фақат шуки, биттаси хонаки жўжахўроларни

осмонга улоқтиради, иккинчиси бўлса, ўша хўроздарни миљтиқ билан отади. Ҳар куни аҳволи шу: китоб ҳам ўқишмайди, маданий эҳтиёжлари ҳам йўқ, ҳеч қандай маънавий манфаатлардан асар ҳам йўқ... Баъзан сиз менга ўша ўғиллардан бири бўлиб туюласиз... Ё мен янгишаётганмиканман?

Половцев жавоб бермай ҳаракатесиз пўлат қиличга куҳлар, унинг юзига қўкиш ҳовур ёйилиб ўчаётганини кўриб тураг, кейин эса қиличини кул ранг толстовкасининг этаги билан артиб, уни эҳтиёт билан, ҳаттоқи меҳр билан, овозини чиқармай, эскиб кетган қинига солиб қўяр эди.

Уларнинг бирдан содир бўладиган айтишишлари ва бир муддатлик тўқнашишлари ҳамма вақт ҳам тинчгина тугайвермас эди. Қамдан-кам шамоллатиладиган меҳмонхонанинг ҳавоси зиқ, бошланиб кетган жазира маисиқ уларнинг Островнов уйидаги аянчили турмушини ундан баттар қийинлаштирган, Половцев эса тер ҳиди уриб шалаббо бўлиб кетган тўшакдан ўқтин-ўқтин сапчиб турганча, бўғиқ овоз билан: «Тюрьма! Бу тюрьмада хароб бўладиган бўлдим!» деб хириллар эди. Ҳатто бу совуқ сўзни кечалари уйқусида ҳам ўқтин-ўқтин айтадиган бўлиб қолди, ниҳоят, тоқати тоқ бўлиб кетган Ляъевский бир куни унга шундай деди:

— Жаноб Половцев, сизнинг ғариб сўз хазина-нгизда «тюрьма» деган сўздан бошқа биронта сўз қолмаганми, деб қўйдим. Агар сиз бу худойихонани шу қадар соғиниб қолган бўлсангиз, менинг сизга самимий маслаҳатим: шу буғуноқ район ГПУсиға бориб, сизни камида йигирмагина йилга тюрьмага жойлаб қўйишларини илтимос қилинг. Амин бўлингки, илтимосингизни ерда қолдиришмайди!

— Бу нима бўлди? Полякча азкиябозликоми? — тиржайганча сўради Половцев.

Ляъевский елкасини қисди:

— Менинг азкиямни бачканда деб ўйлаяпсизми?

— Сиз ҳайвонсиз,— деди лоқайдлик билан Половцев.

Ляъевский яна елкасини қисиб, кулиб қўйди:

— Эҳтимол. Мен сиз билан аллақачондан беріңімә-ён яшаяпман, инсонлик қиёфамни йўқотиб қўйган бўлсам ҳам ажаб эмас...

Бу тўқнашишдан сўнг улар уч суткагача бир-бirlариға чурқ этиб оғиз очишмади. Тўртинчи куни улар чор-ночор яна гаплашиб кетишга мажбур бўлишиди.

Эрталаб барвақт, ҳали Яков Лукич ишга кетмасдан, ҳовлига икки нотаниш киши кириб келди, бири — янгигина резинали пальто, иккинчиси эса — капюшони бор яғиргина брезент плащ кийган эди. Биринчиси қўлтиғига каттакон қалин портфель қистириб олган, иккинчининг елкасида жимжимадор қайиш шокиали қамчи осилиб турар эди. Илгаритдан келишиб қўйилган шартга кўра, Яков Лукич келган одамларни деразадан кўриши биланоқ дарров даҳлизга ўтиб, Половцев билан Лятьевский яшайдиган ҳужранинг эшигини икки марта уриб қўйди-да, мўйловини силаганча салобат билан зинапояга чиқди.

— Менга келдингларми, яхшилар? Қолхоз омборидан бирон нарса керак бўлиб қолдими? Узларингиз ким бўласизлар? Бир ёқдан келганимисизлар?

Портфели бор қурч гавдали ғўлабир одам лўппи юзларидаги хотинларга хос кулгичлари яйраганча саиммий жилмайиб, эскирган кепкасининг соябонини кафти билан ушлаб қўйди-да, деди:

— Уй эгаси сиз бўласизми? Салом, Яков Лукич! Бизни сизга қўшниларингиз юборишиди. Биз — қорамол тайёрловчилармиз, шахтёларнинг хизматини қиласмиз, улар учун, кундалик тамаддиқ тайёрлаймиз. Харидларимизга дуруст пул тўлаймиз, давлат белгилаган умумий харид баҳоларидан юқорироқ ҳақ тўлаймиз. Шунинг учун юқорироқ ҳақ тўлаймизки, шахтёларни тўйдириброқ, узлуксиз боқишимиз керак. Сиз колхознинг хўжалик мудирисиз, бизнинг эҳтиёжимизни тушунишингиз керак... Аммо колхознинг ғаниматидан бизга ҳеч нарса керак эмас, биз хусусий фойдаланишдаги молларни, шунингдек якка хўжаликларнинг қўлларидаги молларни сотиб оламиз. Бизга айтишди, сизда бир яшар ғунажин бор экан. Сотмайсизми? Биз нархига қийищмаймиз, семиз бўлса бўлгани.

Яков Лукич ўй сурганча жим қолиб қошини қашиди, бозор-ўчарда дайдиб юрмай бу сахий тайёрловчилардан кўпроқ пул ишлаб қолиш мумкинлигини кўнглидан ўтказди, савдога пишиқ кўпчилик деҳқонларга ўхшаб жавоб берди:

— Менда сотиладиган ғунажин йўқ.

— Лекин бир кўрсак нархига келишиб қолармиз дейман? Сизга яна такрор айтаманки, биз ошиқроққа ҳам олаверамиз.

Яков Лукич бир дақиқагина индамай тургач, мўйловини силаб, савлат учун гапларини чўзиб худди ўзига ўзи гапиргандек жавоб берди:

— Ғунажиним борликка-ку бор-а, семизгина, йилтиллаб турибди! Аммо ўзимга керак: сигирим қариб қолди, алмаштиришим керак, зоти серсут, сершира, яъни сизларнинг таъбирларингиз билан айтсан, жуда серқаймоқ. Йўқ, харидор ўртоқлар, сотмайман!

Портфелли ғўлабир одам ачинганча хўрсиниб қўйди:

— Ҳўп, майли ўзингиз биласиз... Бизни кечиринг, молни бошқа жойдан қидирамиз.— Фижим кепкасинг соябонини яна қовушмайгина қўли билан ушлаб қўйиб, қўрадан чиқиб кета бошлади.

Жуда ҳам яғриндор, даванги мол ҳайдовчи қамчинини ўйнаб, қўрани, истиқомат қиласидиган иморатларни, уйшинг деразаларини, чортокнинг жисп ёпиб қўйилган эшигини фаромуш назар билан кўздан кеирганча, унинг кетидан чиқиб кета бошлади...

Шундан кейин мудаббир Яков Лукичнинг сабри чидамади. Мехмонлар кўча эшигига етгач, у ғўлабирни чақирди:

— Бир оз тўхта, ҳой сен ўртоқ тайёрловчи! Сизлартирик вазнга қанчадан пул тўлайсизлар?

— Савдосига қараймиз. Ахир мен сенга айтдим-ку, нархига қийишмаймиз, пулимизга ўзимиз хўжайимиз. Пулимиз ҳисобли бўлгани билан, тежоғлик эмас,— деди ғўлабир семиз қўли билан биққи портфелни мақтаниб шапиллатиб уриб, эшик олдида кутиб тураркан.

Яков Лукич зинапоядан қатъият билан тушиб келди.

— Юринглар, танани подага ҳайдаб юбормасла-ридан бурун бориб кўрайлик, аммо шуни билиб қўйингларки, мен уни сизларга арzon сотмайман — ҳурмат қилганимдан бераман, чунки сизлар маъқул йигитларга ўхшайсизлар, унча зиқна эмасга ўхшайсизлар. Мен зиқна савдогарларнинг қўрамда қораларини ҳам кўргим келмайди!

Иккала харидор ғунажинни роса эжикилаб, синчиклаб пайпастаганча кўздан кечиришди, кейин фўлабири зериктириб юборгудек савдолаша бошлади, қамчини бори эса ҳафсаласизгина ҳуштак чалганча товуқхонага ҳам, бўш ётган отхонага ҳам, ҳамма жойга, қарashi керак бўлмаган жойларгача ҳам бош суқиб қўра билан қўра атрофини айланишга тушди... Шунда Яков Лукичнинг қўнглига: «Эҳ, булар бошқача харидорлар экан-ку!» деган фикр келди.

Нархни бирданига етмиш беш сўм камайтириб, шундай деди:

— Майли, зиён қилсам ҳам бераман, шахтёр ўртоқлар учун, аммо мени кечирасизлар, мен правлениега боришим керак, сизлар билан гап сотиб ўтиргани вақтим йўқ. Гунажини ҳозир олиб кетасизларми? Унда пулини нақд чўзинглар!

Оғил остонасида фўлабир бармоқларини ҳўллаб пулини узоқ санади, савдода келишган нархларидан ташқари, устига яна ўн беш сўм қўшди, руҳи тушиб кетган Яков Лукичнинг қўлини сиқиб, им қоқиб қўйди:

— Савдомизнинг битганига бир шишагина ичамизми, Яков Лукич? Биз тайёрловчиларнинг ишимиз шунақаки, ширинкомани ёнимизда олиб юрамиз,— шошилмасдан чўнтағидан оқ каллали шиша олди, шиша эрталабки қуёш нурида хира йилтираб кетди.

Яков Лукич ясама хушчақчақлик билан жавоб берди:

— Кечқурун, ўргилай меҳмонлар, кечқурун! Сизларни кечқурун эъзоз билан кутиб олиб, улфатчилик қилишга бажонидил ҳозирман. Сен менга қўрсатаётган кўнгил очар уй эгасида ҳам топилиб қолади, ҳали унчалик ўлар ҳолатга етгунимизча йўқ, аммо ҳозир кечирасизлар: эрталабдан ароқ ичишга соғлиғим йўл

қўймайди, ишим ҳам изм бермайди, мен колхозга бориб хизмат қилишим керак. Қун ботгандан кейин келинглар, фунажинимнинг бойғазасини ўшандада ичамиз.

— Сен меҳмонларни ақалли уйингга таклиф қилсанг, бузофингнинг онасининг сути билан сийласанг бўларди,— лўппи юзларидағи кулгичлари яйраб, хушнудлик билан жилмайиб деди ғўлабир ва қўлини илтижо билан Яков Лукичнинг билагига ташлади.

Аммо қатъиятли Яков Лукич энди бутун иродаси ва диққатини бир нуқтага йиғиб олган эдикি, бепарвороқ заҳарханда қилганча жавоб берди:

— Биз казакларда таомил шундайки, ўргилай жаноблар, бизда меҳмондорчиликка ҳар кимнинг меҳмон бўлгиси келган вақтда эмас, мезбонлар чақириб таклиф қилишгандагина борилади. Ё сизларда таомил бошқачароқми? Аммо ҳозир бизнинг одатимизга, хутордаги одатга амал қиласлилек: кечқурун кўришадиган бўлдик-а? Демак, эрталабдан қуруқ гап сотиши мизнинг ҳожати ҳам йўқ. Яхши боринглар!

Харидорларга шартта орқа ўгириб, ҳатто даванги подачи ошиқмасдан бошвоқлаётган фунажинга ҳам қарамай, Яков Лукич зинапояга алланг-талпанг кета бошлади. Инқиллаб-синқиллаб ва ясама оҳ-воҳлаганча, чап қўли билан белини ушлаб зинапоянинг юқори босқичига чиқди-да, даҳлизга киргандагина кафтини астойдил кўкрагига босиб бир дақиқача турди, кўзларини юмиб, оқариб кетган лаблари билан: «Ҳаммала-риннга ҳам минг лаънат!» деб шивирлади. Юрагидаги санчиқ ҳадемай тиниб қолди, боши айланиши ҳам тўхтади. Яков Лукич яна бир оз турди-да, кейин Половцев яшаётган меҳмонхона эшигини одоб билан, аммо қатъий тақиллатди.

Остонадан киаркан у «Жаноби олийлари, фалокат!..» дея олди, холос. Шу ондаёқ, тунги момақалдироқ вақтида — чақмоқ чақнаган вақтдагидек, ўзига қараб тўғриланган тўппонча милини, Половцевнинг олдинга тутиб чиқсан вазмин энгагини, унинг мижжа қоқмай диққат билан тикилиб турган кўзларини, қаравотда курагини деворга тақаб чўнқайиб олганча тиззаларини кўтариброқ бемалол қўл пулемёти ушлаб ўтирган Лятьевскийни кўрди, пулемётнинг оғзи

ҳам эшикка. Яков Лукичнинг кўкраги баробаридаги жойга тўғриланган эди... Яков Лукич ярқ этган бу манзарани, ҳатто Лятьевскийнинг табассуми билан ёлғиз кўзининг бежо чақнаётганини ҳам бир зумгина-да кўраркан, гўё йироқдан келган шу саволни эшитди:

— Сен қўрага кимни олиб келдинг ўзи, ўргилай мезбон?

Ҳанг-манг бўлган Яков Лукич овозни таниёл-май қолди, шиддат билан калта-калта шивирлаб айтилган бу саволни гўё кўзга кўринмайдиган учинчи бир киши бергандек эди. Аммо ихтиёридан ташқари бир куч чолни бир лаҳзагина ўзгаришга мажбур қилди: икки ёнига чўзилиб турган қўллари бирдан тирсакларидан букилиб, Яков Лукичнинг ўзи аллақандай бўшашиб, чўкиб қолди. Бироқ тўхтаб-тўхтаб пойма-пой бўлса ҳамки, илгаригига қараганда бошқачароқ тил билан гапира бошлади:

— Мен қўрамга ҳеч кимни бошлаб келганим йўқ, улар ўз оёқлари билан кириб келишди. Ахир қачон-гача, ўргилай жаноблар, менга ҳар кун ўшқириб, хўш, ёш болага ўхшатиб хўрлайсизлар? Бу менга жуда ҳам малол келяпти! Сизларни текиндан текинга еди-риб-ицираётган бўлсан, ҳар қандай йўллар билан кўнгилларингизни олаётган бўлсан. Уй ичимиздаги аёллар ҳам кир-чирларингизни ювиб, текинга ҳар хил овқатлар пишириб беришяпти... Сизлар мени ҳозир, шу дақиқанинг ўзидаёқ ўлдириб қўя қолишларингиз мумкин, сизлар билан кечирган куним азоб-уқубатнинг ўзи бўлиб қолди! Гунажинимни ҳам шунинг учун зиёнига сотдимки, сизларни боқишим керакми? Сиз жаноби олийларга ёвғон карам шўрва тортиб бўлмаса, албатта гўштили бўлиши керак. Мендан яккаш ароқ сўрайсизлар... Бу чақирилмаган меҳмонлар қўрага кириб келишлари биланоқ, мен сизларни огоҳлантирдим-ку, кириб келганлар бошқачароқ харидор эканликларини кейин пайқаб қолдим, «Худо кўтарсан сизларни, гунажини текинга олсанглар ҳам майли, фақат тезроқ кетсанглар бўлгани!» деб орқа ўгиранча қайтиб келдим. Сизлар бўлсанглар, ўргилай жаноблар... Эҳ, сизларга қандай гап уқтира олардим?— Яков Лукич умидсиз қўл силтаб, юзини кафтлари би-

лан бекитиб, эшик ёндорига кўкраги билан суванди.

Кўнглини аллақачонлардан бери ғалати бир лоқайдлик эгаллаб олган Половцев бирдан ҳайратда қоларли ширасиз овоз билан гапирди.

— Дарҳақиқат, чол ҳақли, пан Лятьевский. Латта ҳиди келиб қолдими, биз вақт ғаниматида бу ердан жўнаб қолишимиш керак. Сизнинг фикрингиз қандай?

— Шу бугуноқ кетиш керак,— деди кескинлик билан Лятьевский, пулемётни эҳтиёт билан ғижим тўшакка ётқизаркан.

— Алоқа-чи?

— Бу тўғрида кейин гаплашамиз,— Лятьевский боши билан Яков Лукични имо қилди. Шундан сўнг унга қараб қатъий деди:— Занчалишлик қиласверманг, Лукич! Харидорлар билан нима тўғрисида сўзлашганингизни гапириб беринг. Ҳақингизни тўла бериб кетишдими? У савдогарлар бу ерга яна қайтиб келишадими?

Яков Лукич болалардек пиқиллаб йиғлаб юбориб, камар тақилмаган кўйлагининг этагига бурнини қоқди-да, кафти билан кўзларини, мўйлови ва соқолини артди, сўнг ердан кўзини олмай тайёрловчилар билан қилган суҳбатини, мол ҳайдовчининг шубҳали ҳаракатларини қисқагина гапириб берди. Тайёрловчилар кечқурун келиб у билан ширикомани бирга ичмоқчи эканликларини ҳам эслатиб ўтди.

— Жуда маъқул,— деди Лятьевский асабий заҳарханда қилиб.— Уларни уйингга таклиф қилишдан бошқа ақллироқ тадбирни ўйлаб тополмадингми? Жин урган бефаросат, галварс!

— Уларни мен таклиф қилганим йўқ, ўзлари меҳмон бўламиз, деб хиралик қилишиб, ҳозирнинг ўзидаёқ уйга кириб келишмоқчи эди, кечгача сабр қилишга аранг кўндиридим. Сизлар ҳам, жаноби олийлари, исми-шарифларингизни қандай улуғлашлари эсимда йўқ, мени аҳмоқ, лақмага чиқариб чакки қиляпсизлар... Худонинг ўзи кечирсан, нима жин уриб уларни уйимга бошлаб киарканман, ахир бу ерда сизлар буқиниб ўтирибсизлар-ку? Сизлар билан ўзимнинг бoshим кетиши учунми?

Яков Лукичнинг нам кўзлари хунук чақнаб кетди, у сўзларини ошкора ғазаб билан тутатди:

— Сизлар, жаноб офицерлар, ўн еттинчи йилгача фақат ўзларингни ақлли-ю, солдатлар билан жамики фуқаро казакларнинг ҳаммасини тентак, деб ўйлаб келардинглар. Кизиллар сизларга таълим бера-бера ҳеч нарса ўргатолмаганга ўхшайди.. Шунча таълим билан бир олам таъзир сизларга сира ҳам юқмабди!

Половцев Лятьевскийга имо қилди. У лабини қимтиб индамай, парда тутиб қўйилган деразага ўгирилди, Половцев эса Островновнинг олдигинасига келиб, унинг кифтига қўлини қўйди-да, муроса билан жилмайди.

— Арзимаган нарсаларга ҳам хуноб бўлаверасанми, Лукич! Одам жаҳл устида нималар деб юбормайди? Ҳар тўқисда бир айб. Сен бир нарсада ҳақлисан: фунажинингни харид қилганларнинг тайёрловчилиги бамисоли менинг архиерейлигимга ўхшаган гап. Уларнинг иккови ҳам чекист. Улардан бирини Лятьевский шахсан таниди. Тушундингми? Улар бизни қидириб юришибди, лекин ҳозирча тусмол билан тимирскилаб қидириб юришибди, шунинг учун ҳам ўзларини тайёрловчи қилиб кўрсатишяпти. Энди бу ёғини эшиш: тушгача биз бу ердан битта битталаб чиқиб кетишимиз керак. Сен бориб харидорларингни нима билан бўлса ҳам, қандай қилиб бўлса ҳам икки-уч соат алакситиб тур. Уларни ўзимизга тегишли, ҳозир уйида бўлган танишларингдан биронтасиникига олиб боришинг, улар билан ароқ ичиб ҳангамалашишинг мумкин. Аммо ўзинг ҳам, мезбонинг ҳам зинҳор-базинҳор маст бўлгунча ичиб тилларинг ечила кўрмасин! Билиб қолсам, икковларингни ҳам ўлдираман! Буни қаттиқ ёдингда тут! Сен уларни ичклиқ билан алакситиб турганингча биз аста-секин қўрангнинг этагига туташган жардан даштга чиқиб олиб, ғойиб бўламиш-қўймиз! Ўғлингта айт, ҳозироқ тезак ўюмига менинг қиличимни, пулемётни, дискларни, икковимизнинг милтифимизни яшириб қўйсин.

— Ўзингизнинг милтиғингизни бекиттираверинг, мен ўзимнигини ола кетаман,— дея гап қистирди Лятьевский.

Половцев унга индамай қараб қўйди-да, давом эттири:

— Шу буюмларнинг ҳаммасини палосга ўрасинда, аввал эҳтиётдан кўз ташлаб аста оғилга олиб чиқсин. Уйингга мутлақо ҳеч нарса яшира кўрма. Сенга яна бир илтимос, тўғрироғи, буйруқ бор: менингномимга келадиган пакетларни олиб тур, олишинг билан омбор ёнида ётган тегирмонтошнинг остига бостири. Биз бу ерга баъзан кечалари келиб-кетиб турамиз. Сен ҳамма гапни уқдингми?

Яков Лукич шивирлади:

— Худди шундай.

— Хўп, бор, бу жин урган тайёрловчилардан кўзингни узма! Уларни бу ердан узоқроққа олиб кет, икки соатдан кейин бу ерда бизнинг изимиз ҳам қолмайди. Уларни кечқурун уйингга таклиф қилишинг мумкин. Бу хонадаги каравотларни том бошига олиб чиқиб қўйиб, ҳужрани шамоллатинглар. Чалғитиш учун бу ерга бало-баттар қақир-қуқурларни ташлаб қўй, борди-ю, илтимос қилиб қолишса, уларга бутун уйни кўрсат... Улар турли баҳоналар билан уйингнинг ҳамма ёфини кўздан кечиришга тиришишса ҳам ажаб эмас... Биз бир ҳафтача четда юриб, кейин яна сеникига қайтиб келамиз. Бизга едирган бир бурда нонингни миннат қилма! Бизнинг ишимиз тантана қилди дегунча, ҳамма қилган яхшиликларинг, бизга қилган сарф-харажатларинг учун ошифи билан ҳақ тўлаймиз. Аммо биз бу ерга яна қайтиб келишимиз керак, чунки мен исённи ўз участкамда, шу ерда туриб, Гремячийда кўтараман. Фурсат ҳам яқин қолди!— сўзини тантана билан тугатди Половцев ва Яков Лукични қучоқлаб қўйди.— Бор, чол, худо ёр бўлсин!

Островнов эшикни ёлиб чиқиб кетиши билан Половцев столга келиб ўтириб, сўради:

— Сиз у чекист билан қаерда учрашган эдингиз? Янглишмаётганингизга аминмисиз?

Лятьевский табуретни суриб, Половцевга энгашди-да, танишганларидан бери илк бор бўлса керак, масҳарабозлик қилмасдан, киноясиз гапира бошлади:

— Езус—Мария! Янглишишим мумкинми? Мен бу одамни ўла-ўлгунимча унутмайман! Унинг ёноғидаги чандиқни кўрдингизми? Мени қамоққа олишаётганда юзига ханжар билан туширганман. Қўзимни, мана бу чап кўзимни бўлса сўроқ вақтида ўша ситиб чиқарган. Муштларининг баҳайбатлигини кўрдингизми? Бу воқеа тўрт йилча бурун Краснодарда бўлган эди. Мени бир хотин сотиб қўйди, худога шукурлар бўлсинки, аллақачон дунёдан ўтган! Мен ҳали ички тюрьмада лигимдаёқ унинг сотганини билиб қолдим. Қочган күнимнинг эртасигаёқ оламдан ўтди. Ўзи жуда ёш, кўҳлик, ярамас кубанлик казачка, тўғрироғи, кубанлик қанжиқ эди. Шундай бўлган эди... Биласизми, мен тюрьмадан қандай қилиб қочдим?— Лятьевский мамнуният билан заҳарханда қилиб, кичкина қурғоқ қўлларини бир-бирига ишқади.— Мени бари бир отиб ташлашарди. Менга бари бир эди, мен таваккал билан бир қалтис ишга, ҳатто бир пасткашликка аҳд қилдим... Терговчиларни лақиллатиб, ўзимни оддий аъзолардан қилиб кўрсатиб юрганимда улар мени камоли эҳтиёт билан якка сақлашди. Шундан сўнг мен нажот йўлида охирги чорага ёпишдим. Сўроқ вақтида Кореновская станицасидаги бир казакни сотдим. У бизнинг ташкилотимизга аъзо эди, ҳалқа унга бориб тугарди: у станицадошларидан яна уч кишинигина сотиши мумкин, бизнинг одамлардан бошқа ҳеч кимни, биронтасини ҳам танимас эди. Мен: «Бу тўртта галварсни отиб ташлай қолишин ёки сургун қила қолишин, мен жон сақлаб қолай, ташкилотимиз учун биргина менинг ҳаётим бу зоти пастларнинг, бу тўрт ҳайвоннинг ҳаётидан кўра ғоятда муҳимроқ, деб ўйладим. Шуни айтишим керакки, мен Кубандаги ташкилотда муҳим роль ўйнар эдим. Менинг ишдаги аҳамиятимни ҳатто шундан ҳам билсангиз бўладики, йигирма иккинчи йилда чегарадан беш марта ўтиб, Парижда Кутепов билан беш марта кўришганман. Мен ишдаги бу тўртта қуруқ савлатни сотдим-у, аммо шу билан терговчини юмшатдим; у менинг ички ҳовлида бошқа маҳбуслар билан бирга сайр қилишимга рухсат берди. Мен ҳаяллашим мумкин эмас эди. Тушуняпсизми? Шундай қилиб, кечқурун ҳалокатга маҳкум этилган

бир гала кубанлик тубанлар билан сайрга чиқиб, ҳовлини биринчи айланганимиздаёқ, ҳовлидан томдаги пичанхонага нарвон қўйиб қўйилганини кўриб қолдим, нарвон афтидан, яқинда қўйилган. Пичан ўриш вақти эди, гепеучилар отлари учун кундузлари пичан ташишарди. Мен яна бир айланиб чиқдим, қўлларим қоиддагидек орқамда, учинчى марта айланганимдан кейин бамайлихотир нарвоннинг олдига бордим-да, атрофимга қарамай худди цирк саҳнидагидек аста-секин почама-пocha юқорига чиқа бошладим. Қўлларим илгаригидек орқамда. Мен мўлжални тўғри олган эканман, жаноб Половцев! Руҳан тўғри олган эканман. Менинг ақл бовар қилмайдиган журъатимдан ҳанг-манг бўлиб қолган соқчилар яна саккизта босқи-чиғача монесиз чиқишимга имкон беришди-да, шундагина улардан бири жон аччиғида: «Тўхта!» деб бўйкирди — бу орада мен нарвоннинг икки босқичини бир қилиб чиқиб томга такадек сакрадим. Бетартиб отишма, қичқириқлар, сўкишлар бошланиб кетди. Мен икки сакрашда томнинг лабига етиб олдим, у ердан яна бир сакраб тор кўчага тушдим! Шу билан вассалом. Эрталаб мен Майкопдаги учрашадиган жойимизда, ишончли квартирада эдим... Мени бадбашара қилиб қўйган ўша баҳодирнинг фамилияси — Хижняк. Скифларнинг тошдан йўнилган обидасига ўхшаган чоловорли бу хотинчалишни сиз ҳозир ўз кўзингиз билан кўрдингиз. Нима дейсиз, мен уни энди тириклай қўлдан чиқариб юборайми? Йўқ, менинг си-тилган битта кўзим учун унинг иккала кўзи ҳам си-тилсин! Кетган бир кўзимнинг эвазига икки кўзини ўйиб оламан!

— Эсингизни едингизми! — норозилик билан хитоб қилди Половцев.— Сиз ўз қасосингизни оламан деб бутун ишни барбод қилмоқчимисиз?

— Хотиржам бўлинг. Мен Хижняк билан унинг ошнасини бу ерда ўлдирмайман, хутордан ташқаридаги бирон жойда, Гремячий Логдан узоқроқда пойлаб ётаман. Тайёрловчиларни талангандан қилиб кўрсатаману — ёпиқлик қозон ёпиқлигича қолиб кетаверади! Пулларини ҳам оламан. Савдодан қўлга тушишдими, демак, улар ношуд савдогар экан... Сиз ўз

милтифингизни яшириб қўйинг. Мен бўлсан ўзимникийни плашчимнинг тагида олиб чиқиб кетаман. Мени фикридан қайтараман, деб ўйлай кўрманг, эшитяпсизми? Менинг қарорим узил-кесил! Мен ҳозир чиқиб кетаман, сиз кейинроқ чиқинг. Шанба куни қуёш ботгандан кейин Тубянской яқинидаги ўрмонда ўтган гал учрашган булогимизнинг олдида учрашамиз. Хайр, худо хайрингизни берсин, менга жаҳлингиз чиқмасин, жаноб Половцев! Биз бу ерда асаб важидан баъзан чегарадан чиқиб кетдик, эътироф этишим керак, мен кўпинча одобсизлик ҳам қилдим.

— Қўйсангиз-чи... Бизнинг вазиятимизда назокатнинг ҳожати йўқ,— ийманиб минғиллаб қўйди Половцев, аммо ҳар қалай Лятьевскийни қучоқлаб, унинг рангиз юмaloқ пешонасига оталарча лабларини тегизиб қўйди.

Лятьевский кутилмаганда зоҳир бўлган бу ўртоқлик ҳиссидан таъсиrlаниб кетди, аммо ҳаяжонланганини сездириб қўйгиси келмай, Половцевга орқасини ўгириб, эшик қабзасини ушлаб турганча деди:

— Мен Тубянскойдаги Максим Харитоновни ўзим билан бирга ола кетаман. Унинг милтифи бор, ўзи ҳам машаққатли фурсатларда орқа қилса бўладиганлардан. Сиз эътироуз билдиrmайсизми?

Половцев бир оз хаёл сургач жавоб берди:

— Харитонов менинг сотнямда вахмистр бўлиб хизмат қилган. Жуда тўғри танлабсиз. Олаверинг. У жуда уста мерган, ҳар қалай бир вақтлар шундай эди. Мен сизнинг дардингизни тушуниб турибман. Ишга киришинг, аммо зинҳор Гремячийнинг яқинида ёки хуторнинг ўзида эмас, даштнинг бирон ерида...

— Хўп бўлади. Хайр.

— Муваффақият тилайман.

Лятьевский даҳлизга чиқди, кифтига Островновнинг эскигина зипунини ташлаб, эшик тирқишидан кимсасиз кўчага кўз югуртирди. Бир минутдан сўнг у суворийлар карабинини чап ёнбошига босганча қўрадан оҳиста кетмоқда эди, оғилнинг муюшидан ҳам ошиқмасдангина бурилди. Аммо жарга сакраши билан бирданига ўзгариб кетди: зипунининг енгларини кийиб, карабинни қўлига олди-да, тепкисини суриб

қўйиб, чор атрофга лиққат билан кўз ташлаб, шитир этган садога қулоқ солиб, аҳён-аҳёнда қўйида тонгги кўкиш ҳовур ичиде ястаниб ётган хоторга қараб-қараб қўйиб, ўзан бўйлаб йиртқич ҳайвонлардек пусиб кета бошлади.

Икки кундан сўнг, жума куни эрталаб Тубянской ва Войсковой хуторларининг орасидаги йўлда, Кленовий буеракнинг этагидан олтмиш метрча наридан ўтган йўлда иккита тайёрловчи ва аравага қўшилган отлардан бири ўлдириб кетилди. Тубянской хуторлик аравакаш казак иккинчи отнинг ён қайишларини қирқиб Войсковой хуторига от қўйиб борди. Содир бўлган воқеани қишлоқ советига ўша хабар қилди.

Воқеа содир бўлган жойга чиқиб борган участка милиционери қишлоқ советининг раиси, аравакаш ва гувоҳлар қўйидагиларни аниқладилар: бандитлар ўрмонга яшириниб олиб, милтиқлардан ўн марта ўқ узганлар. Биринчи ўқ билан барваста, яғриндор мол ҳайдовчи ўлдирилган. У дрожкидан юз тубан йиқилган. Ўқ унинг худди юрагига келиб теккан. Fўлабир гавдали тайёрловчи аравакашга жон-жаҳди билан: «Ҳайда!» деб қичқирган ва унинг қўлидан қамчини юлиб олиб ўнг томондаги отга ўқталган, аммо отни қамчилашга улгуролмаган: иккинчи ўқ келиб уни дрожкига чўзилтириб қўйган. Ўқ унинг бошига, чап қулоғидан юқорироққа келиб теккан. Отлар олиб қочган. Ўқ еган тайёрловчи мол ҳайдовчидан йигирма метр нарида дрожкидан тушиб қолган. Иккала милтиқдан баробарига яна бир неча бор ўқ узилган. Чап томондаги от чопиб бораётган жойида теккан ўқдан ўмба-лоқ ошиб кетиб шотини синдирган, устига тақалиб келган дрожкини ағдариб юборган. Аравакаш омон қолган отнинг ён қайишларини қирқиб, уни мина солиб чопган. Унинг орқасидан ҳам бир неча марта ўқ узишган, лекин бу ўлдириш мақсадида эмас, пўписа учун қилинган. Чунки ўқлар, аравакашнинг гапига қараганда, унинг тепасидан ғизиллаб ўтиб кетган.

Ўлдирилганларнинг икковларининг ҳам чўнтаклари ағдарилган эди. Ёнларидан ҳужжатлари йўқ эди.

Тайёрловчининг бўш портфели йўл бўйидаги ўт ичидаги ётарди. Бандитлар у ёқ-бу ёғини тинтиб чалқанча ётқизиб қўйган мол ҳайдовчининг юз терисидаги изга қараганда чап кўзи пошна билан тепиб ситиб чиқарилган эди.

Қишлоқ советининг раиси, иккита урушни бошидан ўтказиб, кўпни кўрган казак, милиционерга шундай деди:

— Буни қара, Лука Назарич, бир газанда буни ҳатто ўлгандан кейин ҳам таҳқирлапти-я! Унинг ғашига тегиб қўйдимикан? Ё хотин масаласида ораларида чатоқ чиқдимикан? Расмона қароқчилар бунақа ваҳшийлик қилишмайди...— У марҳумнинг бўш ётган қипқизил кўз косасига, юзига ёйилиб кетиб энди қотиб қолган қонли шилемшиқ моддага қарамасликка тиришиб, унинг юзига дастрўмолчасини ёпиб қўйди-да, қаддини ростлаб хўрсинди:— Хўп тап тортмайдиган одамлар чиқди-да! Афтидан, бу савдогарларнинг кетига ёмон ниятли одамлар тушиб, чамаси, уларнинг бир неча минг пулинни ўмарганга ўхшайди... Лаънатилар! Пул деб шундай лочинларни нест-нобуд қилишибди-я...

Хижняк билан Бойко-Глуховнинг ҳалокати ҳақидаги хабар Гремячийга етиб келган куни Нагульнов Давидов билан колхоз правлениесида ёлғиз қолиб сўради:

— Иш қаёққа қараб кетаётганини фаҳмлаяпсанми, Семён?

— Сенча фаҳмлаётгандирман. Половцев ёки унинг малайларининг иши, факт!

— Бу ўз-ўзидан маълум. Мен бир нарсага гарангман: уларнинг ким эканликларини қаёқдан билиб олишди эқан, гап шунда. Бу ишни ким қилган бўлиши мумкин?

— Бу масалани сен билан икковимиз еча олмаймиз. Бу икки номаълум тенгламага алоқадор масала. Сен билан икковимиз бўлсак, арифметикаю алгебрадан нўноқмиз, тўғрими?

Нагульнов оёқларини чалиштириб чанг босган этигининг тумшуғига тикилганча анча хаёл сурини ўтиргач, гапирди:

- Бир номаълум нарса менга маълум...
- Нима маълум?
- Бўрининг ўз уяси яқинида қўйларни бўғизла-
маслиги.
- Хўш, бу билан нима демоқчисан?
- Шундай демоқчиманки, уларни Тубянскойдан
ҳам эмас, Войсковойдан ҳам эмас, узоқроқдан келиб
босишган, бу турган гап!
- Шахти ёки Ростовдан дейсанми?
- Шарт эмас, ўзимизнинг хотордан бўлса ҳам
ажаб эмас, қаёқдан биласан.
- Бундай бўлиши ҳам мумкин,— деди Давидов
ўйлаб.— Сенда нима таклиф бор, Макар?
- Коммунистлар, кўзларимизни очайлик. Кечалари камроқ ухлаб, хоторни аста-секин хуфия айланниб, кўз-қулоқ бўлиб юрайлик. Ажаб эмаски, омадимиз келиб, хотордами, хотордан ташқаридами Половцев ёки шубҳали нотаниш одамлардан биронтасини учратиб қолсак. Бўрилар кечаси овга чиқади...
- Сен бизни бўриларга ўхшатяпсанми?— сал илжайиб қўйди Давидов.
- Аммо Нагульнов табассумга табассум билан жавоб бермай, ёйиқ қошлигини чимирганча деди:
- Бўри улар, биз — бўриларнинг кушандаларимиз. Тушуниш керак!
- Жаҳлинг чиқмасин. Фикрингга қўшиламан, факт. Кел, ҳамма коммунистларни ҳозирнинг ўзида-
ёқ йиғақолайлик.
- Ҳозир эмас, сал кечроқ, эл ётганда йиғайлик.
- Бу ҳам тўғри,— деб қўшилди Давидов.— Аммо хутор бўйлаб кузатувчилик қилиб юрмасдан, пистирмада ўтиришимиз керак, бўлмаса, казаклар бирдан бад олиб, гумонсираб қолишади.
- Қаерда пистирма қўйиб ўтирамиз? Тўғри келган жойдами? Беҳуда гап! Менинг Тимошкани пойлашим ўнғай бўлган эди: унинг Лушкадан бошқа борадиган одами, бошқа иложи ҳам йўқ эди. Буларни қаерда пойлаймиз? Дунё кенг, хотордаги қўралар ҳам кўп, ҳар қайсисининг олдига пистирма қўйиб бўлмаса.

— Ҳар қайсисининг олдига пистирма қўйиб ўтиришимизнинг ҳожати ҳам йўқ.

— Бўлмаса қандай йўл билан иш кўрамиз?

— Тайёрловчилар кимлардан мол сотиб олганини аниқлаб, худди ўша қўраларни кўз оstimизга олиб кузатамиз. Қатл этилган ўртоқларимиз кўпроқ шубҳали гражданларнинг атрофида айланиб, ўшалардан мол харид қилишган эди... Бандитлар ҳам шулардан биронтасиникига қора тортиб борган бўлиши мумкин... Тушундингми?

— Хўп мафкурали одамсан-да!— деди Нагульнев қатъият билан.— Баъзан миянгга жуда ақлли фикрлар келади!

XXVII БОБ

Половцев билан Лятьевский яна Островновнинг меҳмонхонасига келиб ўрнашиб, унда тўрт кундан бўён истиқомат қилмоқда эдилар. Улар тонгда келишди. Шундан ярим соат бурун қўшни боғдан туриб Островновнинг уйини кузатаётган Размётнов охирги марта эснаб, ўрнидан туриб, ўз-ўзича шундай мулоҳаза қилганча аста-секин уйига қараб йўл олган эди. «Бу Семён нима балоларни ўйлаб чиқарди-да! Бир неча кундан бери бирорларнинг қўралари атрофида худди от ўғрилари ёки расмона ўғриларга ўшаб пусиб кечалари билан ухламаймиз, қани энди бир фойда чиққан бўлса! Қани у бандитлар? Ўзимизнинг соямини пойлаб юрибмиз... Тезроқ кетишим керак, бигта-яримта саҳарҳез хотин сигир соққани туриб мени кўриб қолса борми, сув бетига тўлқин ёйилгандек хуттор бўйлаб: «Размётнов каллайи саҳарлаб юрибли! Уни қайси бир ўткир хотин иссиққина бағрида олиб ётган экан, тонг отгандагина уйғониб қолибди?» деган миш-мишлар тарқалади. Роса гийбат қилишга киришиб, обрўйимни туширишади... Бу ишга барҳам бериш керак! Бандитларни ГПУ ушласин, чекистларнинг вазифаларини зиммамизга олишимизнинг ҳожати йўқ. Мана мен кечаси билан боғда ётдим, шундай диққат билан тикилдимки, кўзларим қинидан чиқиб кетаёз-

ди, кундуз куни мен хизматда қандай қилиб иш бераман энди? Қишлоқ советида столда мудраб ўтираманми? Одамларга қип-қизил кўзларимни лўқ қилиб қарайманми? Яна: «Лаънати кечаси билан ўйнаб, энди девор тагида ётган теватдек эснаяпти!» дейишлари мумкин. Яна обрўйим ер билан битта бўлади...»

Тараффудлардан ич этини еяётган, уйқусиз тунда ҳориб-чарчаган, бошлаган таъқибларининг кераксизлигига мутлақо ишонган Размётнов қўрага пусиб кирди — уй остонасида даҳлиздан чиқиб келаётган онаси билан тўқнаш келиб қолди.

— Менман, ойижон,— деди ийманиб Андрей, даҳлизга кириб кетишининг пайдан бўлиб.

Аммо кампир унинг йўлини тўсиб, жиддий танбиҳ берди:

— Сен эканлигингни кўриб турибман, кўр эмасман... Ўйин-кулгиларингни бас қилиб, кечалари билан изғиб чиқишингни йиғиширишингга фурсат етмадими, Андрюшка? Ёш эмассан, тантиқлик қиласидиган вақтинг аллақачон ўтиб кетган, онанг билан одамлардан ор қилишингга фурсат етмадими? Уйлану ўзингни тий, бас!

— Шу тобда уйланайми ёки қуёш чиққунча сабр қила турайми?— жаҳл билан сўради Андрей.

— Қуёш уч марта чиқиб ботиб, тўртинчи куни уйлансанг ҳам майли, мен сени шошилтирмайман,— қўпол ҳазилга эътибор қилмай, мутлақо жиддий жавоб берди онаси.— Қариган чоғимда раҳминг келсин. Қариб касалга чалинган вақтимда ҳам сигир соғиш, овқат қилиш, кир-чирингни ювиш, полизга қараш, бутун рўзфордаги ишларни саранжом қилиш менга қийин бўлиб қолди... Бу нарсани нега пайқагинг келмайди, болам? Сен рўзфорнинг ишига қўлингни ҳам урмайсан-ку! Менга ёрдамчи бўлиб қаёққа бординг? Ҳатто сув ҳам олиб келиб бермайсан. Овқатни ейсан-у, худди бир квартирантга ўхшаб, уйдаги бегона бир одамга ўхшаб хизматингга қараб кетасан... Ёш боладек фақат капитарларни ўйлаб, ўшалар билангина овора бўласан. Ахир шу ҳам эркакларга муносиб ишми? Болаларнинг эрмаги билан кўнгил очгани одамлардан ор қилсанг-чи! Агар Нюорка бокишимаса-чи,

мен аллақачон хариш бўлиб йиқилиб қолардим. Кўзинг чиққанми, кўрмайсанми, қоқиндиққинам худонинг берган куни бизникига югуриб келади, гоҳ у ишга қараган, гоҳ бу ишга, гоҳ сигир соғади, гоҳ полизда ўтоқ қилиб, экинларни сұфоради, гоҳ яна бирон ишимга қаравашади! Шундай бинойидек мәхрибон қизки, бутун станицада бунақаси йўқ. Кўзингга нигорон бўлиб тикилади-ю, сен бўлсанг кўрмайсан, ўйин-кулгилар кўзингни кўр қилиб қўйганга ўхшайди! Хўш, қаёқларда жин чалиб юрибсан ўзинг? Турқингни бир қара: худди дайди теватга ўхшаб ҳамма ёғингга тўнғизтароқ ёпишиб ётибди! Бошингни эг, бошгинамга битган бало бўлмай кетгур! Сенгинани қаерларда булғалаб қийноққа солишиди?..

Кампир ўғлининг елкасига қўлини қўйиб, уни энгашишга мажбур қилиб сал пастга босди, Андрей бoshини эггач эса, уни оқ оралаган кокилларидан қаттиқ тишлишиб қоладиган бултурги бир тўп тўнғизтароқни аранг суғуриб олди.

Андрей қаддини ростлаб, ирганиб, ижирғанаётган онасининг юзига тик қараганча кулиб қўйди.

— Менинг тўғримда кўнглингизга ёмон гап келмасин, ойижон! Эрмак вожидан эмас, эҳтиёж юзасидан тўнғизтароқ орасида ётишга мажбур бўлдим. Сиз ҳозирча бу гапга тушунмайсиз, кейинчалик, мавруди келиб билганингиздан кейин тушунасиз. Уйланиш важига келсак, сиз айтган муддат — уч кун — жуда кўплик қиласди. Нюркани эртагаёқ уйингизга бошлаб келаман. Аммо ўзингиз билинг, ойижон, уни келинликка ўзингиз танладингизми — у билан ўзингиз муроса қилинг, ораларингизда жанжал-тўполон бўлмасин. Мен бир бошланада учта хотин билан бўлса ҳам муроса қилиб кетаман, ўзингиз биласиз-ку, бирор менинг жинимга тегмаса мен жуда ройишга юрадиган одамман... Ҳозир йўл беринг, ишга кетишимдан олдин ақалли бир соатгина мизғиб олай.

Кампир чўқинганча йўл берди.

— Худога шукур-а, қариган чоғимда менга раҳм қилишни кўнглингга солибди. Кир, жон болам, кир, арзандам, ётиб ухла, мен сенга нонуштага чалпак пишириб бераман. Сенга озгина қаймоқ ҳам йиғиб қўй-

ганман. Бундай хушнуд қилганинг учун қандай қилиб, нима билан кўнглингни олишимни ҳам билмай қолдим!

Андрей эшикни зичлаб ёпиб кириб кетган бўлсада, кампир ҳали у худди ёнида тургандек оҳистагина гапирди:

— Ёруғ дунёда биттаю битта фарзандимсан-а!— Шундай деб йиғлаб юборди.

Тонгда, айни бир вақтда хуторнинг турли томонларида Андрей Размётнов, туни билан Атаманчуковнинг қўрасидаги оғил тагида ўтириб чиққан Давидов, Банникнинг қўрасини мижжа қоқмай кузатиб чиққан Нагульнов, Островновнинг уйига бехавотир писиб кириб олган Половцев билан Лятьевский ўринга ётмоқда эдилар.

Бу туманлироқ осуда ёз тонгида турли эътиқоддаги ва характердаги бу одамларнинг ҳаммаси турли тушлар кўрган бўлсалар керак, аммо уларнинг ҳаммалари ҳам айни бир соатда уйқуга кетишган эди...

Уларнинг ҳаммасидан Андрей Размётнов олдинроқ уйғонди. У иякларини кўкаргунча қириб, бошини ювди, тоза кўйлагини, Марина Пояркованинг марҳум эридан унга бевосита мерос сифатида келиб теккан мовут чоловорини кийди, этикларига узоқ туфлаб, кеъин уларни эски шинелнинг этагидан йиртиб олинган бир парча мовут билан роса ишқалаб артди. У ошиқмасдан, пишиқ-пухта отланди.

Онаси бу отланишнинг сабабини пайқади-ю, ўғлининг тантанали кайфиятини эҳтиётсиз бир сўз билан бузиб қўймаслик учун ҳеч нарса демади. Унга аҳён-аҳёнда қараб қўйиб, печь атрофида одатдагидан кўпроқ ивиросиди. Улар индамай нонушта қилишди.

— Мени кечгача кутманг, ойижон,—расмий оҳангда огоҳлантирди Размётнов.

— Худо омадингни берсин!— тилак тилади онаси.

— Омад бериб бўпти...— ишончсизлик билан жавоб берди Размётнов.

У совчиликни ҳам, Давидовга ўхшамай, ишchanлик билан ўн минутнинг ичидәёқ тугатди. Аммо, Нюрканинг ота-оналари уйига киргач, ҳар қалай, одатдаги

тартибни бажо келтирди: икки минутча индамай чекиб ўтири, кейин Нюрканинг отаси билан ҳосилнинг қандай бўлиши ҳақида, об-ҳаво ҳақида бир-икки оғиз гаплашди-да, шу заҳотиёқ аллақачон пишишиб қўйилган иш ҳақида гапираётгандек гапирди.

— Эртага сизлардан Нюркани олиб кетаман.

Қайлиқнинг асқиябозликдан хабари бор отаси сўради:

— Қаёққа? Қишлоқ советида дастёр бўлиб навбатчилик қилиб ўтирганими?

— Ундан ҳам баттар иш. Ўзимга хотин қилиб олиб кетаман.

— Ўзи нима дер экан...

Размётнов лов-лов ёнаётган қайлиғига қаради, ўзининг одатда кулиб турадиган юзида табассумдан асар ҳам йўқ эди.

— Розимисан?

— Мен ўн йилдан бери розиман,— деди қиз кескин, Андрейдан дадил, ошифта шаҳло кўзларини узмай.

— Гап шу билан тамом,— деб қўйди мамнуният билан Размётнов.

Қизнинг ота-оналари эски удумни қилиб қийишишмоқчи эди, аммо Андрей яна тамаки чекиб уларнинг уринишларига кескин барҳам берди:

— Мен сизлардан сеп ҳам, ҳеч нарса ундираётганим йўқ, сизлар мендан нима ундира олардинглар? Тамакининг тутуниними? Қизни отлантиринглар. Шу бугуноқ станицага тушиб рўйхатдан ўтиб, шу бугуноқ қайтиб чиқамиз, эртага тўй қиласмиз, гап шу!

— Нега бунча энди сабринг чидамай, қисталанг қилмасанг?— ғаши келиб сўради қизнинг онаси.

Аммо Размётнов унга совуққина қараб қўйиб, жавоб берди:

— Менинг сабрим бундан ўн икки йил муқаддам тугаган, адойи тамом бўлиб, қора ернинг қаърига кирган... Шунинг учун ошиқпманки ўрим-йигим тумшувимизнинг тагига келиб қолди, уйда ҳам, ўзларинги биласизлар, кампирим бус-бутун истеъфога чиқяпти. Хулласи калом, шундай келишамиз: ароқни мен станицадан олиб келаман — ўн литрчагина, ароқ-

қа яраша овқат тайёрлаб, меҳмон чақиринглар. Мен томондан уч киши келади: онам, Давидов, Шалий.

— Нагульнов-чи? — суриштириди отаси.

— Унинг тоби қочиб қолди, — қувлик ишлатди, Макарнинг тўйга ўлақолса ҳам келмаслигига қатъий ишонган Андрей.

— Қўй сўяйликми, Андрей Степанич?

— Ўзларингиз биласизлар, лекин кўп ўйин-кулги қилмаймиз, менга мумкин эмас: вазифамдан олиб ташлаб, партиявий йўл билан шунақсанги бир лахча чўғдек ҳайфсан тутқазиб қўйишадики, рюмка ушлаган бармоқларимни бир йилгача пуллаб юраман.— Қизга ўгирилди-да, шўхлик билан имо қилиб қўйди, аммо унча илжаймади.— Ярим соатдан кейин келаман, сен унгача, Ниора, яхшилаб ясаниб тур. Унчамунча одамга эмас, кимсан қишлоқ советининг раисига тегяпсан-а!

Бу маъюсгина тўй бўлди. Қўшиқ айтилмади, ўйин тушилмади, казакларнинг тўйларига мансуб қувноқ ҳазиллар бўлмади, куёв-келинга қараб айтиладиган, баъзан беибо, баъзан эса мутлақо беҳаё бўлгувчи тилаклар ҳам айтилмади... Бутун руҳ-кайфият Размётновнинг измида бўлди: у тасодифга қарши жиддий, вазмин, ҳушёр эди. Суҳбатларда деярли иштирок этмас, яккаш жим ўтирас, оз-моз ичган меҳмонлар аҳён-аҳёнда «аччиқ» деб қичқириб қолишиса, у худди мажбурият юзасидан қилаётгандек, қизил юзли хотинига бошини буради-да, уни совуқ лаблари билан истамагандек ўпар, ҳамиша шўх кўзлари эса ҳозир ёш келинчакка, меҳмонларга эмас, аллақаёқдаги йироқларга, гўё йироқ, жуда йироқ ҳазин ўтмишга тикилар эди.

XXVIII БОБ

Гремячий Лог ва унинг кўкидаги ҳаёт ҳамон азалий улуғвор, вазмин маромда давом этмоқда: ҳамон хутор устидан баъзан оппоқ қирор уртилган булатлар

сузиб ўтар, баъзан уларнинг туслари ва ранглари ўзгариб, момақалдириқдан дарак берувчи тўқ кўк рангини йўқотиб туссиз бўлиб қолар, баъзан, қуёш ботаётганида хира ёки ярқироқ тусда ловуллаб эртага шамол бўлишидан дарак берар, шунда Гремячий Логдаги ҳамма қўралардаги хотин-халаж ва болалар хонадон бошлиқларидан ёки хонадон бошлиғи бўлишга тайёрланаётганлардан азалий асосилиги билан эътиrozга ўрин қолдирмайдиган қисқагина, хотиржам жумлаларни эшитишарди: «Шундай шамолда ғарам босиб ёки аравага ортиб бўларми?» Шунда ёнила ўтирганлардан — оиласда каттароқларданми ёки қўшниларданми, биронтаси ўй суриси жавоб берарди: «Ҳеч иложи йўқ! Учириб кетади!» Юқорида шафқатсиз шарқий шамол эсиб турган ва пастда одамлар мажбуран бекор ўтирган шундай пайтларда — хутордаги уч юз хонадоннинг ҳаммасида бир вақтлар казо қилган Иван Иванович Дегтяров деган ҳамқишлоқлари ҳақидаги бирдан-бир ҳангама бошланиб кетар эди. Ӯша одам бир вақт, аллақачонлардир шарқий шамол турганда даладан хирмонга ғалла ташимоқчи бўлиб, шамол аравадаги буғдойни боғбоги билан учириси кетаётганини кўргач, оғатга қарши курашдан иложсиз қолиб, паншахада буғдой боғларини кўтарибида-да, шамолга қаҳр билан: «Ҳўп, шунақа зўр экансан буни ҳам учириси кетақол! Учириб кетақол, лаънат теккур!» деб бўкирибди, кейин аравага айқаш-үйқаш уйиб ортилган ғаллани ағдариб юбориб, қаттиқ сўкиниб, аравасини қалдиратганча уйга жўнаб қолибди.

Гремячий Логдаги ҳаёт ўзининг вазмин одимини тезлаштирмасдан бир маромда давом этар, аммо ҳар бир кун ва ҳар бир кеча хуторнинг уч юз хонадонидан бирига ўзининг катта ва кичик қувончларини, қайғуларини, ҳаяжонларини, дарров тугай қолмайдиган гуссаларини олиб келар эди... Душанба куни тонгда ўтлоқда хуторнинг аллақачонлардан буёнги подачиси Агей бобо ўлиб қолди. Ёш, шўх фунажин сигирни қайтариб келиб подага қўшиш учун югуриб, аммо чолларга хос бир оз лўкиллаб чопган ҳам эди-ки, бирдан тўхтаб кўксига гавронини босди-да, бир

минутча турган жойида букилиб кетаётган оёқлари-ни олиб қўйиб, кейин эса худди мастрлардек қаловла-ганича, қўлидан гавронини тушириб юбориб, арангги-на қадам босиб аста-секин орқасига қайта бошлади. Унинг олдиде Бесхлебновнинг сигир ҳайдаб чиқарган келини югуриб келди. Чолнинг совиётган қўлларига ёпишиб, унинг хиралашаётган кўзларига иссиқ нафа-си урилганча, дамини аранг ростлаб сўради:

— Бобогинам, ўргилай, аҳволинг ёмонми?!— Ке-йин овози борича қичқирди:— Вой ўргилиб кетай! Сенга нима ёрдам қилдим энди?!

Тилдан қолаётган Агей бобо гапирди:

— Қўзичноғим, сен кўрқма... Қўлтифимдан сужа, бўлмаса йиқилиб кетаман...

Йиқилиб ҳам тушди — аввал ўнг тиззаси билан чўккаласб, кейин ёнбошига узала тушди-да. ўлиб қолди. Вассалом. Тушки овқат пайтида, айни бир соатда икки колхозчи жувон туғди. Биттасининг дарди жуда оғир бўлди. Давидов биринчи дуч келган арава-ни ошиғич равишда Войсковойдаги участка фельд-шерини олиб келгани юборишига тўғри келди. У мар-ҳум Агей бобо билан видолашиб, унинг ҳувиллаб қолган уйидан энди правлениега қайтиб келган ҳам эдики, шу заҳотиёқ унинг олдига ёш колхозчи Михей Кузнецов кириб борди. Оқариб кетган, ҳаяжонланган йигит оstonаданоқ гапириб кирди:

— Қимматли ўртоқ Давидов, худо ҳақи, ёрдам бер! Хотиним икки кеча-кундуздан бери туғолмай қийналиб ётибди. Менинг ундан бошқа иккита болам ҳам бор, ўзига ҳам ёмон ачиниб кетяпман. От бериб тур, фельдшер керак, бўлмаса кампирларимиз ҳеч жонига ора киришолмаяпти...

— Юр!— деди Давидов ва ҳовлига чиқди.

Шчукарь бобо пичан олиб келгани даштга жўна-ган эди. Отлар тарагиб кетган эди.

— Уйингнинг олдига борайлик-чи, биринчи учрат-ган аравамизниеқ Войсковойга жўнатамиз. Сен хотинингнинг олдига бор, мен йўлда тўқнаш келган аравани тўхтатиб, жўнатаман.

Давидов хотин кишининг кўзи ёриётган жойнинг яқинида эркак кишининг бўлиши номуносиблигини

жуда яхши билар, аммо у Кузнецов уйининг пастаккина четани олдида катта-катта қадамлаб юриб, бўмбўш кўчанинг у бошидан бу бошига аланглар, аёлнинг бўғиқ фарёдлари ва чўзиқ қичқириқларини эшитар, ўзига бегона она изтиробидан ачиниб босиқлик билан инграб қўяр, паст овоз билан матросларнинг энг ёмон сўкишларини айтиб сўкинар эди. Кўчада ошиқмай арава ҳайдаб келаётган бригада сув ташувчиши — ун олти ёшли йигитча Андрей Акимовни кўраркан, худди ёш бўлалардек юргурганча унинг олдидан кесиб чиқди-да, дрогидаги лим-лим сув тўла бочкани енгилгина ағдариб тушириб, нафаси тиқилганча гапирди:

— Гап шу, йигитча, бу ерда бир хотинни дард тутяпти. Отларинг чакки эмас, Войсковойга қараб физилла, менга ўлигини бўлса ҳам, тиригини бўлса ҳам фельдшерни етказиб кел! Отларни ҳоритиб қўйсанг, мен жавобгарман, факт!

Тушки пайваст сукунатда ўлим азобини тортаётган аёлнинг бўғиқ ва паст чинқириғи яна янграб, бирдан тиниб қолди. Давидов йигитчанинг кўзларига диққат билан тикилиб, сўради:

— Эшитдингми? Хўп, қани ҳайда!

Йигитча дрогида бор бўйи билан туриб олганча Давидовга катталардек қараб қўйди.

— Семён амаки, мен ҳаммасига тушуниб турибман, отлардан ҳам хотирингиз жам бўлсин!

Отлар турган жойларидан сапчиб елдек учиб кетишиди, йигитча тик турганча мардонавор сизифириб, қамчини абжирлик билан силтар эди, Давидов эса филдираклар остидан кўтарилиган паға-паға тўзонга қараб умидсизлангандек қўл силтаб қўйди-да, колхоз правлениесига қараб кета бошлади. Кетаётганида аёлнинг чинқириғини яна эшитди-да: худди оғир бир оғриқ азобидан ижирғандек ижирғанди, икки кварталча йўл босиб ўтгандан кейингина, энсаси қотиб ғудуллаб қўйди:

— Буни қара-я, туғишга жазм қилипти-ю, ўзининг уқуви йўқ экан, факт!

Правлениеда кундалик иш деб аталадиган ишларни бартараф қилиб бўлмаган ҳам эдики, ёш ва тор-

тинчоқ бир йигит, кекса колхозчи Абрамовнинг ўғли келиб қолди, бир оёғини олиб бир оёғини қўйғанча, ийманиб гапира бошлади:

— Ўртоқ Давидов, бугун бизнинг уйда тўй, бутун оиласиз билан таклиф қиласиз. Даастурхон тепасида сиз бўлмасангиз уят бўлар.

Шунда Давидовнинг тоқати тоқ бўлиб кетди — у столдан сапчиб туриб, хитоб қилди:

— Хутордагилар эсларингизни едингларми ўзи?! Бир куннинг ўзида ҳам ўлиш, ҳам туғилиш, ҳам уйла-ниш! Бир-бирларингиз билан тил биритирганмисиз-лар, нима бало!

Ўзининг қизиқонлигига ичидан пушаймон бўлиб, энди осойишта сўради:

— Мунча жин уриб ошиқмасанг? Хўш, кузда уй-лана қолардинг-да. Куз жуда тўйнинг мавриди.

Йигит худди чўғ устида тургандек деди:

— Кузга қадар кутгунча иш қисталанг.

— Қанақа иш?

— Хўш, сиз ўзингиз тушунишингиз керак, ўртоқ Давидов...

— Э, шунақами... Ишни, ука, олдинроқ ўйлаб қўйиш керак,— деб қўйди ўгит билан Давидов. Шу ондаёқ жилмайиб, «Келиб-келиб бу гапни унга мен гапиришим, унинг эшитиши ҳам эриш» деб ўйлади.

Давидов анчагача салобат билан жим тургач, ке-йин илова қилди:

— Хўп, майли боравер, кечқурун бирров кириб чиқармиз, ҳаммамиз кирамиз. Сен Нагульнов билан Размётновга айтганмидинг?

— Мен уларни аллақачон таклиф қилганман.

— Хўп, учовимиз кирамиз, бир соатча ўтира-миз. Бизнинг кўп ичишими мумкин эмас, ҳозир қал-тисроқ вақт, хафа бўлиб юрманглар тағин. Хўп, бора-қол. Бахтли, саодатли бўлишларингни тилайман. Лекин сизларга бахт-саодатни уйларингизга боргандা тилаймиз... Қайлифинг жуда кўпчиб кетганми?

— Унчалик эмас-у, аммо кўриниб турибди...

— Ҳа, ҳар қалай, кўриниб тургани яхши,— деди яна бир оз ўгит бергандек Давидов ва бу гаплардаги сохталикни пайқаб тағин жилмайиб қўйди.

Бир соатдан сўнг Давидов маълумотга қўл қўяётган эди, худди шу пайтда баҳтиёр ота Михей Кузнецов кириб келди, Давидовни кира солиб қучоқлаганча миннатдорчилик билан бидирлаб гапира кетди:

— Сенга зўр раҳмат, раисимиз! Андрюшка фельдшерни олиб келди — айни вақтда олиб келди: хотиним ўлиб қолаёзган эди, ҳозир унинг кўмаги билан менга шундай бир ўғил туғиб бердики, хўш, худди бузоқдек келади, кўтараман десанг қўлинг узилиб тушай дейди. Фельдшер айтади, бола ўнг келмаганиш. Менга деса ўнг келганми, ўнг келмаганими, ҳар ҳолда оиласамга бир йигит қўшилди-ку! Ўзинг отахон бўлсанг, ўртоқ Давидов!

Давидов пешанасини қўли билан силаб, деди:

— Отахон бўламан, хотининг эсон-омон қутулганидан қаттиқ хурсанд бўлдим. Рўзгорингга у-бу керак бўлса, эртага Островновга мурожаат қил, унга буйруқ берамиз, факт. Йигитнинг ўнг келмагани важига келсак,— бунинг айби йўқ: шуни билиб қўйки, йигитлар камдан-кам ўнг юришади, чинакам йигитлар...— Бу гал ҳатто жилмаймади ҳам. Гапидаги ўзи яқингинада кулаётган ўгит оҳангини ҳам сезмади.

Бироннинг қувончи ва онанинг мушкили осон бўлгани унинг қўзидан тирқиратиб ёш чиқариб юборган экан, демак, матрос нозик табиат бўлиб қолибди. У қўзидан тирқираб ёш чиққанини сезгач, қўзини катта-кон кафти билан тўсиб, сўзини дағалгина тугатди:

— Сен боравер, хотининг сенга маҳтал бўлиб турнибди. Бирор нарса керак бўлиб қолгудек бўлса, келарсан, ҳозирча жўна. Бу ерда менинг вақтим зиқ, биласанми, сенсиз ҳам ишим бошимдан ошиб ётибди.

Шу куни, кечга яқин Гремячий Лог учун ҳазила-кам бўлмаган, деярли ҳеч ким сезмаган фавқулодда бир ҳодиса содир бўлди: соат еттиларда Островновнинг уйи олдига олифтагина дрожки келиб тўхтади. Уни бир жуфт яхши от олиб келди. Эшик олдида дрожкидан каноп пиджак билан шим кийган ўрта бўйли одам тушди. Шимининг чанг босган қайтарма почасини чолларга хос олифталик билан қоқиб, ёшлардек хушчақчақлик билан Островнов уйининг зинапоя-

сидан чиқиб бориб, ишонч билан даҳлизга ҳирди. У ерда уни янги ташрифдан ташвишланган Яков Лукич кутиб турарди. У тамакидан сарғайиб қорайғанроқ тишларини йилтиратиб самимий кулиб қўйинб, кичкина ва қурғоқ қўли билан Яков Лукичнинг билагини қаттиқ сиқди-да, мулойимгина жилмайиб сўради:

— Александр Анисимович шу ердами? Қиёғангга қараганда, сен — уй эгаси бўлсанг керак. Яков Лукичмисан?

Яков Лукич ҳарбий хизматда бўлган одамга хос туйғуси билан, келган меҳмоннинг ўзини тутиши, қадди-қоматига қараб каттакон бошлиқлардан эканлигини пайқади-да, эскириб кетган чориқларининг пошналарини итоаткорона уриштириб қўйиб, шоша-пиша жавоб берди:

— Мартабаи олийлари! Сизмисиз? Худойимдан ўргилай, сизни муштоқ бўлиб кутишаётган эди!

— Олиб кир!

Яков Лукич табиатига хос бўлмаган чаққонлик билан Половцев ва Лятьевский яшаётган меҳмонхона эшигини тавозе билан ланг очиб юборди.

— Александр Анисимович, олдиндан кириб айтмаганим учун афв этасиз, бизга азиз меҳмон келиб қолдилар!

Келган одам очиқ эшикдан ичкари кириб, қучоғини худди театрдагидек кенг очди.

— Саломатмисизлар, азиз узлатнишинлар! Бу ерда барала гапираверса бўладими?

Стол ёнида ўтирган Половцев, одатдагидек бемалол чўзилганча каравотда ётган Лятьевский худди «смирно» командаси берилгандек ўринларидан сапиб туришди.

Келган одам Половцевни қучоқлаб, Лятьевскийни эса чап қўли билангина бағрига босиб, деди:

— Ўтиришларингизни илтимос қиласман, жаноб офицерлар. Мен сизларга буйруқлар ёзган полковник Седой бўласман. Ҳозир тақдирнинг иродаси билан ўлка қишлоқ хўжалик бошқармасининг агрономиман. Кўриб турганларингиздек, сизларнинг ҳузурларингизга назорат сафари билан келдим. Менинг вақтим жуда қисқа. Сизларга вазиятни маълум қилишим керак.

Келган одам офицерларни ўтиришга тకлиф қилиб, боягидек тамакидан сарғайған тишларини кўрсатиб илжайғанча намойишкорона ясама самимият билан давом этди:

— Фақир яшар экансизлар, ҳатто меҳмонни сийлагудек ҳеч нарсанглар ҳам йўққа ўхшайди... Аммо гап бу ерда зиёфат тўғрисида бормайди, мен бошқа ерда овқатланаман. Менинг кучеримни столга таклиф қилиб, бизнинг муҳофазамизни гаъминлашларингизни илтимос қиласман, ақалли кузатиш йўли билан бўлса ҳам майли.

Половцев бажонидил эшикка қараб юргурган эди, лекин шу пайт жаноб полковникнинг хушбичим ва жуссадор кучери кириб келди. У Половцевга қўлини чўзди:

— Саломат бўлинг, жаноб ясовул! Русларнинг одатига кўра, бўсаға оша кўришилмайди...— Полковника мурожаат қилиб, эҳтиром билан сўради:— Бу ерда бўлишимга рухсат этасизми? Кузагиш масаласини таъминладим.

Келган одам Половцев ва Лятьевскийга чуқур тушган қуралай кўzlари билан ҳамон жилмаярди:

— Танишишларингизни илтимос қиласман, жаноб офицерлар: ротмистр Казанцев. Хўш, мезбонларни бўлса, жаноб Казанцев, сиз биласиз. Энди ишга кўчайлик, жаноблар. Сизларнинг бўйдоқона столингизга ўтирайлик.

Половцев ботинқирамай сўради:

— Жаноб полковник, сизни бирон нарса билан сийлашга рухсат этарсиз балки? Соддагина, боримизни олдингизга қўямиз!

Келган одам қуруққина жавоб берди:

— Ташаккур, ҳожати йўқ. Келинглар, дарҳол ишга ўтақолайлик, менинг вақтим зиқ. Ротмистр, картани беринг.

Ротмистр Казанцев пиджагининг ички кўкрак чўнтагидан Азов-Қора денгиз ўлкасининг тўрт буклаб тахланган ўн чақирим миқёсдаги картасини олиб столга ёйди, тўртовлари унга энгashiшди.

Келган одам каноп кителининг тугмаси ечишган

кенг ёқасини тузатиб қўйиб, чўнтағидан кўк қалам олди-да, у билан столни тиқ-тиқ урганча деди:

— Менинг фамилиям сизлар ўйлагандек, мутлақо Седой эмас... Никольский. Император армияси бош штабининг полковнигиман. Карта умумий, аммо сизларга жанговар операциялар учун бундан муфассалроқ картанинг ҳожати йўқ. Вазифангиз: сизнинг ихтиёрингизда милтиқ ёки қилич кўтарган икки юзга яқин фаол аскар бор, сиз, маҳаллий коммунистларни қиргач, аммо майда ва узоқса чўзиладиган тўқнашувларга мутлақо киришманг, йўл-йўлакай алоқа воситаларини кесиб, жанговар тартибда «Красная заря» совхозига боришингиз керак. Сиз у ерда керакли ишни бажаргач, шунинг натижасида қирққа яқин милтиқ билан шунга яраша запас ўқ-дори ўлжа оласиз. Энг муҳими, тасарруфингиздаги қўл ва станокли пулемётларни тўла-тўқис сақлаган ҳолда, совхозда ўттизга яқин юк автомобилларини қўлга киритиб, жадал марш билан Миллеровога қараб юришингиз керак. Яна бир муҳим вазифа... Сизга қанча муҳим вазифа юклётганимни кўряпсизми... Сиз, жаноб ясовул, мен буюраман, Миллерово шаҳрида жойлашган полкни дафъатан босиб, унинг ҳаракат қилишига йўл қўймай, дарҳол тор-мор этиб, қуролсизлантиришингиз, унда мавжуд бўлган ўт очиш воситаларини ва полкнинг сизга қўшиладиган қизил аскарларини қўлга киритиб, улар билан биргаликда машиналарда Ростов томонга қараб юришингиз керак. Мен сизга вазифани умумий бир руҳда белгилаб бераётиман, аммо кўп нарсанинг тақдирни шунга боғлиқ. Тасоди-фан, борди-ю, сизнинг Миллеровога қараб юришингиз қаршиликка дуч келиб қолса, мана бу маршрут бўйича Миллеровони четлаб ўтиб Каменскка қараб юринг.— Полковник кўк қалам билан ошиқмасдангина картага тўғри чизиқ чизди.— Каменскда мен сизни ўз отрядим билан кутиб оламан, жаноб ясовул.

Бир оз жим тургач, у илова қилди:

— Шимолдан сизга, эҳтимол, подполковник Савватеев мадад берса керак. Аммо сиз бунга унча умид боғламай, ўзингиз ҳаракат қилаверинг. Кўп нарса, буни тушунинг, сизнинг операциянгизнинг муваффақия-

тига боғлиқ. Мен Миллероводаги полкни қуролсиз-лантириб, унинг ўт очиш воситаларидан фойдаланишни айтяпман. Ҳар қалай, уларда батарея бор, бу эса кўп жиҳатдан фойда бериши мумкин. Шундан кейин биз Қаменскдан Ростов учун жанг бошлаб, бизга маддад бериш учун Кубань ва Терекдаги кучларимиз, ундан сўнг эса иттифоқчиларимизнинг мадади етиб келишини кутардик, қарабисизки, жанубда ҳокимлик қиляпмиз. Шуни ҳисобга олишларингизни илтимос қиласманки, жаноб офицерлар, биз ўйлаган операция қалтис, аммо бизнинг бошқа иложимиз йўқ! Агар биз тарих бизга бир минг тўққиз юз ўттизинчи йилда бераётган имкониятдан фойдаланмас эканмиз, у тақдирда империя билан видолашиб, майда террористик ҳаракатларга ўтаверинглар... Мен сизларга айтмоқчи бўлган гаплар шу. Қисқагина гапириш навбати сизга, ясовул Половцев. Бир вазиятни ҳисобга олинг: мен ҳали қишлоқ советига ҳам кириб, командировкамни қайд эттириб, районга жўнашим керак. Мен бовужуди расмий шахсман, қишлоқ хўжалик бошқармасининг агрономиман, шунинг учун қисқароқ гапиринг, мулоҳазаларингизни айтинг.

Половцев полковника қарамай, бўғиққина гапира бошлади:

— Жаноб полковник, сиз менинг олдимга умумий вазифа қўяяпсиз, уни ҳеч конкретлаштиrimаяпсиз. Мен совхозни оламан, аммо мен шундан сўнг бориб, казакларни оёққа кўтарамиз, деб ўйлаган эдим, сиз бўлсангиз мени Қизил Армиянинг мунтазам полки билан жанг қилгани жўнатяпсиз. Сизнинг назарингизда, бу мендаги мавжуд имкониятлар ва кучлар билан амалга ошириш маҳол бўлган вазифа эмасми? Борди-ю, менинг йўлимда қаршимдан ҳатто битта батальон келиб чиқса... сиз мени муқаррар ҳалокатга маҳкум қиласиз-ку?

Полковник Никольский суякли бармоқлари билан столни чертиб, заҳарханда қилиб қўйди:

— Мен ўйлайманки, бир вақтлар сизга ясовул унвонини бериб чакки қилишган экан. Агар машаққатли дақиқаларда иккиланиб, биз ўйлаган тадбирнинг муваффақиятига ишонмаётган экансиз, рус армиясининг

офицерлигига сира ҳам арзимас экансиз! Зинҳор, ақлавонлик қилиб, ўз мустақил планларингизни тузиши ўйлай кўрманг! Сизнинг сўзларингизни қандай тушуниш керак бўлади? Ҳаракат қиласизми ёки сизни олиб ташлаш керакми?

Половцев ўрнидан турди. Кенг пешанали бошини эгиб, оҳиста жавоб берди:

— Ҳаракат қиласан, жаноб полковник. Аммо... Аммо операция муваффақиятсиз чиқадиган бўлса, мен эмас, сиз жавоб берасиз!

— Эҳ, бунинг ташвиши сизга тушмай қўя қолсин, жаноб ясовул!— деб қўйди тундлик билан заҳарханда қилиб полковник Никольский ва ўрнидан турди.

Шу ондаёқ ротмистр Казанцев ҳам турди.

Никольский Половцевни қучоқлаб деди:

— Мардлик, яна бир карра мардлик! Ажойиб, эски император армиясининг офицерлар корпусига шу нарса етишмайди! Сизлар ўрта мактабда ўқитувчилик қилиб, агрономлик қилиб юриб унтиб қўйибсизлар. Анъаналар-чи? Ҳа, майли. Сиз учун ўйлаётганларнинг буйруғи билан иш бошланг, у ёғи... у ёғи — иш бир юрса юришиб кетади! Сизни, жаноб ясовул, ҳали Новороссийскдами ёки, чунончи, Москвадами генерал-майор лавозимида кўраман деб умид қиласан. Тунд қиёфангизга қараганда, сиз кўп ишларга қодирсиз! Каменскда учрашгунимизча, хайр. Энг охирги гапим: бизнинг қаршилик кўрсатиш нуқталаримиз бор жойлардан айни бир вақтда кўтарилиб чиқиш ҳақидаги буйруқ алоҳида берилади, сиз буни тушунасиз. Қаменскда учрашгунимизча, хайр!

Половцев келганлар билан совуққина қучоқлашиб, меҳмонхона эшигини очиб, даҳлиза жонсарак бўлиб турган Яков Лукичнинг кўзига кўзи тушаркан, ўтириш эмас, каравотга чўзилиб қолди. Бир оздан сўнг орқаси билан деразага суюлиб турган Лятьевскийдан сўради:

— Сиз бунаقا лўттибозни кўрганмисиз?

Лятьевский эса нафрат билан қўл силтади:

— Езус — Мария, бу рус ҳарбийларидан нима истамоқчи эдингиз! Сиз мендан сўранг, жаноб Половцев: мен нима жин уриб сизга эргашиб юрибман?!

Шу куни яна бир фожиали ҳодиса юз берди: Трофим деган така қудуққа тушиб кетди. Табиатан бекарор бўлгани учун у кечаси билан хутор бўйлаб изғиб юриб, тунда дайди итлар галасига рўпара келиб қолган, улар ҳам уни тириқтирганча қувиб, колхоз правлениеси ёнидаги қудуқдан сакраб ўтишга мажбур қилишган. Қудуқ оғзидағи қопқоғи Шчукарь бонинг чолларга хос эҳтиётсизлиги туфайли кечқурундан бекитилмай қолган, итлардан қўрқиб кетган қари така қудуқ устидан сакраб ўтаман деб, чамаси, қари туёқлари сирғаниб кетиб, пастга қулаган-у ғарқ бўлган.

Кечқурун Шчукарь бобо бир арава пичан олиб қайтди, айғирларини суформоқчи бўлди, сув оламан деган эди, челак юмшоқ бир нарсага бориб текканини сезди. Челак боғланган арқонни у ёқдан-бу ёққа нечоғлик силтамасин, сув оламан деган ҳамма ҳаракатлари беҳуда кетди. Шундан сўнг кўнглига даҳшатли бир шубҳа тушган чол эски душманини оғил томининг бирон ерида кўриб қолиш умидида жовдираған кўзлари билан қўрани назаридан кечирди, аммо кўзига ҳеч нарса чалинмади: Трофим ҳеч қаерда йўқ эди. Шчукарь бобо шоша-пиша пичанхонага қараб кетди. Кейин лўкиллаганча дарвоза ташқарисига қараб югурди — Трофим ҳеч қаерда йўқ эди... Шундан сўнг қайғусидан аянчли ва хун бўлган Шчукарь правлениедаги Давидов ўтирган хонага кириб, скамейкага ўтиреди:

— Ана, Сёма, ўргилай бошимизга янги бир фалокат ҳам келди: бизнинг Трофим, чамамда, қудуққа тушиб ғарқ бўлганга ўхшайди. Юр, чангак топиб, уни тортиб чиқарайлик.

— Куяяпсанми? — жилмайиб сўради Давидов. — Доим, уни сўйинглар, деб илтимос қиласдинг-ку.

— Илтимос қиласи бўлсан нима қипти! — жаҳл билан қичқириб юборди Шчукарь бобо. — Худога шукурки, сўймадинглар! Энди мен усиз қандай қилиб яшайман? У мени худонинг берган куни таҳликада жон ҳовучлаб юришга мажбур қиласарди, ўзимни ундан қўриқлаб тонг саҳардан оқшомгача қўлимдан қамчинимни қўймасдим, бундан бўён кечирган турму-

шим қандай бўлади энди? Диққинафасликдан иборат бўлади! Энди ўзим ҳам қудуққа калла ташлай қолсам бўлаверадиган бўлиб қолди... У билан бизнинг орамизда қандай дўстлик бор эди? Ҳеч қандай! Яккаш жанг жадалда тўқнашардик. Лаънатини ушлаб олсам, шохидан тутиб турганча: «Трофим, ярамаснинг боласи, ахир сен унча ёш така эмассан-ку, шунча кекни қаёқдан олгансан? Шунча абжирликни қаёқдан олгансанки, мени бир секунд ҳам ўз ҳолимга қўймайсан? Яккаш орқамданми ёки ён-веримданми келиб сузиб қолишнинг пайдан бўласан. Ахир тушунсанг-чи, мен нимжон одамман, сен менга унча-мунча раҳм қилишинг керак дегувчи эдим. У менга кўзларини лўқ қилиб қарайди, кўзларида одамшавандаликнинг ишонаси ҳам кўринмайди. Кўзларида ҳеч қандай раҳмшафқат асарини кўрмайман. Яғринига қамчи билан соламан-да, орқасидан: «Жўна, лаънат тегсин сенга, қари бузуқи! Сен билан ёлчибина бир муросага келиб бўлмайди!» деб қоламан. У бўлса, фанимвачча, орқасини бир кўтариб ташлайди-да, ўн қадамча нарига югуриб бориб, лаънати, худди оч қолгандек бекорчиликдан ўт чимдишга киришади! Ўзи бўлса лўқ кўзлари билан менга қия қарайди. Чамаси, яна мени сузининг пайдан бўлади шекилли. Икковимизнинг кечирган кунимиз кун эмас, майнавозчилик эди! Чунки бундай аҳмоқ галварс билан, содда қилиб айтганимизда — аҳмоқ билан муросага келиб олишимнинг ҳеч иложи йўқ эди! Мана ҳозир бўлса чўкиб ўлди, унга ачиняпман, турмушим ҳам мутлақо диққинафас бўлиб қолди...— Шчукаръ бобо маъюсгина пиқиллаб йиғлаб юборди ва кир чит кўйлагининг енги билан ёшли кўзларини артди.

Кўшни ҳовлидан чангак топиб чиқиб Давидов билан Шчукаръ қудуқдан хийлагина бўккан Трофимни тортиб чиқириши. Давидов Шчукардан юзини ўтириб турганча сўради:

— Хўш, энди нима қиламиз?

Шчукаръ бобо ҳамон пиқиллаб йиғлаганча ёшли кўзларини арта туриб, жавоб берди:

— Сен бориб, Сёмушка, давлат ишларингни баъзаравер, буни ўзим кўмаман. Бу сенга ўхшаган ёш-

ларнинг иши эмас, чолларнинг иши. Мен бу ғаддорни қоидасини келтириб қўмаман. Тепасида ўтириб бирпаст азасини тутиб йифглайман... Уни тортиб чиқаришга ёрдам берганинг учун худо сени ёрлақасин, ёлғиз ўзимнинг кучим етмас эди: ўзиям камида уч пуд келади. Текин томоқни еб семириб кетган эди-да, шунинг учун чўкиб кетган, аҳмоқ, енгилроқ бўлса борми, қудуқдан бемалол сапчиб чиқсан бўларди! Чамаси, итлар ўтакасини ёриб юборишган шекилли, эс-ҳушини йўқотганча қудуқнинг устидан сакраб ўтмоқчи бўлган. Бу қари аҳмоқда эс-ҳуш нима қиласди дейсан? Сен менга, ўргилай, айланай, Сёмушка, чорактагина ароққа пул бер, кечқурун пичанхонада унинг арвоҳини йўқлай. Уйга, кампирнинг олдига боришимнинг ҳожати йўқ, борганим билан нима иш чиқарди? Ҳамма асад системаларимнинг қақшашидан бошқа иш чиқмайди. Яна жанг жадалми? Қариб қолган ҷофимда бунинг менга мутлақо ҳожати йўқ. Ўзим секингина ичib, майитни йўқлайман-да, айғирларни суфориб, ётиб ухлайман, факт.

Кулгиси қистаб кетган Давидов ўзини аранг тийиб, ўн сўм тутқазди-да, унинг чуваккина елкасидан қулоқлади.

— Сен, бобо, унга унча қуиб-пишаверма. Жуда бўлмаса, биз сенга янги така олиб бера қолармиз.

Шчукаръ бобо бошини қайғули чайқаб, жавоб берди:

— Бунақанги такани ҳеч қанақанги пулга ҳам тополмайсан, ёруғ дунёда бунақанги така бўлган эмас, бўлмайди ҳам! Менинг қайғум ўзим билан кетади.— Ўзининг самимий қайғусидан таъсир этувчи кулгили бир қиёфада буқчайган, аянчли чол белкурак олиб келгани кетди.

Гремячий Логдаги катта ва кичик ҳодисалар билан тўлган бу кун шундай тамом бўлди.

XXIX БОБ

Давидов кечки овқатни еб бўлгач, ўз ҳужрасига кириб, унга почтадан яқинда олиб келиб беришган газеталарни кўздан кечириш учун эндигина столга

ўтирган ҳам эдики, дераза ромининг оҳиста тақиллаганини эшишиб қолди. Давидов деразани очди. Нагульнов пойдеворга оёғини қўйганча, бўғиқ овоз билан гапирди:

— Ишга отлан! Қани, йўл бер-чи, мен олдингга тушиб гапириб берай...

Унинг қорамағиз юзи оқарган, жиддий эди. У дераза рафидан осонгина ошиб ўтди-да, дарҳол табуреткага ўтириб, муштуми билан тиззасини урди:

— Ана, мен сени огоҳлантирган эдим, Семён, худди айтганимиздек бўлди! Мен ҳар ҳолда биттасини учратдим: Островновнинг уйи ёнида икки соат сурункасига чўзилиб ётдим, қарасам, ўрта бўйли бирор келяпти, келяпти-ю, эҳтиёт билан атрофга қулоқ соляпти, демак, ўшалардан, худди ўша унсурлардан бири... мен пистирмага кеч бордим, жуда қоронги тушиб қолган эди. Кеч қолганим сабаби, далага борган эдим. Ўшангача яна биттаси кириб кетган бўлса-чи? Қисқаси, борамиз, йўл-йўлакай Размётновни ҳам олакетамиз, кутиб ўтиришнинг ҳожати йўқ. Биз уларни ўша ерда, Лукичникида шу заҳотиёқ қўлга туширамиз! Борди-ю, ундай бўлмаса, ўшанинг ўзини ушлаймиз.

Давидов тўшакдаги ёстиқ тагига қўлини тиқиб пистолет олди.

— Қандай қилиб ушлаймиз? Қел, шу ерда гаплашиб оламиз.

Нагульнов тамаки чекиб, сезилар-сезилмас жилмайди:

— Бу менга эскидан таниш иш. Бўлмаса қулоқ сол: ўша ўрта бўйли эшикни тақиллатмай, мен деразангни тақиллатганимдек деразани тақиллатди. Яков Лукичнинг уйида бир деразаси ҳовлига қараган ҳужраси бор. Ўша бандит, зипундами, ёки плашчдами, қоронғида илғаёлмадим, деразани тақиллатди: Лукичмикан, унинг ўғли Семёнмикан, бирор эшикни қия очди, у уйга кириб кетди. Зинапоядан чиқаётганида, бир алантади, эшикдан кираётганида—иккинчи марта орқасига қараб қўйди. Мен четан орқасида ётган жойимда буларнинг ҳаммасини ўз кўзим билан кўрдим. Шуни билиб қўйки, Семён, яхши одамлар бунақа

бўрига ўхшаб хавотир билан олазарак бўлиб юришмайди! Уларни қўлга туширишнинг шундай бир пла-нини таклиф этаман: сен билан икковимиз эшикни та-қиллатамиз, Андрей бўлса, ҳовлида деразанинг яқинида биқиниб ётади. Бизга ким эшик очса — уни кўрамиз, меҳмонхонанинг эшиги ёдимда, даҳлизга киришинг билан ўнг томонда биринчи эшик. Билиб қўй, у ичкаридан беркитиб қўйилган бўлади, уни дар-ҳол бузиб киришга тўғри келади. Биз икковимиз ки-риб борамиз, борди-ю, биронтаси қочмоқчи бўлиб деразадан ташласа Андрей уни қулатади. Бу тунги меҳмонларни тириклай қўлга туширамиз, жуда осон-гина! Мен эшикни уриб бузаман, сен менинг орқаро-ғимда турасан, бирон ишқал чиқиб қолгудек бўлса — гап сўзни чўзиб ўтирумай, меҳмонхонадан келган овоз томонга қараб ўқ узаверасан!

Макар Давидовнинг кўзларига қисила келган кўзлари билан қаради, унинг қатъий лаблари яна сезилар-сезилмас табассумдан жилмайиб қўй-ди:

— Сен бу ўйинчоқни қўлингда ўйнаяпсан, ундан кўра обоймасини текшириб, шу ернинг ўзида патронни милига жойлаб қўй. Бу ердан дераза орқали чиқиб кетамиз, дарчасини юзига ёлиб қўямиз.

Нагульнев гимнастёркасининг камарини тўғрила-ди, тамакисини ерга ташлади, чанг босган этигининг тумшуғига, тупроқда беланган қўнжларига қаради-да, яна кулиб қўйди:

— Аллақаёқдаги ярамас газандалар туфайли худди кучук боладек роса тупроқча ағанадим: азиз меҳмонларни кутиб ҳар қанақасига узала тушиб ёти-шимга тўғри келди... Мана биттаси келди ҳам... Лекин менинг фикримча, у ерда улар иккита-учта бўлса ке-рак, шундан ортиқ бўлмаса керак. Улар бир взвод эмасдир-ку, ахир?

Давидов затворни шарақлатиб милга патронни жойлади-да, пистолетни пиджагининг чўнтағига ти-киб деди:

— Сен бугун нега хушчақчақсан, Макар? Олдимга келганингга беш минут бўлди-ю, шу орада уч марга кулиб қўйдинг...

— Қувноқ ишга кетяпмиз. Сёма, шунинг учун куляпман.

Улар деразадан пастга тушиб, унинг тавақалари билан дарчасини юзига ёпиб қўйиб, бир оз туришиди. Тун илиққина, анҳор томондан ер бағирлаб салқин ҳаво келмоқда, хотор уйқула, кундузги ҳаракатлар тинган. Қаердадир бузоқ маъради, хотор этагидаги алла-қаердадир итлар вовуллади, қўшни қўрада вақтдан адашган, уйқусираб довдираган хўroz бемаҳал қичқириб юборди. Бир-бирларига чурқ этмай, Макар билан Давидов Размётновнинг уйига етиб келишди. Макар шаҳодат бармоғини букиб, дераза тавақасини эшитилар-эшитилмас тақиллатди, бир оз кутгач, фирашира ёруғда Андрейнинг юзини кўраркан, уни қўли билан имлаб чақириб, нагани кўрсатди.

Давидов уйдан чиқсан босиқ, жиддий овозни эшилди:

— Имонгни тушундим. Дарров чиқаман.

Размётнов шу ондаёқ уй остонасида пайдо бўлди. Чиқа туриб эшикни ёпаркан, фижиниб гапирди:

— Ҳамма нарсани суриштираверасан-а, Нюра! Қишлоқ советига иш билан чақиришяпти. Сайилгоҳга чақиришаётгани йўқ-ку? Хўп, оҳ-воҳ қилавермай, ухла, тез қайтиб келаман.

Учвлари ғуж бўлиб туришиди. Размётнов қувониб сўради:

— Ахир тутдинларми?

Нагульнов бўғиқ шивирлаганча унга бўлган воқеани гапириб берди.

...Улар учовлашиб индамайгина Яков Лукичнинг қўрасига киришди. Размётнов орқасини иссиқ пойде-вортга бериб, унинг тагига пусди. У наган милини эҳтиёт билан тиззасига қўйди, ўнг қўлининг панжасини унча толиқтиргиси келмади.

Нагульнов зинапоядан энг олдин чиқиб эшикка борди-да, ҳалқани шиқирлатди.

Островновнинг қўраси ҳам, уйи ҳам жимжит эди. Аммо бу хунук сукунат узоқ давом этмади — даҳлиздан Яков Лукичнинг кутилмагандага қаттиқ янраган овози эшитилди:

— Ярим кечада изғиб юрган ким?

Нагульнов жавоб берди:

— Лукич, сени бемаҳалда уйғотганимиз учун ке-
чирил, ҳозир сен билан икковимиз совхозга жұнашимиз
керак. Зарур иш чиқиб қолди!

Бир минутча саросима ва жимжитлик ҳукм сурди.

Энди Нагульнов сабрсизланиб талаб қилди:

— Хүш, нима бўлди сенга? Эшикни оч!

— Қимматли ўртоқ Нагульнов, бемаҳал келган
меҳмонимиз, бу ер қоронғи бўлгани учун... Илгакла-
римиз... дарров тополмайсан, киринглар.

Ичкарида пухта темир илгак шарақлади, қалин
эшик сал қия очилди.

Нагульнов кучи борича эшикни чап елкаси билан
итариб, Яков Лукични девор томонга суриб юборди-
да, даҳлизга катта қадам ташлаб, Давидовга елкаси
уша буюрди:

— Бирон ҳодиса бўлгудек бўлса уни отавер!

Нагульновнинг димогига уйнинг иссиқ нафаси ва
янги ачитқининг ҳиди урилди. Аммо ҳидлар билан
ҳисларнинг фарқини ажратиб ўтиришга унинг вақти
йўқ эди. У ўнг қўлида наган ушлаб турганча, чап
қўли билан дарҳол меҳмонхонага олиб кирадиган
эшик тавақасини пайпаслаб топди-да, енгилгина ил-
гак билан беркитиб қўйилган бу эшикни тепиб
бузди.

— Ҳой, бу ерда ким бор, ўқ узаман!

Аммо у ўқ узишга улгуролмади: унинг қичқириғи
кетиданоқ остоңа яқинида қўл гранатаси гумбурлаб
портлади, қўл пулемёти тун сукунатида даҳшатли янг-
раб тариллади. Шундан сўнг, уриб синдирилган де-
раза роми жаранглади, ҳовлида отилган ўқ овози инг-
ради, кимдир чинқириб юборди...

Граната парчалари тегиб дабдала бўлган Нагуль-
нов дарҳол ўлди, меҳмонхонага югуриб кирган, ҳар
қалай, қоронғиликка қараб икки марта ўқ узишга
улгурган Давидов пулемёт ўқларига дуч келди.

У эшик кесакисидан ўқ учирган дағал пайра-
ҳани чап қўли билан чанглаб, бошини изтиробда
орқага ташлаганча ҳушини йўқотиб чалқанчасига
йиқилди.

Эҳ, Давидовнинг тўрт жойидан ўқ тешиб ўтган ўмровли кўкрагининг ҳаётни тарк этиши қийин бўлди... Кечаси дўстлари қоронғида қоқилиб-суқилиб, аммо имконлари борича ярадорни қимирлатмасликка тиришиб уни қўлларида уйига олиб келганларидан бери у ҳали бирон марта ҳам ҳушига келгани йўқ, ва ҳоланки, унинг ўлим билан машаққатли кураши ўн олти соатдан бери давом этмоқда эди...

Эрталаб кўпик босган отда район хирург врачи келди, у ёш бўлишига қарамай анча жиддий одам эди. У Давидов ётган хонада ўн минутчагина бўлди, шу вақт мобайнида ошхонада жиддий сукут сақлаб турган Гремячий партячейкасининг коммунистлари ва Давидовни севган кўпгина партиясиз колхозчилар Давидовнинг меҳмонхонадан келган худди уйқусирагандагидек бўғиқ, ҳазин ингрогини бир мартагина эшитдилар. Енглари шимарилган, ранги оқарган, аммо зоҳиран осойишта врач ошхонага қўлини сочиқ билан артганча чиқиб келди-да, Давидов дўстларининг унсиз саволларига шундай жавоб берди:

— Умид йўқ. Менинг ёрдамим керак бўлмайди. Аммо ниҳоятда жони қаттиқ экан! Уни ётган жойидан бошқа ерга кўчира кўрманглар, умуман уни қўзгатиб бўлмайди. Борди-ю. хоторда муз топилса... дарвоҷе, кераги ҳам йўқ. Аммо ярадорнинг олдида бирор қўзғалмасдан ўтириши керак.

Унинг кетидан хонадан Размётнов билан Майданников чиқиб келишди. Размётновнинг лаблари титрар, жовдираган кўзлари ошхонани кезиб, тартибсиз уймалашиб турган ҳамқишлоқларини кўрмас эди. Майданников бошини қуий согланча чиқиб келди, унинг чаккаларидаги ўйноқлаб чиққан кўк қон томирлари яққол қўзга ташланар, қаншаридан юқорироқдаги иккита кўндаланг чуқур ажини худди чандиқдек қизариб турар эди. Майданниковдан ташқари ҳамма ёпирилиб эшик олдига чиқди-да, қўра бўйлаб ҳар томонга таралиб кетди. Размётнов кўчадаги ён эшикка кўкрагини тираганча бошини қуий солиб турар, яғрини кўтарила тушиб кураклари ўйнамоқда; кекса Шалий четан олдига бориб қийшайиб қолган дуб қозиқни ўз-ўзидан беихтиёр ғазаб билан силтамоқда; Дёмка Ушаков

худди гуноҳ қилиб қўйган ўқувчикдек омбор деворига тақалиб турганча ёмғир ювиб кетган лой сувоқни тирноғи билан чўқилар ва юзларидан думалаб тушаётган ёшларини артмас эди. Дўстларидан жудо бўлганларига ҳар қайсилари ўзларича қайғирмоқда, аммо ҳамманинг бошига келиб тушган эркакларга хос мусибат барчалари учун бир эди...

Давидов кечаси ўлди. Улар олдидан у ҳушига келди. Бошида ўтирган Шчукаръ бобога қараб қўйиб, нафаси тиқилганча шундай деди:

— Нега йиғлаляпсан, чол? — Шу пайт оғзидан қонли кўпик отилиб чиқди, бир неча марта титроқ билан ютунгачгина, оқариб кетган юзини ёстиққа қўйиб, сўзини аранг тугата олди: — Қўй йиғлама... — ҳатто жилмаймоқчи ҳам бўлди.

Кейин эса машаққат билан қоматини ростлади-да, чўзиқ инграб тиниб қолди.

...Мана, Дон булбуллари қалбимга ардоқли Давидов билан Нагульнинг сайдабори бўлишиди, пишиб келаётган буғдой уларга шивирлаб бўлди, Гремячий буеракнинг юқорисидаги аллақаёқлардан оқиб келаётган номсиз анҳор тошлар оша шилдираб бўлди... Вассалом!

Орадан икки ой ўтди. Гремячий Лог тепасидан ҳамон боягидек оқ булатлар, энди эса кузга хос қуюқ булатлар жазирама ёз давомида бўзариб қолган осмондан ҳамон боягисидек сузиг ўтмоқда, Гремячий анҳори устидаги теракларнинг япроқлари аллақачон қирмизи зарҳал билан уртилган, сой суви шаффоғ ва салқинроқ бўлиб қолган, хоторнинг мактаб яқинидаги майдонга дағн этилган Давидов билан Нагульнинг қабрларида хасис куз қуёши парваришлаган ирвоқ, оч яшил гиёҳлар пайдо бўлди. Ҳатто қандайdir бир дашт гули ҳам панжара ғоннинг пинжига тиқилиб бемаҳал бўлса ҳамки, ўзининг ғариб ҳаётини барқарор этишга уринмоқда. Аммо август ёмғирларидан сўнг қабрлар яқинида ўсиб чиққан уч туп кунгабоқар эса, салкам бўй баробар кўтарилиб қолган, майдонда

ер багирлаб шабада эсганда енгилгина чайқалиб турар эди.

Икки ой мобайнода Гремячий анҳоридан кўпгина сувлар оқиб ўтди. Хуторда кўпгина нарсалар ўзгарди. Ўз дўстларини дафн этгач, Шчукарь бобо ҳам анчагина мазаси қочиб, таниб бўлмайдиган даражада ўзгариб қолди: у одамларга аралашмайдиган, камгап, илгаригисидан кўра яна ҳам йиғлоқироқ бўлиб қолди... Дафн маросимидан сўнг уйида тўрт кеча-кундуз ўрнидан турмасдан ётди, ўрнидан турганда — кампири унинг оғзи қийшайиброқ қолганини, бутун чап юзи бир томонга қараб тортилиб қолганини кўраркан, астойдил қўрқиб кетди.

— Сенга нима қилди ўзи?! — ўтакаси ёрилганча хитоб қилди кампири, чапак отиб.

Шчукарь бобо оғзининг чап томонидан оқаётган сўлакни кафти билан арта туриб, дудуқланиброқ, аммо хотиржам жавоб берди:

— Унча айтадиган ҳеч нарса бўлгани йўқ. Қандай навқиронлар кетишди, мен бўлсан аллақачонлар бориб ётишим керак эди. Масала равшанми?

Аста-секин столга қараб кетаётганида эса чап оёғини сургаб босаётгани маълум бўлди. Тамаки ўратётганида чап қўлини аранг кўтарди...

— Мени фалаж чалганга ўхшайди, қуриб кетсин, кампир! Илгаридан бошқачароқ бўлиб қолгандайман,— деди Шчукарь қовушмаётган қўлини таажжуб билан кўздан кечириб.

Бир ҳафтадан сўнг у анчагина тетиқлашиб қолди, қадам босиши ҳам дадиллашди, чап қўлини ҳам машиқатсиз ишга соладиган бўлди, аммо кучерлик вазифасидан мутлақо воз кечди. Колхоз правлениесига бориб янги раис — Кондрат Майданниковга худди шундай деди:

— Мен ҳайдаб бўлдим, ўргилай, Кондратушка, энди айғирларни эплашга қурбим келмас.

— Размётнов икковимиз сенинг тўғрингда ўйлаॅ, қўйганмиз, бобо,— жавоб берди Майданников.— Сельпога кечасилик қоровул бўлиб кирсанг қалай бўларкан? Қишига сенга иссиқ будка қуриб берамиз, унга чўян печка ўрнатамиз, чорпоя ясад берамиз, ўзи-

нгга бўлса қиши куни қалта пўстин, узун пўстин, пийма тўғрилаб берамиш. Чакки бўлмайди-ку? Ойлик ҳам олиб турасан, ишинг ҳам енгил бўлади, энг муҳими— бекор юрмай, иш билан банд бўласан. Хўш, қалай, розимисан?

— Худо ёрлақасин, бу иш менга жуда боп. Чолни эсдан чиқармаётганликларинг учун раҳмат. Мен бари бир кечалари билан ухламай чиқаман, ҳозир бўлсанку, мутлақо. Йигитларни қўмсаяпман, Кондратушка, уйқум ҳам мутлақо қочиб кетди... Хўп, мен бориб, айғирларим билан хайрлашиб, уйимга жўнай. Уларни кимга топширияпсизлар?

— Кекса Бесхлебновга.

— У бақувват чол, мен бўлсан шартим кетиб, партим қолди. Макарушка билан Давидов мени мункиллатиб, умримни қисқартириб кетишиди... Улар бўлса, эҳтимол, мен бир-икки йил ошиқроқ умр кўрармидим, улар бўлмаганликлари учун ёруғ дунёда қаққайиб юришга тоқатим ҳам бўлмайроқ қолди...— деб қўйди маъюсгина Шчукарь бобо, кўзларини фуражкасининг тепаси билан артиб.

Шу кечадан бошлаб у қоровулчилик қила бошлиди.

Давидов билан Нагульнининг пастаккина панжара билан иҳота қилинган қабрлари яқин орада, сельпо дўкончасининг қаршисида эди. Шчукарь бобо эртасигаёқ болта билан арра кўтариб келиб, қабр панжараси олдига кичкина скамейкача ўрнатди. Кечалари билан ўша ерда ўтириб чиқадиган бўлди.

— Борган сари жигарбандларимнинг пинжалрига кирияпман... Мен ҳамроҳ бўлсан улар ҳам хурсанд бўлиб ётишади, уларнинг яқинида мен ҳам кечаларни хушнуд ўтказаман. Умрим бино бўлиб фарзанд кўрмадим, Андрюшенька, ҳозир бўлса — бирданига худди иккита азиз фарзандимдан ажраб қолгандекман... Лаънати юрагим эртаю кеч ачишгани-ачишган. Менга ҳеч бир тинчлик бермай қўйди!— деди у Размётновга.

Партичайканинг янги секретари Размётнов эса хавотирларини Майданниковга айтарди:

— Пайқаяпсанми, Кондрат, бу вақт ичида Шчукарь бобомиз жуда қариб қолди-я? Йигитларни қўм-

сайвериб, жуда ўзини олдириб қўйди. Чолнинг умри оз қолганга ўхшайди. Калласи лиқилладиган бўлиб, қўллари ҳам кўкариброқ қолибди. У бизни мусибатга қўйиб кетмаса дейман! Тентак чолга ўрганишиб қолган эдик, ўлиб кетса қишлоқ ҳувиллаб қолади-я.

Кунлар қисқариб, осмон тиниқлашмоқда эди. Энди шабада қабрларга ёвшанинг талх исини эмас, хутор ташқарисида жойлашган хирмонлардан янги-гина янчилган буғдой похолларининг ҳидини олиб келмоқда эди.

Фалла янчиш давом эгаётганда Шчукарь бобонинг кайфи чоғроқ бўларди: хирмонларда анча маҳалгача веялкалар гулдирав, шиббаланган ер бўйлаб дукурлаганча тош ғалтаклар айланар, одамларнинг чуҳ-чуҳлаган овозлари ва отларнинг пишқириши эшитилиб туради. Кейин буларнинг ҳаммаси тиниб қолди. Тунлар узайиб ва қоронfilaшиб, кечалари бошқача овозлар янграйдиган бўлди: қоп-қоронғи са-мода турналарнинг фарёди, қора ғозларнинг маъюс чақириқлари, ғозларнинг вазмин фақиллаши ва ўрдак қанотларининг ғизиллаши эшилладиган бўлди.

— Қушлар иссиқ юртларга қараб равона бўлиши,— ёлғизликда хўрсинарди Шчукарь бобо, қушларнинг осмон-фалакдан етиб келаётган ғала-ғовур ни-доларини эшитаркан.

Бир кун кечқурун, қоронғи тушганда Шчукарьнинг олдига қора рўмолни чирмаб ўраган бир аёл аста-секин келиб индамай тўхтади.

— Худо кимни етказди?— сўради чол, келган аёлга синчиклаб тикилиб.

— Менман, бобожон, Варяман...

Шчукарь бобо имкони борича чаққонлик билан скамейкадан турди:

— Келдингми-я, ахир, қўзичноғим? Мен, сен бизни унутиб юбёрди... деб ўйлабман... Эҳ, Варюха-куюнчак, у сен билан икковимизни етим қилиб кетди! Кирақол, жоним, эшикчадан, мана унинг қабри, четдагиси... Сен унинг ёнида туратур, мен бориб дўкондан хабар олиб, қулфларни кўздан кечириб келай... Бу ерда менинг ишларим кўп, пойлоқчилик қиляпман,

қариган чоғимда ишим етиб ортадиган бўлиб қолди...
Шундай бўлди, меҳрибоним.

Чол лўкиллаганча майдон томон қараб кетди ва бир соатдан кейингина қайтиб келди. Варя Давидов қабрининг бўш томонида тиз чўкиб турарди, Шчукарь бобонинг одоб билан огоҳлантириб йўталганини эшигач эса, ўрнидан туриб эшикчадан чиқиб келдида, каловлаб кетиб, чўчиғанча қўллари билан панжарага суяниб қолди. Индамай турди. Чол ҳам индамасди. Кейин қиз оҳистагина деди:

— Раҳмат, сенга, бобожон. Ёлғиз ўзимнинг у билан бирга қолишимга имкон берганинг учун...

— Ҳожати йўқ. Энди нима қилмоқчисан, ўргилай?

— Бутунлай келдим. Бугун эрталаб келдим, бу ерга одамлар кўрмасин деб қоронги тушганда келдим.

— Ўқишинг нима бўлди?

— Ташладим. Уйимиздагиларнинг менсиз куни ўтмайди.

— Сёмамиз норози бўлади, мен шундай деб ўйлайман.

— Нима қилишим мумкин, ўргилай бобожон?— Варянинг овози қалтираб кетди.

— Сенга маслаҳат беролмайман, ўргилай қизим, ўзинг бил. Аммо сен уни ранжитма, у сени яхши кўрарди-я, факт!

Варя тез бурилди-да, ўпкаси тўлиб ўкраб йиғланча майдондан чопиб кетди, у ҳатто чол билан хайрлашишга ожиз эди.

Зим-зиё қоронги осмонда эса тонггача аллақаёқ-ларгadir чорловчи турна галаларининг нолали нидодари янграб турди, буқчайиб қолган Шчукарь бобо ҳам тонггача мижжа қоқмай, скамейкада ўтирганча хўрсиниб, чўқиниб йиғлаб чиқди...

Донда тайёрланган контрреволюцион фитна ва исённинг чигали кун сайин аста-секин ечила бошлиди. Давидов ўлимининг учинчи куни Ростовдан Гремячий Логга келган ОГПУ ўлка бошқафмасининг

ходимлари Размётнов ўлдирган, Островновнинг қўрасида ётган одамнинг аллақачонлардан бери қидирилаётган жиноятчи, ихтиёрий армиянинг собиқ подпоручиги Лятьевский эканниги танидилар.

Уч ҳафтачадан кейин Тошкент яқинидаги совхозда яқинда ишга кирган Калашников деган фамилияли ўрта ёшлардаги ҳисобчининг олдига фуқаро кийими-даги соддагина бир одам келиб, столга энгашди-да, паст овоз билан шундай деди:

— Сиз иссиққина ўрнашиб олибсиз, жаноб Половцев... Жим! Бир дақиқа ташқарига чиқайлик, олдимга тушинг!

Остонада уларни чакка соchlари оқарган, фуқаро кийими-даги яна бир киши кутиб туарди. У ўз кичик ўртоғига ўҳшаб у қадар камоли сертакаллуф ва босиқ эмас эди,— Половцевни кўриши билан олдинга бир қадам ташлаб, кўзи пир-пир учганча нафратдан оқариб кетиб, гапирди:

— Газанда! Узоқ жойга ўрмалаб келибсан... Бизнинг кўзимиздан бу ерда, бу кавакда яшириниб қолмоқчимидинг? Ҳа, шошмай тур, мен ҳали сен билан Ростовда гаплашаман! Ўлиминг олдидан ҳали сени бир ўйноқлатмасам...

— Вой, ваҳмасини-е! Вой, бир қўрқиб кетдим-эй! Аъзойи баданим қалтираб кетяпти, ўтакам ёрилганидан қалт-қалт титраяпман!— деб қўйди истеҳзо билан Половцев, остонада тўхтаб паст нав папиро-сидан чекаркан. Ўзи эса кулиб турувчи нафратли кўзлари билан ер остидан чекистга қаарди.

Унинг ёнини шу ернинг ўзида, остонадаёқ тинтишли, у итоат билан у ёқ-бу ёққа айланаркан, шундай дерди:

— Менга қаранглар, беҳуда овора бўлманглар! Ёнимда қурол йўқ: уни бу ерда нега ҳам олиб юардим? Маузеримни квартирамда яшириб қўйганман. Юринглар!

Квартирага кетаётганларида у чакка соchlари оқарган чекистга мурожаат қилиб, мулоҳаза билан осо-йишта гапирди:

— Сен мени нима билан қўрқитмоқчисан, гўл одам? Қийноқлар биланми? Овора бўласан, мен ҳам-

ма нарсага тайёрман, ҳаммасига чидаш бераман, мени қийнашнинг ҳам ҳожати йўқ, чунки, яширмасдан, заррача ҳам муғамбирлик ишлатмасдан ҳамма гапни, билган нарсаларимнинг ҳаммасини айтиб бераман. Офицерга хос чин сўзим. Сен мени икки марта ўлдиролмайсан, ўлимга бўлса мен аллақачонларданоқ тайёрман. Биз ютқаздик, ҳаёт мен учун маъноси ни йўқотди. Мен буни олифтагарчилик қилиб айтиётганим йўқ, мен савлат тўқадиган такаббур одам эмасман, бу ҳаммамиз учун аччиқ ҳақиқат. Ҳаммадан аввал номус бурчи: ютқаздингми — тўла! Мен ютқизиқ эвазига ҳаётимни эҳсон қилишга тайёрман. Худо ҳақи, қўрқмайман!

— Масхараబозликини йиғиштириб, унингни ўчир, қасос бўлса қочмайди,— маслаҳат берди унга, Половцевнинг баландпарвоз нутқини эшитаётган одам.

Унинг квартираси тингилганда маузердан бошқа далил бўладиган ҳеч нарса чиқмади. Унинг фанера чамадонида биронта ҳам ҳужжат йўқ эди. Аммо столида Ленин асарларининг ҳамма ўтгиз беш томи тартиб билан тахлаб қўйилган эди.

— Бу сизникими?— сўрашди Половцевдан.

— Ҳа.

— Сиз бу китобларни нима учун сақлаётган эдингиз?

Половцев сурбетлик билан заҳарханда қилди:

— Душманни уриш учун — унинг қуролини билиш керак...

У сўзининг устидан чиқди: Ростовда сўроқ вақтларида полковник Седой-Никольскийни, ротмистр Казанцевни, Гремячий Лог билан атрофидаги хуторлардан унинг ташкилотига кирганларнинг ҳаммасини ёддан бирма-бир айтиб берди. Никольский эса, қолганларни айтиб берди.

Азов-Қора денгиз ўлкаси бўйлаб қўплар қамоқ-қа олинди. Фитнанинг оддий иштирокчиларидан олти юз нафардан ортиқ казак, шу жумладан Островнов билан ўғли ҳам алоҳида кенгаш томонидан турли муддатлардаги қамоққа ҳукм қилинди. Улардан терористик ҳаракатларни амалга оширишда бевосита иштирок этганларгина отилди. Половцев, Николь-

кий, Қазанцев, Сталинград областидаги подполковник Савватеев билан унинг икки ёрдамчиси, улардан ташқари, Москвада бошқа фамилия билан яшаётган тўққизта оқғвардиячи офицер ва генерал отишга ҳукм этилди. Москва ва Москва атрофидаги шаҳарчаларда қамоққа олинган тўққиз кишининг орасида Деникин армияси доираларида машхур бўлган бир казак генерал-лейтенанти ҳам бор эди. У фитнага бевосита раҳбарлик қилиб, чет эллардаги муҳожир ҳарбий ташкилотлар билан мунтазам алоқани амалга ошириб келган. Раҳбар марказдан фақат тўрт кишигина эпчилик билан Москвада қўлга тушиб қолмай, турли йўллар билан чет элга ўтиб кетишга муваффақ бўлган.

Контрреволюциянинг мамлакатимиз жанубида Совет ҳокимиятига қарши исён кўтариш учун жон аччиғида қилган, тарих илгариданоқ барбод бўлишга маҳкум этган бу хатти-ҳаракати шундай тугади.

Варя Харламова хоторга келгач, бир неча кундан сўнг Андрей Размётнов Шахтига қилган сафаридан қайтиб келди. Майданниковнинг илтимоси билан у ерга колхоз учун локомобиль сотиб олгани борган эди. Кечқурун алламаҳалда уч киши: Майданников, Размётнов ва Гремячий. Логда ташкил этилган комсомол ячейкасининг секретари Иван Найденов колхоз правлениесида ўтирадилар. Размётнов сафари, локомобилни сотиб олгани ҳақида муфассал гапириб бергач, сўради:

— Варька Харламова хоторга қайтиб келганмиш, ўқишини ташлаганмиш, аллақачон Дубцовнинг ҳам олдига бориб, ўзини бригадага қабул қилишини сўраганмиш, шу тўғрими?

Майданников хўрсиниб қўйди:

— Тўғри, онаси, укалари бир нима билан кун кеширишлари керак-ку ахир? Шунинг учун техникумни ташлаб келган. Бўлмаса ўзи уқувли қизалоқ.

Размётнов, ағидан Варя важини ҳар томонлама ўйлаб қўйди шекилли, энди фикрига қўшилишларига тўла амин бўлган ҳолда гапира бошлади:

— У марҳум Семёnnинг қайлиғи. Ўқиши керак. Семёnnинг хоҳиши шу эди. Худди шундай қилиш керак. Уни эртагаёт бу ерга чақириб, гаплашиб, техникиумга қайтариб юборайлик, оиласини бўлса колхознинг қарамоғига олайлик. Қимматли ўртоғимиз Давидов ёнимизда эмас экан, унинг оиласини боқишини ўз зиммамизга олайлик. Эътиrozлар йўқми?

Майданников индамай бош силкиди, жўшқин Иван Найденов эса Размётновнинг қўлини сиқиб хитоб қилди:

— Сен зўр одамсан, Андрей амаки!

Шунда Размётнов бирдан эслаб қолди:

— Ҳа, йигитлар, сизларга айтаман деб эсимдан чиқибди... Биласизларми, Шахтида, кўчада кимни кўриб қолдим? Кимни кўрибди, деб ўйлайсизлар? Лушка Нагульновани кўрдим! Қарасам гупсонгидек бир хотин келяпти, ёнида семизгина калбашара эркак... Унга қаравшим билан, ҳанг-манг бўлиб қолдим: ўшами, ўша эмасми? Башараси кепчиқдай, кўзлари қисилицаб кетган, худди уч қучоқ келади. Қилиқларини кўрсам — ўзи! Олдига бориб саломлашиб: «Лушания, ўзингмисан?!» дедим. У менга жавобан: «Гражданин, мен сизни танимайман» деди. Мен кулиб, унга: «Ҳамқишлоқларингни дарров унугтибсан-да! Ахир сен Лушка Нагульновасан-ку?» дедим. У шаҳарчасига олифиялик билан лабларини қисиб-қимтиб: «Бир вақтлар Нагульнова бўлган бўлсам, бир вақтлар Лушка бўлган бўлсам, ҳозир Лукерья Никитична Свиридоваман. Бу киши менинг эrim, кон инженери Свиридов, танишинглар» дейди. Хўш, мен инженер билан қўл олишдим, у бўлса менга олайиб қарайпти: яъни, нега менинг хотиним билан бунаقا тап тортмасдан гаплашяпсан, дегандек. Ўгирилиб жўнаб қолишиди, икковлари ҳам биққидек, чамаси, ўzlаридан мамнунга ўхшайди, мен бўлсам ичимда: «Ҳа, хотинларга даво йўқ экан! Икки кишини, Тимошка билан Макарни кўмид бўлар-бўлмас, аллақачон учинчисига тегиб олибди!» деб ўйладим. Гап тегиб олганида эмас, қачон шунча эт қўйиб семириб олди экан?! Ўша кўчада турганимда мен шу нарсани ўйладим. Нима учундир кўнглимни қайfu босди, илгариги ёш, шўх,

чиройли Лушкага ачиниб кетдим! Назаримда илгари-
ги Лушка билан хуторда ёнма-ён яшаган эмас, уни
аллақачонлардир бир вақт худди тушимда кўргандек
бўлдим...— Разметнов хўрсиниб қўйди:— Ана, бу
турмушгинамиз ана шунақа кўйларга гушар экан,
йигитлар! Баъзан шундай кўйларга гушиб кетадики,
хаёлингга ҳам келмаган бўлади! Қани, кетдикми?

Улар оstonага чиқишиди. Доннинг нарёғидаги
йироқларда момақалдироқдан дарак берувчи вазмин
булутлар қалашиб келмоқда, осмонни қиялаб, чақ-
моқлар кесиб ўтмоқда, эшитилар-эшитилмас гулдирак
янграмоқда.

— Тавба, бу йил шу вақтгача ҳам момақалдироқ
бўляпти-я,— деди Майданников.— Томоша қилсакми-
кан?

— Сизлар томоша қила қолинглар, мен кетдим.—
Размётнов ўртоқлари билан хайрлашиб, абжирлик
билан зинапоядан югуриб тушди.

У хутор ташқарисига чиқиб, бир оз турди-да,
кейин ошиқмасдан қабристонга қараб йўл олди,
фира-шира кўриниб турган бутлар, қабрлар, нураган
ғишт деворни йироқдан четлааб ўғди. У ўзига керакли
жойга келди. Фуражкасини олиб, ўнг қўли билан
оқарган сочини силади-да, ўприлган қабрнинг чети-
га қараб, оҳистагина гапирди:

— Сенинг охирги маконингни яхшилаб, эҳтиёт би-
лан сақломаяпман, Евдокия...— Энганиб қуруқ ке-
сакни олди-да, уни кафтида уқалаб, энди бу гунлай
бўғиқ овсз билан деди:— Мен сени шу кунгача сева-
ман, унутилмас, умрбод яккаю ягона ёrim... Кўрят-
санми, ҳеч вактим бўлмаяпти... Камдан-кам кўриша-
миз... Агар имконинг бўлса, ҳамма гуноҳларим учун
мени кечир... Сен марҳуманинг кўнглингни оғритган
ҳамма гуноҳларим учун...

У гўё қулок солиб жавоб кутаётгандек узоқ вақт
бош яланг чолларга ўхшаб букчайганча, қимирламай
турди. Юзига илиқ шабада келиб урилар, илиқ ём-
ғир томчилар эди... Доннинг нарёғида оқиш шуъла-
лар чақнар, Размётновнинг ғамгин, шиддатли кўзла-
ри энди пастга эмас, ўзига қадрдон, ўприлиб кетган
қабрнинг четига эмас, бир йўла осмоннинг ярми-

сини қирмизи аланга билан ёритган уфқнинг кўз ил-
ғамас ҳудуди томон тикилар, у ёқда эса уйқуга кета-
ётган табиятни ҳаётга даъват этиб, ҳудди жазирма
ёздагидек улугвор ва шўх, бу йилда энг охирги мо-
мақалдироқ янграмоқда эди.

На узбекском языке

МИХАИЛ АЛЕКСАНДРОВИЧ ШОЛОХОВ

Собрание сочинений, том 7.

Перевод с издания
Гослитиздата, 1960 года

Редактор *М. Мирзоидов*

Рассом *А. Ошайко*

Расмлар редактори *Г. Бедарев*

Техн. редактор *Л. Парнихўжаев*

Корректор *Ш. Зуҳриддинов*

Босмахонага берилди 18/III-65. Босишга рухсат этилди 15/V-65 й. Формати
84×108¹/32. Босма л. 14,125. Шартли босма л. 23,17. Нашр. л. 22,0. Тиражи
15000. Индекс 6/а. «Тошкент» оаддий адабиёт нашриёти. Тошкент, Навони
кӯчаси, 30. Шартнома № 133 — 64.

Ўзбекистон ССР Министрлар Совети Матбуот Давлат комитетининг Их-
тисослаштирилган ҳарф терув фабрикасида терилиб, матрицадан Офсет
босма фабрикасида босилди. Тошкент, Полиграф кӯчаси, 86. Заказ 1629
Баҳоси 86 т.